

UTL AT DOWNSVIEW




D RANGE BAY SHLF POS ITEM C
39 10 15 04 04 003 2

BP
75
S8
v.1

Su'ād, Yūsuf, Düzceli
Mirāt el-ḡu'ūn

PLEASE DO NOT REMOVE
CARDS OR SLIPS FROM THIS POCKET

UNIVERSITY OF TORONTO LIBRARY



Digitized by the Internet Archive
in 2010 with funding from
University of Toronto

مِرَاتُ السُّعُوتِ

Su'ād, Yūsuf, Düzceli


جلد اول

Mirāt el-šū'un

مؤلفی :

مکتوبی مشیخت علیا قلمی خلفاسندن

یوسف سعاد



معارف نظارت جلیله سنک فی ۲۴ تموز سنه ۳۱۵

تاریخی و ۳۲۱ نومرولی رخصتی حازدر

مختوم و کتابخانه ساخته در

عمر مطبعه سی باب عالی جاده سنده نومرو ۴

۱۳۱۷


① 418-4
6/8



BP
75
S8
v.1



1085734





وجوديله عسرك افتخار ايتديكى مدققين فضلاى
عثمانيه نك سر آمدانندن بولى متصرف در ايتندى سعا -
دتلو مصطفى ذهنى پاشا - حضرتلرينك تقريض بليغ
استادانه لريدر :

*

* *

- « سير جليله نبويه » -

تاريخ ، او فن عاليه دركه - نظر اسلامده دخی -
علوم دينيه دن صوكره سرنامه علوم وفنون عداولتمغه
سزادر .

بوکا مبنيدرکه ملل متمدنه نك فن تاريخه ويردكلى
اهميتى هيچ برفنه ، هيچ بر علمه لايق وروا كور مامشله .
عربلرکه دنيوى ، اخروى كافه علوم وفنونده اقوام
موجوده اسلاميه نك ومدنيت حاضره نك معلم عاليه

و موجد و بانی حقیقی سیدر فن تاریخده علوم و فنون
سائرہ کی اہمیت و یرمشر و ظہور اسلام ایلہ برابر
انوار ساطعہ اسلامیه نك آفاق عالمہ انتشاری کی بوفن
جلیلی ده نشر ایتشردر .

اوروپا ملل متمدنہ سی نزدندہ ہنوز کلیاً مجهول
اولدیغی وقتدن وادوار سنین وایامك اون اوچ عصر
قدر بر زمان طویل وبعیدی دور ایلہ نوع بشرہ علوم
و فنونی و مدنیاتی اوکرتزدن اول فن تاریخ ، عربلر
طرفندن او قدر متین ، او قدر رصین بر اساس اوزرینہ
ابتنا ابدلشدر کہ تاریخك بعض اقسامندہ کی تقییدات
و مضبوطانہ نظراً او اقسامده بوکون دخی او رصانت ،
او متانت بولنہ مز .

فن تاریخك اك مهم واك مفید قسمی ایسه تاریخك
طانیدیغی بر شخصك ، یابروقه نك تاریخ خصوصیسیدر .
تاریخ خصوصیلر ، تراجم احوالر ، خصوصیتلری
اعتباریلہ تاریخ عمومیدن زیادہ تفصیلاتی متضمن اولہ .
جغندن انلردن استفادہ نك او نسبتده تزايد و تکمیلی
طبیعی .

تاریخك طانیدیغی بر شخصی طانیق ، نظر تاریخده
معروف بیکرلہ سنه لك بر ذات ایلہ کوروشك ایستر .

میسکر؟ او ذاتک ترجئه حالی ، تاریخ خصوصیتی
 او قویکز! تواریخ عمومیه نقدر مفصل اولور ایسه
 اولسون اندن اشخاصه ویا بر وقعه خصوصیه دائر
 تکمل معلوماته مدار اوله جق ایضاحاته دسترس اوله مامق
 ضروریدر .

حد ذاتنده اهمیت عالیه سی میدانده اولان تراجم
 احوال ، وتواریخ خصوصیه وقایع ، موضوعلری
 اعتباریه یعنی احواله کسب وقوف ایدلک ارزو
 اولنان ذاتک ویا وقعه نك بیوکلکی ، اهمیتی نسبتنده
 برقاندها تعالی ایده جکی امر جلیدر .

احوال امی تعمیقاً تدقیق ایدنلرجه مسلدرکه علم
 هیئت ، علوم ریاضیه ، جغرافیا ، کیمیا ، فلسفه ، فنون
 طبیعیه و طبیه ، حکمت طبیعیه و معارف سائرده مدنیت
 حاضره نك استاد ذی اقتدار یبولنان عربلر ، فن تاریخه
 تراجم احواله هرفندن زیاده و علوم دینه قدر اعتنا
 وهمتی دریغ ایتماشلردر .

عربلرک فن تاریخ و تراجمه ویردکاری بو اهمیتی
 صرف ایتدکاری اعتنا وهمتی سببسز موجبسز اولمیوب
 ضایت مقدس بر احتیاجدن تولد ایتمش و او احتیاج
 ایسه افق حجازدن نوع بشر ایچون صباح الخیر انفلاق

اولمق اوزره ظهور ایدن نور دیانت اسلامیه نك مطلع
عالی و اقدس اولان فخر رسالت ، خاتمه سلسله نبوت
علیه الصلوٰة والسلام افندیز حضرتلرینک هر قول و فعل
جلیل نبوتینا هیلرینی قید و تحریر احتیاج دین پرور یسندن
نشأت ایله مشدر .

از جمله اجله اصحاب کرامدن « عبدالله بن عمرو
بن العاص » رضی الله تعالی عنه حضرتلری ، قم
درر بار رسالتینا هیدن صدور ایدن احادیث شریفه یی
یاز مقدمه اولدیغی حالدیه قید و تحریر احادیث ماده سنک
مقرون صواب اولدیغنده بر وقت متردد قالمسیله
شرفنامه نبوت افندیز حضرتلرندن استیذان کیفیت
ایتمشر و مأذونیت جلیله نبویه یه مظهرده اولمشلردی .

اصحاب کرام ذوی الاحترام رضوان الله تعالی
علیهم اجمعین حضراتی دخی اقوال و افعال مقدسه
رسالتینا هی یی حرفیاً و تماماً ضبط و حفظه فوق العاده
اعتنا و اخلاقلری بولنان تابعین کرامه بت و انبا پور -
دقلری جهتله سیر و احادیث عالیة نبویه دایر برنجی ،
ایکنجی ، اوچنجی عصر هجرتده یوزلرله تألیفلر ، یوزلرله
کتابلر وجوده کلشدر .

حتی عرب ارباب علوم و فنونی طرفندن تاریخده

و تراجم حاله اعتنا او انسى اشته او احتياج دينيدن
متولد والحق كتب سير و حديثك جمع و تأليفنده كى مضبو .
طيت هر درلو امكانك عادتاً فوقه و اصل اولمش بر
مرتبه ده اولديغى و ارسته اشارت دركه بو حقيقت ، كتب
موجوده عربيه ايله ده ثابت و مؤيد بولنيور .

يكه تاز ميدان نبوت و رسالت مفخر عالم صلى الله
عليه وسلم افنديز حضرتلرينك سير جليله نبوتينا .
هيلرينك علويت و قدسيق ايسه ذات همايون رسالتينا .
هيلرينك علويت و قدسيق ايله متناسباً على و مقدس
اولديغنده شبهه يوقدر .

اعاظم اسلام دخى بو علويت و قدسيت اعتباريله
سير جليله و احاديث عاليه نبوتينا هيلرينى قيد و تحرير
ابتمش اولدقلى حالده بو موضوع عاليده لسان عثمانيده
كتب عربيه كى تفصيلات و ايضاحاتى شامل آثار نافعه
هنوز ساحه آراى حصول اوله مامشى .

ايسته شمدى افاضل علمائى جرا كسه دن و محررين
عثمانيه دن دوزجه لى فضيلتلى يوسف سعاد افنديك
« مرآة الشؤون » ناميله ترتيب و تأليف ايتديكى وسيد .
الكونين افنديز حضرتلرينك شؤونات حياتيه احديه .
لرينه حصر و تخصيص ايله ديكى كتابك قسم مستحضرندن


مستبان اولديغنه كوره بو اثر مهم ، سير جليله نبويه نك
تفصيلات وايضا حات لازمه سنى تماماً محتويدر .

اثر مجبوسده كتب عربيده اولديغى كى نسب
همايون رسالتيناهى يه و مشرق انوار اسلاميت اولان
عربستانك احوال تاريخيه وجغرافيه سنه ، فخر عالم
افنديمى حضرتلرينه ورود منشور رسالتدن اولكى
احوال و حرركات و معاملات جليله لرينه ، صور تبليغ
رسالتلرينه ، غزوات عاليه سنه ، والحاصل بالجملة شؤن
احواله دائر مطولات كتب عربيده دن اقتباس اولنان
معلومات صححه و مكمله يى حاويدر .

كتابك پك چوق يرنده محاكات تاريخيه و تنقيدات
مقتضيه مدققانه و فاضلانه بر صورتده يوريدلمش و
معجزات جليله نبويه حقنده دخى تدقيقات لازمه
اجرا قيلمش اولديغندن اترك بالوجوه شايد استفادة
اولديغى بديهدر .

اترك موضوعنده كى علويت و قدسيته فاضل مومى -
اليك تدقيقات عميقه سى انضمام ايتسيله بويله بر اثرى
ساحه وجوده كتورن سعاد افندى حضرتلرى
بالخاصه تبريك و تقديره لايقدر .

مصطفى ذهني



سرآمدان ادبای عسکریه دن و «مرآت مکتب حریده»
ایله «مرآت مهندسخانه» بری همایون» نام ایکی اثر جسیم
عسکرینک مؤلف فاضلی شاعر شهر شیرین مقال عزتلو
اسعد بک افندیکنک تقریض ادیبانه لیدر :

*
* *

تاریخ خصوصینک اقسامندن [تراجم احوال] دیه
کوستریلان قسم ، قارئک نظاردقنی موضوع بحث اولان
شیء و یا شخصک اوزرنده دائماً معطوف بولندیرر بر
مرآت، و تعبیر اصحله بر محزن شؤونات اولدیغندن انواع
تواریخ آره سنده اهمیتی بؤکدر :

اسلاف صرہ سنه کچمش بر ذاتک تاریخ حیاته
سوالف اعصاره عائد بر وقعه نک دقایق لدنیاته واقف
اولق ایچون اوزات و یا اووقعه حقنده یازلش بر تاریخ
خصوصییه مراجعت ایدملیدر .

تاریخ عمومیده ایسه اوراسی یا هیچ یازلماش
یا خود یازلش ده خصوصیت درجه سنده اهمیته یوریدلماش
بولنور .

حالبوکه بر ذاتک، یابر دولت و ملتک ترجمه احوال
و تاریخ خصوصیی، عمومی اولان تواریخدن زیاده

مفردات وقوعاتی تعقیب ایدر. وزمین متین مندرجات
واحاطاتی بالنسبه دها وسعتلی بولندیرر .

ایشته عصرعالی حضرت عبدالحمید خانینک افاضل
علمای جرا کسه سندن ادیب بدیع الرقم دوزجه لی فضیلتلو
یوسف سعادت بک افندینک «مرآة الشئون» نام کتابی که اوچ
جلددن مرکب اولوب هر اوچ جلدده یالکز سید کائنات
علیه افضل الصلوة واکمل التحیات افندیمر حضرتلرینک
الشمس اوچ سنده دن عبارت اولان مدت عمر همایونلرنده
شؤونات حیاتیة جناب اجدیه لرینی مکملاً و مفصلاً بیان
ایدیور شمعی یه دکین او موضوعده بوقدر مفصل و محاکمة
تاریخیه نقطه نظر نجه بوقدر مکمل ترکیه بر اثر بهترین
یازلماش دینلسه حقنده طوغری سوز سولنلمش اولوق
مزینتی حائر بر تاریخ خصوصی مکملدر .

سلطان هر دو عالم صلی الله تعالی علیه وسلم افندیمر
حضرتلرینک کرک نسب پاک همایونلرینی ، کرک سیرت
علیه اجدیه وشؤونات سنیة محمدیة رسالتپناهیلرینی
اکلامق ویا اکلامق ایچون یالکز : [آل هاشمدن عبدالله
بن عبدالمطلب اوغلیدر] دینلمک کافی برسوز اولدیغنی
یلنلریمزک کافه سی ده بویله نوزمین بر کتاب مستطابه احتیاج
حس ایدرلردی . زیرا نسب همایون رسالتپناهیده بوقدر

معلوماتی مسلمان امیلری دکل بلکه خرسیان عامیلری
دخی حائر لر .

« مرآة الشئون » ایسه عمومه ، ایشته اونقطه دن
معلومات مکمله و یرمک ایچون - یالکز مدت رسالت
سنیه ، و ایام دعوت نبویه حقنده کی بیاناتیه اکتفا یتیمه رک
حتی بتون ایام حیاتی و منسوب اولدیغی اقلیمک دخی
وضعیات جغرافیه سنی و اهالیسنک بعض عادات ملیه
واجرات مدینه سنی بیان ایتک اوزره فصل اولی تشکیل
ایدن قسمده - مقدمات تاریخیه لوحده سی آلتنده اوله رق
عربستانک احوال ارضیه سنی ، سکنه اصلیه سنی ، احوال
اداره و تبدلات سیاسیه سنی ، معاملات مذهبییه و آداب
و شرایع دینه سنی کوسترمش واشبو معلوماتی اک معتبر
مدونات تاریخیه دن اخذ و اقتباس ده ایله مشدر .

علی الخصوص عاربه و مستعربه طبقه سنه منسوب
اولان اسکی عربلرک احوال دینه سندن ینه او فصلده
بحث ایدرکن استطراداً « خنظله بن صفوان ، ذوالقرنین ،
فترت و خالد بن سنان العبسی ، قس بن ساعده » کبی انبیا
و اخبار حقنده کی تدقیقات و محاکماتنه نظر دقتله باقلیر ایسه
کتابک بیوک بر اثر تدقیق اولدیغی همان اکلاشیلیویرر .
محاکمه و موازنه بی یالکز بو یرلره حصر و تخصیص

ایتماش بلکه کتابک هر صحیفه سنده اودرلو محاکات
تاریخیه بی کلیلہ اجرا ایدوب یوروتمشدیر .

از چله شق قر، عروج پیغمبر مقاله لرندہ - افکار
جدیدہ حکیمہ اصحابی بولن ان فیرستان زمان طرفندن
محتمل رد واستبعاده محل براقیه جق صورتده - بعض
افکار بیان ایدہ رک انبیا و اولیایہ منسوب اومللو غرائب
حالات و خوارق عاداتک امکان عقلی خارچندہ اولیوب
بلکہ ممتنعات عادیدن اولدیغی حقندہ کی مباحثاتک
نتیجہ سنده علمای اسلامک اثبات مدعا ایلہ دکارینی یازمش
و محاکمتندہ آثار تاریخیه نک عقله ملایم کلیان بعض نقاط
تاریخیه سنی دخی پک سربست بر صورتده مؤاخذہ و آندن
صوکرہ تصحیح ایلہ مشدرکہ کتابک اساساً مکملیتی ده
ایشته بودرلو محاکات و موازات بیطرفانه نک انتاج
واظهار ایلہ دیکی حقایق تاریخیه دن ایلری کلیور .

هر درلو خصایص و مزایای مابہ الامتیازی کندیسندن
نزع و تجرید ایدلمش فرض و تقدیر ایدلدیکی حالده ده
صفوت و مکملیت مرآته بر برهان دها قالیورکہ اوده،
آنک آثار حاضرہ یه لاحقہ نوین اولسیدر .

بناءً علیہ بویله بر اثر مکملک مؤلف فاضلی و دها
طوغریسی سیرنویسانک شمذیلک خیر الخلف روشندلی

سعاد افندی حضرتلرینک اشبو اثر یکانه لرینی یک مشکور
بولقده و خدمت فاضلانه لرندن طولایی کنیدیلرینی هر
وجهله شایسته تحسین وتبریک کور مکده یز .

جناب خلاق لوح وقلم ، دها بویله نیجه مطولات
تألیفنه موفق بالخیر ایدهرک کنیدیلرینی مستحق شکران
اهل عالم بیورسون آمین !

دوزجه بیکباشیسی

محمد اسعد

افادات تشکریه

هر کس کندی نفسنده تجربه ایتشدر که روحه عائد
اوله حق عوارض خارجیه قارشی انسانک حاصل
ایده جکی مأیوسیت اثناسنده جدی بر التفات تسلیمت آمیزک
- انبساط و انشراح ایله برابر - اکتساب شوق و نشاط
حقنده کی تأثیر شدیدی قابل انکار دکلدر .

اگر اودرلو تأثیردخی اولمسیدی جو هواده طیران،
قعر در یاده جولان قوه تدبیره و تصرفیه سی موجود اولماز
و هر درلو مآثر بشریه ده مشهود و متلو اولان: « حکمت
حیات، سعی و عملدر » عبارء معنویه سی، استحصال و ادراک
دقایق حقایق مدنیه ایچون انسانی شهراه تمدنه طوغری
عزم و حرکتیه سوق و ارشاد ایتزدی .

او حالده ده مصنوعات بشریه نك بوکونکی مکملیتی
دخی بولنماق لازم کلیر ایدی .

اولیه ایکن بونلرک هپ فاعل و مبدع ظاهریلری
مطلقا - برچوق تسلسلاتدن صوکره نتیجه سی ینه -
اجرو التفاته عائد امید استقبالک تأثیر مشوقانه سنه قارشی
سعی و اقدامه اولو جهله محکوم اولمش و نتیجه اقداماتی ده
الده ایده بیلشدردر .

ایشته از جمله محروم فقیر! . . کالای حیاتلری
 تحولات دهریه تأثیریلہ بر طاقم تلونات اعتسافیه واختلا-
 فیهیه او غرامق شانندن اولان بعض شعرا کبی برارالق
 التزاماً او غرادلدیغم رقابت اغیار عارضه بی امیدندن
 طولایی هرشیدن محروم اوله قالمشدم .
 حتی او حالت یأسمده :

ویردی کلزار دلم غنجه آثارینه فر
 عندلیب قلم نغمه اسرارینه فر

کبی فخریه لرم دخی دیلندن دوشمشلردی !

محتاج نیم نکاه التفات بر حالده ایدم . فقط کیسه
 ابدال اثر التفات ایتز، ایدنلرک التفاتی ده - تغیر مشرب
 ومسلک حسبله - اعاده سرور واقامه شوق وحبور
 کفایت ایتک کبی درجه سندن دون قالیر ایدی !
 لکن شمس حقیقت ، ابر رقابت ایلہ مستور قالیر می
 ایدی ؟ احوال ابدیاً دوام ایتماشدر ! احوال ، مغموم بر
 هواده سحاب کشیف مظلم ضیای شمسی موقه ستر ایتسنه
 بکزه مشدر ! .

الله تعالی ، ملک وملته دانشور لریمزی اکسک
 ایتسون ! دانشوران ملت ، افتادکان امت ایچون برر
 دستگیر سلامندر .

ایشته اودانشوران زمانک سرفراز لریدن و فضلائی
رجال دولتن بولی متصرف حصاقتشعار عالیسی سعادتلو
« مصطفی زهنی » پاشا حضرتلرینک [معلم ! ...] خطاب
مستطابیله باشلایان التفاتلرینه قارشی قلمک وقوعبولان
انبساط و انشراحنی کندم :

قد انشرح الصدر باکسیر لطفکم ،

ایا معدن اللطف ! ایا مصطفی پاشا !

جعلتنی مسعوداً و کنت مؤیداً

فأیدک المولى بالطافه العلیا

نشیده سیله افاده ایتک ایستد کدن و الیمده بعده قلمی آلوب
کوزل برطاووراند قدن صوکره حزین حزین قیلدانییر ایکن
اولاً اوفاق « سروناز » ی میدانه قویمش و آنی متعاقب
.. هر درلو اسبابنک نقصان و فقدانی کوردیکمله برابر
ینه .. جرأت و جسارت ایله دیکمک اثری ، ثبات و غیرتمک
مکفاتی اولمق اوزره (مرآة الشئون) می ده یازمق ایچون
بازوی همتی تشبیر ایتیش اولدم . که بونلر هپ پاشانک
التفات مشوقانه لرینه مقابل نقسمده بولدینم هوس و شوق
سایه سنده اولمش شیلردر !

*

حالبوکه اخیراً حاصل اولان آلایش خاطر ، هر

در لو هوسمی بوزم رق خدمت تحریریه جه وجودیله
مباهی و مفتخر اولدیم انتظام دوام و جریانہ عارضه قنور
کتر دیکندن اشبو خدمتی :

نقصانکی بیل بر ایشه یا باشلامه اول
یا باشلادیغ کاری پذیرای ختام ایت

کبی مأل کرامت اشمالی قیامتله دکن قیمت
و اعتباردن دوشمک شائبه سندن مصون بر نصیح حکیمان
نه نک علیهنده بولنور جه سنه ترک ایله دوامی ارمه سنده
متردد اولدم . یعنی او خدمتی اتمام ایچون ینه بر مشوقه
لزوم کور و نمشدی . حقیقتده هر خدمت ذاتاً بر
تشویقک ، هر مأثرده بر مشوق اثری دکلیدر ؟

الله عز وجل حضرتلرینه حد و ثنار اولسون که -
بکا او خدمتی اتمام ایتدیرمک ایچون - مشوق احسان
پیوردی ! ..

ارتق بوندن صوکره کندمده کی عارضه عطالت
کوزل بر التفات مشوقانه نک تأثیر یله همان بسبتون محو
اولوب کیتشد :

بتون علما و فضلا ی اسلامیہ نک پیشوای علی الاهتمامی
دولتو سماحتلو « محمد جمال الدین » افندی حضرتلری
کبی - اجراءت جلیله بوالسعودانه لر نجھ مشهود اولان

درايتلريله مشهور - بر شيخ الاسلامك التفات عالي درجات
مشيختپناهيلرينه قارشى بنم كبي هانكي بر مؤلف ، هانكي
بر محرر كمترده اثر عطالت قالير ؟

حتى او وقتدنبري كوزيمك او كندن بر لحظه بيله غائب
اولميان خيال بديع التمثال ذى كالنه :

ايا ناظوره ديوان جهان افضال !
ويا مستجمع او صاف و مزايى جال !
سزكه حكمتده سبقداشكر ابن سينا
علم و عرفانده غزالى كرامات مقال
امر معروف و زارنده نظيرك آصف
امر مشروع مشيخته دخی ابن كال

كبي دها اوزون بر چوق شيلره خطاب و او خطاب
ستايشكاراندى :

رب قربه و او صله الى ما يطلبه
من منى ما يتناه و زده مانال
دعاى منتدارانه سيله اتمامه همان هر زمان شتاب

بدرم .

*
* *

ايشته كرك التفات عالى مشيختپناهى به ، كرك

باشقه هر درلو تلطیفاته انجق او حضرت ظل ظلیل
 پروردگار ، او وکیل جلیل رسول کردگار ، او شهنشاه
 حیدری شعار ، او حامی دین مبین احمدی ، او حارس
 شرع شریف محمدی ، او متبوع مشروع تقوا کزین ،
 جناب امیر المؤمنین شوکتلو ، قدرتلو ، مهابتلو « السلطان
 بن السلطان السلطان الغازی »

﴿ عبد الحمید خان ثانی ﴾

بو المغازی اسبغ الله تعالى ظلال شوکتیه علی مفا-
 رق العالمین ! وادام کمال دولته ورأفته الی یوم الدین !
 افندیمز حضرت تلرینک سایه مرا حیرمایه جهانداریلرنده
 نائل ومظهر اولمش واو سایه عالی پادشاهیده اشبو
 کتابمی ده تألیفه موفقیته حاصل ایش اولدم .
 بناء علیه اولیه بر نعمت عثمانی تحدیث ضمننده
 هر زمان مداومت ومواظبتیه متلذذ بولندیغ دعای
 بیر یای شا کرانه می بوراده ده بر لسان ستایشله تکرار
 ایدرم :

ای شاه سریر عز وشوکت !
 وی پادشه حیدر خصلت !
 سن فخر ملوک پادشاهین
 بالجمله رعیتیه پنهسین

فخر ايله مدد سنكاه اسلاف
 فخر ايله به جك بلاشك اخلاف
 فكر ايله مك ايستد بجه والله
 علويت شانك اي شهنشاه
 بر حال كليز كه حيرت مدن
 خاك رهك اوپمك ايسترم بن
 زيرا زمن عدالت كده
 غرق اولدى عموم عنايت كده
 هر يرده مآثر همايون ،
 ايتمكده عيوني فرله مشحون
 سن شاهك عطاسى وصف و تبیان
 فكرنده طورور زبان سحبان
 حاتملى اليك قند لطفك
 رستملى اسير قيد عنفك
 دربار مكارم كده بكار
 احسان و عطايى بر مكيلر
 عدل كده عدليك كزده فاروق
 فكر كده مثيل كزده فاروق
 مسرور عنايت كده عالم
 معمور عدالت كده عالم

یوق سن کی حاصلی کرمور
تاریخ بوکا کوواہ بر تر !

*

* *

ای سر حقیقت خلافت !
وی روح وجود پاک دولت !
اول دمدہ کہ تخت زیب اجلال
اولدکدی، دکشدی بزده احوال
سن شاهر، علادہ پشرو
بز اولدق او مسلککده پیرو
تکثیر مکاتب و مطابع
افکاری دمکده اولدی ساطع
هیچ وارمی ایدی یلن عجب نه ؟
کویلرده ادیب نه ؟ ادب نه ؟
باق حالبوکه شمدی اهل عالم
حالنجه برر علیم واعلم
هر قریه برر مدینه العلم
هر فرد برر خزینة العلم
فکرمنجه دیرم که هپ ادیبز
یاخود که او رتبه یه قریبز

*

* *

لطفكاه زمینی ایتدك احیا
 قهرکاه عدویی ایتدك احیا
 عز مکاه سکندر جهانسک
 رزمکاه شهنشه زمانسک
 سایه کده اولندی پادشاها !
 ناموس جلیل ملت اعلا
 رشک ایتده شانلی حاله ، ماضی
 رشک ایتده شانلی حاله ، آتی
 بیکر یشا ای کریم واشفق
 حقندنده اودر نیازم انحق
 مطلوب ملل دوام عمرک
 تختکده شرفصدور امرک
 ماضیز ایچونده بارک الله
 آتیز ایچونده صانک الله
 یارب بحق سر لولاک
 لولاک لما خلقت الافلاک
 سلطان حمید نیکسازی
 کیم شاه جلیل بو المغازی
 رونقده تخت عز وشوکت
 ایت تا بقیام حشر وساعت !

فصل اول

مقدمات تاريخيه

— ۱ —

عربستان

احوال ارضيه عربستان؛ سکنه عربستان؛ احوال سياسيه سي
احوال مذهبيه سي

۱

احوال ارضيه عربستان

ميلادك يدنجي عصر لرينه دكين تاريخجه نامي وهر
دراو احوال جغرافيه سي پك معلوم اولميان جزيره العرب،
اوتاريخده بردنبره قبله كاه عالم اولوب ميدانه چيقيمشدر .
جزيره العرب، آسيا قطعه سنك جهت جنوبيه سنده
واقع بر شبه جزيره اولوب شمالاً آسيا قطعه سندن ارض.
فلسطينك بر جزئي و بر الشام و جزيره ماوراء النهرين ايله
مفروق، غرباً بجر سويس [شاب دكزي]، باب المندب
بوغازي، شرقاً خليج عجم [بصره كورفي] ايله

بحر محیط هندیك بر جزئی و عراق عرب ، جنوباً
 بحر محیط هندی ایلہ محاط و محدوددر . کہ شمالدن
 جنوبہ قدر « ایکینیک بشیوز » ، غربدن شرقہ قدر
 « ایکینیک » کیلومتر امتدادی او لب مساحت سطحیہ سی دم
 « بر میلیون یوز یک » میل مربعیدر .

ایشته وضعیت جغرافیہ سنی و صورتلہ بیان
 ایتک ایستدیکم جزیرۃ العرب قطعہ غایبہ سی « یمن » ،
 حجاز ، تہامہ ، یمامہ ، حضر موت ، نجد ، حیرہ
 دوائر وسیعہ سی و ملحقاتنک مجموعیدر .

جزیرۃ العربک اکثر اقسامنک منطقہ حارہ تحتندہ
 بولنسی سبیلہ عربستاندہ حرارت هوا هر زمان شدت
 اوزرہ بولنور .

بناءً علیہ اراضیسنک قسم اکثری قومسال یرلر -
 دن عبارتدر فقط یمن و سواحلنک بعض اقسامی منبت
 وقابل زراعت اولدیغی کبی « نجد ، یمامہ ، یثرب » ک
 همان عمومی دنیلہ جک قدر اکثر اراضیسی یک لطیفدر .
 طاتلی صولر ، کوزل نخلستانلرلہ مزیندر .

مع مافیہ « حجاز ، احقاف حضر موت » کبی اک
 زیادہ طاشلق و قوملق اولان یرلردہ بیلہ بشیلکلی

آطه جقلرك ، ايجيلير صوبي حاوی يرلرك بولنديغي
واردر .

*

**

۶

سكنه عربستان

عربستان سکنه اصلیه سی ، اولاد سامدن محدود
اولان عربلدر .

روایته کوره سام اولادنن « قحطان بن عابر
[هود علیه السلام] بن صالح » نام کسنه نك رئیس
بولنديغي طائفه طرفندن ، جزیره العربی ابتدا مسکن
اتخاذ ایدن [باند] عربلری تحت اطاعته انهرق انلرله
وقوعبولان اختلاطدن طبقه ثانیه اولان [عرب عاربه]
قومی ظهور ایتشد .

بر مدت صوکره یمنده مبعوث اولنديغي عمالقه
اقوامندن آیریلهرق کلان اسماعیل علیه السلام ،
عربستانه [مکة مکرمه] عودتده لسان عبرانی اوزر .
تکلم ایدرکن کرک کنديسنک ، کرک اولاد واحفادینک
مکة مکرمه دهکی عاربه ایله اولان اختلاطلرندن [عرب
مستعربه] ظهوره کلشدر . که باعث وعلت تکیون

کائنات علیه افضل الصلوة واکمل التحیات افندیمن
حضرتلرینک منسوب اولدقلری قریشیلر دخی بو عرب
مستعربه طاقندن معدوددر .

مؤخرأً اعلاى کلمة الله ایچون مستعربه عربلرینک
جزیره العربدن چیقوب طیشاریله فوج فوج یایلدقلری .
زمان افرادیلله اختلاط ایتمش اولدقلری طوائف اجنبیه ایله
ارالزندن ده [عرب مستعجمه] حاصل اولمشدر .

*

**

کرك قرون اولیده ، كرك قرون وسطی اولان
ظهور اسلام زمانلرنده عربستان چوللارنده كزن اقوام
بدویه ، بو کونکی کونده جزیره العرب و شام چوللارنده
بدویتله یاشایان اخلافندن پكده فرقلى یوغیدی :
قبيله شىخلىرىنك ریاست ادارهسى التنده ایدیله . که
حوالى مذکورده بو عادت ، الآن موجود و باقیدر .
ثروت و سامانلری آت ، قویون ، پکی ، دوه کبی
بعض مواشى و حیوانلارندن عبارت ایدی . حتی تشدیردکلى
عرب آتلىرىنك شهرت شایعهسى مسلم جهانلاردر .
صنعت و صورت معیشتلى ايسه تاجرلک ،
چوبانلق جابو جلیق ایدی .

*

**

عربستان سکنه سنده کی استعداد و قابلیت وزکا ،
هیچ بر یرك سکنه سنده یوقدر . کسب معارفه اولان
میللری ده او نسبتده !

ذکاوت و فراستلری او درجده عالیدر که قوم
اوزرنده غلبه لیکه کیده رك ایز براقش اولان برطاقك
ایز لرینه باقدقلری حالده هانکی ایز صاحبك کنج ،
هانکیسنگ اختیار ، هانکیسنگ ارکک ، هانکیسنگ
قادرین اولدیغی اکالارلر و یولده یان یانه کیدن ایکی
رفیق عرب ، الارنده تخته ، طاش اولدیغی حالده شطرنج
اویناه بیلیرلردی .

عربده کی ذکاوتك درجه سی ، ذاتاً ظهور اسلام
دور منور نرنده معارفه محیر العقول اولان ترقیاتندن ده
اکلاشیله بیلیر .

نه فائده که وطن و مسکنلرینک احوال طبیعیه سی ،
قوة مفکره لرینی حسن استعماله مساعدده و معاونت ایده .
جک بر حالده دکلدی !

*

**

عربلرک اک فاخر مزیتلرندن بری ده سخاوتدر .
قریب و غریبه اکرام و ضیافتلری هیچ بر قومه قیاس
قبول ایتک درجه سندن عالیدر .

حتى اولقدرده عاليدير كه وقتنده بين العرب بر
معرض بلاغت بولمش اولان « سوق عكاظ » ده جمعيت
دوام ايدر كن اشراف واغنيای عرب اوراده عمومه
خطاباً :

— « قارنى آچ اولان اطعام ، قورقوسى اولان
تأمين ، بريره كیده جك اولوب دهينه جك حيوانى اولميان
راحله يه تحمیل اولنقى اوزره فلان فلان ذاتلره مراجعت
ايتسون ! »

ديه ندالر ايتدير لر دى !

كهانته كي اقتدار لر دى ده فوق العاده دينيله جك بر
مرتبه ده كورينور .

*

**

۳

— جزيرة العربك احوال سياسيه سى —

جزيرة العرب ، قطعات سائرء عالم كى تبدلات عظيمه
ومتدايه كور ملك حادثات وعارضات دهر يه سندن هر زمان
مصون اوله كمشدر .

عربستانده — هجرتدن « ۹۵ » سنه مقدم ينه

طوغری تجاوز برله حکومت تبايعه قحطانيه ي ضبط
وقبل الهجره « ۴۵ » تاريخه دكين انده حکومت ايتش
اولان حبشه وبرده عجم حکومت ساسانيه سي مستثنا
طوتلديغي حالد - عربلردن باشقه هيچ بر قوم تأسيس
حکومت واجراي سلطنت ايتش دکلدرد . [۱]

انجق طوائف ملوک عرب ، وطنلری اولان
جزیره العربده مناوبه حکم ونفوذ صاحبي اولدقلری
کبي اطراف جزیره ممالکنده تجاوز ايله فتح ايله دکاری
بلادده اجراي حکومت ايتدکاری واقع اولدی .

[۱] چونکه ساسانيان دولت ايرانيه سي ، بقیه
ملوک تبايعه حیریه نك تاريخ اضمحلالی بولنان قبل الهجره
« ۳۸ » ده يمني کندی ممالکنه الحاق ايتديکندن « هرز
ديلی ، وليحان ، حزدان ، نوشجان ، مرزان ، باذان »
نام التي عجم حکمداری ده اوراده اجراي حکومت
ايتش وباذان نام حکمدار اخير ايسه يدنجی سنه
هجريه سنده قبول دين مبین اسلام ايتمکه حضرت
يعمبر افنديمز انك عهد سنده يمن ولايتی واليکني ابقا
يورمشدر . « انتهى »

حتی هجرتدن « ۲۸۳۶ » سنه اولی عمالقه عربلری
 مصرک فراغه نبطیه سی اوزرینه یوریوب اون النجی
 سلاله حکمداریسندن « تیماوس » ه غلبه ایتکله مصر وسطی
 ومصر سفلی بی استیلا ایتدکاردن فضله « ۵۱۴ »
 سنه مقداری بر زمان ده ید تحکملرنده اداره ایده
 طور دیلر .

* *

کذلک بابل حکومتی [قبل الهجرة « ۲۱۸۱ » ده]
 ضبط ایدن عربلردن اوراده طقوز حکمدار ، « ۲۴۵ »
 سنه مدت سلطنت ایتشد .

* *

جزیره العربیه ابتدا کسب اشهار ایدن حکومت ،
 عن ایله حضر موت قطعه لری اره سنده « احقاف »
 دینیلان یرده حکومت تشکیل ایدن [عاد بن عوص بن
 ارم بن سام] ک حکومتیدر که تواریخده اسملری چوقجه سبق
 ایدن [شدید ، شداد] بونک اوغلریدر .

عاده ایکنجی اوغلی « شداد » ، جزیره العربی زیر
 دست تحکمنه الدقن صوکره افریقاه کچوب اوراده مصر
 قطعه سنی ده استیلا ایتشدی .

قوم عاد ، بالاخره « لقمان » ، « خلجان » نام
ایکی شعبه یه انشعاب وانقسام ایدرک « لقمان » ،
کرسئ سلطنته یکدکدن صوکره [هود علیه السلام] ،
هر ایکی شعبه خلقتی دین حقه دعوته مأمور ومبعوث
بیورلشدر .

فقط « احقاف » صحرا سنده متوطن « خلجان »
واتباعنک نبی مشارالیه قارشی عصیان ومخالفت
کوسترمسی اوزرینه - بر دعجوز ایام سابعه سنده بر
چهارشنبه صباحی - من طرف القهار کندیلرینه کوندر -
یلهرک ایرته می چهارشنبه افشامنه دکین یدی کیجه سکز
کون دوام ایدن باد قهر وبلا ، انلری عموماً قهر وتدمیر
ایله مشدر . قبل الهجرة [۳۱۷۲] .

« لقمان » ایسه قوم واتباعیله برابر اولدیغی
حالده نبی مشارالیه ایمان واطاعت ایدرک سلامتی
بولمش و او سایه ده بر چوق سنه اجرای سلطنت
ایده یلشدر .

*

**

کذلک اولاد سامدن معدود [قحطان بن عابر
« هود علیه السلام » بن شالخ] قبل الهجرة « ۳۰۶۵ »

ده تأسيس ايله ديكي « حكومت قحطانيه » ، « ۲۹۷۰ » سنه جزيرة العربك هر طرفنه نفوذيني اجرا ايدوب طور مشدر .

« قحطان » ، وطناً شجره [يعنى حضر موت قطعسى] منسوب ايدى . هود عليه السلام ، شجر ، عمان حواليسنده كي قوم عادى دين حقه دعوت مأمور اولديغندن كنديسنه ايمان ايتيانلرك هلاكلرندن صوكره اتباعى اولان مؤمنين ايله برابر اولديغى حالده شجرده بر مدت اقامت ايتديلر .

فقط ارتحال وانتقاللرندن صوكره اوغلى - و ابراهيم عليه السلامك جد على اجدى - « فالغ » ، اولاد ومتعلقايله برابر جزيرة ماوراءالنهرين طرفلرينه كيمش وديكر اوغلى قحطانده اتباعى الوب يمنه عزيمتله اوراده وتاريخ مذكوره مستقلاً بر حكومت تأسيس ايله مشدر .

اشبو حكومت قحطانيهده اجراى سلطنت ايتش اولان ملوك ، [قحطانيه ، حيريه ، تبابعه] ناميله اوچ

صنفدر :

قحطاندن « سباء » نام پادشاهه قدر اولان ملوكه :

« قحطانیہ » ، سببان صوکرہ کی « حیر » دن
 « حارث الرأش بن لقمان » دکن کلمش اولان ملوکہ دہ
 « حیریہ » ، حارث دن صوکرہ کی پادشاہلر دہ « تابعہ »
 دینیلیر .

« تابعہ » کلمہ سی ، « تبع » ک جمعیدر . ملوک
 تابعہ دہ هر بر خلف ، سلفنک صورت اداره سیاسیه -
 سنہ تمامیلہ اتباع ایدہ کلدیکی ایچون او یولده مسمی
 اولشلردر .

مشهور [بلقیس] ، بو ملوک تابعہ حیریہ دن
 معدود اولدیغی کبی ینہ اولردن « شمر عرش »
 نامندہ بر بهادر ملکہ ده پک چوق یرلری فتح ایدوب
 شرق طرفلرینه طوغری آچدیغی سفرلرنده کی صیت
 مظفریتنی عراقه دکن واورادن ده چینہ قدر واردیره -
 رق فارس ، سجستان ، خراسان بلده لرینی فتح برله
 صغد [سمرقند] شهرینه یورومش وانی هم فتح ، هم ده
 تحریب ابتدکی حالده مؤخرأ معموریتنی ینہ اعاده و توسیع
 ایتشدیر .

بناءً علیه فرسلرجه « شمر کند » نامنی المش اولان
 صغد شهری ، براز صوکرہ تحریفأ « سمرقند » دیه
 شهرت الدی .

کندلک « شجر » ده قبل الهجرة تقریباً ۳۰۱۷ تاریخند
تأسس ایدن حکومت ، عصر لرله دوام ایتش و برچوق
ده پادشاه حکمدارلق ایتشدر :

استطراد

فاضل شهر دیار بکرلی مرحوم سعید پاشا - اسکنه
الله بحبوحه جنته المأوی - نک « مرآة العبر » تاریخ
عمومی معتبرلرنده ایکنجی جلدک ۲۵۸ نومرولی صحیفه -
سنده قحطانک اوغلی « عامر » ک « جبال شجر » ده
وقوع تسلطنی اولمق اوزره یازدیغی :

— « یعرب بن قحطان زمانده عرب باندنک خالی
قالان مسکنلری دولت قحطانیه طرفندن استیلا اولندیغی
صرده یعرب ، برادرلر « حضر موت » ی جبال شجره
والی تعیین ایتدیکی یمن مجتهد کوسترلشدی . »

عبارتسندکی معنای تاریخینک « ۳۱۰۷ » اولدیغی
علینده ینه او صحیفه نک کنارنده « ملاحظه » سرلوحه سی
التنه یازلمش غیر مطبوع بر حاشیه کورددم .

فقط محشی کیم ایسه حاشیه سنی اولدقجه مدقانه بر
صورته یوروتمک ایسته مش و تدقیق تأثیرله بنمده نظر

دقت فقیرانه می اورایه جلب ایتش اولغله ملاحظه مذ کو -
ره بی عیناً نقل ایدیورم :

ملاحظه

« بو ، عامربن قحطانك باباسی ، یمنده تأسیس »
« وتشکیل ایله دیکی حکومت قحطانیه نك تاریخ تأسیسی »
« قبل الهجرة » ۳۰۶۵ « اولدیغنه وقحطانك وفاتندن »
« صوكره اوغلی وبونك برادری « یعرب » ك كرسی »
« سلطنت قحطانیه یه یكوب بوده او صروده داعیه »
« تسلطن ایله جبال شحری ضبط ایله مش بولندیغنه »
« كوره شوراده تاریخ تسلطن عامر اولق اوزره - »
« عبارة مذ كوره دن منفهم اوله رق - كوستریلان »
« قبل الهجرة [۳۱۰۷] تاریخى سهو ویا خطادن سالم »
« اولمایه جقدر . »

« زیرا عامرك جبال شحرده کی حكومتی ، پدری »
« قحطانك یمنده کی زمان حكومتندن بالطبع مؤخر ، »
« یعربك زمان سلطنتنه معاصر اولسی لازم . اوده »
« حكومت قحطانیه نك بدایت تأسی تاریخنه نسبة زمان »
« هجرت ده قریب ! »

« بناءً عليه قحطان على وجه التخمين مثلاً قرق »
 « بش سنه حكومت ايتمش ، اونك حكومتندن صوكره »
 « سلطنت يعربه انتقال ايله مش ، يعربك تسلطن ايدوب »
 « عامر بوش قالدیغی زمان جبال شحرولایقی کندیسنه »
 « برادری طرفندن توجیه اولمش اوده اوراده »
 « اعلان استقلال ايتمش فرض وتقدير ایدلیدیکی حالد »
 « عامرك تاريخ تسلطنی وسائر برادرلرینك ابتدای حكو - »
 « متلری تاریخی » ۳۱۰۷ « ده دكل بلكه تقریباً » ۳۰۲۰ «
 « اولمق لازم كلیر ! »

عقلاً وعادةً مستبعددرکه عامر ، باباسی قحطانك
 حكومتندن اول تا « ۳۱۰۷ » ده حكومت ايتمش
 دكل .

بو استبعاد کوره محشینك شایان قبول اولان ملاحظه -
 سنه بناءً دیرمکه :

او تاریخ ، نه مرآة العبرده کی کی « ۳۱۰۷ » ،
 نه ده محشینك دیدیکی کی « ۳۰۲۰ » دكل بلكه انجق :
 « ۳۰۱۷ » در . فقط قلم ویا مرتب سهوی اوله رق
 « ۳۱۰۷ » یاییلشد .

زیرا قحطانك - ملاحظه مذکورده - تخمیناً

قرق بش سنه دينلش اولان مدت سلطنتی بزده قرق
سکز ديه فرض ايله ديگمز حالده ملاحظه صحت نظريه
باقعه مجبور اوليورز .

ذاتاً قحطانك مدت سلطنتی قرق سکز سنه ديه
قبول ايتكدن بزى منع ايله بيله جك صحيح هيچ بر قيد
تاريخی ده يوقدر .

ايسته بونكچوندر كه بن ايله قبول ايتدم . ايله ده
يازيورم . انتهى

قحطانك اوغلی « يعرب » ك يمنده وقوعبولان
تسلطنی وعرب بائدهك خالی قالان مسكنلرينك دولت
قحطانيه طرفندن استيلا اولنديغی ائنده يعرب . برادری
« عامر » ی جبال شخره والی تعیین ايتمشدی .

عامر ، ايتديكي حرب وقتالده شدت فوق العاده
كوستر مکی عادت ايتديكندن « نرده بولنور ايسه اوراده
موت حاضر ! » معناسنه اولان « حضر موت » جله سی ايله
ياد ايدلش و او جله ، مؤخرأ كنديسنك قلمرو حكومتنه يعنی
حكمدار بولنديغی قطعه يه علم خاص ويرلمشدر .

*

**

« حجاز » ده ده قحطان اولادندن « جرهم بن قحطان »

قبل الهجرة « ٣٠١٧ » ده نبی جرهم حکومتی تأسیس
ایده رک کرک کنیدیسی ، کرک اولاد واحفادن « عبد
بالیل ، جرشم ، عبدالمدان ، ثقیله ، عبدالمسیح ،
مضاض ، عمرو ، حارث ، عمرو بن حارث ، بشر ،
مضاض بن عمرو » نام ملوک بر چوق عصر لر اجرای
سلطنت ایتشلردر .

*

**

« عمان » ده دخی قحطان اولاددن « عمان بن قحطان »
قبل الهجرة « ٣٠١٧ » ده بر حکومت مستقله تأسیس
ایتمش و اولاد واحفادی او حکومتده بر خیلی زمان اجرای
حکومت و سلطنت ایتشلردر .

*

**

عرب باده طبقه سندن و یمامه نک سکنه اصلیه سندن
« طسم بن لاوز ، جدیس بن ارم » قبیله لرندن « طسم » ک
قرنداشی یا خود سلاله سندن [عمیق] نامنده بری ،
هر ایکی قبیله نک کندی زمانه دکن تکثر ایتمش اولان
افراد کثیره سنه تغلباً حاکم اوله رق یمامه ده « عمالقه
حکومتی » نامیه تأسیس ایله دیکی حکومت ، سنه لرله
حوام و امتداد ایتشدر .

علیق ، غایت خبیث و طبعاً ردی بر شخص ایدی .
حتی حقیقده روایت ایدیله یورکه :

عزاده لری اولان جدیس قبیله سی افرادندن « قابس »
نامنده بری ، زوجه سی « هذیله » بی تطلیق و چوجغنی ده
الندن اخذ ایله دیکندن طولای منفعله اولان هذیله .
حکمدار بولنان عملیقه مراجعت ایده رک :

— « چوجغنی طقوز آی جل و بر آنده وضع
وایکی مه لرمه ارضاع ایتدم . شمدی یه دکین فائده سی
کورماشکن هنوز اکیال فصال ایله دیکی بر زمانده
زوجم قابس ، اونی المدن جبراً الوب بی حزن و حیرتمه
براغیور ! »

دیه رفع و بث شکوی ایتدیکندن صوریلان
قابس ده :

— « ای ملک ! شو زوجه مک مهرینی ویرمش
و چوجقدن باشقه فائده سی کورماشم . ناصل حکم
ایدرسه ک ایت ! »

جوانی ویرمکه علیق ، چوجغنی هر اکیسینک ده .
الندن الهرق کندی غلامی اره سنه قید و ادخال ایله دکدن
صوکره :

— « كرك زوج ، كرك زوجه نك هر ايكىسى ده
صانلسون ! ثمن زوجه نك خسى قابسه ، ثمن زوجك
عشرى ده هذيله ويرلسون ! » ديه حكم ايتشدر .
هذيله ، بو حكم غريبدن غايت متعجبه و متأثره اوله رق
تأثرندن :

اينا انا طسم ليحكم بيننا
فانفذ حكماً في هذيلة ظالماً
ندمت ولا اندم انى بعثرتى
واصبح بعلى فى الحكومة نادماً

قطعه هجويه سنى انشاد ايدنجه عمليق ، غضب
ايدوب [جدیس قبیله سى قیزلرندن تزویج اولنه حق
اولانلرك بکرلرینی اولایا ازاله ایتدیجه زوجك تقرب
ایده مامسی] حقنده بر قانون مخصوص وضع و اعلان
ایتدی .

« یثرب » ، « عبیل بن مهلایل بن جاشم بن
عملیق » ك اوغلیدر . ایشته بو [یثرب] نام کسه كرك
کندینه ، كرك ریاست اداره سى التنده بولنان اقوامنه وطن
ومسکن اتخاذايله دیكى موقع ، مؤخرأ « یثرب » [مدینه
منوره] ديه تسمیه ایدلمشدر .

حضرت موسی علیه السلام افندی مزك بنی اسرائیل
ایله برابر « تیه » صحراسنه کلدکری تاریخه دکین یثرب
حوالیسی ، اشبو عمیق زاده لری اولان عبالقه اقوامی
النده ایدی .

بنی مشارالیه ، یثرب حوالیسنی اسرائیلیون عسکریه
حرباً استیلا ایله دکن و کنیدیلری ده ارتحال دارنعیم
بیوردقلرندن صوکره بنی اسرائیل اقوامندن بر فرقه ،
یثرب و خیر طرفلرنده توطن اییدی . که تاریخ توطنی
قبل الهجره « ۶۳۰ » !

یثرب و خیر حوالیسند کی کافه قلاع و بقاع قبل الهجره
« ۶۰۰ » تاریخلرینه دکین بنی اسرائیلک شو فرقه سی
النده بولندی .

حتی هجرت جلیله نبویه دن صوکره علیهلرنده
اعلان حرب و قیام ایدیلوب باب حرب و قتال اچیلان
بنی نضیر ، بنی قریظه ، بنی قینقاع کبی برچوق قبائل یهود ،
اشته او فرقه بنی اسرائیلیه دندر .

*

**

بونلردن باشقه بلاد عراقدن « انبار » شهرینی
دارالملک اتخاذایدن « مالک بن فهم بن کهلان بن سباء » ده

[مناذره] دولتی « حیره » [۱] ده قبل الهجره
« ۶۱۰ » ده تأسیس وتشکیل ایتدی .

اشبو دولت مناذره ، بعد الهجره « ۱۲ » تاریخلرینه
دکین دوام وامتداد ایتشد .

کندیسنه « يوم نعيم » ایله « يوم بؤس » اتخاذ
ایدن اخلاقسز « نعمان بن منذر بن ماء السماء » ملوک
مناذره نك بریدر . تاریخ تسلطی هجرتدن « ۳۰ »
سنه مقدم .

جناب صدیق رضی الله تعالی عنه حضرتلرینک
زمان خلافت علیه لرنده حوالی عراقیه اعزام بیور .
دقلری « خالد بن ولید » رضی الله تعالی عنه حضرتلری ،
حیره بی ضبط ایتسکله آل منذر حکومتی نهایت بولشدر .
بعد الهجره « ۱۲ » !

*

**

[۱] مشاهیر ملوک تبابعة قحطانیه دن « ابو کرب »
کنیه سله مکنی [اسمعید بن کلکیکرب] نام حکمدار ، فرس
دولتی علیهنده اجدینی سفرده منتظم بر اردو ایله یمندن چیقوب
ایران طوغری حرکت ایدرکن حیره محله کلدیکی زمان عسکرینه
غریب بر حیرت کلدیکنندن طولایی او محل ، اشته او وقت
دنبری حیره دیه مسعی قالمشدر !

« غسانه » حکومتی دخی « جفته بن عمرو بن ثعلبه بن عمرو مزینیا » نام کسیه طرفندن قبل الهجرة تقریباً « ۵۸۰ » ده شامده تأسیس ایدیلرله قیاصره رومک تحت نظارت و حایتلرند. اولدیغی حالده « ۶۰۰ » سنه امتداد ایتشدیر .

طرابلس شام ایله لازقیه ارمه سنده الیوم موجود « جبله » قصبه سنک مؤسس و بانیسی اولان [جبله بن ایهم] ، بوملوك غسانه نك آخردیر .

حضرت عمر الفاروق رضی الله تعالی عنه حضرت تار - ینک زمان خلافتلرنده دین اسلامی قبول شریفله تشرف ایدرک معیتده اکیوز الی نفر اتباع بولندیغی حالده لاجل الزیاره مدینه منوره یه کلمش وبعده برای حجده مکة مکرمه یه کیتشدیر .

مدینه منوره ده خلیفه حضرتلری جبله یه حرمت و رعایت مخصوصه ده بولمیشلردی .

فقط بر کون اشای طوافده فزاره قبیله سندن بری ، جبله نك اتکنه باصددیغندن جبله حدت ایدرک انک یوزنه اوردیغی شمار ، کوزینی پاطلاشم اولدیغندن حضور حائنیناهیده فزاری مرقوم طرفه سن اقامه

ایدیلان دعوا وشکوای متظلمانه اوزرینه قضااص ایله
حکم صادر اولنجہ عوام عربدن بری ایله مشاہیرملو
کدن بر حکمدارک شریعت نظرندہ کی مساواتی قبول
ایدمیہرک کیجہ کافئ اتباعیلہ برابر شامہ طوغری ارتداداً
فرار ایتشدن . بعد الحجہ [۱۶] .

ایستہ بو فرار اوزرینہ طرف عالیٰ خلافتیناہیدن۔
حوالی شامیہ امور ملکیت و عمکریہ و سیاسیتسی نظا۔
رتہ مأمور۔ ابو عبیدہ عامر بن عبداللہ الجراح رضی اللہ
تعالی عنہ حضرتلرینہ : « مرتد جبیلہ نک طوتلسی
وارتدادندہ اثر ثبات و اصرار کوستردیکی خالدہ
اعدام ایدلسی » خصوصنک امر ایدلایکندن خبردار
اولان جبیلہ ، قسطنطنیہدہ روم ایمپراطورلغنه همان
النجا و دین نصرانیتی قبول ایتمش ایسہدہ ملنجاسی
بولنان ایمپراطورک ایندیکی هر درلو اعزاز و اکراملرہ
قارشی ینہ فرار و ارتدادندن ندامت حاصل ایتشدی کہ
خبر ندامتی شو قطعہ حزن انکیزانہ سندن صراحتہ
اکلا شلقدهدر :

تنصرت الاشراف من عار لطمہ
وما کان فیہا لو صبرت لہا ضرر
یکنفنی فیہا جاج و نخوۃ

وبعت بها عين الصبيحة بالغور
 فبالت امي لم تلدني وليتني
 رجعت الى القول الذي قال لي عمر
 ويا ليتني ارعى المخاض بقفرة
 وكنت اسيراً في ربيعة او مضر
 ويا ليت لي بالشام ادنى معيشة
 اجالس قومي ذاهب السمع والبيصر

*

* *

يمن قبائل متفرقة سندن بولنان « خزاعه » قبيله -
 سندن « عمرو بن لحي بن حارثه » نك دخي هجرتدن
 « ٣١٥ » سنه مقدم بطحاده [مكه مكرمه] حكومتى
 واردر .

اولاد اسماعيل عليه السلام ، ملوك نبى جرهم تبعه -
 سنك اجرا ايله دكبرى فضايحدن غايله بيزار اوله رقه
 مكه دن چكلكبرى ائاده بو عمروك عشاىرى بطحاده
 جرهميلرى حرباً طرد وتبعيد و حكومتلرينى ده ضبط
 وتسخير ايتشدى .

ليكن كهبه معظمه ايجنه ابتدا وضع وادخال صنم
 ايدوب بت پرستلىكى حوالى حجازيه ده ترويج وتوسيع
 ايتك ايستيانده بودر :

مرقوم عمرو ، شام ملحقانندن « بلقا » یه کیتدیکی
 بر زمان بلقا اهاالینک بتلره طایمده اولدیغنی کوره -
 رک کندیسیده عبادت اصنامه رغبت ایتدیکندن اهاالی
 مرقومه نك کندیسینه ویردیکی « هبل ، اساف ، ناله »
 نام اوچ صنمی تا بلقادر بطحایه کتیروب اولا بر زمزم
 اوزرینه ، صوکره داخل بیت الله وضع ایتدکدن باشقه
 خلقیده عبادت وتعظیم اصنامه دعوت ایتشدر !

*

**

« زهیر بن جناب بن هبل بن عبدالله بن کنانه -
 القضاعی » ده ابرهه الاشمره معاصر ، خیره مائل بر
 ملك عادل ایدی .

حتی « بنی بغیض بن ریث بن غطفان » قبیله سنک
 حرم کعبه معظمه یه مشابه و مماثل اولمق اوزرته تهمه حوالیسندنه
 بر حرم بناو سدانتنی ده « بنی مره » فخذینه اعطا ایله -
 دیکی بونک مسموعی اولنجه عسکرله همان اوزرلرینه
 واروب قبیله مرقومه یی تنکیل و حرملرینی ده هدم
 و تخریب ایتشدر .

*

**

تهامده عرب مستعربه طاقندن « بنی نزار بن معد »
دن بر چوق رؤسا ، مدت مدیده اجرای ریاست ایتش
و بر خیلی غلبات حریبه موفقه اولمشدر .

حتی بونلردن « کلب و مهلهل بن ربیعة التغلبی بن
مره » نام ایکی قرن داشلرده قبل الهجره « ۱۴۱ » ده
تهامده شانلی و پارلاق بر صورتده ریاست ایتشدری .
مدت ریاستلری ده اولدقجه امتداد ایتشدر .

*

**

نجدده تاریخ هجرتدن « ۱۶۲ » سنه مقدم نجد
وعراق عرب دائره لرنده کی بنی بکر قبائلی حکومتنه
[جحر بن عمرو] ، یمن حکمداری طرفندن حکمدار
تعیین ایدلش وانک حکومتی « بنی کنده » حکومتی دیه
اشتهار ایتشدر .

شاعر شهر « امری القیس » ، اشبو « بنی کنده »
ملوکنک صو ککجیسیدر .

حکومت ، « ۱۰۸ » سنه امتداد ایتدکدن صو کره
هجرتدن « ۴۵ » سنه مقدم امری القیسک مسموماً و قاتله
ختام بولدی .

استطراد

امری الفیس

نجدده « بنی اسد » قبیله سی امیری بولنان [جحر
بن الحارث] ك اوغلیدر .

كوچوك كیندنبری شعره هوس ایتیش ودها كوچوك
ایكن هوسی سایه سنده اقتدار شاعرانه سی پك ایلریله .
دەرك یوكسلتمشدر .

فقط باباسی جحر ، « شاعرلك ابنای ملوکه ، شان
امارتە یاقشماز » دیه اوغلنی شعردن پك چوق دفعه لر
منع ایتدیکی حالده موفق اوله منجه نهایت نزدندن بسبتون
طرد ایتشدی .

مؤخرأ بنی اسد قبیله سی ، امیرلری بولنان جحر ك
خزینة امارته ادا واعطاسنه عرفاً متعهد بولندیغی
خراج معینی ویرمامك کبی بعض تکالیف امیریہ یی
ایفاده قصور و مخالفت ایدنجه او مخالفتدن تحدت ایدن
بر مخاصمه اثناسنده اسدیلك متفقاً هجوم و جحر ك
« علیاً بن الحرث الکاهلی » طرفندن قارغی ایله اعدام
ایدلیدیکی خبرینی شاعر ، اولوقت ساکن بولندیغی

نواحی یمانیه دن « دمون » ده آلمش وانی متعاقب باباسی
 ایچون : « ضیعنی صغیراً و حلتی کبیراً ، دیهرک [بنی
 اسددن یوز کشی بی قتل واعدام ، یوز کشی یهده
 جزالناسیه [۱] معامله سنی اجرا ایتدیکه باده ایچما-
 مک ، باشنی ده یقامامق [اوزره قسم و عهد وثیق
 ایله دکن صوکره بنی تغلب ، بنی بکر قبیله لرینک انضمام
 معاوناتی سایه سنده اسدیلرک اوزرینه بغتة هجوم
 ایله مش و کنیدیسنه متفق بولنان او ایکی قبیله ،
 هجومنده واقع اولان قتال و مظفریتک ، انتقام ایچون
 کافی اولدیغندن بحشله اولا اتفاقدن بعده حربدن
 استنکاف ایتشارسده امری القیس ، بومقدار ایله قناعت
 کتیره مدیکچون یمنده کی ملوک حیریه نک معاونتیه ایکنجی
 بردها اسدیله غلبه ایتشدر .

فقط شاعرک او درجه لرده پایمال ایله دیکی اسدیلرک
 اولوقت حیره ده کی حامیسی بولنان « المنذر » ، امری-
 القیسی پنجه قهر و انتقامه المق اوزره اوزرینه عسکر
 سوق ایله دیکندن امری القیس خبردار اوله رق یمندن

[۱] قید اسارتدن آزاد ایدلیکنه دائمی بر علامت
 فارقه اولق اوزره نواصی اسری چیزیلرک اینجه اینجه
 یاریقلر پیدا ایتک اوزمان عمر بلرجه عادت ایدی .

مفارقت ايله روم ایمپراطورلغنه دخالت واندن اعدا
 علیه استمداد ایتک اوزره استانبوله قاچوب کیدرکن ،
 اجدادن کنديسنه ارثاً انتقال ایتش اولان یوز عدد
 زرهی و بعض اشیای سائر ملوکانه سنی حوالی شامیه -
 ده بر قلعده مقيم شعرای یهودیه دن « سموئل » نام شخصه
 امانه تودیع ایدرک استانبوله کلشدی .

ملوک غسانه دن شامک اوزمانکی حاکمی « حرث
 بن شمر الغسانی » نام ذات ، سموئلدن امانات مرقومه یی طلب
 و طلبنده ده پک اصرار ایتدیکندن او اصراره مقابل
 سموئل ، اعطا و تسلیم امانتدن تماماً امتناع برله
 قلعیه قیانبجه غدار حرث ، اولا سموئلک بر اوغلنی
 آلهرق :

— « امانتری ویرمدیکی حالد چوجغنی اولدیره -

جکم ! »

دیش فقط بر جواب شاعرانه اولق اوزره
 سموئلدن :

— « بنم ایچون امانته خیانت ایتک ، اوغلك اولومنی

کورمکدن چوق اجیدر ! »

سوزینی ایشتمش اولدیغندن چوجغنی باباسنک

کوره جکی بر یرده صورت غدارانه و بار بارانه ده قتل
ایتدیر مشدر .

*
* *

امری القیس ، دخالت و ملاقاتنک ابتدا سنده ایمپراطور
طرفندن حسن قبول و التفاته مظهر اولمشدی . حتی تطیباً
معینه و یریلان کایتلی عسکر ایله دونوب کلیر ایکن اوارالق انک
تشبثات عسکریه سندن خبر الان بنی اسد قبیله سی ،
روم ایمپراطورینه خطاباً : « امری القیسک الدیغی
عسکرله مؤخرأ کویا روم علیهنده حرکات حربیه ده
بولنه جغندن باحث » بر نامه یازهرق شاعرک ازاله وجودینه
ایمپراطوری او صورتله مجبور و تحریض ایله مشلردر .

*
* *

بر روایتده کویا امری القیس ایله ایمپراطورک
همشیره می اره سنده بر علاقه عشق و محبتک حصولی
شایعه سی ، بعض اصحاب اغراض طرفندن ایلرییه
سورولمش وانی ایشیدن ایمپراطور دخی شاعره
شدیداً غضب و انفعال ایله دیکندن معاونتندن ندامت
ایتمش !

بناءً علیه ازاله وجودی فکریله بعض مواد

ومرکبات سمیه مغطوس بر حله ، ارقه سندنبری
کوندریله رک اکا انقره جوارنده یتشدیرلمش اوده
حله یی کینجه تأثیر سمله هلاک اولوب کیتمشدر .
قبل الهجره « ۵۴ » .

مسموماً وفاتنک تقرب ایله دیکنی حس و تفرس
اینبجه حالت احتضارنده اطرافنه حزن حزن باقمش
وبنات ملوکدن برینک مزاری اولدیغنی اکلا دیغنی
مقبره یه احاله نکه تحسر ایدرک شو بیتلری سویله -
مشدر :

اجارتنا ان الخطوب تنوب
وانی مقیم ما اقام عسیب
اجارتنا انا غریبان ههنا
وکل غریب للغریب نسیب
فان تصلینا فالقرا بة یئینا
وان تهجرینا فالغریب غریب

عموماً شعرای جاهلیه نك اشعارینك جمع وتدوین
اولندیغنی « هارون الرشید » و « مأمون » دورلرنده
بونكده اشعارى طویلا نیله رق دیوان شكلنه قونلشدی .
مؤخرأ مصرده ، صوكره « ۱۸۷۰ » تاریخ میلاد -
دیسنده « لوندرده » اورادن نقلاً (۱۸۸۶) تاریخ

میلادیسندہ) ده بیروتده مطبع و نشر ایدلمشدر .
انتهی

*

* *

(زهیر بن جذیمه بن رواحه بن ربیعہ بن مازن -
العبسی) نك دخی حكومتی هجرتدن (۶۰) سنه مقدم
ابتدا ایتمشدی .

*

..

ع

عربستانك احوال دینیہ

و مذهبیه سی

عربلر ، اصلاً موحد اولدقلری حالده مرور زمان ،
ایچلرینه بت پرستلك ضلالتنی ادخال ایتمشدی :
قرون اولی عربلرندن « حضرت صالح ، خنظله
بن صفوان ، ذوالقرنین » کبی انبیای عظام و « خالد
بن سنان العبسی ، قس بن ساعده » کبی اخیارك سوز -
لرینه تبعیت ایدنلرده بولتمش اولدیغنه کوره بو قسم
مستثنا اولقی اوزره عربلرك اکثری ، مذاهب باطله اوزره
بولنورلردی .

استطراد

۱

خنظله بن صفوان

علیه السلام

اصحاب « رس » ، مبعوث اولدیغی محقق اولان
جناب « خنظله بن صفوان » علیه السلام کیفیت بعثتی
حقنده روایات تاریخیه یک مختلفقدر .

روایتہ کوره : قوم ثموده مبعوث حضرت صالح
علیه السلام ، کندینه ایمان ایتش افراد مؤمنیندن درت
بیک قدر اشیاعی ایله برابر « حضرموت » قطعه سنده کی
« حاظوراء » نام قویونک کنارینه کلوب اوراسنی مسکن
اتخاذ ایله مشدر .

*

* *

بر اراق پیغمبرلرینک وقوع غیوبتندن صوکره
طائفه مرقومه یعنی قوم ثمود ، کندیلرینه « جلیس
یاخود حاسر بن جلاس » نامنده برینی امیر و اوامیرهده
« سنجاریب » ی وزیر تعین ایتشلردی .

فقط مرور اعصار سبيله طريق حق و هدايتى
 غيب و كفر و ضلالتى اختيار و ارتكاب ايده رك عبادت
 اصنامه جرأت ايتكه باشلا دقلى زمان ، طرف
 حقدن « خنظه بن صفوان » عليه السلام پيغمبر بعث
 بيورلشدر .

نبى مشاراليه ، بعثلرندن اوللرى او طائفه اره سنده
 حرفتله مشغل اوله رق كچنه كمشدى .

وقتا كه دعوت مأموريتنى ايفايه باشلادى . قويمى
 كنديسنى . لئاناسده طوتوب اولدردى .

جناب الله عز وجل حضرتلى ، بوجنايتك ، بوسيلة عظيمه
 نك جزاسى اوله رق قويورلىنى تعطيل ، شهرلىنى تخريب ،
 اها ليسنى ده قهر و تدمير ايله مشدر .

*

**

باشقه روايته كوره : بئرس ، عدن مملكتند
 بقايى ثمود [۱] ك كافه ذى حيات مملكتى اروا ايدر
 يالكز بر قوبوسى ايدى .

[۱] صيحه هائله سماويه ايله هلاكى نصاً ثابت اولان
 قوم ثمودك بقاياسى قالدغنى بيان ايتك ايستيانلرك بيانات
 تاريخيه سى عليهنده « حجاج بن يوسف » ك [و ثمود فذا بقى]
 آيت كريمه سيله بالاستشهاد :

— « كذبوا والله جل من قائل يقول : و ثمود فذا بقى »
 ديديكى مرويدر !

مذکور «رس» قویوسندن منتفع و منتفع اولان قومك
 «علیس» ائمنده کی عادل و حسن سیرت صاحبی بولنان امیری
 فوت اولدیغی زمان بدننی متغیر و متفسخ اولمقدن مصون
 براقق نیتله اصحاب رس ، او بدننی بعض اجزای دهنیه
 ایله تدهین ایتشدی .

فقط عادل امیرك غیوبتدن صوكره قومك احوال
 اداره سیاسیه سنه فساد اختلال عارض اولمغله قوم ،
 اجزائك تأثیریه چورومدن قالمش او بدنه باقه رقاسکی
 دور انتظامی و امیر علیسك زمان اداره عادلانه سنی
 دوشونمك کبی بعض خاطرات ماضیه یی تذکر برله فریاد
 تحسره آغاز ایله دکارندن بیوک فرصت اله کچیرمش اولان
 شیطان لعین ، امیر متوفی علیسك جسد بیروحنه صو -
 قیلوب قومه :

— « بن فوت اولدم ! بلکه بدنن صوكره سزك
 کسب ایده جککزر احوالی اکلامق ایچون براز صاقللا -
 نمشدم »

سوزیله خطاب ایتمش ، قوم دخی بونی صحیح
 باللهیه رك علیسك فوت اولدیغنه ارتق جداً
 اینامشدر .

اندن صوکره مکانه کنديسيه افراد رعایای
اره سنه بر حجاب آصديردی . بعده ترتيب ايتديردی
بر صنيده پرده نك ايج طرفه وضع وانك هيچ اوليه جكنی
قومنه اخبار واعلام ايله برابر :

— « ايشته شو ، سزك الهكزدر ! »

ديه شيطان لعين ، دائرة امارته مراجعت ايدنلره
امير عليسك سسي اوزره او صنم موضوعی سويلدوب
قونوشدير مغه باشلادی .

بونى بويله كورن قومدن برطاقم ، اوصنك الوهيتنى
تصديق واقرار برطاقمده تكذيب وانكار ايتدى . لکن
مكذبه نسبة مصدق دها چوق ايتدى .

ايشه بر درجهيه قدر عقلی ایرنلردن نصيحت يوللو
براز سوز سويله مکی ايستيان بعض مؤنين ايسه شدله
زجر وقهره گرفتار ايدلديکندن صنم عبادته هپسى ده
متفق اولديلر .

ايشته بونك اوزرينه انلری طريق حقه دعوت
ايچون طرف حقدن « خنظه بن صفوان » عليه السلام
بعث بيورلمشدر .

نبی مشار اليه وحی الهی - انبیای سائره کي حالت
يقظه ده دکل - حالت منامنده نازل اولور ايتدی .

جناب خنظله عليه السلام ، قومی :

— « ای قوم ! شو کوردیککز ، قونوشدیغکز صورت ، برصنم بیروحدر . شیطان انک ایچنده طو-روب سس ویردیریورده سزی الدادیور . حالبوکه جناب الله ، صورت مخلوقده تمثیل ایتز . ملوکک الله شریک اتخاذا یدلمسی هر درلو خطیئات وسیئات بشریه . نک بیوکیدر »

کبی منذرانه کلمات ایله انذار ایله دیکی حالده تاثیر ایتدیره میهرک انذارینه قارشى بر چوق اذیتلره دوچار ایدلدکن صوکره نهایت قتل و بررسه القا ایدلمش اولدیغندن بو درلو جرأت مشرکانه لرینه جزاء قویونک صوبی طرف الهیدن معطل براغملقله برابر قوم ، باجمهم اهلاک ایدلمشدر .

*

**

القا اولندیغی قویودن بر چوق اعصار صوکره عش شریفلری بولنوب چیقاریلنجه مبارک باشنده کی ره سی اوستنه النی وضع ایتمش بر حالده ایدی ! یاره دن الی قالدیر لدقه قانی همان اقش والی براغلدقه

النی تکرار کندی کنندینه یاره نك اوستنه قویوب قانی
اقتیماق اوزره طوتدیغی کورولمشدر !!

••

روایت اخرایه کوره ده : مشرک ملوکندن برینک
غضب ملوکانه سنه اوغراتدیغی وزیرنی قتله امر ویر -
دیکی حالده وزیر ، درت بیک مؤمن افرادیله برابر
ملکک یانندن دامن چین فرار وحضر موت بلده سی
طاغنگ اتکننده خیمه زن تمکن واستقرار اولدیغی صره -
ده لزومنه مبنی قازدقلری هر یردن اجی صو چیقمش
او صوسزلق سبیلله جماعت خیلجه مضطرب اوله -
قالمش ایکن اره لرینه کیرن رجال الغییدن برینک
اشارت ایلهدیکی یر قازلدقده اورادن طاتلی صو
چیقمشدی •

قومک او محله توطن ایده قالدیغی ایامدن سنه لر
بیله یکمشدی که عجوزه صفت برانسان ، طائفه نسوانه
قاریشوب انلره فحشیات صنعت مذمه سنی تعلیم ایتدیکنندن
کیتدجکه فحشیات مذکوره تعممه باشلادی •

حق تعالی ، ایشک اوکنی الدیرمق وانلری دین
حقه ، صراط مستقیمه دعوت ایتدیرمک اوزره تومه

« خنظله یاخود قحافه بن صفوان » علیه السلامی ایسته
اوزمان پیغمبر بعث بیورمشدر .

لکن اکا ایمان و اطاعت ایتمدکلرندن اول امرده
قویولرینک طاتلی صوی غائب اولدی .
بوکا قارشی ارتق اطاعتیه مجبور قالان قومک
وقوع بولان التماسی اوزرینه « صویک ظهور و نبعان
ایتمدیکنه مقابل ایمان وطریق حقه اهتدا ایتملری »
شرطیه نبی مشارالیه دعا بیورمش وصو دخی عقیب
دعاده کیری کلشدی .

فقط وعد و شرطنده خلف ایدن قوم ، ینه ایمان
ایتمدیکندن حق تمالی جناب خنظله علیه السلام واسطه-
سیله انلره بعض تبلیغات مندرانه اجرا بیوردی . وعین
تبلیغاتی وجهله عذاب دخی کوندردک قومی هلاک
ایله دی .

*

**

بر باشقه روایتیه کورده ده : [بنی تمیمدن « عمر »
اسمنده بری ، امیر المؤمنین حضرت علی المرتضی کرم الله
وجهه افندیتمزه کلوب :

— « یا امیر المؤمنین ! اصحاب رس هانکی قومدن
ایدیلر ؟ زمان حیاتلری هانکی عصرده و مسکن

ودیارلری زرده ایدی ؟ پادشاهلری کیم ایدی ؟ رب العزه
انلره بر پیغمبر کوندرمشمی یاخود کوندرمشمی ؟
انلری آخر نه یولده هلاک ایتدی ؟ بز قرآن کریمده
انلرک اسملرینی او قویورزده اصحاب رس کیم وقصده -
لرینک نذن عبارت اولدیغنی بیلیورز ! »

دیه صورمهش ، او حضرت امیر دخی اکا :

— « اوت ! اصحاب رس » سلیمان بن داود »
علیهما السلامک دورلرندن مقدم بنی اسرائیل عصر -
لرنده بر قوم ایدیلر . « یافت بن نوح » ک بر چشمه
کنارنده دیکدیکی (صنوبر) اغاجنه پرستش ایدرلردی .
او چشمه نك بر طرفندن « رس » نامنده بر بیوک
نهر چکردی . قومه ده او نهر رسک کنارنده غایت
معمور و منتظم اون ایکی پارچه شهرلری وار ایدی .
اون ایکی شهرلرندن « اسفند آباد » اسمیله مسمی
اولان شهرده پادشاهلری اقامت ایدردی . « ترکون
بن عابور » نامنده کی پادشاهلری ایسه « نمرود بن کنعان »
نسلنددر .

صنوبرلری دخی پادشاهک تختگاه سلطنتی بولنان
شهرده ایدی .

بر اراق او صنوبرك تخمندن برر مقدار ، هر
اون ایکی شهرده کوندریله رک اکدیرلدی . تاکه هر
شهرک بر صنوبری بولنه !

تخملردن شهرلرده برر صنوبر وجوده کتیرلش
اولنج اهاالیسی ده او صنوبر افاجلری معبود اتخازینه
سوق وتشویق ایدلدی .

اصل اسکی صنوبرک دیننده بر قویو وار ایدی .
فقط اندن هیچ بر کیسه نک صو الوب ایچمسی دین
وآینلرنجه اصلا جائز اولمزدی . زیرا قوم « هی حیاة
آلهتنا . فلا ینبغی لاحد ان ینقص من حیاتها » دیر و او
اعتقادده بولنور ایدی .

بناءً علیه اصحاب رس ، صوی یالکز رس نهر عظیمیدن
الیر ، استعمال ایدردی .

* *

معبودلرینه قارشی صورت عبادتلری ایسه پک
غریبدر :

هر سنه یوم معینلرنده هر کس اغاجک التنه کلوب
صنوبری تللی ، پوللی بعض اشیاء البسه نفیسه ایله تزین ایله -

دکدن صوکره یاننده قربانلر کسر ، قربانلرینی اغاجک
یاننده اولجه حاضر لادقلری قوجه مان آتسه قویوب یاقارلر .

وقتا که قربانلرک یانمسندن دومان چیه رق کوز -
لریله سما ارمسنه حجاب حائل کبی اولور ایشه او
زمان حضار عموماً سجده سربلیر . شجره صنوبره
تضرع و نیاز ایدردی .

قومک طرزمذکور اوزره برچوق نضرعات مشرکانه -
سندن صوکره شیطان لعین ، صنوبرک ایچندبری جماعت
حاضرده خطاباً :

— « انی قد رضیت عنکم . فطیبوا نفساً ! وقرؤا
عیناً ! »

دیه سس ویرپردی .

بوسسی ایشته کلرنده « خدامن بزدن راضی
اولدی ! » دیه باشلرینی سجده یرندن قالدیروب آتلايه
صیغرایه برچوق نشاط و طرب مستانه ایله او کیجه یی
پکیر لردی .

ایشته بو درلوعبادت مشرکانه ، انلرده زمانلرجه
دوام ایتدی . کفر و شرک ، طغیان و عصیان درجه
غایته ایریشدی .

بعده جناب رب العزه ، انلره « يهود بن يعقوب »
نسلندن بر پيغمبري بعث بيوردي .

نبی مشاراليه ، حسب النبوه انلری اوزون مدت
دين حقه دعوت ايده طورديغی حالده دعوتك هيچ
تأثيريني كوره مدكدن فضله دعوتنه قارشى قومك كفر
وشركريني ارتمش اولديغنى ده كورونجه طبعى حدت
وانفعال ايله ديكندن انلرك علمينده :

— « يارب ! ان عبادك ابوا تصديق و دعوتى
اليهم . وما ارادوا الا تكذيبى والكفر بك . ثم غدوا يعبدون
شجرة لا تضر ولا تنفع . فاي بس شجرتهم اجمع وارهم
قدرتك وسلطانك ! »

دعاسنى بيورديغنىك تأثير استجابتيه بتون صنوبرلرى
قورومشدر .

اونك اوزرينه قوم رس :

— « هر درلو مضرات ، نبوت دعواسنى ايدن
والله لريمك عيبنى آرايان شو آدمك شأمتندن چيقدى »
ديه پيغمبر مشاراليه طوتوب بر درين قويويه
اندقدن صوكره اغزىنى ده قوجه بر طاش ايله محكم
قياده رق :

— « بزم الهه لریمز ، شمیدی بیلیرز که بزدن راضی
اولمشلردر . زیرا انلرک عیبلرینی آرایان آدمی هلاک
ایتدک ! »
دیدیلر .

حضرت نبی علیه السلام ایسه ایچنده براغیلدیغی او
وحشتگاه مظلنده :

— « سیدی ! ومولای ! قد ترى ضیق مکانی وشدة
کربی ، فارحم ضعف رکنی وقلة حیلتی ! عجل قبض
روحي ! ولا تؤخر اجابة دعوتی ! »

نالش وندای پیغمبرانه سنده بولندیغندن عقینده روح
پر فتوحاری عازم راه کلشنسرای علین اولدی .
دیه جواب ویرمشدر .

*

**

نبی مشار الیهک مبعوث الیهی اولان قوم رس اطفاء -
لندن بعضلرک عنقا قوشی طرفندن پنجه اصطیاده
الندیغی بالدفعات کورولمش نهایت سن رهاقه کیرمش
بیوجک بر چوجفک بر کون عنقا طرفندن قالدیریلوب
بر هوای هلاک اولدیغی کورولسی اوزرینه حضرت
خنظله علیه السلامک لطف دعا لرینه مراجعت ایدلمش

او دخی، « عنقابی مملکتدن بلیکه ربع مسکوندن خارجه
 قدر دفع ایله دیکی حالده مقابلنده قومئک کندیسنه ایمان
 ایتلری شرطیله » دعا بیورمشدر .
 تیردعای نبویلری هدف استجابته قرین اولدیغنددرکه
 نازل اولان بر صاعقه ، عنقابی یاقمش .

*

* *

۶

ذوالقرنین

ذوالقرنین ، بردن زیاده اولدیغیچون حقنده مور -
 خین ایله مفسرین طرفندن شمدییه دکن ویریلان
 معلومات تاریخیده هیچ برکیمسه ، انلرک حقایق نسبیله لری
 کلهی حقیقتها تعیین ایده مامشدر .

زیرا ایچلرندن بری قرآن کریمده مذکور ونبوتی
 مختلف فیها ، دیکرلری ده مشاهیرامدن معدود بولنیور .
 مثلا : مدونات تاریخیه نك بیاناته کوره بری ملوک
 قحطانیه دن ، بری ماکدونیا حکمداری فلیک اوغلی
 جهانگیر مشهور « اسکندر ذوالقرنین یونانی » ، دیکری
 روح البیانک تقسیمی اوزره مورخیندن « اسکندر رومی » ،

دها او بری ده صلحادن اولق اوزره درت درلودوالقرنین
بولندیغی اکلاشیله یور .

فضلاى متأخرین ومعاصریندن دیار بکرلی سعید
پاشا مرحوم ، اولکنک « ذوالقرنین صعب بن ذی -
شدد » نامنده بولندیغی وقرآن کریمده اسمی مذکور
ونبوتی ده مختلف فیها اولان ذوالقرنین ایدوکنی
« مرآة العبر » نام تاریخ مرغوب معتبرلرینه بلا تردد
یازمشلر . که ظلماته کیرمش ، شرق وغربی زیر دست
تحکم جهانکیرانه سنه المش اولان مشهور ذوالقرنین
یونانی - کندی رأی فاضلانه لرنجه - ایشته او اولق ده
لازم کلمش دیمک اولیور .

فقط یمنده کی ملوک حیریه دن « ذوالقرنین صعب » ک
روم ویا یونانه نسبتله یونانی صفت نسبیه سیله موصوف
اوله قالمسی عقلاً وعاده مستبعد اولدیغنه نظراً عکسنی
ادعاده برمانعه تصادف اولنه من .

مع مافیه شو قدر اولسون بر قول وارکه اسکندر
یونانی ده ملوک حیریه دن بلاد رومه کیدوب اوراده
اختیار اقامت وبنات آل غساندن بر قیزی تزوج ایتمش
بر ذاتک اوغلی ! . روم ویا یونانه سبب نسبیتی ده
او بولده ! . .

حتى شرف اجداديه افتخار ايتك ايسديه جك تبا -
بعده حيره ، جد اكبرلى بولنان مذکور اسكندر
ذوالقرنين يونانينك مآثر مشهوره جهانگردانه سنى درپيش
مفخرت ايدمرك :

قد كان ذوالقرنين جدى مسلماً
ملك تدين له الملوك وتسجد
بلغ المشارق والمغرب يتغى
اسباب امر من حكيم مرشد
فرأى مغيب الشمس عند غروبها
فى عين ذى خلب وثأط حرمد

کې فخریه لری سویلر لردى .

فقط بوروايت فرضا تسليم ايدلسه بيله انك تايمندم
حکومت ايدن ملوک حيره عدادينه ادخالى پک قولای دم
قابل اوله من .

•••

صلحادن اولمق اوزره دردنجى کوستريلان ذوالقرنين «
امام على المرتضى كرم الله وجهه افنديمزه مسند -
ومحى الدين بن عربى حضرتلرينك «مسامراة الاخيار» ندم

مذکور - اولان روایتہ کورہ بر قومہ من طرف اللہ
مبعوث صالح بر رجل ایدی .

دعوتی اجرا ایتک ایستدیکي زمان قوم ، مشار الہی
بونیوزندن اوروب اولدیردیکي حالہ جناب حق انی
ینہ احیابرلہ دعوتہ مأمور بیورمش اودہ، دعوت اوغورندہ
قوم طرفندن اندن صوکرہ او درلو اہانتہ اوچ دفعہ
اوغرامش یعنی اولوب دیرلک کیفیتی کندیسندہ قوم
الندن اوچ کرہ تکرر ایتشدہ .

فقط بونک صورت حیات صالحانہ سی ایلہ « ذوالقر -
نین صعب بن ذی شدد » ل و « ذوالقرنین یونانی » نک
معلوم اولان شؤنات حیاتیہ حکمدارانہ لری ارہ سندہ
اصلا بر مشابہت و مناسبت اولمديغنه باقيلير ايسہ ايشته
او دلالتلہ بودہ دیکرلردن باشقہ بر ذوالقرنین اولدیغی
مرتبہ ثبوت و تحقیقہ وارپور !

بناءً علیہ ہر درت درلو ذوالقرنینلر حقندہ
مدونات تاریخیہ نک ویردیکي معلومات ، یکدیگرینہ
مناقض بولمش اولدیغی ایچون بوکون - محرر فقیر کبی
بر عاجز - انلردن بحث ایدوبدہ نبوتی مختلف اولان

هانکیسی ، انک نرده و کیمه مبعوث اولدیغنی کس دیر مک
مشکل و بلکه بستیون مستحیل درجه سند در .

*

**

۴

فترت

و

خالد بن سنان العیسی

« انکسار ، ضعف مطلق » معناسنی افاده ایدن
« فترت » کله سی تاریخه ، زمانه نسبتله لفظندن فترت
زمانیه ، فترت تاریخیه قصد ایدلدیکی زمان « علی
فترة من الرسل » قول شریف قرآنسی مراد
اولور که هنسکام دعوت حضرت عیسی ایله خاتم الانبیا
« محمد المصطفی » علیهما افضل الصلوة و اکمل التحایا
افندیملک زمان ظهور و بعثت اجدیه لری ایام سعادت لرینه
دکین دعوتسز یکن بر زمان غافلیت و جاهلیتدر .

*

**

لكن اشبو فترتك تمام مدتی بین الروات مختلف فیها
قلمشدر :

بعض روات ، « ۶۰۰ » ودها زیاده ، بعضی
« ۵۹۶ ، ۵۷۰ » دیگر بعض ده « ۵۴۰ » سنه اولدیغنی ضحاک
دخی « ۴۳۰ » ایله « ۴۴۰ » اره سنده بر زمان ایدوکنی
بیان ایدیور .

اکثریت ایسه « ۶۰۰ » ده اولدیغیچون حکم اصح ده
انک اوزرنده اولوق لازم کلیر .

بو مدت زمانک - انکسار ، انقطاع ایله مفسر
اولان - فترت ایله یاد و ذکر ایدلسی انده سلسله
حیات انیا و مرسلینک منکسر و منقطع اولوب عالمک
او مدته کلیاً هم نیسز ، هم ده مرسلینز قالمسندن
طولای ایدی .

مع مافیه فترتک ده حقیقه او معناده فترت اولسی
ایچون وجه مذکور اوزره یعنی پیغمبر سنز کدیکی هنوز متفق
علیه بر حقیقت اوله مامشدر .

زیرا مفسرین ایله مورخینک بعضی ، اوچی بی
اسرائیلدن ، بری [خالد بن سنان بن غیث العبسی]
نامنده عربدن اولوق اوزره درت نبی ذیشانک مبعوثیتنی

بیان ایتدکدن فضله اویچ اولکی انبیای اسرائیلیه نکه ده
 سورۀ شریفه « یس » ده استعین بالله [. . .] اذ ارسلنا
 الیهم اثین [. . .] و بونی تعقیب ایدن [. . .] فعزنا
 ثالث [. . .] ایکی آیت کریمه لرنده کی « اثین ، ثالث »
 اولدقلرینی دخی سویله دکدن صوکره « اثین » ک -
 انطاکیه شهرنده کی ، « انطقیس » نام حکمندی دین
 حقه دعوت ایچون - طرف ذیشرف مسیحان ابعاث
 وارسال بیوریلان « یوحنا ، بولس » یاخود بونلردن
 محرف « یحیی ، یونس » نام ایکی حواری ، « ثالث » ک
 ده حسب الایجاب صوکره تردیفاً ارسال بیوریلان
 « شمعون الصفاء » نام رئیس الحواریین اولدیغنی
 یازیورلر .

حتی « بنی عبس بن بغیض » دن زمان حیاتی
 ظهور اسلامه قریب اولان « خالد بن سنان بن غیث -
 العبسی » نکه قیزی ، زمان سعادتیه یله یتشدیکندن رسول
 ذیشان علیه صلواة الرحمن افندیملک مشارالیه یاه راست
 کلدکارنده خطاب بیوره رق :

— « مرحباً بآنة نبی اضاعه قومه »

دیه التفات بیوردقلرینی اکلاتدقن صوکره او التفاتی

متعاقب طرف عالی رسالتیناهیدن ، جناب خالده قبری
مراد اوله رق : « لونبشوه لا خبرهم بشأن وشأن ،
هذه الامة وما يكون منها » قولنك ده علاوه بيورولديغني
بيان ايتديلر . كه اشبو « ... مرحباً ... » و
« ... لونبشوه » كبي اقوالی احاديث صحيحه دن
اولق اوزره قبول و - « ... من الرسل ... »
صراحت قرأينه سنه قارشى وقوع مبعوثيت رسل ادعا -
سنه هيچ بر درلو محل مناسبی قالميان - فترده يالـكـز
مبعوثيت انبيا روايتنك صحتنه برهان اتخاذا ايتنك
ايسترلر .

بونك عكسنى ادعا ايدنلرده « الانبياء اولاد هلات .
وانا اولى بعيسى بن مريم . لانه ليس بينى وبينه نبى ... »
حديث شريفنى درميان اعتراض ايدمرك اكا استناداً
اثبات صحت مده الرينه قالقيشيراركه دقتله باقيلير ايسه
حق ، جانب نفى بعث نبى طرفداراننده قالمق ده
كر كدر .

حتى حافظ بن حجر العسقلانى رحمه الله تعالى نك :

— « لا يمتنع ان يكون فيها نبى يدعوا الى شريعة الرسول

الاخير . »

قولنی کندی کتابنه نقل ایدن و بو برنجی حدیثده کی
صراحتدن بالاستفاده :

— « و قد یجاب باحتمال ان یکون مراده [علیه السلام]

نبی مرسل . »

دیه مبعوثیت نبی طرفنی بر کره التزام ایتش کورینان
علامه قسطلانی بیله هر ایکی حدیث شریفک
ظاهرده یکدیگرینه پک مناقض و معارض بولندیغنه باقه رق
او بحثک آخرنده :

— « فلم یظهر لی وجه المطابقة فیهما »

دیه بالاخره حاصل ایله دیکی حیرت و تردیدنی میدانه
قویغنه مجبور اوله قالمشدر .

شو حالده هر ایکی طرفجه قول اصح ، نفی بعث نبی
اولدیغنی رأی اوزرنده اکثر علمانک اتفاق طبیعی !

*

* *

« روح البیان » صاحب عالمناقی اسماعیل حق
قدس سره العلیّ حضرتلری دخی « اثین ، ثالث »
تفسیرلرنده کړک افراد مبعوثه مرقومه نك ، کړک جناب
خالدک نبوتنی قطعياً رد ایدهرک :

— « علم منه ان الحواریین الح »

بیوردیلر .

بناءً علیه نص ظاهرک افهام ایتدییکی بعض نکات
تعظییه ایله سائر موجود اولان اختلافات و روایات
تاریخیه ، دقتله محاکمه و موازنه ایدلدییکی زمان صحیح
ویا خود اکا قریب اوله رق النان نتیجه ، فترتده - ذاتاً
رسول کلدییکی کبی - نبی دخی کلمش اولماق ایکن ایکی
حدیث شریفک بری وقوع مبعوثیتی صراحة افاده
ایتمکده ، دیکری ایسه اکا شدتله معارض دوشمکده در
والله اعلم !

*
* *

ع

قس بن ساعده

فصاحت و بلاغتیه مشهر اولان مشارالیه . « بنی
ایاد » قبیله سنک رئیس الرؤسای و زماننده زهد و تقوی
ایلّه متصف اولان رجال عربدن ایدی .
بعض روایات مشارالیهک برارالق دین نصاری
قبول ایلهدیکنی خبر ویریرلر . او روایت ، مدققین
متأخرین طرفندن پکده شایان قبول کوریلهماش

ایسه ده هر حالده توحید حقہ قائل ، وحدانیت الهیه
معتقد اولدیغی سوز لرندن اکلا شلمقده در . وقتنده اکا
دین و آیینده تبعیت ایدن ده اولدی .

حتی بنی ایاد قبائلنک رئیس « جارود بن عبدالله »
نام ذاتک ، دها باشقه برچوق رؤسا ایلہ برابر قبول
اسلام ایتدیکی کون جناب رسول کبریا علیه افضل الصلوة
واکمل التحایا افندیملک حضور پر نور هما یونلرنده « قس » ی
تعریف ایچون او قودیغی خطبه سندده :

— « ... انا اقفوا ثره واطلب خیره ... »

دیہ مشار الیهک دین و آیینجه متبوع و مقتدرالدن اولدیغی
تصریح ایتشدی .

*

**

سبب اشتہاری ایسه بر روایتہ کوره حضرت
پیغمبر افندیملک ہنوز وحی الہی نازل اولمغه باشلامزدن
از اول ، روایت اخرایہ نظراً ایلاک وحی نازل اولوب -
ده بر اراق منقطع اولہ قالمش بولندیغی ایامده « سوق
عکاظ » ہ کیدہ رک اندہ بلغای عرب مشاعرہ و مناشدہ
ایدرکن کندیسکی راکب بولندیغی قیزیل دوه سندن
ایلہ ایندکسزین بعثت علیہ احدیہ حقندہ ایراد
ایتدیکی :

« ايها الناس ! اسمعوا وعوا . واذا وعيتكم »
 « شيئاً فانتفعوا ! انه من عاش مات . ومن مات فات . »
 « وكل ماهوآت آت . مطرونبات . وارزاق واقوات . »
 « وآباء واهبات . واحياء واموات . جمع واشتات . »
 « آيات بعد آيات ! ان في السماء نجراً . وان في الارض »
 « لعبراً . ليل داج . وسماء ذات ابراج . وارض ذات »
 « فجاج . وبحار ذات امواج . مالى ارى الناس يذهبون »
 « ولا يرجعون . رضوا بالمقام فاقاموا ؟ ام تركوا هناك »
 « فناموا ؟ اقسم قس قسماً حقاً . لاحاشا فيه ولا آثماً . »
 « ان لله ديناً هو احب اليه من دينكم الذى انتم عليه . »
 « ونبياً قدحان حينه . واطلكم اوانه . فطوبى لمن ادركه »
 « فأمن به وهداه . وويل لمن خالفه وعصاه . تبا »
 « لارباب الغفلة والامم الخالية والقرون الماضية . »
 « يا معشر اباد ! اين آلاء والاجداد ؟ واين المريض »
 « والعواد ؟ واين الفراغنة الشداد ؟ اين من بنى »
 « وشيد ؟ وزخرف ونجد ؟ اين المال والولد ؟ اين من »
 « بنى وطغى ؟ وجمع فاوعى ؟ وقال انار بكم الاعلى ؟ »
 « الم يكونوا اكثر منكم اموالاً ؟ واطول منكم أجالاً ؟ »
 « طحنهم الثرى بكله . ومن قهم بطوله . فتلك عظامهم »
 « بالية . وبيوتهم خالية . عبرتها الذئاب العاويه . كلا »

« بل هو الله الواحد المعبود. ليس بوالد ولا مولود . »
 في الذاهين الاولين من القرون لنا بصائر
 لما رأيت موارد الموت ليس لها مصادر
 ورأيت قومي نحوها يمضي الا صاغروا الاكابر
 لا يرجع الماضي الى ولا من الباقيين عابر
 ايقنت اني لا محال لث حيث صار القوم صائر
 خطبة بليغة سيدركه استاد محترم جودت پاشا رحمه الله
 تعالى ، خلاصه وجهله شويله جه ترجمه بيور مشردر :
 « — اي ناس ! كليكنز ! ديكله يكلز ! بلله يكلز ! عبرت »
 « اليكلز ! ياشايان اولور . اولن فنا بولور . اوله جق »
 « اولور . ياغور ياغار . اوتلر بيتر . چو جقلر »
 « طوفار . انالرينك بابالرينك يريني طوتار . صوكره »
 « هيسي محو اولوب كيدر . وقوعاتك اردى ارمه سي »
 « كسلز . همان برى بريني ولى ايدر . قولاق طو - »
 « تكز ! دقت ايديكنز ! كوكده خبروار . يرده »
 « عبرت اله جق شيلر وار . كوك يوزى بر يوكسك »
 « طاوان . ير يوزى بر فرش ايوان . ييلديزلر يورور . »
 « دكزلر طورور . كلن قالمز . كيدين كلز . عجبا »
 « وارد قلري يرده خوشنود اولوب ده مي قاليورلر ؟ »

« یوقسه اوراده براغیلوب اویقویه می طالیورلر ؟ »
 « یمین ایدرم که اللهک عندنده بر دین واردر که شمدی »
 « بولند یغکز دیندن دهاسو کیلودر . واللهک کله جک »
 « بر پیغمبری واردر که کلسی پک یقین اولدی . »
 « کولکه سی باشکزک اوستنه کادی . نه موطلو اول »
 « کیمسه که اکا ایمان ایدوب ده او دخی اکا هدایت »
 « ایله یه . وای او بد بخته که اکا عصیان و مخالفت »
 « ایله یه . یازقلر اولسون عمرلری غفلتله یکن امتلره ! ! »
 « ای جماعت ! قنی آباء واجداد ؟ قنی مزین کاشا . »
 « نه لر ؟ وطاشدن خانه لر یاپان عاد و ثمود ؟ قنی دنیا »
 « وارلغنه مغرور اولوب ده قومنه [بن سزک الک »
 « بیوک ربکزم] دیان فرعون ایله نمرود ؟ انلر سزه »
 « نسبتله دهانکین وقوت و قدرتجه سزدن افزون »
 « دکلی ایدیلر ؟ بویر ، انلری دکرمنده او کوتدی ! »
 « توز ایتدی طاغندی ! کیملری بیله چوریوب »
 « طاغیلدی ! اولری یقیلوب ایصمزلر قالدی ! یرلینی ، »
 « یوردلینی شمدی کوپکلر شنلندیر یور ! صاقین انلر »
 « کبی غفلت ایتیک ! انلرک یولنه کیمیک ! هرشی »
 « فانیدر . باقی انجق جناب حق قدر . که بردر . »
 « شریک ونظیری یوقدر . طابه جق انجق اودر . »

« طوغنامش طوغورمامشدر . اول کلوب پکنلرده »
 « بزه عبرت اوله جق شی چوقدر . اولوم ایرماغنک »
 « کیره جک یرلری وار . اما چیقہ جق یری یوقدر . »
 « بیوک کوچوک هپ کچوب کیدیور . کیدن کری کلیور . »
 « جزم ایتدم که عامه یه اولان بکاده اوله جقدر ! . . . »

*

* *

جناب جارودک قبول دین اسلام ایتدیکی کون
 قس ، مجلس شریف نبوی ارکان کرامنجه برکره موضوع
 بحث ایدلمش اولمغله طرف عالی رسالتیناهیدن اصحاب
 کرامه خطاباً :

— « فهل فيكم من يحفظ لنا منه شيئاً . . . ؟ »
 ديه اظهار بیوریلان رغبت اوزرینه همان جناب ابی
 بکر الصدیق رضی الله عنه افندیمز حضرتلری ایاغه
 قاله ورق :

— « یا رسول الله ! انی احفظه . . . »

دیدکدن صوکره خطبه بلیغه مذکوریه بی تمامها قرائت
 ایتمش و ختام قرائته سید کائنات افندیمز حضرتلری
 جناب قس ایچون :

— « یرحم الله قسماً . انی لارجوان یبعثه الله امةً
واحدة »
بیور مشلردر !

[استطراد بتدی]

مثلاً « زرارہ بن عدی » نك منسوب اولدیغی بنی
تمیم قبیلہ سنده مجوسیلر بولندقدن فضلہ آثوریلر کبی
کواکبه عبادت ایدنلرده موجود ایدی .

ازجمله بنی حیر ، شمسہ ، بنی کنانه قره ، بنی لخم
مشتریه ، بنی طیّ سهیلہ ، بنی اسد عطاردہ ، طایار
ایدی . مصریلر کبی حیواناتی معبود اتخاذا ایتش قبائلده
بولندی .

مع مافیه بونلرک ایچلرندہ « غسل ایتک ، ختان
اولق حج ، کعبه معظمه یه حرمت واحرامه کیروب
طواف ایتک » کبی موسی و ابراهیم علیهما السلامک
شریعت و سنتلرینی اجرا ایدن کیمسه لرده بولنیور
ایدی .

بت پرست اولان عربلرک مؤخرأ حاصل ایله -
دکاری ترقیات فکریه لری سایه سنده بت پرستلک
مذهبنک کلیأ بطلاتی ادراک ایتش کیمسه لرده مفقود
دکادی .

اگر عصر لرزنده شریعت موسویه ، شریعت عیسویه ، حریت پرور اولان عربلرک طبعلرینه موافق کلسیدی و او شریعتلرده اصللرینه تمامیله مطابق بولنسیدی همان جله سنک متفقاً تبدیل و تصحیح مذهب ایدوب موسوی و یا خود عیسوی اوله جقلرینه احتمال وار ایدی .

زیرا تورات شریف و انجیل شریف ، اسارت التنده بولنان اقوام و طوائفه کوندرلش اولوب احکا - محیده حالت اسارتده چکیلان مظالم و تعدیاته قارشی - استحصال مرضای جلیل ربانی ایچون - صبر و تحمل ایتمک و هر خصوصده هر درلو تحریکات جسمانی بی ذکر و عبادت ایله تسکینه چالشمق خصوصلرینی امر و توصیه دن عبارت اولدیغی جهته حریت و استقلاللرینی غائب ایدوبده تحت اسارت کیردیکنی بر زمان بیله کورماش اولان وقور عربلر ، مظالم و مزاحم اسا - رتی هضم و کظم ایله مأمور و مأجور اولق ایچون شریعت قبولنه کندیلرنجه لزوم کورمک ایستمزلدی .

تمة مقدمات

سكنه عربستانك متفرق وپريشان احوال بر صو -
 رتده قبيله ، قبيله ياشاملرينك جله سياتندن ياخود
 جله محسنازندركه حريص شهرت و غنيت اولان
 اصحاب مكنت وسطوتك نظر رغبت حريصانه سني جلب
 ايدجك درجده معمور و مزين اولماسي ، جزيره ي
 او وقته دكين يالكز اجنبي تسلطندن محافظه ايد بيلش
 ايديسه ده مؤخرأ يعني ميلادك النجى ، يدنجى عصر لرنده
 جزيره ، اطراف ثلثه سندن ياواش ياواش تضيق و تجاوز
 ايدلكه باشلانمىدى :

حبش حكمدارلري يمنه ، عجم حكمدارلري نجده ،
 روم امپراطورلري دخی مصر ايله سوريه دنبري حجاز
 طوغرى تجاوز كوستر مكدده ايدنلر .

اجانبك شو تجاوزات و تضيقاتي ايسه اوتهدنبري
 حریت واستقلال ايله مألوف اولان وقور عربلرك
 هر درلو حضور وآسایشنی تا دیندن سو كوب بر باد
 ایتكه پك مستعد كورونديكندن استقلال و حریتلرينك
 كافي الاول دوام و محافظه سی ایچون عموماً قبائل و عشائر

عربك قوی بر جهت وحدت اساسی اوزرنده مؤسس
بر نقطه اتحادده جمع اولسی و جمعیتی بر قوت ایله ده
خصما و مهاجین اعدایه قارشی مقاومت و مقابله کو سترمی
لزومی ارتق بستیون تحقق ایتشدی .

اتفاق و اتحاد حصولیچون اللرنده اساس اوله جق
حاضر جهت وحدت ایسه ، یالکز وحدت لسانیه دن
باشقه برشی دکلدی .

حالبوکه قبائل بیننده موجود اولان اختلاف
واختلال مذهبی ، وحدت لسانیه نك اتحاد و اتفاق
خصوصنده کوریه جك و یا خود کورولسی مأمول بولنه جق
هر درلو تأثیرات و محسناتی ذاتاً چوقدن محو و تعطیل
ایدوب کیتشدی .

بناءً علیه اقوام عرب بیننده تضییقات و تجاوزات
اجنبیهیه قارشی یکو جودانه مدافعه و مقابله ایده جك
و مدافعه لرنده - حسن تأثیر حاصل ایتدیره جك
درجه ده قوتلی و متانتلی بر اتحاد عمومی حصولی پك
مشکلدی .

لزوم قطعیمی ایشته او صورتده کورونمش اولان
اتحاد عمومی ملی تأسیسی ایچون اول امرده حجاز

قطعه سنك مركز اجتماع اتخاذ ايدلسى ، ثانياً قبائل
اره سنده قریش قبیله سنك ده - اعراب ساثره اوزرینه
ترجیح وتفضیلی صورتیله امور اداره ملیه ریاستنه کچیرلمسی
هر حالده ایجاب ایدیورایدی که او صورتده، مطلوب اولان
تأسیس اتحاد مسئله سنك تهوین حصولنه موافق
ومساعد برمسلك قویم تهینه واستحضار ایدلمش اوله جق
ایدی .

زیرا حجاز قطعه مبارکه سی موقع جغرافیسنده کی
مناسبت اعتباریله جزیره العربک بر مرکز مهمی اولدقدن
باشقه عموم اقوام و افراد عربک حرمت وتعظیمه مجبور اولدیغی
کعبه معظمه بی ده مشتملدر .

کذلک قطعه حجازیه ده قبائل اره سنده - اسماعیل
علیه السلامک نسلی بولتمق شرفنی حائر اولان - قریش
قبیله سی اک معتبر و ممتاز بر قبیله اولدیغی کبی لسانی
دخی افصح الالسنه والک مقبول بر لسان بولندیغنه بناء
بین العرب نشر اولنان بتون آثار ادبیه ومکاتیب، قریش
لسانی اوزره سویله نیلیر و یازیلیر ایدی .

بناء علیه اویله بر اتحادک وقوع بولمسی لازم کلدیکی
تقدیرده اتحاد و اتفاقک انحق قریشیلرک ریاست اداره سی

التننده حصـوله كله بيله جكي ، حال حاضر لرنجه حائر
اولدقلى قدر وحيثندن ، شرف و شان و امتياز دن
اكلا شلقده ايدى .

ايسته قريشيلار اره سنده شرف ظهور ايدن سيدالكو -
ئين ، رسول الثقلين افنديمى حضرتلرينك من طرف الله
نشر و تعمينه مأمور بيورلدقلى دين مبين اسلام -
وحدت لسانيه نسبت قبول ايتز - بر جهت وحدت
اوله رق اشبو دين مبين اسلام سايه سنده عموم قبائل
اره سنده غير قابل انفكالك و انحلال قوتلى بر اتحاد
عمومى معنوى حاصل اولمش و بو اتحاد سبيله وجوده
كلان دولت قوى الشكيمة اسلاميه ، مهاجرين اجابنه قارشى
گاه تجاوزى ، گاه تدافعى حركت ايدهرلك نهايت يارى
جهانى ضبط و تسخير دخی ايتشدن .

*

**


فصل تالى

{بشارت اوليه و شئون ارهاصيه}

شبيه و عبدالمطلب . كشف بئرمزم . وقعة فيل و ابرهة الاشرم . مولد
نبوى . رضاع پيغمبرى . انشفاق صدر . فوت آمنه . سيف بن ذى اليزنك

تنبيهات و تبشیراتی. رمذیغمبری وقعه سی. وفات عبدالمطلب. شام
سفری و بحیرا. ازدواج نبوی. تعمیر کعبه معظمه.

— ۱ —



و

عبدالمطلب

قریش قبیله سنک اکثری - قبائل عربک اسباب
ثلثه معیشتاری اولان « تاجرلک ، چوبانلق ، جابوجیللق »
صنعتلری اره سندن تجارتی اختیار ایتش بولندیغندن -
هرسنه تجارت ایچون شام دیارلرینه بر ، ویا بر قاق دفعه
سیر و سفر ایدرلردی .

اجداد غلیه جناب احدیهدن « هاشم » دخی
بر زمان شامه کیدن قافله قریش ایله برابر لاجل التجاره
حوالی شامیه کیتک اوزره یوله چیقهرق مدینه
اوغرا دیغی صروده کندینه مهماندار اتخاذا ایله دیکی
بنی نجار قبیله سندن « عمرو بن لبید الخزرجی » نک « سلمه »
نامنده کی قیزنده کوردیکی حسن وان و ملاحظتندن

استعجاب ایده قالدیغندن انی باباسندن ایسته‌مش باباسی
عبرودخی، « سله » مدینه‌ده قالمق شرطیله صهریت هاشمیه‌نی
قبول برله قیزی اكا تزویج ایتشدی .

فقط هاشم ، او زمان حوالی شامیه‌ده ایده‌جکی
سیاحت تجاریه‌سنی اتمام واکمال ایدوب مدینه‌یه کلدکن
صوکره مدینه‌دن تکرار شامه ایکنجی بردها سفر
ایتمش وارتق او سفرکی عودتنده قبل المواصله « غزه » ده
وفات ایده‌رله سلمه‌دن متولد اوغلی « شیه » یتیم قالمشدی .



مکهدن لمصلحه مدینه‌یه کیتش اولان بر عرب ،
مدینه چوجقلرینک یولده او یونلرینه تصادف ایدنجه
ایچلرندن بر صاحب بجال چوجفک :

— « انا ابن هاشم ، انا ابن سیدالبطحاء »

سویله دیکنی کورن مکهلی عرب ، او چوجغه :

— « من کیسین ؟ »

دیه صوردیغنده چوجفک هاشمزاده اولدیغنی اکلا .
دیغنی مکده مؤخرأ تصادف ایله دیکی مطلب [هاشمک
برادریدر] ایله مصاحبتری اشناسنده اکاچمش وشیه‌نک

حسن اخلاق معصومانہ سندن و جال ذی کاندن دہ بحث
ایتمشدی .

بناء علیہ مطلبک قلبندہ شیبہ بی کورمک ارزوسی
همان حاصل اوله رق خانه سنه بيله دونمکسزین طوغریجه
مدینه عزیمت و برادرزاده سی شیبہ بی الوب مکہ عودت
ایله مشدر .

مطلبک مکہ عیہ اثنای مواصلتندہ « شیبہ » عنک
ترکہ سنده بولندیغندن انک کیم اولدیغنی سؤال ایدنلره
مطلب - لطیفه اوله رق - « کوله مدر ! » دیمش
بولنسیله او جواب ، شیبہ نک « عبدالمطلب » دیه مسمی
قالسنه سبب اولمشدر . شیبہ ایسه او زمان هنوز یدی
یاشنده ایدی .

*

* *

نور محمدی عبدالمطلبک الننده لمعان ایدردی . بو
سبيله قریش قومی کندیسيله فوق العاده تبرک و تین
ایتمکده ایدیلر . حتی مکده قحط و غلا واقع اولسه
عبدالمطلبک انه یاپشوب « ثیر » طاغنه چیقار ومتوسلا
جناب حقدن یاغور ایسترلردی . نور محمدی حرمتنه

دعایری ده مردود اولیوب طرف حقندن رجت وبرکت
احسان ده بیوریلیر ایدی .

عبدالمطلب بیودکده پدری « هاشم » لـ مقام ریاستنی
احراز ایدهرک ملتنه یارار پک چوق ایشلری یامغه موفق
اولشدر .

*

**

ولادت باهرالسعادة جناب رسالتیناهی زمانی
تقرب ایلهدیجه کهنهٔ عرب ، انک تشریفندن خبر
ویرمکه وبر طاقم خوارق عاداتده ساحهٔ ظهوره کلمکه
باشلامشدی .

ازجمله عبدالمطلب رؤیاسی ! که برکون حرم شریف
کعبه ده اوپور ایکن منامنده :

-- « ظهرندن بر سلسله نك چيقوب سمايه قدر
یوکسلدیکنی بعده سماند اینوب یرده یشیل یاراقلی
غایت کوزل بر اغاج اوله قالدیغنی واو اغاجده بر
اختیار کسه نك متعلق طوردیغنی کورمکه اکا « سن
کیسین ؟ » ديه صورنجه اوده « نوح » جوابنی
ویردیکنی واو جوابه قارشى همان حاصل ایلهدیکی
رغبتدن طولای کندیسی ده او اغاجه ویا دالرندن برینه

يايشتق ايشته مش ايسه ذه [سنك اونده نصييك يوقدر]
ديه رد ايدلديكني ! »

كورور ايكن قورقو ايله همان اويانمش واشبو رؤياي
غريبه ايجون كاهنلره ايتديرديكي تعبیره :

— « نسلندن بر چوجغك طوغه جغي و سماوات
زمين اهلنك ده او چوجغه ايمان ايدجكلى »
تبشير اولمشدى .

بو رؤيا اوزرينه عبدالمطلب ، مخدرات قريشدن
« فاطمه » اسمنده بر قيز الدي كه والد ماجد احدى
« عبدالله » ، ايشته اوندن دنيايه كلوب نور محمدى يي
حائز و حامل اولمشدر .

*

**

كندى كتابلرنده :

— « اذا قطرت جبة يحيى [عليه السلام] ولدو والد

النبي صلى الله عليه وسلم »

ديه محرر بولنان يهوديلر ، علامت مذكور منك وقوعى
زماننده والد ماجد احدى جناب عبداللهك تولدينى
اكلامش و مشاراليهك قتل و اعدامى خصوصى ده
ينلرنده تصمم و تصور دخى ايتمش اولدقلرندن برارالق

افتراص ایدہ بیلدکاری ساعتہ او شمع شبستان رسالتی
 همان قتل واعدام ایتکہ طاورانقلری حالہ کوکدن
 فصرته کلان ملائکہ نک ، عبداللہی تخلص ویهودیلری
 یکدیگریلہ قتالہ تحریض وتحریص ایلہ دکاری « وھب بن
 عبد مناف » طرفندن بر طاغدنبری عیناً مشاہدہ
 ایلدیکسی جھتلہ کرامتنہ بناء وھب ، قیزی « آمنہ » بی
 اکا تزویج خصوصنی ملاحظہ وحتی خانہ سنہ کیدوبدہ
 جناب عبداللہ حقندہ کی مشہوداتی زوجہ سی
 « برہ بنت عبدالعزی » یہ حکایہ ایتدکدن سوکرہ اکا
 خطاباً :

— « هل لك ان تزوجی عبداللہ بآمنہ ؟ »

دیہ انک موافقتنی دہ استحصال ایلہ مشدی .

*

**

۶

— کشف بئر زمزم —

یمندہ قحطانیہ حکومتنی تأسیس ایدن « قحطان
 بن عابر [ہود علیہ السلام] بن صالح بن ار فحشد

بن سام بن نوح علیه السلام « ك وفاتنه اولادی
اره سنده - یمن سلطنتنه نائل اوله میان « جرهم » ، حجاز
مملکتی قبل الهجره « ۳۰۱۷ » ده ضبط ایدرک اولوقت
مکده بر حکومت تأسیس ایتشدی .

مؤخرأ اسماعیل علیه السلام ، مبعوث اولدیغی
عمالقه اقوامی بلادندن حجازه عودتده ملوک بنی
جرهمک صوکی اولان « مضاض بن عمرو » ک اوغلی
« حرث » ک قیزی « سیده » بی آلهرق آل جرهم ایله
کسب قرابت وصهریت ایله دیکنه بناء مضاضک وفاتندن
صوکره حکومت ، اولاد اسماعیل علیه السلامه انتقال
ایتش دیمک اولدیغی حالده عامله طائفه سندن مکهنک
اوست طرفنده « قیقعان » نام محله متوطن بر جماعت ،
« سمیدع » نامنده بر شخصک حکومتی قبول ایدنجه
اولاد اسماعیل علیه السلام ، طائفه مرقومه بی حرباً طرد
وتبعید ایتشدر .

بعده اولاد اسماعیل ، مکده عصر لرجه اقامت
وجوار اولان قبائل عربان ایله ده حسن معاشرت
ایتش ایسه لرده بنی جرهم ، مؤخرأ بیت شریفه اصنام و اوثان
مثلاً بعض اشیای خسیسه بی ادخال و اونکله برابر دیگر فضایح

ارتکابنده جرأت ایدرک رزائی چو غالتدقلرندن انلرک
کعبه معظمه قارشى واقع اولان حرمتسزلککرى منعدن
عاجز قالان اولاد مشارالهم ، اولوقته دکین زوارک
على ماجرت العاده کعبه قويدیغی هدايایى زمزم
قویوسنه وضع ، اوستى ده ستر و اخفا ایدرک -
ایشته او درلو عجزلرینه بناء - باشقه طرفه هجرت
ایتملردى .

بو هجرت اوزرینه یمن قبائل متفرقه سندن
« بطن » نام محله متوطن خزاعه قبیله سی مکّه یه
کلوب جرهمیلری مکّه دن حرباً طرد ایتملدر .
قبل الهجرة [۳۱۵]

اولاد اسماعیل علیه السلام مکّه یه تکرار
عودتلری ده بنی خزاعه نك ایشه بو موفقیتی صره سنده
ایدى .

لیکن بئر زمزم موقعی صوکره اونودلملشدی
مکّه ده جرهمیلرک اخلال ایتدیکی آسایش محلی اعادم
ایدلیدی و بئر اولان لزوم شدید دخی ظهور ایتدیکی
حاله کیمسه اکا تعیین محل ایده میهرک نیجه یلار بو حال
مجهولیتده قالدی .

نهایت بر کچه عبدالمطلب حج رده یاتوب او یور ایکن
رؤیاسنده بری، کندیسنه خطاباً :

— « احقر طيبة »

دیمش عبدالمطلب ده :

— « طيبة ندر »

دیدیکی حاله جواب آله مامش وایکنجی کچه ینه رؤیاسنده
کندیسنه :

— « احقر برة »

دیه خطاب اولنه رق :

— « برة ندر »

دیه صورار ایکن صورانی فائب ایتشدی .

لیله ثالثه ده دخی :

— « احقر المضمونة »

دیه امر اولندیغندن مضمونه نك نه اولدیغنی صوروب
دوشنور ایکن او یانیورمش و صبا حلین خانه سنده یتاغنه
اوزانه رق ینه او یومشدی . رؤیاسنده ینه :

— « احقر زمزم »

دیه امر اولنور ایکن کندیسى :

— « زمزم ندر »

سؤالنی ایراد ایتش مخاطبی بولنان شخص غیبی دخی :

— « بئر یستقی الحجیج منه عند منکر قریش عند
نقرة الغراب وقرية النمل »

دیه جواب ویرمش اولدیفتدن بئر زمزمک محلی بووجه
ایله اوکرنمش اولدی .

وعلی روایة بر کجه رؤیاسنده بری طرفندن
کندیسنه :

یا ایها المدلیح احفر زمزم
انک ان حفرتها لم تندم
وهی تراث من ابیک الاعظم
تسقی الحجیج حافلاً لم ینقم

دیه خطاب اولندوقده عبدالمطلب :

— « او دیدیکک زمزم محلی نرده ؟ »

دیمش قائل ده :

— « عند قرية النمل حیث یتقر الغراب الاعصم »

جوابی ویره رک اکاتعیین محل ایله دیکچون عبدالمطلب
محل زمزمی اولوجهله کلامشدر .

بعدالنوم اوغلی حارث ایله برابر اولدیغی حالده
محل زمزمی تحرییه کتدکده رؤیاسنده بیلدیریلان
قارغه ، « اساف ، نالؤه » نام ایکی صنمک قارشیسنده

نقر ایدوب طور دیغنی کورمش وارتق بئر زمزمک
اوراسی اولدیغنده یقین حاصل ایتشدی .

حالبوکه محل بئر اولق اوزره بولدیغی یر ،
قریشک سجده کاه و عبادتگاهیی و محل نهری اولدیغی
جهتله قریش ، امر حفردن انی منعه شیداً تشبث
ایتشدی .

بئر زمزمدن « یوز عدد قیلنج ایله یوز زره
والتوندن معمول ایکی کیک هیکللی » چیقمشدر .

بو اشیا حقنده حصوله کلان اختلافی دفع ایتک
اوزره قرعه آتیش و قرعه ده هیکلر کعبه معظمه یه ، سیوف
ایله دروع عبدالمطلبه اصابت ایدوب قریش بوشه
چیقمشدر .

حفر بئر مسئله سننده قریش ، عبدالمطلبک موفقیتنه
حسد ایدهرک اکا :

— « یا عبدالمطلب ! بئر زمزم دده من اسماعیل
علیه السلامک آثارندندر . بزم دده انده حقمزوار . صویک
منافعنده سکا شریک اولملی یر »

دیدیلر . شو ادما ، قبائل یلیننده یوجک بر منازعه یه
استعداد حاصل ایتدی .

بر چوق مجادلات متمادیه دن صوکره نهایت بنی
سعد بن هذیلک حوالی شامیه ده کی کاهنه لرینه مراجعت
واونک ویره جکی حکم، هر ایکی طرفجه قبول ایدلک
اوزره قرار ویرلدی .

ایشته او قرار موجبجه عموم قبائل قریشیه دن
برر آدم قالقوب عبدالمطلب وانک بر طاقم اتباعیله برابر
شامه حرکت اولنمشدی . حالبوکه او زمان عبدالمطلب
ایله اتباعنک صولری یولده دوکنندیکندن قافله خلقنجه
حاصل اولان احتیاج ومضایقه شدید اوزرینه مخاصم
بولنان دیگر طرفدن صوایسته مکّه مجبور اولدیلر لکن
اله مدقلری و قومسال ، صوسز یرلردن عبارت اولان
اطرافده ذاتاً صو بولندیغی سببیله خلق بسبتون
مشرف هلاک اوله قالدقلری وحقی حیاتلرندن ده قطع
امید ایدوب هرکسک صحراده کندینه مخصوص قبر
قازمسنه واول هلاک اولانلرک براز کیری قالانلر
طرفندن دفن ایدلمسنه قرار ویرلدکن صوکره هلاکه
انتظاراً قبرلرینک کنارلرنده مأیوس اوطوردقلری حالده
عبدالمطلبک امر وارشادی اوله رق : « اوطوروب
هلاکه انتظار ایده جکمز یول یورور ایکن هلاک
اوله لم . بلکه یولده جناب حق ، بزه صوده احسان

ایدر « فکر و امیدیه قالمشردی . که ایسته او زمان
عبدالمطلب ، اناخه ایله دیکی دوه سنی قالدیرمق اوزره
ایکن جیزمه سنک التندن یرده صو صیزندیسی
کورولمش اوراسی همان قازیلوب طاتلی بر پیکارده
ظهور ایله مشدر .

جمله سی دفع عطش ایتدکدن صو کره الارنده کی
قربه لرینی ، مطهره لرینی ده طولدیره رق یولارینه دوام
ایتدیلر .

مکر او صرده صوی بیترمک نوبتی مخاصم طرفنده
ظهور ایتشدی ! ارقه لرندن یتشدکری زمان شدت
عطش و حرارتدن هلاکه قریب بر حاله او غرادق لرینی
کورن عبدالمطلب ، انلرک معاملهء سابقه لرینه کوره
مقابله بالمثل دنائتی کوسترمکی تجویز ایده میهرک
کندی اتباعنک او یکی پیکاردن الدیغی تازه صو
ایله همان جمله سنی اروا و احتیاج لرینی دفع ایتمشدر .
بولطفه قارشی ممنون و اسائت واقعہ لرندن طولایی
محبوب قالان خصما ایسه ، عبدالمطلبه خطاباً :

— « سنک نه درجه لرده کریم الطبع اولدیغی بلیر
ایکن بیهوده کاهنه یه کیتیملم »

ديه ادمالرنندن طوعاً فراغت وعودته مجبور اولديلر .

*

* *

اشبو زمزمك كشف وحفرى مسئله سنده قريشدين
پك زياده سيله اينجشمش اولان عبدالمطلب ، كنديسنك
اون نفر اولادى طوغوبده انلر قريشدين كله جك
اذياتى منع ايده جك مرتبه سنه بالغ اولور لرسه
برينى حول بيت اللهده نطوعاً ذبح ايتك اوزره نذر
ايتشدى .

وقتاكه « ابو طالب ، ابوله ب ، غيداق ، حجل ،
عبدالكعبه ، مقوم ، زير ، ضرار ، قثم ، عبدالله ،
حزه ، عباس » نام اون اوج اولادى ميدان شهوده
كلهرك انلركده كنديسنك تعيين ايتديكى مرتبه كلاله
بالغ اولدقلىرني ينه كنديسى جزم ايتدى نذرني ايفا
ايچون كيفيتى اولادينه تفهيم ايتدكن صوكره انلرى
عموماً بيت اللهه جلب ودعوت برله داخل كعبهدهكى
« هبل » نام صنك حضورنده ايتديغى قرعهده اك
زياده سوديكى ونور جليل احدينك مستقر عالييسى
بولنان والد ماجد پيغمبرى جناب عبداللهه اصابت
ايتشدر .

بناءً عليه انى ذبح ايتك ايچون « اساف ، نأله »
 نام ايكي بتك حضورينه كتيردى . فقط ديكر اولادى ،
 واو وقتته دكين مسئله دن خبردار اولان قبائل قريش
 « اكر سن بونى بويله ياپارده عالمه كوستيرر ايسهك
 صوكره هر كس اولاديني ذبحه باشلار . ملت كندى
 كسنديني قيرمش اولور ! » ديه عبدالمطلبى فكر ذبحدن اولاً
 منع ايتدكن صوكره اكا :

— « ليكن حجازدهكى عرافهيه كيتده صور ! اونك
 سكا ديه جكى سوزى ايشيدنجه امر واراده ينه سنكدر »
 ديمشدر .

ايسته قريشيلرك بومطالعهي اوزرينه مراجعت ايتديكى
 عرافه مذكور دنك توصيه سي وجهله صنمك قارشيسنده
 — فداء لعبدالله — يوز رأس دوه ذبح ايتمش وعبداللهى
 ذبحدن اوصورتله قورتارمشدر .

حضرت سيد كائنات عليه افضل الصلوة واكل التحيات
 افنديمز حضرت تليينك ده :

— « انا ابن الذبيحين »

قول شريف نبويلرندهكى « ذبيحين » دن مراد عاليلى
 والد ماجدلى جناب « عبدالله » ايله جد امجدلى
 « اسماعيل » عليه السلام اولديغى مرويدر .

عبدالمطلب، ذبحدن قورتارديغى سو كيلى اوغلى
الندن طوتهرق خانه سنه طوغرى كتيړمك اوزره
كعبه دنبرى دونديكى زمان « بنى اسد بن عبدالعزى » دن
« ورقه بن نوفل » ك - خاتم الانبيا افنديمك قريش
عربلرندن ظهور ايده چككنه و شرف ظهورينك ده
مك تقرب ايتش بولنديغنه واقف واوراده حاضر ومنتظر
بولنان - هميشه سى « ام اقبال » ، عبداللهك يوزنده
كورديكى نور هر دم ظهور محمدى به عاشق اوله قالديغندن
آنك صلب پاك تا بنا كندن متولد اوله جق او سلطان
هر دوسرايه والده اولمق شرف عالى بيشالى احراز
ايتك اوزره عبدالله ايله ازدواجى ارزو ايدهرك اكا
خطاباً :

— « اين تذهب ؟ يا عبدالله ! »

ديش اوده يالكز :

— « مع ابى »

جوانى ويره بيش ايكن ام اقبال بردها :

— « هل لك مثل الابل التى نحررت عنك ؟ وتقع

على الان ؟ »

دیدیکی حالدہ - باشقہ درلو اجابتہ وقتی اولیان -
عبداللہدن :

— « انا مع ابی ولا استطیع فراقہ الان »

جواب ردینی المشر .

عبدالطلب ، بنی زھرہ شیخی « وھب بن عبد
مناف » لکیزی « آمنہ » بی جناب عبداللہ او کون
تزویج ایتش عبداللہدہ ایتدیک ی تقرب و مواقعہ دن آمنہ
جناب احمد مرسل افندیمر حضرتلرینی حامل
وعبداللہک وجهندہ لمعان ایدن نور جلیل اجدی بی دم
انتقالاً حائر اولہ قالمشدی .

وقاع و جلدن صوکرہ ایدی برکون عبداللہ ، ام
اقبالہ کیندی . فقط ام اقبال ، بودفعہ ارزوی ازدواجدن
روی اعراض کو ستر مکله جناب عبداللہ :

— « بن اعراض ایتسہم سن نہ ایدہ جکسن ؟ »

دیدیکندن اکا قارشی ام اقبال :

— « سنک وجهکده کوروب احرازینہ ایمرندیکم

نور ، سندن مفارقت ایتدی . بوندنبویله سکا احتیاجم
قالمدی ،

جوابی ویرمشر .

*

**

ایشته او صروده قریش قومنه قحط وغلا بلیه سی
عارض اولدیغندن هرکس بر مضایقه شیده یه قارشی
پک مضطرب بولمقده ایدی. رسول اکرم صلی الله تعالی
علیه وسلم افندیغ حضرتلرینک عالم ارواحدن فک
رابطه سکون وقرار ایدوبده عالم اشباحده جلو مساز
ظهور اولدقلری او دقیقه دن اعتباراً انک حرمتنه فیاض
مطلق حضرتلری قریشک باغ وبوستانه اولقدر
فیوضات وبرکات احسان بیور مشدر که بتون
قریش ، او غنا سببیه هر شیدن مستغنی بر درجه یه
کشدی .

بناءً علیه عربلر او سنه یه [سنة الفتح والابتهاج]
دیدیلر . « فتوحات و مسرت سنه سی » دیمکدر .
حضرت فخر عالمک رحم مادرده نور پاش
وجود اولدقلری زماندن از بر مدت مرورنده وعلی
روایه وقوع ولادت ظاهر السعادة اجدیه لرندن ایکی
آی صوکره والد ماجدلری جناب عبدالله ، هنوز
یکرمی بش یاشنده اولدیغی حالدده فوت اولمشدر .

ولادت باهر السعادة محمدیه نک تقرب ایتمکده اولمسی
وذاتاً تشریف اجدیه منتظر و مترقب اولان عربان

وعشارك اثنای وقوع ولادتہ تبریک و تهنیتہ کله جکری
ملفوظ و بلکه مقرر بولمسی سبیلہ انلرہ ترتیب ایدیله جلت
ضیافت سفرہ لرینہ قونلق اوزرہ مدینہ نك کوزل خرما سندن
المق ایچون جناب عبدالمطلب ، والد ماجد نبوی عبد اللہی
مدینہ یه کوندر مشدی .

اثنای عودتندہ ایکی کونلک مسافہ بریده
« دار النابغة » نام محله دکین کلشکن اوراده فوت واندہ
دفن ایدلمشدر .

حبیب خدا افندیملک ، پدر عالیکهر لرندن ارث
طریقیلہ الدقلری مال ایسه ، یالکز بش دوه ،
بر سوری قویون ، « ام ایمن » نامیلہ مسماة برجاریة
حبشیہ ، برده کندی محل ولادت سنیہ لری بولنان خانة
سعادت لرندن عبارتدر .


دولتخانه مذکور ، مکہ ده بنی هاشم محله سنده
کائن ایدی . مؤخرأ « حجاج ظالم » ک برادری « محمد
بن یوسف » طرفندن « بیضاء » نامیلہ معروف اولان
قصر مشهورینه علاوه ایدلمش ودها صوکره هارون
الرشیدک والدهسی [خیزران] ، حج ایچون مکہ یه
کیتدیکی زمان اوخانه سعادتی مسجد اتخاذا یله مشدر .

او اثناده یعنی ذات احدینک هنوز رحم مادرده جنین
بر حالده بولندقلری زمانلرده فیل وقعه مشهوره سی ده
وقوعه کلشدر :

*

* *

۳



و

(ابرهه الاشرم)

شویله مرویدرکه :

یمنده ملوک حبشیه دن قبل الهجره « ۷۵ » ده حکو -
مت ایدن « ابرهه بن صباح الاشرم » ، عربلری طواف
وزیارت کعبه دن منع ایدوب کعبه نك بناء علیه بتون
بتون قطعات حجازیه نك ناس عنده اولان شرف
ومزلتی تنزیل ایتکله برابر ضعانك شهرتی ، مدنیت
ومعموریتنی اعلا ایتك فکریله ضعاذه [قلیس] نامنده
جسامتلی بر کلیسا یاپدیردقدن صوکره « محمد خزاعه »
نامنده بری « ایله قیس » اسمنده ایکی قرن داشی ، کعبه

رینه کلیسا طواغنه هر کسی جلب وتشویق ایتک اوزره
جانب بطحایه - مأموراً - کوندرمشدی .

او وقت بطحاده عربك وبانخاصه قریش قبيله سنك
رئیسى ، عبدالمطلب ایدی .

فقط ابرهه نك مكه ده كنى او آدملىنى ديكه يان
اولمقدن باشقه هذیل قبيله سندن « عروه بن عباس »
نام تیر انداز ، بونلك قتل واعدامنه مأمور ایدلمكه
عروه ، « محمد خزاعه » یی تلف ایده یلمش ايسه ده
رفیقى « قیس » قورتیلوب ابرهیه طوغرى فرار
ایتمشدر .

ابرهه ، مبعوثلى حقنده روا کوریلان شو معا -
مله دن طولایى غضب شدید حاصل ایدرك ، كعبه یی
یيقمق ، عربلى ده قیرمق فكريله ارتق ترتیبات وتجهيزات
عسكریه اجراسنه باشلادی .

برى طرفندن ده ضعاده یاپیلان او کلیسایى کورمك
اوزره « بنی فقیم بن عدی بن عامر بن ثعلبه بن الحارث
بن مالك بن کنانه » دن یمنه « زهیر بن بدر » نام فداكار
کورلمشدى . زهیر ايسه ، كوره جكنى كوردكدن
صوكره کلیسانك ایچریسندن بعض معامله غیر لایقه ده
بولنه رق فرار ایتكه موفق اوله بیلشكن ارقه سندن بری

تعقيب ايدن حبش آدملى يتشهر ك انى يولده قتل
ايتمشلردر .

*

**

ابن بدر ك شو جسارت واهانتنه قارشى ابرهده
حدت و شدت ارتقى چوق ارتوب زياده لشدى كچوندر كه
التمش بك موجودلى بيوك بر قوؤ عسكريه ايله مكه يه
طوغرى همان يولالاندى .

اردوسنك ايچنده « محمود » اسمنده ووجودى مدار
ظفر صايدقلى قوجه فيلاريله برابر اون ايكى فيلده
موجود ايدى .

اشاي سفرد - ملوك حيريه نسلندن - « ذونفر »
نامنده بر بهادر ، ابرهده قارشى حربيه چيقمش فقط
مغلوب واسير دوشمشدر .

بر مدت صوكره ينه يولده راست كلديكى بلاد
خشمندن « نفيل بن حبيب الخشمى » نام رئيسده ابره
عسكرينك اوكنه چيقوب مقابله و مقاومت ايتك
ايتديسده باشه كتيره ميهرك نهايت اوده مغلوب واسير
اولدى .

ابره ارتقى اله بيلديكنه يورور ايكن طائف حدو -
دينه يتشمشدى . طائف اشرف قبائلى اولان بنى

ثقیفدن « مسعود بن معتب الثقفی » نام ذات ، ابرههیه اطاعت واستقبال ایدمرک حتی مکهیه دکین یول کوستر - مک اوزره ثقیفیلردن « ابورغال » نامنده بر شخصی ترفیق دخی ایدی .

ابورغال ، کعبه معظمه علیهنده حرکت ایتمکده اولان دشمن عسکرینه ارتق قلاغوزلق ایدیور ایدی . لکن دشمن اردوسنک مکه جوارلرنده « مغمس » نام محله کلدیکی بر صرمده کنیدیسی او محله هلاک اولمش واعدايه اهل حرم علیهنده رهبرک ایدرکن هلاک اولدیغنه بناء قبری بالآخره رجم ایدلمشدر !

حتی شعرای عربدن ومعلقات سبعه نك طبقه سابعه - سی اصحابندن « جریر بن عطیه التیمی » ، مشهور « فرزدق » [۱] نام شاعر آتشزبانی هجوده بوقعهیه :

[۱] جریر ، « بنی تمیم » دن وفحول شعرای اسلامیه - دندر . معاصری بولسان [فرزدق] نام شاعر ایله اولان مهاجات شاعرانه لريله هر ایکیسی ده کسب اشتهار ایتلمشدری . تاریخ هجرتک ۴۲ سنه سنده تولد و (۱۲۰) سنه سنده ارتحال ایله مشدر .

(فرزدق) ، (هام بن غالب) اسمیله مسعی واشراف بن تیمدن بر شاعر در . کنیدیسنک چیرکین وشیشکین اولسی .

اذا مات الفرزدق فارجوه

كما ترمون قبر ابي رغال

يبتى ايله اشارت ايتشدرد .

ابرهنك ارتق حدوده تقربندن طبعي آگاه اولان
مكه عربلري ، بينلرنده ايتدكلري مذاكره و مشاوره ده
هر كسك عيالي الوب طاغله طوغري قاچمسي خصوصي
تسيب ايدلمشدي .

ابرهنه ، مغمس محله ده نصب خيام توقف ايدرك
رجال حبشيه دن « اسود بن مقصود » نام كيسه نك
قومانداسي التنده بر مفرزه عسكريه مكه طرفنه سوق
ايتمش اولديغندن فرقه مذكوره ، اهل تهامه حيوانا -
تندن انسه چكني چوبانلريله برابر سوروب اردوكاهه
كتيرمشدر .

حيوانات مذكوره ايله برابر اسير ايدلمش بولمان

(خير پارچه سي) ديمك اولان [فرزدق] لقبيله مقلب اولسنه
سبب اولمشدر .

فرزدق ، هجونده شدت ، قولنده سرعت التزام ايدر بر
شاعرايدى . بناءً عليه شعرا انك شدت لسان هاجيانه سندن
يك احتراز ايدردى . هجرتك ۳۸ نده تولد ، ۱۲۰ سنده
ارتحال ايله مشدر .

تقیفدن « مسعود بن معتب الثقفی » نام ذات ، ابرهیه اطاعت واستقبال ایدمرك حتى مكه یه دكین یول كوستر- مك اوزره ثقیفیلردن « ابورغال » نامنده بر شخصی ترفیق دخی ایدی .

ابورغال ، كعبه معظمه علیهنده حرکت ایتكده اولان دشمن عسکرینه ارتق قلاغوزلق ایدیور ایدی . لكن دشمن اردوسنك مكه جوارلرنده « مغمس » نام محله كلدیكى بر صرمده كندیسی او محله هلاك اولمش واعدايه اهل حرم علیهنده رهبرلك ایدركن هلاك اولدیغنه بناء قبری بالآخره رجم ایدلمشدر !

حتى شعرای عربدن ومعلقات سبعة نك طبقه سابعه- سی اصحابندن « جریر بن عطیه التیمی » ، مشهور « فرزдық » [۱] نام شاعر آتشرزانی هجوده بوقعیه :

[۱] جریر ، « بنی تمیم » دن وفحول شعرای اسلامیة- دندر . معاصری بولسان [فرزдық] نام شاعر ايله اولان مهاجات شاعرانه لریله هر ایکیدی ده کسب اشتهار ایتلمشردی . تاریخ هجرتك ۴۲ سنه سنده تولد و (۱۲۰) سنه سنده ارتحال ايله مشدر .

(فرزдық) ، (هام بن غالب) اسمیله مسمی واشراف بن تیمدن بر شاعر در . كندیسنك چیرکین وشیشکین اولسی .

اذا مات الفرزدق فارجوہ

كما ترمون قبر ابی رغال

بیاتی ایله اشارت ایتشدیر .

ابرہہ نك ارتق حدوده تقریدن طبیعی آگاه اولان
مکہ عربلری ، بیلرلنده ایتدکلری مذاکره و مشاوره ده
هر کسک عیالنی الوب طاغلره طوغری قاچمسی خصوصی
تنسیب ایدلمشدی .

ابرہه ، مغمس محلنده نصب خیام توقف ایدرک
رجال حبشیه دن « اسود بن مقصود » نام کیسه نك
قومانداسی التنده بر مفرزہ عسکریه مکہ طرفنه سوق
ایتمش اولدیغندن فرقه مذکورہ ، اهل تمامه حیوانا -
تندن انسه کچی چوبانلریله برابر سوروب اردوگاهه
کتیرمشدر .

حیوانات مذکورہ ایله برابر اسیر ایدلمش بولنان

(خیر پارچه سی) دیمک اولان [فرزدق] لقبیله مقلب اولسنه
سبب اولمشدر .

فرزدق ، هجونده شدت ، قولنده سرعت التزام ایدر بر
شاعر ایدی . بناءً علیه شعرا انك شدت لسان هاجیانہ سندن
يك احتراز ایدردی . هجرتك ۳۸ نده تولد ، ۱۲۰ سنده
ارتحال ایله مشدر .

ترویح واسعاف ایولکی نصیب اولیدی»

دیه خیالندن باشقه جه کیزلی بر فکر کچمشدی !

بونک اوزرینه ابرهه ، عبدالمطلبه خطاباً :

— « کوزومدن دوشدک ! آبا واجدادیکزک تعظیم

ایده کلدیکی کعبه یی یقیمغه کلدیکم حالدہ انی هیچ قاله بیلہ

المدکده کنددی دودلریکک لاقردیسنی ایتک کبی جیتسزلک

اظهار ایدیورسک »

دیه رک اندن :

— « بن انجق دودلریمک صاحبی یم . کعبه نکده -

جایه ایده جک - صاحبی وار ! انی او جایه ایدر »

جوابی الدقدن صوکره دودلری اعاده ایتشدر . فقط

انک عقینده عسکرینی کعبه یه طوغری همان سوق

ایتکه ده باشلامشدر .

وقتا که ابرهه ، عسکرینی مکبه سوقه باشلادی

حرم بیت اللهک قرب وجوارینه کلدکری بر صروده ،

یولده اسیر ایدیلان « نفیل بن حبیب الخثعمی » نام

ذات ، « محمود » اسمنده کی قوجه فیلک قولاغنی طوته -

رق اکا :

— « ابرک محموداً ! وارجمع راشداً من حیث جئت

فانک فی بلد الله الحرام »

دید کردن صوکره قویورمشدی • ایشته اوصرهده آیدی
قوجه محمود، بردنبره چوکوب یره او طور یورمشدر •
فرقه فیلیه نك ریاستنی حائر اولان محمودك اووضع
محترزانه سنی کورن اتباعی ده عسکره اطاعتدان روکر-
دان اولدی : حرکتده رئیس لرینه تابع اوله رق برخطوه
ایلری یه کیمتدیلر •

فیلرک کعبه طرفنه هجوم وحرکتلر یچون عسکر
طرفندن ایدیلان غیرتله، کلیاً تأثیرسنز قالدی •
حالبوکه کری طرفه، یاخود شام وشرق طرفلرینه
توجیه اولندقلری زمان همان هروله ایله یورومککه
باشلار ایدیلر •

*

**

حافظ حقیقی طرفندن « ابایل » قوشلری، ابرهه
عسکرینک اوزرینه مسلط بیورلدی • « ابایل » • اک
زیاده قرلانغیج قوشلرینه بکزدی •

قوشلر، بری اغزلرنده، ایکیمی ایاقلرنده اولمق
اوزره اوچر عدد حجتیر پاره یی حامل ایدیلر •

اوילה بر هیئتده اولدیغی حالده جانب بحردنبری
کلوب عسکره یتشدکدن صوکره حامل اولدقلری
طاشلری برر برر آتمشلر • قزغین طاشلرک ایسه

طوقانديغي عسکر يا در حال بستیون هلاک و یاخود
فنا حالده زخماک اولور ایدی .

ابرهنک عسکری بو صورت قبیحه ایله هزیمته
دوچار و « کعصف مأ کول » نظم جلیلی منظوم قبیحه
پریشان و تارومار اولدی . حتی ابرهنه دخی اوکون
جریحه دار دوشدی . بیکارله بلا و مزاحم ایله یمنه
دکین قاجه بیلش ایسه ده « حجارة من سجيل » دن الیغی
یاره دن متأثراً هلاک اولمشدر . قبل الهجرة « ۵۳ » .

عبد المطلب ایسه دوه لرینی قورتاروب ابرهنک
یانندن ایرلقدن صوکره کندی یاننده بنی ثقیفدن « ابو
مسعود » نامنده برامی بولدیغی حالده کعبه قابوسنک
حلقه سنی طوته رق الله عزوجل حضرتلرینه :

لاهم ان المرء يمنع رحله فامنع رحالک

وانصر علی آل الصلیب و عابديه الیوم آلاک

لا یغلبن صلیهم و محالهم عد و امحالک

ان کنت تارکهم و کعبتنا فأمربدالک

کبی تضرعاتده بولنه رق صیانت بیت الاهی جناب الاهی
حواله ایله دکدن صوکره مکهنک خارجنده طاغه
چیقمشدی .

ایرتسی کون مکه قومندن دهاکیمسه میدانه کیروب

کوروئمدن عبد المطلب، عسکرك حانندن ممکنسه خبر
المق اوزره رقيقيله برابر طاغدن ايندى .
فقط عسکرك هلاك اولديغنى کوروئجه ايکيسى
اولا اردو يرئده ذيقيت چوق اشيا بولوب صاقللا-
مشلردر .

براز صوکره وقعهدن خبردارايتديكى مکهاهاليسى ده
اردوگاهه يتشهرك اوراده دها باشقه بر چوق مال
بولديلر . که کرك بويله بر دشمن قويدن زحتسزجه
خلاص ، کرك بويله بر غنيمت عظيمه نائلت هپ خاتم
الانبيا محمد المصطفى عليه افضل الصلوة واکمل التحايا
افنديمز حضرتلرينک حرمتنه ايندى .
بتون خاندان بنى هاشمک زنکين ومالدار اولسنه
سبب ، اوکون عبد المطلبک هرکسدن اول بولوب
الديغنى مال ايندى .

بناءً عليه معارضه ايتک ايستيان قبائل سائرء عرب ،
قريشک من طرف الله مؤيد برقبيله اولديغنى يقيناً بيلهرك
فکر جدال ومعارضه دن واز کچمکه مجبور اولدى .
ايشته بووقعه نك سنه سى عربلرجه « عام الفيل »
ديه مسمى ومشهوردر .

وقعه مذکورہ بالاخره شعراجه سرمايه بحث و

مقال اوله رق حقنده پك چوق اشعار انشاد ايداشدر .
 از جمله بلغای شعرای عربدن « امیه بن ابی الصلت
 بن ربیعہ » [۱] وقعه فیلی تصویرده :

ان آیات ربنا باقیات
 ما یماری فیهن الا الکفور
 یخلق اللیل والنهار فکل
 مستنیر حسابہ مقدور
 ثم یجلو بها ورب رحیم
 بمهارة شعاعها منشور
 حبس الفیل بالمغمس حتی
 ظل یحبو کأنه معقور
 لازماً خلفته الحران كما
 قطر من رأس کوكب محذور
 حوله من ملوک کنده ابطا
 لملایوت فی الحروب صقور

[۱] اشبو امیه نك نه کبی بر آدم اولدینی ایلریده -
 وقعه بدر صره سنده - بر مقدار یازیله جق وشو جلدك
 نهایتده ده اکا دائر آریجه بر مبحث مخصوص مختصر علاوه
 ایدیله جکدر .

خلفوه ثم ابد عروا جميعاً
كلهم عظم ساقه مأسور
كل دين يوم القيامة عند الله
الا دين الخيفة بور

اشعار بنی انشاد ایتدیکی کبی « صفی بن خیشم بن وائل
الخطمی بن زید بن قیس بن عامر بن مره بن مالک بن
اوس الانصاری » ده :

ومن صنعه يوم فيل الجيوش
اذا كلما بعثوه رزم
محاجنهم تحت اقرايه
وقد شرموا انفسه فانخرم
وقد جعلوا سوطهم معولاً
اذا يمحوه قفاه كلم
فغولي وادبر دراجه
وقد باء بالظلم من كان ثم
فارسل من فوقهم حاصباً
يلقهم مثل لف القزم
تخرت على الصبر اجسادهم
فقد تاجوا كثر واج الغنم

فقوموا فصلوا ربكم فتمسحوا
 باركان هذالبيت بين الاخاشب
 فعندكم منه بلاء ومصدق
 غداة ابي يكسوم هادى الكتائب
 كتيبتة بالسهل تمشى ورحله
 على العادقات فى رؤس المناقب
 فلما اتاكم نصر ذى العرش ردهم
 جنود مليك بين ساق وصاحب
 فولوا سراعا هار بين ولم يؤب
 الى اهله بالجيش غير عصائب

قطعه لربنى سويله مش و « فرزدق » ده هم حجاجى، هم
 وقعة فيلى ذكر ايده رك :

فلما طغى الحجاج حين طغى به
 غنى قال انى مرتق فى السلام
 فكان كما قال ابن نوح سأرتقى
 الى جبل من خشيته الماء عاصم
 رمى الله فى جثمانه مثل مارمى
 عن القبلة البيضاء ذات المحارم
 جنوداً اسوق الفيل حتى اعادهم
 اليه عظيم المشركين الاعاجم

نظم رنكينى انشاد ايتشدر •
 « عبد الله بن قيس الرقيسات » ده ابرهة الاشرم
 ايله فيلنى ذكر ايدمرك :

كاد الاشرم الذى جاء بالفى
 ل فولى وجيشه مهزوم
 واستهلت عليهم الطير بالجنة
 دل حتى كأنه مرجوم
 ذلك من يغرو من الناس يرجع
 وهو فل من الجيوش رميم
 شعر دليسندينى، « منيره بن عبدالله الخزومى » دخى :

انت حبست الفيل بالغمس
 حبسته كأنه مكر دس
 مذماهم هم بشر مجلس
 بمجلس تزهق فيه الانفس
 وقت بباب ربنا لم يدنس
 يا واهب الحى الجميع الاخس
 ومالهم من طارف ومنفس
 وجاره مثل الجوارى الكنس
 انت لنا فى كل امر مضرس
 نفثات اخذت بالانفس

غزل بديع بليغني ، كذلك « طالب بن ابى طالب » ده :
 الم تعلموا ما كان فى حرب داحس
 وجيش ابى يكسوم اذ ملؤا الشعبا
 فلو لا دفاع الله لاشئ غيره
 لا صبحتم لا يمنعون لكم سربا
 قطعه سنى انشاد ايتشدرد .

بونلردن باشقه « عبدالله بن الزبيرى » ده :
 يتكلموا من بطن مكة انها
 كانت قديماً لا يرام حريمها
 لم يخلق الشعرى ليا لى حرمت
 اذ لا عزيز من الانام يروها
 سائل امير الجيش عنها ما رأى
 ولسوف ينبي الجاهلين عليها
 ستون الفاً لم يؤبوا ارضهم
 بل لم يعش بعد الاياب سقيمها
 كانت بها عاد وجرهم قبلهم
 والله من فوق العباد يقيمها

ديمشدر .

*

**

ایشته بوقعه عظیمه غریبه کوندن الی کون
دها مرورندن صوکره ولادت باهرالسعادة جناب
احدیه شرفوقوع بولشدر . اللهم ارزقنا شفاعته یوم
يقوم الحساب !

* *

ع

مولد جلیل پیغمبری

شهریار سریر اعلاى ناسوت ، شہسوار حریم بالای
لاہوت ، شرفیاب خطاب تجلیل « لولاک » ، آفتاب
عواملتاب معلای « افلاک » ، مظهر نکاہ تکریم « وما
ارسلناک » ، کلچین کلشنسرای بی منہای « انا اعطیناک »
اولان اشرف مخلوقات ، مفخر موجودات علیہ افضل
الصلوة واکمل التحیات افندیمز حضرتلری کہ خاتم الانبیا
محمد المصطفی صلی اللہ تعالی علیہ وسلمدر - « آمنہ بنت
وہب » دن - اشبو عام الفیلده واقع شهر ربیع الاولک
اون ایکنجی و ماہ نیسانک برنجی و علی روایہ اون
یدنجی بازار ایرتہ سی کیجہ سی سحر وقتندہ نیر پاش
عالم شہود اولمشلردر .

حضرت آدم علیه السلام دن بری اولاددن اولاده
انتقال ایده کلش اولان نور خاتمت ، شمدی آمنه دن
کچهرک صاحبنی یعنی مستقر عالیسنی بولوب انده تقرر
وتنور ایتدی .

*

**

ولادت جلیله اجدیه زمان سعادت اقترانلرنده
یک چوق خوارق عادات مشاهده ایداش وحتی اولیله
جلیله المنزله ولادتک فرداسی صباحی ، کعبه معظمه
درونده کی اصنامک یوزی اوستی یره دوشمش بولنه رق
کورنلری متحیر ومبهوت براقشدر .

کذلک حضرت آمنه ، هنگام حل ووضعه کی
حسیات ومشهوداتی حکایه صرہ سنده اوله رق دیر
ایمش که :

— « بن ، نه جلدہ ، نه ده وضع اثنالرنده قادیلرک
کوره کلدیکی کبه لک زحمتی چکمدم . فقط زمان جلدن
آلتی ای یکدیکی صرہ ده بر کیجه رؤیامده کوردم که
بر کیسه کلوب ایاغیله بکا طوقوندقن صوکره : « یا
آمنه ! محققا بیل که ! سن خیر العالمینی حاملسین .
طوغوردیغک زمان انی محمد اسمیله تسمیه ایت ! »
دیمشدر . وقت ولادت ایریشوب ده اوجاع وعلامات

وضعیه کند مده ظهور ایتکه باشلادیغی ائاده ایدی
 بیوک برسس ایشتم . اوسس بنی بر دفعه چوق قور-
 قوتمشدر . همان بر ااق قوش کلوب قنادیلہ ارقہ می
 مسح ایدنجه اولجه کندیمہ عارض اولان قورقق ،
 اورمک کبی حاللر بردنبرہ مندفع اولدی . بر یانمہ
 باقدم بیاض بر کأس طولوسی شربت بولدم . سود
 ظن ایتدم . ذاتاً تشنه بولندیغ جهتلہ انی همان ایچدم .
 ایچدیکم اندہ هر طرفم بیوک بر نور ایلہ محاط اولدی .
 بعدہ اطرافدہ کوردم کہ عبد مناف قیزلرینہ بکرر غایت
 اوزون بویلی بر چوق قیزلر بنی طواف ایدیورلردی .
 بن اونلردن متعجبہ اوله رق :

— « واغوثاه ! من این علم بی هوألا ، ؟ »

دیدم . زمان یکدیجہ حسیات مخصوصه مده شدت زیاده .
 لشهرک وضعک تقریبی اکلار ایدم . او بیوک سسی دخی همان
 هر زمان ایشیدیردم . هوا اوزرندہ قائم بر طاقم کیمسه لری
 ده کوردم . اللرنده کوشدن ابر یقلر موجود ایدی .
 بن اوزمانلر مسک از فردن دها زیاده کوزل قوقولی
 ترلر دوکر طورور ایدم . جناب الله ، او ساعتده
 کوزومدن حجاب حائلی قالدیرمش اولمغله اوچ عدد
 بایراق کوردم . بری مغربده ، بری مشرقده ، بری ده

ظهر بيت اللهه ديكلمشدى • حسياتم دها زياده
مشتداولدى • بن قادينلرك قوجاغنده متكى كى برطرزده
قالدم • ايشته او آنده ولديمى توليد ايدم • • • • *

*

* *

حضرت آمنه نك هنكام وضعدهكى مشهوداتى
يالکز بو معدودات ومحصوراته منحصر اوليوب اك
زياده مكمل تفصيلات، محى الدين بن عربى حضرتلرينك
جلد ثانى « مسامرات الاخيار » نده موجوددر •

*

* *

« صفيه بنت عبدالمطلب » دن مرويدرکه ::
بن او كچه آمنه نك ياننده ايدم • حضرت سيد
البشر افنديز طوغوبده ارضه سقوط ايتديكى زمان
بر وضعيت ساجدانه اوزره دوشوب همان سجده
ايتشدز •

سجده سنده نه ديديكنى ديكده ديكده انك « امتى »
امتى « ديه نياز ايتكده اولديغنى كوردم • واو سجده سنى
متعاقب باشنى يردن قالديرديغنده « لا اله الا الله وانى
رسول الله » ديديكنى ده ايتشدم •

طوغوبده سجده وارديغى زمانلرده داخل بيت
اويله برنور ايله مستنير اولمشدى كه سراجك ضياى

اونور اجدی به قارشى مغلوب ومنطقى اوله قالمشدى .
ارکک اولوب اولمديغنى اکلامق ايستدم . کوردم که
سنملى !

غسلنى مراد ايتديکمه هاتف غيبي بکا خطاباً :
— « يا صفيه ! کنديکه زجت ايمه ! بز اوڻى
مغسولاً ، طاهرأ ، طيبأ اخراج ايتدک »
ديه ندا ايتمشدى .

*

* *

کذلک او کيچه حضرت آمنه نك ياننده بولنش
اولان « شفا » نام قادين - که عشره مبشره دن عبدالرحمن
بن عوف الزهرى حضرتلرينک والده ليدر او - دخی
مشرق دن مغربه دکين بتون جهانک نور ايله طولديغنى
کورمک کي انواع خوارق مشاهده ايله ديکنى اوغلى
عبدالرحمنه ، اوده ديکرلره حکايه ايتشدر .
عبدالمطلب دخی او کيچه مسجد حرامده ايکن
هاتفدن :

— « مؤده يا عبدالمطلب ! شمدى آمنه دن برچوجوق
طوغدى . وجودى عالمه رحمتدر »
صدای تبشیر بنى ایشتمش واوده همان آمنه نك خانه

سنه كيدوب اوراده نيجه خارق العاده شيلرى تماشا
ايلاه مشدر .

..

كعبة معظمه دروننده كي بتلرك يره دوشوب سرلديكنندن
باشقه خاك پارسده دها برچوق خوارق عادات احوال
غريبه سرنماي ساحه ظهور اولمشدى :

از جمله عجمده ايوان كسرى - كه ملوك ساسانيا -
نيه دن قبل الهجره « ۲۴۲ » ده وفات ايدن شاپورك
بنا كرده سيدر - فنا حالده صارصيلوب اون درت عدد
شه نشيني [برجى ، شرفه سي] ييقلمش ، كذلك فارس
ولايتنده اصطخر آباد شهرنده مجوسيلرك بيك سنه دن
برى يانمقده اولان آتش كده لرى ده سونوب منطقي
اولمشدر .

ممالك ايرانيه ده واقع اولوب طولى وعرضى التى
فرسخدن زياده جه بولنان ساوه كولى دخی يره باتوب
تابديد اولدى . ويك سنه قدر بر زماندن برى صوبى
كسيلوب قورويه قالمش اولان سماوه واديلرنده بالعكس
صولر طاشدى . كه وقوعات مذكوره يه امام بو
صيرى رحمه الله تعالى حضرتلرى قمبيده فريده
برنه لرنده :

یوم تفرس فیہ الفرس انهم
 قد اندروا بحلول البؤس والنقم
 وبات ایوان کسری وهو منصدم
 کثمل اصحابه کسری غیر ملتئم
 وانار خامدة الانفاس من اسف
 علیه والنهر ساهی العین من سدم
 وساء ساوة ان غاضت بحیرتها
 ورد واردها بالفیظ حین ظمی

بیتلریله اشارت بیورمشلردر .

فرس قاضی القضاتی « موبدان » دخی او کیجه

منامنده :

— « بر طاقم سرکش دوهلرک ، عرب آتلیرینی
 یدهرک دجله یی عبور وعراق عجمده انتشارایله دکلرینی »
 کورمشدی .

شاه عجم اولان « نوشیروان » که — ملوک ساسانیا -
 نیه بقیه سندن و قبل الهجره « ۹۱ » ده تسلطن ایتیش
 بر ملک ایدی — ایوانک صار صیلوب شرفه لرک انهدامی
 خصوصنی قرناسیله صبا حلین مذا کره ایدرکن اصطخر
 آبادده آتشد لرک انطفا سی خبری کلش اولدیغندن شاهک
 اضطرابی ارتدی .

بو صروده ساوه كولنك يره باتديغي ، سماوده
 صورك طاشديغي حوادثي ده كلنجه ارتق بوسبتون
 اندیشه لر ايچنده شاشيره جق درجه سنه كلان نوشيروان ،
 قاضيسي موبداني جلب ايدرك وقعه لري سويله دي .
 اوده اكا مقابل ، كورديكي مدهش رؤيائي آچدي .
 فقط او رؤيا ، نوشيروانك خلیجان واضطرابه برضمیمه
 اولديغندن كيفيتك نهيه علامت اوله بيله جكني موبدانن
 صوردي .

موبدان ، ذاتاً نه اولديغي ، نهيه دلالت ايله ديكني
 بيلديكي حالده يالكز :

-- « عربستانده بيوك بروقوعات اولسه كر كدر »
 جوابيله اکتفا ايتدي .

*

كر ك رؤيانك ، كرك وقوعات سائر نك فرس لرجه
 كسب ايله ديكي اهميته بناء نوشيروان ، كنديسنه تابع اولان
 حيره ملكي « نعمان بن منذر » :
 — « بكا بر عرافه بولوب كوندر ! »

ديه امر ايتدي كنده اوده ، فراست و كهانتيله معروف
 و « عبدالمسيح » لقبيله ملقب اولان « نعمان بن عمرو بن
 حسان بن بقیلة الغسانی » نام كيمسه يي او زمان

کسرانک تختگاه سلطنتی بولنان « مدائن » شهر شهیرینه
کوندرا مشدر .

عبدالمسیح ایسه ، نوشیروانک صوروب اکلامق
ایستدیکی مغیباتی کنديسندن دها اعلا بيله جک اولان
« سطيح شامی » به مراجعتی ایستمکه نوشیروان اکا اولوجهله
مساعده ایتشدر .

سطیح ، ارض شامک « جابه » دنیلان محلهده ساکن
ایدی . هم او زمان مرض موت ایله مشغول ایدی .
حتی عبدالمسیح واروبده سلام ویردیکی حالده سلامنه
جواب بيله آله مدی . بناءً علیه پک زیاده سیله مأیوس
و متأثر قاله رق سطيحک تأثرینی موجب اولمق اوزره
حضورنده :

اصم ام یسمع غطریف الین
ام فارق ازلیم به شاو العین
یا فاصل الخطه اعیت من ومن
وکاشف الکربة فی الوجه الغضن
اتاک شیخ الحی من آل سنن
وامه من آل ذئب بن حجن
تحمله وجناء تهوی من وجن
حتی اتی غار الجأجی والفظن

قصیده سنی انشاد ایدوب مقصدینی صورت شاعرانده
بیان ایله ییجه اکا قارشى متأثر قالان سطح ارتق کوزینی
اچهرق :

« عبدالمسیح یهوی الی سطح علی جبل مشیح . وقد »
« اوفی علی الضریح . بعثک ملک ساسان . لارتجاس »
« الایوان . وخود النیران . ورؤیا الموبدان . رأى »
« ابلاً صعباً . تقود خیلاً عرباً . قد قطعت دجلة »
« وانتشرت فی بلادها . یا عبدالمسیح ! اذا کثرت »
« النلاوه . وظهر صاحب الهراوه . وخدت نار »
« فارس . وفاض وادی السماوه . وفاضت بحیره »
« ساوه . فلیس الشام للسطح شام . یملك منهم ملک »
« وملکات علی عدد الشرفات . وكل ماهو آت آت »
یعنی :

« عبدالمسیح سرعتلی دوه اوزرنده اولدیغی حالده »
« سطحه کلدی . سطح ایسه اولوم حالنده در . سنی »
« ملک ساسان کوندردی . ایوانک صار صیلوب »
« ییقلسنک ، آشکده لک سونوب منطفی اولسنک نهیه »
« دلالت ایتدیکنی ، رؤیای موبدانک ده تعبیرینی »
« صوریور . موبدان کوردی که : بر آلاى سرکش »
« دومر ، عرب آتارینی پده رک دجله یی کجوب مملکتنه »

« یایلدی . ای عبدالمسیح ! اولوقت که تلاوت یعنی »
 « او قومق چوغاله . صاحب هراوه ظاهر اوله . »
 « نار فارس سونه . سماوه وادیسی طاشه . ساوه »
 « کولی یره باته . شام ارتق سطح ایچون شام »
 « دکدر . یقیلان شرفه لک عددنجه آل ساساندن اون »
 « درت ملک و ملکه پادشاه اوله جق . وهرنه که که جکسه - »
 « قریباً - که جکدر . »

جوابی ویرمشدر !

بو جوابی بتیردیکنک عقینده سطح همان فوت
 اولمشدی . بعده عبدالمسیح :

شمر فانک ماضی الهم شمیر
 لا یفز عنک تشدید و تعزیر
 فرمما ربما اضحوا بمنزلة
 یهاب صولهم الاسد المهاصیر
 منهم اخو الصرح بهرام و اخوته
 والهزمزان و سابور و شابور
 والناس اولاد عللات فن علموا
 ان قد اقل فمهجور و محقور
 وهم نبو آدم لما رأوا بأسنا
 فذاك بالغیب محفوظ و منصور

والخير والشر بمجموعان في قرن
فالخير متبع والشر محذور

ديهرك مديانه طوغري عودت وسطيح شاميدن اخذ
وتلقى ايله ديكي معلومات غيبه يي نوشروانه تبليغ وتفهم
ايشدر .

فقط « ايوانك اون درت شرفه سي عددنجه اون
درت پادشاهك كلوب چمسي اوزون زمانلره محتاجدر »
ديه ايشك هم او طرزده ، هم ده قريب زمانده ايرانك
اويله پك بيوك بر حادثه انقراضيه اوغرايه جغني و
اوغرايه يلმسنی بعيد كورن نوشروان ، ارتق نه رؤيايه
نده سائر حادثات غريبه اهميت بيله ويرمك ايسمدي .

في الحقيقة اون درت پادشاه ، على ما جرت العاده
كلوب كنجيه دكين برچوق زمان كچه بيلير ايدي . لكن
نوشيروانك قبل الهجره « ۴۳ » دهكي وفاتندن صوكره
ساسانيان دولتنك اختلاله اوغرايان هر درلو احوال
سياسيه سي اره سنده يالكز درت سنده اون حكمدار
كلوب چمش و ساسانيانلرك مدت سلطنتي ده ظن اولنديغي
قدر اوزانه ميوب مملكتي قريباً اهل اسلام انه چمش

و حتی اون در دنجی پادشاهلری اولان یزدجرد ،
حضرت عثمان ذی النورین افندیملک زمان خلافتلرنده
کوردیکی تضییقات اسلامیه قارشى محافظه و اداره
ملکدن عاجز قالدیغندن تاج و تختنى ترك ايله فرار و
[مرو] بلده سنده اختفا ایتیش اولدیغى حالدده قتل
ایدیلهرك دولت ساسانییه بعد الهجره « ۳۱ » ده
ایشته اوصورتله محو و منقرض اولمشر .

حضرت عائشه دن روایة منقولدرکه :

مکده بر یهودی ، ولادت احمدیه کیجه سی صباحی
مجمع قریشه کیدوب :

— « ازا کزده بر چوجق طوغدی ؟ »

دیه صورهرق :

— « اوت عبد الله بن عبد المطلب بو کیجه بر

اوغلی طوغدی »

جوانبی المسی اوزرینه :

— « ایشته اوچوجق ، خاتم الانبیادر . ظهرنده

علامتی ده وار »

دیه خبر ویردیکنندن جماعت قریشه قالقوب عبدالهک
خانه سنه وار مشلر . اول حضرت قی کور مشلر . یهودی
ایسه اونک شکل و شمائل شریفه سعادتنامه باقوب مهر

نبوتی ده کورد کردن و عقلی باشندن کیتش درجه سنده
کلیکنی طوریه اظهار ایتد کردن صوکره :

— « نبوت ارتق بنی اسرائیلدن کیتدی • بوندن
بویله پیغمبر کلک احتمالی قالمدی • قریشه اوילה بر سطوت •
اوילה بر شوکت، اوילה بر دولت توجه ایده جک و ایتشدن
که صیت و شهرتی مغربدن مشرقله دکین واره جقدر •
دیتشدن •

*

**

عبد المطلب ایسه ، بوکبی خیرلی علاماتی کوروب
صورت فوق العاده شاد اولور ایدی • حتی ممنونیت
و محظوظیت فوق العاده لرینی اعلان ایده رک تحدیث
نعمت ضمننده جناب الله اولان شکر و محمدنی مشعر بر
کوزل قصیده دخی سویله مشدر •

*

**

۵

رضاع پیغمبری

اهالی مکه ، تولد ایدن چو جقلرینی عشاردن
بر سودانایه و یرمک کندیلرنجه عادت ایدی •

بناء علیه عشایردن اره صره مکیه سودانالفه
کلانلر اکسک اولماز ایدی .

دایه اوله جق قادین ، چوجغی آلوب یری یوردی
تره ایسه اورایه کتیرر ، ارضاع ایدر ، بیودور ،
تربیه ایدر ، بعده کتیروب ابویننه یا اولیاسنه تسلیم
ایدردی . که ایشته او زمان تسلیمده دایه لره ابوین ویا
اولیای اطفال طرفندن بر زمان اکرام واحسان
دیمک ایدی .

مولد جلیل جناب احدی اثناسنده « بنی سعد بن
کر » قبیله سندن سودانلق ایچون مکیه برطاقم کیسه لر
کشلردی . بونلردن هربری ، برر چوجق الدیغی حالده
چلرندن حارث نام کیسه نک زوجه سی « حلیمه بنت
ذؤیب » ده حضرت پیغمبری الوب کتیرمشدی .

روایاته کوره حلیمه تسلیم ایدلزدن مقدم حضرت
مهری ، اوچ ویا یدی کون والدہ ماجده لری آمنه ،
ه برمدتده « ابولهب بن عبد المطلب » ک جاریه سی
یه ، ودرت آیده عبدالمطلبک دایه سی « مسروه »
نماع ایتشدر . صوکره « حلیمه السعیدیه بنت ابو
ب » ویرلدی .

حلیمه اول حضرتک یتیمکی ، بناء علیه فقیرلکی

حسبيله بردفعه امتناع ايتش فقط رفقاسندن هر برى
برر دانه رضيعه بولديغى حالده كنديسى باشقه الهجق
چوجق بوله مديغنه باقه رق صوكره المشدر .

*

**

بنى سعد ديارنده اوسنه قحط و غلا اولديغى كى
حليمه نكده مملرنده ارضاعه كافى سود يوغيكى حضرت
پيغمبرى الديغى كى همان سودك چوغالديغنه تعجب
ايتدى .

يوردينه وارنجه حيواناتنده كوردىكى تكثر لى
كيفيتى حيرت و تعجبى بر قاندها ارتيردى . بولردن
باشقه خانه سنده فوق العاده بركت چوغالدى .
بوخصوصا، حارثك نظر دقتنى جلب ايدى حى
زوجه سى حليمه برارالق ديدى كه :

— « يا حليمه ! بو كيرديك چوجغك ياغى
اوغورلى ايمش ؟ او، كلهلى كچه لريمز خير اولدى ! »
بناء عليه هر شيلرندن دهها زياده اكا دقت ايتدى

اوزره بيلرنجه قرار ويرديلر !

حليمه ايسه ذاتاً حضرت پيغمبرى كندى اولادنا
دهها زياده سور ايدى . حتى بو يو بو بده اياق اوز
كز مكه باشلا ديغى زمان اناسى آمنه آنك اعاده ايدى

امر ايله ديكى حالده حليمه ، مكده هوانك وخامت و
ثقلتندن بختله برمدت دها كندى ياننده قالمسنه مساعده
المشدى .

*

* *

۶

انشقاق صدر

فخر عالم صلى الله تعالى عليه وسلم افنديمى حضرتلرينك
- ارها صات اجديه لزنندركه - درت ياشنه كيردكلى بر
صرده انشقاق صدر وقعه غريبه سى واقع اولمشدر :
حليمه نك « آيه ، صديقه » نامنده كى ايكي قيزندن برى
قويونلى اوتارمق ايجون بركون صحرايه الوب كتيرديكى
انئاده فخر عالم افنديمى دخی انكله برابر كيمش ويانلرنده
دها برقايچ چوجق ده بولمشدى .

برارالق طرف سمدن ، بياض البسه لى اوچ شخصك
يره اينهرك او حضرت اجديه نك كوكنى ياروب قلبنى
چيقاردقلىنى كرك همشيره سى ، كرك ديكى چوجقلى
كورمكله همان اورادن سير سريغ ايله كرى يه قوشه رق

کوردکاری شیئی حلیه ايله حارثه حکایه ایتدیلر .
 اندردخی همان باغیره باغیره اوستمه قوشوب کیتشلر .
 فخر عالم افندی می بیوک بر صخره اوزرنده متبسم بر
 حالد بولد قلرندن باشی کوزینی اوپد کدن صوکره اکا :
 — « نصلسین ؟ یا محمد ! »

دیه صور مشلر !

حضرت فخر کائنات افندی میز دخی :

— « بیاض البسه لی اویچ شخص کوکدن ایندی .
 الارنده التوندن بر ابریق ايله برده لکن وار ایندی .
 کوکسمی یارهرق ایچرمده نه وار ایسه هپسینی چیتقار .
 دیلر . لکنک ایچنده یقنا یوب ینه ایچری یه قویدیلر .
 قلبی یاردیلر . « بوشیطانک حظیدر » دیه سیاه بر قان
 اقیدهرق لکنک ایچنده تمیزلد کدن صوکره یرینه قویدیلر .
 بعده هراوچی ده قارنمی الاريله اوغونجه قارنم اولکی
 کبی صاغ وسالم اولدی . »
 جوابی ویرمشدر .

بونک اوزرینه حارث ، وقعه یی جنته جل ایدهرک
 برکاهنه مراجعته لزوم کوردی .

کاهن ایسه کرک وقعه یه ، کرک چوجنک شکل
 و شمائل شریفه سنه ، اخلاق و اطوارینه نظر دقت و امعان

ایله باقدقدن وبر صورت ممنونیت و محظوظیت اوزره
اول حضرت قوجاقلایوب سودکدن صوکره جواب
ویردی :

— « وقعه علامت جنت دکل . بلکه علامت
نبوتدر . بو ، سزک دینکزه دشمنی ؛ بتلریکزی قیره جق ؛
دینکزی محو و دیکله میانلریکزی قهر و برباد ایده جکدر ! »

*

* *

اشبو شق صدر وقعه سنی ، قرآن کریمده « الم
تشرح لك صدرک » آیت کریمه سی : « یا محمد ! سنک
صدر شریفکی بزشرح و توسیع ایتدکی ؟ » کبی بر مآلده
اوله رق تضمن ایتدکده در .

صدر ایسه احوال نفسه محل و علوم ، ادراکات ،
ملکات ، ارادات ، کبی سرائر نفسیه مخزن اولدیغندن
قوای قدسیه و کالات انسیه ایله تأیید و تحلیله و دائره
تصرفاتک توسیعندن کنایه « الم نفسحه »
معناسنه « شرح » ماده سیله تعبیر ایدلمشدر . تاکه
« غیب » ایله « شهاده » عالم لرنی و « افاده » ایله
« استفاده » ملکه لرنی جامع اولسونده علائق جسمانی
تیه اولان تعلق و ملاست او حضرت نبی ذیشانی ،

اقتباس انوار ملکات روحانیه دن صدومصالح خلقه
اولان تعلق دخی شؤن حقه استغراقدن منع ایتش اولق
شائبه سی بولنسون !

آیت کریمه ده کی شرح ده بری مادی بری معنوی اولق
اوزره ایکی درلو قول واردر .

قول اول — نبی محترمک مرضعه سعادتلی
بولنان « حلیمه السعدیه » نك نزدنده بولندقلری اثنای
صباوتنه وقوع بولدیغی روایت اولنان بوشرح و شق
صدر وقعه سیدر .

لکن قاضی عبدالجبار ، بودرلو شرح صدره وجوه
ثلاثه ایله طعن ایدهرک :

— « اولاً : معجزات احیدیه دن اولق اوزره
ذکر و روایت ایدیلان شق و شرح صدر مسئله سی
بعثتدن چوق زمان مقدم واقع اولش و معجزه نك ده
زمان نبوتده وقوعه کیش اولسی مقتضی اولدیغنه
کوره بونک هر حالده زمان بعثته تقدم ایتسی غیر
جائز .

ثانیاً : غسک تأثیری انجق اجسامی ازاله ده اولور .
حالبوکه معاصی اجسامدن دکل . او حالده غسک ازاله
معاصیده تأثیری اولمز .

ثالثاً : قلبك — روايت اولنديغي وجهله — علم ايله
املاسى ممكن وصحيح دكل . بلكه جناب الله ، علوى
قلبه خلق و ايجاد ايدر »

ديمش و اكا علامه فخرالدين رازى حضرتلرى ده :
— « معجزه نك زمان بعثته تقدم ايتسى بزجه
جا ندر . حتى بو درلوسى [ارهاص] ايله ده مسمى در .
بو كى غرائب معجزات خارقه العادات ايسه پيغمبريمز
افنديمز حقنده دها پك چوقدر . قلب شريف نبويدن
غسلاً ازاله ايدلدىكى مروي اولان علقه سوداء يعنى
قاره قانده زمام اداره انسانيه ي معاصيه ميل
ايتديره جك ، طاعتدن منع ايديه جك قلبه علامت اولمق ده
مستبعد دكل ! اكر ازاله ايتديلرسه او ازاله دم سوداء
كيفيتى ، صاحبك طاعاته مواظبت و سيئاتدن احتراز
و مجانبت ايتمسه اشارتدر »

جواب صوابيله مقابله بيورمشدر .

قول ثانى — شرح صدر دن مراد ، هموم دنيادن
عدم مبالات اثرى اوله رق دنيانك درجه حقارتنه ، آخرتك
مرتبه كالنه دائر طرف جليل الهيدن كنديلرينه ويريان
علم شريفلرندن عبارتدر .

*

ایشته حقنډه بویه خو ارق عاداتک چو غامسی اوزرینه
بعض بت پرستانک قتل و تعدی کېې سو افکاری ده منظم
اولنجه حارث زوجه سنه :

— « یا حلیه ! بز بو چو جغی والدہ سنه و قتيله
تسلیم ایتلی یز »

دیمکه مجبوریت الویرمش حلیمه ده بالضروره کتیروب
او حضرتی والدہ ماجده لرینه تسلیم ایتشد .

۷

فوت آمنه

حضرت آمنه ، ولد نجیب لرینی حلیمه دن الدقندن
صوکره او فرزند ا مجدی ده یانه آلوب کنندی دیاری
بولنان مدينه نك ایکی کونلک مسافه بریسنده کائن
دار النابه « ده بنی نجار قبيله سندن [عدی بن النجار
الخزرجی] یی زیارته کیتشدی .

او زمان ، نجی ذیشان افندیملک پدر عالیکهر لرندن
کندی لرینه ارثاً انتقال ایتش اولان « ام ایمن » نام جاریه
حبشیه دخی برابرنده موجود ایدی .

مدینه ده کی کهنه یهود ، او حضرتک شکل و شمائل
عظمتنامه با قهرق حقنده :

— « ایسته ورودی منتظر و کتب سماویه ده مبشر
اولان پیغمبر آخر الزمان بوچوجق اولسه کر کدر . علام
معینه سی بتمامها ذاتنده مجتمع و موجود در . »
دیرلردی .

حضرت آمنه ، مدینه دن اوسفرکی عودتده یولک
« ابواء » نام محمده فوت اولوب فخر کائنات افندیمر الی
یاشلرنده ایکن انادنده یتیم دوشدیکندن جد عالیبری
عبدالمطلب نزدنده قالمشدر .

*

* *

۸

{ «سيف بن ذی اليزن» ك تنبيهات و تبشیراتی }

ملوك حيريه نسلندن « سيف بن ذی اليزن » ،
كسرای عجم « نوشیروان بن قباد بن فیروز » ك مظا -
هرت و معاونتی سایه سنده قبائل عربانی لوای ریاستی
لشنه طوپلایه رق اجرا ایله دیکی حرکات حرییه ایله

يَمْنَدَن حَبْشِيلَرِي طَرْد وَتَبْعِيد وَاَعَادَةُ سُلْطَنَت اَيْتْدِيكِي
 زَمَان اَشْبُو مَوْفَقِيَّت عَظِيمَه سَنِي تَبْرِيك اِيچُون رُؤْسا
 وَاَمْرَاي قِبَائِل عَرَب ، سَيْفَك مَقَر حَكُومَتِي اُولَان
 « صَنَعَا » يَه كَيْتَمَشْلَرْدِي .

استطراد

يَمْنَدَه اَوْچِيك سَنَه يَه قَرِيب زَمَانْدَنْبَرِي حَكُومَت
 اَيْدِن مَلُوك حَيْرِيَه يِي بَر فَرْصَتْلَه طَرْد وَقَبْل اَلْهَجْرَه
 [۹۵] دَه حَكُومَت حَيْرِيَه يِي ضَبْط اَيْدِن حَبْش حَكُو -
 مَتِي طَرْفَنْدِن يَمْن حَكُومَتْنَه حَاكَم تَعْيِين اَيْدِيْلَان « اَبْرَهَه
 بَن صَبَاح الْاَشْرَم » ، اِسْتِقْلَالَنِي تَأْمِين اَيْتْدَكْن صُوكْرَه
 هَر دَرْلُو سُوْ اَفْعَال وَمُظَالْمَه اِبْتِدَار اَيْدَهْرَك پَك چُوق
 كَيْمَسَه لَرِي اِيْزْمَش ، وَرُؤْسا ي حَيْرِيَه يِي تَنْدِيل
 مَقْصَدِيْنَه بِنَاء غَدَارَانَه بَر چُوق مَعَامِلَاتَه تَصْدِي وَتَجَاوُز
 اَيْلَه مَشْدُر .

حَتِي مَلُوك حَيْرِيَه نَسْلَنْدِن [ذِي يَزْن] لَقْبِيلَه
 مَلَقَب اُولَان « فَيَاص » لُ حَسَن وَجَالِي اَيْلَه مَعْرُوفَه
 زَوْجَه سِي وَ « سَيْف » لَقْبِيلَه مَلَقَب « مَعْدِي كَرَب » لُ
 وَالدَّه سِي « رِيحَانَه بَنْت عَلْقَمَه بَن مَالَك بَن زَيْد بَن

کهلان « ی زوجی ذی یزندن جبراً اخذ و سبی صورتیله
کندی نفسنه تخصیص ایدرک اوندن « مسروق »
اسمنده بر ارکک چوجق ایله « بساسه » نامنده بر قیزی
یله اولمشدی .

ریحانه سندن شو صورت و خیمه اوزره آیری دوشمش
اولان « ذی یزن » ایسه ملوک حبشیه یی قطعۀ یمانیه دن
ومظالم حبشیه یی رعایای حیریه نك اوزرندن رفع و دفع
ایتمک فکریله روم قیصرینه [استانبوله] بالمراجعه یمنک
حبشیلردن استخلاصنی استمداء ایتدیکی حالدۀ قیصر :
— « حبشیلر یهودیمیدر که علیهلرندۀ حرکات حربیه
اجراسنه قیام ایدیم »

جواب ردی ایله ذی یزنی مأیوس ایله دیکندن حیری
مرقوم ، کسرای عجمه طوغری عودته مجبور اوله رق
دو نمشدر .

*

* *

بر روایتۀ کوره روملرک او ارالق باشقه درلو
مشغولیتلری بولندیغیله برابر یمنک استانبوله بعد مسافده سی
حسبیلۀ منفعتی ده از بولنه جغندن طولایی عسکرک
یهوده اتعاب ایدیلۀ میه جکی جواباً در میان ایدلمشدی .
قیصر دن صوکره ذی یزن ، کسرای عجمه عودت

ومراجعت واکاسره طرفندن منصوب حیره ملکی
 «نعمان بن منذر» ک دلاتیه کیفیتی فرس پادشاهی
 «نوشروان» عرض و اخبار و قطعۀ یمانیه نک سراپا
 ممالک ایرانہ ضم و الحاق اولمقی شرطیه همان انجق
 ظمہ حبش الندن قورتارلمسنی تمنی ایله مشدر .
 نوشروان ایسه :

— « قسعة یمانیه ، ممالک ایرانیه بهعیددر محصور -
 لاتی دخی دوه ، قویون کبی عادی شیلر . بناءً علیه
 مشقتی منفعتنه دکرز »

دیه جواب رد ویردیکندن بو جوابه قارشی طبیعی
 مأیوس و مقموم قالمش اولان ذی زن ، شاه طرفندن
 خلعت کبی بعض آثار و عطایای شاهانه احسانیه دلشاد
 ایدمک ایستلمش ایسه ده ذی زن عطیه ایله ممنون او-
 له میه جغنی و عطیه یه . احسانه احتیاجی اولمدیغنی بیلدیر-
 مک ایچون بارگاه کسرادن چیقیدیغنی انده عطایایی
 بتمامها خدام و فقرا یه نثر و ایثار ایتشدر .

حالبوکه ایثار مسئله سی مسموع حکمداری اولدقدن
 صوکره نوشیران ، حیرئ مرقومه قارشی بر مقدار
 اظهار عتاب ایتکی ایستمکه ذی زن همان :

— « بزم یمن طاغلی بتون التون ، کوشدر .

بن ایرانک التوتی ، شاهک احسانی المغه کدم .
انجق حبشی یمندن چیقارمق ایچون امداد ومعاونت
ایستکه کدم »

دیه جواب ویرمش وبوسوزاورینه مستدعاسی ده قبول
ایدلدیکندن مسئله بین الوکلا براز مذاکره ایدیلنجیه
دکین بکله مسنه امر الدیغی حالدده اوصرهده فوت اولغله
مسئولی ده اویله جه یوزی اوستی قالمشدی .

*

**

ابرهنک ریحانه یی زوجندن اخذ وسبی ایلهدیکی
اثناه برابر الدیغی « سیف » نامندکی چوجغی بویومش
و « یکسوم » ابن ابرهنک زمان تسلطنندن بر مدت بیله
یکمشدی که برکون اناسندن برادری اولان « مسروق »
ایله مجادله ایدرکن مسروق ، « سیف بن ذی الیزن »
خطاباً :

— « لعنت اولسون بابا که ! »

دیمش وبوسوز ، ابره یی بابا بلله مش اولان سیفک سامعه
دقتی پارچه لامش کیتمش بولنه رق باباسنک کیم اولدیغی
اناسی ریحانه دن صور مشدر .

فقط او بابده بر جواب ویرمک ایله ویرمامک بیننده
متردد قالان ریحانه ، چوجغنک اصرارینه قارشی نهایت

ذی یزنک کړک قیاصره، کړک اکاسره جه اولان ماجرا-
سنى ضرورة حکایه اشدیکندن عقینده سیف، همان
کسرای عجمه مراجعت وباباسنه ایدیلان وعدنصرتک
انجاز واسعافنی ده استدعا ایله مشدر .

اشبو استدعا به قارشى غلیان تأثرى حصوله کله رک
خصوص مستدعى به حقنـده ایدیلان مذاکرات و مرا-
قات سیاسیه نتیجه سنده :

— « محبس لرده کی ارباب جنایتی ویرملم . انلر ایله
ایش کوره بیلدیکی حالدہ بر مملکت ضبط ایدلمش اوله جغی
جهتله نعم المطلوب ! والا حبس خانه لرده تخلیه ایدلمش
اولور »

دیہ میدانہ قونیلان فکر متین معقول، باشقه هر صورتہ
ترجیح ایدلمش اولدیغندن حبس خانه لرده کی ارباب جنا-
یتدن سکز یوز کشی وابن قتیبہ نك قولنه کوره یدی بیک
بشیوز نفر عسکر، « هرز الدیلمی » نامنده غایت ماهر
بر تیراندازک قومانداسی التندہ اولدیغی حالدہ سکز
سفینه یه اركاب و بحرأ یمنه سوق واعزام ایدلمش فقط
اثنای سفردہ سفائن ثمانیه دن ایکسی غرق اولمش والتیوز
نفری حامل اولان التیسی سالماً ساحل عدنه چیقمشدی .
سیف بر کره ساحل سلامته چیقـدقـدن صوکره

بمنده چيريه طرفدارانندن دها بيكرله عسكـر تجهيز و
ترتيب ايدهرك يكسومي ياخود مسروقي هرزك دست
وتيري ايله قتل واجدادندن قالمش اولان حكومت
چيريه بي ايسته او صورته ضبط ايتشدر . قبل
الهجرة [۴۵]

فقط سيف بن ذي يزنن صوكره يمن حكومتی
قبل الهجرة [۳۸] ده ايرانه قاله رق [هرزالديلي ، وليجان ،
حزدان ، نوشيجان . مرزان ، بادان] نام التي عجم
حكمداري ده اوراده اجراي حكومت ايتش و بادان
نام حكمدار اخير ايسه يدنجي سنه هجريه سنده قبول
دين اسلام ايتكله حضرت پيغمبر افنديز انك عهده
سنده يمن ولايتي واليلكني ابقا بيورمشدر .

« علاوة استطراد »

و

« تصحيح »

فاضل شهيز ديار بكرلي سعيد پاشا رحمه الله تعالى ،
مرآة العبر نام تاريخ معتبر لرنده اشبو « سيف » ك
بمنده كي اعاده استقلالى تاريخنى قبل الهجرة [۲۳] اوله رق

کوستریورلر • فقط خدم اولیه رق دیمکه جرأت ایدرم
که بو ، غلطدر :

زیرا موفقیت استقلالیه سنی تبریک ایچون بطحادن
صنعايه کیدن رؤسای عربدن بریده عبدالمطلب ایدی •
حالبوکه عبدالمطلب قبل الهجره [۴۵] ده وفات ایتدی •
وفاتک اوتاریخده کی وقوعه ایسه رسول اکرم
صلی الله تعالی علیه وسلم افندیمز حضرتلرینک - باتفاق
جمیع المورخین - یدی یا سکز یا شابرنده بولنمی دلیل
کافیدر •

بناءً علیه سيفك تاريخ استقلال واضمحلالی، ايشته
اودلیل جلتینک دلاتیله قبل الهجره [۴۵ و ۳۸] اولوق
وسیفه معاونت وامداد ایله یان کسری دخی - مرآة
البرک بیانی اوزره « خسرو پرویز بن هرمز » دکل
انجق - نوشروان اولوق لازم کلیور »

اتهی

ایشته اوصرده - وسال حیات اجدیه نک یدنجی
ویا خود سکزنجی دوره منور مسنده - مکه دن ده رؤسای
عربدن « عبدالمطلب ، امیه بن عبد الشمس ، عبد الله
بن جدعان ، خویلد بن اسد ، وهب بن عبد مناف »
کی سکز اون رئیس ، سیفی تبریکه کیتمش وعبدالمطلب

دخی حسب الریاسه اونلرک ایچنده بولنمشدی .
 امرا ورؤسای عرب ، سیفک یاننده بر آی قدر
 زمان مسافر قالدیلر . انواع اعزاز واکراملرله مظهر
 تلطیف وتوقیر دخی اولدیلر .

* *

بر اراق « سیف بن ذی الیزن » ، عبید المطلبی
 حضورینه صورت خصوصیهده جلب ودعوت ایدهرک
 کندیسنه دیدی که :

— « کهنه مزک . سائر اصحاب معلوماتک پک اسکی
 زمانلردنبری واقع اولان استخراجاتنه کوره جانب
 بطحادن بر نبی آخرالزمان ظهور ایده جک وعالمی طریق
 ضلالتدن شهراء حق وهدایتہ طوغری سوق وارشاد
 ایده جکدر . فقط استدلالات واستخراجات اخیریه کوره
 اوزات شریف شمیدیکی حالده طوغش وحتی بیومکدهده
 بولنمشدر . اوزرنده برچوق علائم نبوتی ده وارایمش .
 ازجمله ! ظهر شریفنده بین الکتفین بیوجک برات بکی
 صورتده مهر نبوتی اوله جق ایمش . اسمی اجددرکه
 اونک اسمیله شمیدییه دکین هیچ برکیمسه مسمی اولمامشدر .
 ایشته اوزات شریفک لوای شوکت وسطوتی انوف
 اعدایی ترغیم ایده جک . کلامی فصل خطاب ، احکامی

عين صواب اوله جق ، امر بالمعروف نهى عن المنكر
انك شانى بولنه جق . حتى اى عبد المطلب ! بونى سكا
خصوصى اوله رق سويلرم كه بو ذات شريف اولاد
اسماعيل عليه السلامدن و بناءً عليه آل هاشمدين
كله جكدرد ! »

عبد المطلب ذاتاً او نبى ذیشانك كرك هنكام ولادت
باسعادتلرنده ، كرك بعد الولاده كوردیكى برچوق
خوارق عاداتدن پك زیاده سیله متعجب اوله قالمش ایكن
سيف بن ذى الیزندن ده بوسوزى ، بوتبشیراتى ایشیدنجه
تعجب و تحیری سرور ايله ممزوج اوله رق ملك
مشار اليه :

— « اى شاه سماجاه ! دیدیککز فرزند ارجند ،
ذکر ايله دیککز علامات و اوصافه کوره بنم حقیق
سعیدم » محمد « اولمق لازم کلیور . بوندن یدی سنه مقدم
طوغمشدر . حقیقهً بین الکتفین اوله بر نشانه سی ده
واردرکه یارم الما بویککنده و دیدیککز شیئک عینی !
وطوغمق زماننک قریب اولدیغی هنکامده پك چوق
خوارق عادات مشاهده اولندی . بو احوال ایسه کندى
حقنده خبر و یردیککز استخراجات واستدلالاتک
طوغریلغنه شهادت ایدیور »

دیه جواب ویردی !

سیف بن ذی الیزن ، طفل الیکه رک حفظ و جایه سنه
اهتمام تام ایدلسی خصوصنی عبدالمطلبه صیق صیق تنیه
و توصیه ایتدکن صوکره دیدی که :

— « اکر اونک زمان بعثت و نبوته یتشه جک
اولور ایسم بتون قوای عسکریه مایله برابر کیدوب
خدمت مایه المفخرت سنیه سنه ملازمت ایلایه جکم »

*

* *

سیف ، رؤسا و امرای عربک اوزمانکی عودتلرنده
مکه امراسنه ویردیکی عطایا [۱] نک اونلرله امثالی
عبدالمطلبه ویرمشدی .

حتی بونجه امرانک ایچندن عبدالمطلبی ترجیحاً
او درجه فوق العاده بر صورت ایلایه مظهر التفات
واحسان حکمداری اولسنده کی علت و حکمت ، کندیلرنجه
مجهول قالدیغندن امرای سائر نک جانلری صیقیلوب
سیف بن ذی الیزن علیهنده مؤخرأ برطاقم هجویه لر

[۱] مفتاح العبرک ، صاحب اعلام و غیریلردن نقلاً
یازدیغنه کوره عبدالمطلبک غیری اولان مکه امراسنه سیفک
ویردیکی عطایا :

« یوز رأس دوه ، اون نفر اسیر ، اون جاریه ، اون
بطمان التون و مکوش ، بر طفار جق عنبر » در .

سویله دکلرینه مقابل عبدالمطلب ، هدیہ وعطیہ لردن زیاده
تبشیر واستبشار مسئلہ سندن ممنون اولمش و ممنونیتی ده
نظماً بیان و اظهار ایله مشدر .

*
* *

ك

— رمد پیغمبری وقعه سی —

ولادت سنیهٔ احدیه نك یدنجی ویا سکزنجی سنه -
سندہ و تبریک موفقیت ایچون عبدالمطلبک یمندہ سیفک
نزدینہ کیدوب کلدیکی تاریخدن براز مؤخر فخر
کائنات علیه افضل الصلوة افندیزه رمد عارض اوله رق
ایدیلان معالجاتک تاثیر منر قلمسی اوزرینه مکہ ایله
مدینه ارمسندہ و « عکاظہ » نام محله بر عبادتخانه ده
مقیم برمنزویء عابدک کوزخسته لقلرینه اولان مداوات و
معالجاتی پک نافع ایدو کندن بختله اورایه کیدلمسی خصوصی
عبد المطلبه بعض طرفلردن اخطار ایدلمش اودخی او
حضرتی الوب کتیر مشدی .

منزویء مرقوم ، فخر کائنات افندیزی کورور

کورمن چشم دقت و امعان ایله معاینه یه باشلادی .
حضرت اسماعیل علیه السلامدن نسلأ بعد نسل
انتقال ایده کلمش اولدیغی ونهایت جبین پاک احدیده
قرار قیلولوب طوردیغی بین العرب معروف و مشهور
اولان نور محمدی ، منزوی مرقومک نظر دقتنی هرشیدن
اول جلب ایتدی :

ابتدا او حضرتک اسمنی ، نسبنی صور مقدن باشلا .
یهرق عبدالمطلبی کوزل براستنطاق واستجواب ایله دکن
صوکره بین الکنفین موجود اولان مهر نبوتی ده کورونجه
انزو اخانهک برکوشه سنده کی غسلخانه یه قوشوب انده همان
بالاغتسال النده برکتاب اولدیغی حالده عودت ایتدی .
کاه النده کی کتابه ، کاه وجه پاک احدی یه باقرق
هر باقشده ده عبدالمطلبدن برچوق شیر صور دقدن صوکره
تیجه الکلام اولق اوزره دیدی که :

— « سماوات وزمینی خلق و ابداع ایدن الله تعالی
حضرتلرینک عظمتنه قسم ایدرم که خاتم الانبیا والمرسلین
اولق اوزره بعثت و رسالتی کتب سماویده مذکور
موعود اولان پیغمبر جلیل العنوان ، ایشته بو صبی
بشاندیر »

بو یولده دها پك چوق تبشیرات واستبشارات ایتمش
اولان عبدالمطلب ، او مزویدن ده بو تبشیراتی ایشیدنجه
امتحان ایچون صوردیغی سؤالره مزویء مرقوم جواب
صواب ویرمش وجوابنده کی جدیدت و اصابتی شویله جه
تأیید ایتمشدر :

— « بنم بوبابده کی تفصیلات و ایضا حاتم نه حاجت!
اگر دیدکلم صحیح ایسه بو ذات شریفک کندی
تو کروکی کوزلرنده کی درد رمده دوا ی عاجلی اولق
لازم کله جکدر . هایدی سز کندی الیکزله سوریکز
باقلم »

بعده عبدالمطلب ، مبارک دهان اجدیدن بر مقدار
تو کړوګ الوب چشم محمدی یه سورمه رک یقادرده
بشفائه تعالی درحال عافیت تامه کسب ایله دیکی مشاهده
ایدلمشدر .

*
* *

۱۰

— وفات عبدالمطلب —

بو وقعددن بر سنده ضوکره یعنی سید کائنات

افندیمز حضرتلرینک سکز یا طقوز یاشنه کیردکری
سنده عبدالمطلب، سکسان - وعلی روایة یوز یکرمی
ویا یوز قرق - یاشنده اولدیغی حالده وفات ایتدیکندن
ذات جلیل محمدی، ریاست هاشمیه یکن « ابوطالب بن
عبدالمطلب » ک عهدۀ حایت وکفالتنده قالمشدر .

عبدالمطلب، فراش ارتحاله یاتدیغی ودوام حیاتندن
قطع امید ایتدیکی زمان اولادینی یعنی حیاتنه
اولان اعمام اربعهٔ اجدیه بی نزدینه چاغیروب انلره
خطاباً :

— « اوغلارم ! هانکی بریکز محمدی حقیله
کوزه ده بیلیر ؟ »
دیمشدی .

ایچلرندن اولاً ابولهب، قالدقهرق :
— « یا سیدالعرب ! اطل الله عمرک ! قد قت خدمتہ
محمد . و او فیت وصیتک علی مرادک »
دیدیکی حالده اکا عبدالمطلب :
— « اوت مالک چوقدر . حیثیتک ده واردر . فقط
مرحتک یوقدر . سکا تسلیم ایدهم »

جواب ردینی ویردکن صوکره ایاغه قالمش اولان جزه :

— « یاسیدالعرب ! قوضنی هذه الخدمة ! »

دیوب :

— « سن بوکا معاونت ومظاهرتہ احق سبک . لیکن

اولادک اولدیغیچون اولاد قدرینی بیلیورسک »

کبی بر اعتراضی دیکله رکن ایاغہ قالقان عباس ، حمزه .

نک سویلیدیکی سوزی تکرار لایه رق « سن ده مناسبسک

اما اولادک چوق اولدیغیچون بونک حقنی لایقیله

کورهمیه جکسک »

جوابنی الدقدن صوکره ایدی خدمت شریفه مذکورهمیه

طالب اولدیغنی سویله یان ابوطالب ، عبدالمطلبدن :

— « انت لایق ومناسب بهذه الخدمة »

جواب موافقتنی المش واو حضرت احدک کفالت و حیا

یتنی ده اولوجهله تعهد ایتشدیر .

*
* *

۱۱

— شام سفری —

و

(بحیرا)

فخر عالم صلی الله تعالی علیه وسلم افندیز حضرتلری

هنوز اون ايكنجى سال حيات اجديه لرنده ايدى كه
ابو طالب ، براى تجارت شام قافله سيله چيقوب حوالى
شاميه كيده چكى صروده معيته النديغندن طولايى
جناب اجد محزون قالمغله ابى طالب او حضرتى دخی ارتق
برابر الوب كتيريور ايدى .

قافله ، شام ولايتند . « بصرى » نام بلديه كلديكى
زمان « كفر » نام موقعده ، يول كنارنده
وبر صومعه قارشيسنده بر قورى اغاج التنه نزول
ايتشد .

مكر او صومعهده « بحيرا » ناميله معروف غايت زاهد
بر راهب عيسوى وار ايش !

* *

استظراد

(بحيرا)

بو آدم يعنى بحيرا ، هجرتك برنجى عصرى علمای
مسيحيه سندن . يعقوب بن اسحاق الكندى « نك » [اجواب
على البرهان] نام كتابنده اوصاف خسته و فضائل عليه

واخلاقیه سندن بحث ایله دیکي کیمسه در . « آریوس »
 مذهبنده . هم علوم فلکیهیه آشنا عالم ، فاضل
 بر راهب عیسوی . اصل اسمی ایسه « جرجیس بن
 اسکندر . »

حضرت عیسی نك الوهیتنی قطعياً انكار و مریمك
 والدۀ ناسوت اولدیغنی ادعا ایدر . حتی واقع اولان
 ایشته او انكار و ادعایه قارشى ، ایچنده بولندیغنی کلیسا .
 نك رئیسى ، کندیسنی طرد ایتکله طور سیناده کی
 کلیسایه بعده بریۀ عربیه ، بعده شام حوالیسنه کیده رك
 یول اوزرنده کی اوصومعه معده سنی مقام اتخا ذایله مشدی .
 یولده کلان پکنلری ، توحید حقه تحریض و خلق ،
 عربلری عبادت او ثان و اصنامدن تحذیر ایتکده ایدی .
 بحیرا ، شا کردلرندن « مذهب » نام کیمسه ایچون
 تألیف ایله دیکي « ابنا » نام کتابنده ، اولاد اسماعیل
 علیه السلامك قریباً مظهر هدایت اوله جغنی یاز مشدر .

مرقوم مذهبده سید کائنات افندیملك برج ثورده
 وزهره نك مشتری ایله زحله مقارنتی وقتنده تولدینی
 و بنی اسماعیل علیه السلامدن ابنا جنسنى توحید خالقه
 دعوت و معرفت مولایه ارشاد ایده جکنی و قریباً

کندیلر نده بیوک بر قوت و سطوت حاصل اوله جغنی بحیرادن
 نقلاً روایت ایتشدِر » انتهى
 قافله نك کلدیکی اوزاقدنبری کورن بحیرا ایسه
 دقتله باقنجه قافله ایله برابر اوستلرنده بر بولوط پارچه -
 سنکده کلدیکی و نزوللرنده بولوطك باشلری اوستنده
 استقرار ایدوب طور دیغنی والثنه نزول ایتدکلری
 قوری اغاجكده درحال یشیللنوب یاپراق ویردیکنی
 کوردیکندن کندی معلومات و کشفیات فلکیه سنی،
 مشهودی اولان اشبو حالاته تطبیق ایدنجه خاتم الانبیا
 حضرتلرینك او قافله ده بولندیغنه همان قطعياً حکم
 ایتشدی .

فقط بو بایده دهها زیاده یقین حاصل ایتك ایچون
 صومعه سنده همان ترتیب ایتدیکی ضیافته قافله نك
 ارکان و افرادینی دعوت ایتدیسه ده آرادییغی علامتلردن
 هیچ برینی ، ایچلرندن هیچ برنده بوله مدقدن باشقه
 بولوطكده اغاج اوزرنده کی استقرارینی دخی کوردیکندن
 کریده بریسنك قالب قالمدیغنی صورتی .
 ابوطالب ، اکا :

— « برچوجق قالدی »

دیه جواب ویرمکله بحیرا ، انكده تشریفلرینی رجا

ایتدیکندن ابوطالب او حضرتی ده مجلس ضیافته کتیر تدری .
 طعام اثناسنده بحیرا ؛ دقت ایدرکن کوردی که :
 — « کتب سماویه ده مذکور و علمای ماضیه دن
 مروی اولان کافه علامات نبوت بتمامها اودات شریفده
 موجود و مشهود ! »

*
* *

بعض کتب قدیمه سیردن نقلاً [روضة الاحباب] ک
 یازدیغنه کوره بحیرا ایله اولان او ملاقات اجدیه ؛ سن
 شریفلرندن اون ایکی سنه ، ایکی ماه ، اون ایکی کون
 کچدیکی انده واقع اولمشدر .
 بعدالطعام بحیرا ، او نونهال حدیقه رسالته خطاب
 ایدرک :

— « بنسندن برشی صوره جغم . لات و عزى حقیچون
 طوغری جواب ویر ! »
 دیش فقط افندیمز ، اکا :
 — « بکا لات و عزى ایله صورمه ! والله اونلردن
 دها زیاده کریه کوردیکم هیچ برشی یوقدر . اک بیوک
 دشمنلرم اونلر ! ... »
 دیه جواب ویر مکه بحیرا دخی :
 — « اوله ایسه الله تعالی حقیچون ! ... »

طرزینہ تحویل کلام ایدوب بعدہ .

— « شمدی صور ! »

جوانی المش وارتق ذات عالیٰ اجدینک ، شئون
شریفہ سندن ایستدیکی قدر صوروب معلومات استحصال
ایله دیکی کبی الدیغی معلوماتی ده کنندی کشفیانه تماماً
موافق بولشد .

بعدہ بحیرا :

— « اوزرکدن جبہ کی چیقار ! »

دیمش ایسه ده ذات عالیٰ اجدی امتناع ایتمکله
ابو طالب :

— « چیقار اوغلم ! »

دیهرک چیقارتمش و او حالده ظہور ایدن خاتم نبوتی
بحیرا کمال عشق و محبتله او پوب یوزینی کوزینی اکا
سورمشدر .

* *

ایشته بویله بر محاوره دن سوکره بحیرا ، ابوطالبه ،
خطاباً دیدی کہ :

— « یا ابا طالب ! بوچوجق خاتم الانبیادر . شام
یہودیلرینک ایچنده بونک اوصاف و علامات شریفہ سنی
بیلیر و طائیر چوق کاهنلر واردر . بلکه حقنہ اہانت .

قصدا ایدرلر • ایوسی شامه کیتدن چوجنی اعاده
ایتمکدر »

ابو طالب ، بحیرانک سوزینی طوتدیغندن مالنی
بصرهده صاتهرق مکهیه طوغری همان عودت ایتشدرد .

* *

فخر عالم صلی الله تعالی علیه وسلم افندیز ، هنکام
صباوتی کچوب سن شبابه کیردیکی زمان رشدورویت ،
حلم و مروت ، صدق و استقامت ایله بتون اقران و
امثالندن ممتاز اولدیغنه مبنی [محمد الامین] دیه شهرت
بولمشدی • اون یدی یاشلرنده « زبیر » یاخود « عباس
بن عبدالمطلب » ایله برابر یمنه کیتدیکی سفرده کندیسندن
پک خارق العاده حالار مشاهده ایدلمشدر .

یکرمی یاشنه کیرنجه کوزینه بعضاً ملکر کورینه رک
کندیسنه اشارتله :

— « ایشته بوتون عالمه هدایت ایریشدیره جک بودر •

لکن ایام دعوتی هنوز کلمدی »

دیرلردی •

حالبوکه حبیب خدا ، او کبی کوردیکی حالات
غریبه دن طولایی قورققده اولدیغیچون کیفیتی ابو طالبه
آچمش اوده بر نوع خسته لاک اثری ظنیه اکلامق و

دواسنی ایسته مک اوزره کهنه عربدن برینه مراجعت
ایتمشدر .

کاهن دخی غایت دقتله معاینه ایتدکدن صوکره :
— « یا ایا طالب ! مراق ایته ! بو اوویه مقدس
بر وجوددرکه هر درلو امراض واسقامدن سالم .
کوزینه کورینانلر ایسه ملکدر . انسیت پیدا ایدیورلر .
احتمال که بو، نبی آخر الزماندر ! »
دیه جواب ویرمشدر !

* *

۱۶

— ازدواج نبوی —

حضرت حبیب خدا افندیمر هنوز سن شبابه کیروب
صداقت وامانته معروف ومشتهر اولدیغی بر صرهد
اشراف قریشدن ، [خدیجه بنت خویلد بن اسد] نامنده
بر طول قادین ایله عقد شرکت تجارت ایتشدی .
شویله که :

خدیجه، زنکینایکی حسبیه بعض تجاره سرمایه

ویرەرك تجارت ایتدیرمك وکارینك نصفنی کندیسی
 المقله معتاد بولندیغندن بر مقدار سرمایہ و یروب ده
 جناب « محمد الامین » ی تجارتہ سوق و تشویق ایتسه
 چوق کار ایدہ بیلہ جکی خصوصی کندیسنہ بعض
 طرفلردن اخطار ایدلدیکندن خدیجہ دخی مناسب کوہ
 رەرك کلی سرمایہ و یرمش و کولہ سی « میسرہ » نامندہ کی
 شخصی دخی ترفیقاً حوالی شامیہ کی کوندرمشدی .

بوسفرده قافلہ نك ایچندہ حضرت محمد الامینی جایہ
 مأ موریت مخصوصہ سی ابوطالب طرفندن عہدہ سنہ
 تفویض ایدلش بولنان « حزیمہ » کبی رجال قریشدن بر
 چوق کیسہ لردہ موجود ایدی .

حضرت پیغمبر، قافلہ شام ایلہ برابر کیدرکن ،
 عمی ابوطالب ایلہ اولجہ منزل اتخاذا ایلہ مش اولدیغی
 بحیرا صومعه سی پیشکاهنہ ینہ نزول ایتشدہ . فقط
 راہب بحیرا وفات ایدوب مقامنہ باشقہ سی قائم اولمشدی .
 اودہ « نسطورا » ایدی . نسطورانک ایسہ میسرہ ایلہ
 اسکیدن الفت و معارفہ سی وار ایدی . او معارفہ یہ مبنی
 منزله کلہ رك میسرہ ایلہ برخیلی قونوشدی .

حالبوکہ ہر درلو شکل و شمائل شریفہ احدیہ یی
 اوزمان بر طرفندن نظر دقت و امعاندن کچیرمش بولنان

راهب مرقوم، سوزینی بمناسبه افندی مزه انتقال ایتدیره رک
 مهر شریف نبوتی اویمک شرفنی احرازه موفق اولدقدن
 واللهک برلکنه وبونک حق پیغمبر اخر الزمان اولدیغنه
 قسم ایله شهادت ایله دکن صوکره میسره به خطاباً
 دیدی که :

— « یا میسره ! حضرت عیسانک خبر ویردیکی
 خاتم الانبیا ایشته بوذات شریفدر . شامه کیمیکز ! زیرا
 خونه وکهنه یهود بونی کورنجه همان طانیرلر . بلکه
 سوء قصد ایتک ایستلر »

حتی اوزات شریفده مشاهده ایله دیکی حالات و
 علائم نبوته قارشی حب وشوقنک غلبه سیله همان اول
 حضرتی قوجا قلیوب سومکه قدر مجبور اولنجه ، جا-
 یه یه مأمور بولنان حزیمه ، نسطورانک حرکتنه بر
 سوء قصدی وار ظنیله همان قلنجی چکمکه برابر :
 — « یتشکر ای آل هاشم ! »

دیه شدتله فریاد ایتدیکندن ارکان قافله دخی یتشمش
 ایسه ده نسطورانک حرکتی سوء قصد دکل بلکه بر حال
 تعظیم کارانه دن عبارت اولدیغی اکلا شلدقده ، ایله دکاری
 غلباندن طولای اظهار محجوبیت ونسطورایده باشقه جه
 بر محبت حاصل ایتشلردر .

نسطورانك حقه مقرون اولان شوتكليف خالصانه
ومحبانه سى قبوله مجبوريت طبيعیه حاصل اولديغى
جهتله ارتق دها ايلريه كيتدن دونمك ايچون ارکان
قافله، اخذ واعطاسنى اوراده اويديردقدن صوكره
عودت ايتشدرد .

* *

اثنای معاودتده قافله نك مكه يه مواصلى كوني پك
صيحاق بر كونه تصادف ايتشدرد .

خديجه ايسه ، شام قافله سنك صورت مواصلى
بر قاچ قادينلرله برابر بر يرده طوروب سير و تماشا
ايتديكى صرءده قافله يولچيلردن برينك باشى اوستنده
ايكى قوشك قناد كروب كولكه ياپديغنى كوردى .

ايشته او كوردكلرى شيدن غايت متعجبه اولوب
طورورلر كن چيقه كلان ميسره دخى دها نيجه خارق
العاده حاللى كورديكنى حكايه ايتشدرد .

* *

رؤيت ايتدكلرى محاسبه ده كلتيلى كار حاصل اولديغى
اكلاشلىش لكن خديجه نك كوزينه اوندن اويله شام
قافله تجار يه سنك كارى كورونمز انجق « محمد الامين »
كورنمكه باشلامشدى .

زیرا خدیجه بر زمان منامنده « کونشک کوکدن
 یره اینهرک کندی خانه سنده کیردیکنی و ضیای شمسک
 کندی خانه سندنبری بتون مکه اهالیسی خانه لرینی ضیا
 لندیردیغنی « کورمش و خدیجه نك اشبور و یاسنی ، کاهن
 مشهور « ورقه بن نوفل » « خدیجه نك اخر الزمان
 پیغمبرینه زوجه اوله جغنی تبشیر ایلله « تعبیر ایتش بناء
 علیه خدیجه او شرکتی - خاتم الانبیا اولدیغنده کیمسه نك
 شبهه سی قالمامش دیمک درجه سنده شهرت المش اولان
 - محمد الامین ایلله ازدواجه سبب محض اتخاذا ایتک
 امید قویسنده بولنمشدی .

ایشته او اثناده طرفینجه متخذ اولان واسطه لرك
 وساطتی ایلله خدیجه نك سید کائنات افندیمر حضرتلرینه
 عقد نکاحی خصوصی مقرر اولدی .

خدیجه نك خانه سنده مجلس عقد نکاح تشکیل
 ایدیلهرک قریش قومنک اعظم واعیان طویلاندی .
 افندیمر دخی عوجه سی حزه ایلله برابر اوراده حاضر
 بولندی .

ابوطالبک :

— « الحمد لله الذی جعلنا من ذریة ابراهیم وزرع
 اسماعیل وجعل لنا بیتاً محجوجاً وحرماً آمناً وجعلنا

سوّاس حرمه والحکام علی الناس . ثم ان ابن اخي
هذا محمداً لا یوزن برجل الارجح به فان کان فی المال
قل فان المال ظل زائل وامر حائل . وقد خطب خدیجة
لها من الصداق ما عاجله وآجله کذا . وهو والله بعد هذا
له نباء عظیم .

خطبه سیله باشلايان عقد مسئله سی ، ورقه بن نوفلک
خطبه سیله نهایت بوله رق خدیجه ، پیغمبر علیه السلام
افندیمره تزویج ایدلمش اولدی . که اوزمان جناب
احدی یکرمی بش ، خدیجه قرق یاشلرنده ایدی .

* *

[خدیجة الکبری] دینیلان سیده النساء ، ایشته بو
خدیجه در . فخر عالم افندیمر کندیسنندن دائماً خوشنود
وراضی قالمش بناء علیه صاغلغنده باشقه زوجه
الماملردر .

حضرت رسول الله افندیمرکه خدیجه دن [قاسم ،
طیب ، طاهر ، عبد الله] ناملرنده دردی ارکک ،
[رقیه ، زینب ، ام کلثوم ، فاطمه] ناملرنده دردی
انات اولق اوزره سکر اولادی اولمشدر .

اولا [قاسم] دنیاه کلشدی . انکیچون حضرت
پیغمبر ، عادت عرب اوزره [ابو القاسم] کنیه سیله

مکنی اولمشدر • فقط فاطمه دن ماعدا هپسی ده کوچوک
ایکن فوت اولدیله •

سن شریفلری اوتوزه واردیغنده کریمه مکرمله لری
« رقیه » ، اوتوز اوچده « زینب » ، بعده « ام کلثوم »
رضی الله تعالی عنهن حضراتی طوغدیله •
بعثت احدیته نك بدایتنده حضرت « فاطمة الزهرا »
رضی الله تعالی عنها حضرتلری تولد ایتمشدر •

*
*
*

خدیجة الکبری، بو ازدواجدن اول بنی مخزومدن
« عتیق بن عابد بن عبدالله » ایله « ابو هاله بن النباش بن زیاد
التیمی » نامنده ایکی قوجیه وارمش و ابو هاله دن بر
چوجقه بیله انا اولمشدی •
حتی او چوجق [۱] ، ازدواج نبویدن صکره
ایدی که :

— « انا اکرم الناس اباً و امأً و اخأً و اختاً »
دیه اظهار افتخار ایله دکدن صوکره :
— « بابام سید کائنات افندیمز ، انام خدیجة الکبری ،
قرنداشم قاسم ، قیز قرنداشم فاطمة الزهرا ! »

[۱] شوذاتک اسمی بر درلو در خاطر ایده مدیکمه عظیم
تأسف ایدیورم !

دیه ایضاح کلام دخی ایلردی .

مشار الیهک وقعتہ جلدہ [۳۶] شہید اولدیغی روایات
تاریخیه دندر .

۱۳

— تعمیر کعبہ معظمہ —

فخر عالم صلی اللہ تعالیٰ علیہ وسلم افندیمز حضرتلرینک
اوتوز بش یاشنه کیردکری ایشته اوصرده کعبہ معظمہ
تعمیر ایدلمشدر شویله که :

ابراہیم واسماعیل علیهما السلام، کعبہ بی ابتدا انشا
ایله دکری زماندنبری بعض سیلاره معروض قالمق کبی
عارض اولان عوارض و حالاتک تأثیراتی سببیلہ بیت
الله، تعمیرہ شدیداً محتاج بر درجہ به کلش ایدی تعمیرینی
قریشده ارزو ایدردی . فقط هدم کعبہ معظمہ دن
طولای علیهلرنده بر عارضه شدیدہ کونیه وحادثہ هائلہ
سماویہ نک وقوعی احتمالیله هدمه بر درلو جرأت ایده .
میورلر ایدی .

نهایت الامر قریشک اعظم قبائلی طویلانوب درت
فرقه یه ایرلدقن صوکره جوف کعبه ده و « هبل »
نام صنمک حضورنده اقتراع ایتدیلر .

قرعه ده « بنی عبد مناف ، بنی زهره » نك
 سهمنه - قابوی حاوی اولان - جدار شرقی كعبه
 اصابت ایلهدیكی كبی « بنی عبدالدار ، بنی عبدالاسد
 بن عبدالعزی ، بنی عدی بن كعب » ه جدار شامی ،
 « بنی سهم ، بنی جمع ، بنی عامر بن لؤی » ه جدار
 غربی ، « بنی تمیم ، بنی مخزوم » ه ده جدار یمانی
 دوشمشدر .

ترتیبات سهمیه بو طرزده تقرر ایدنجه اك اول طاش ،
 طوپراق كبی لوازم انشائییه تدارك ایچون طاغلردن
 بری موضع شریف بیت الله طاش نقل ایتكه باشلادیلر . كه
 اشبو نقلیاتده ذات احدى دخی بالذات بولنوب مبارك
 ظهر شریفلریله طاش كتیر مشلدر .

وقتا كه لوازم انشائییه تداركاتی اكمل ایدیلوب
 قبائلجه یالکز هدم بیت الله بدء ومباشرت اولندی ه
 اوزمان حارس بیت الله اولان حیة عظیمه ظهور
 ایدر ك قریشی امر هدم وانشادن منع ایتكه باشلادی .
 قریشده حیة نك ظهور وحرکتته قارشى مرعوباً
 مقام ابراهیه چكلمكه مجبور قالدی . ایشته اوزمان

ولید بن المغیره ، حاضر اولان قریشہ خطاب ایتدی .
دیدی که :

— « یا قوم ! سز بو هر مدن اصلاحی مراد
ایتمدیکرمی ؟ »

قریش جواب ویردی :

— « اوت »

بوجواب اوزرینه ولید بن المغیره :

— « الله ؛ اصلاحی مراد ایدن قومی هلاك ایتز .
لیکن عمارت بیت الله اطیب اموالکزلک غیرینی صرف
ایتمکز ! الله ، طیبدن باشقه هیچ برشی قبول ایتز »
تنبیہاتی اجرا ایتدی .

اشبو تنبیہات ، قریشجه قبول وموجبجه حرکت
اولندقدن صوکره جماعت، ینه او مقامده طورهرق :
— « اللهم ان کان لک فی هدمه رضاء فأتّممه واشغل

عنا هذه الشعبان ! »

دیه نیاز ایتدی . نیاز ودعائک عقیب ختامنده ایدی .
عقاب صورتنده اغزی اچیق اولهرق طرف سمدان
ظهور ایدن بر قوش ، کلوب جدار کعبه یه قونمش وحیه
مذکوردهی باشندن طوتهرق قالدیروب ینه هوالمشدر . که

ايشته او وقعده «زبير بن عبدالمطلب» شوقصيدة رنكينيله
اشارت ايدر :

عجبت لما تصورت العقاب
الى الشعبان وهى لها اضطراب
وقد كانت يكون لها كشيـش
واحياناً يكون لها وثاب
اذا قمنا الى التأسيس شدت
تهيبنا البناء ولا تهاب
فلما ان خشينا الزجر جائت
عقاب بالسكات لها انصباب
فضمتها اليها ثم خلت
لنا البنيان ليس لها حجاب
فقمنا حاشدين الى بناء
لنا منه القواعد والتراب
غداة نرفع التأسيس منه
وليس على مساوينا ثياب
اعزبه المليك بنى لوى
فليس لاصله منهم ذهاب
وقد حشدت هناك بنوعدى
ومرة قد تقدمها كلاب

فیو أنا الملیک بذاک عزاً
وعند الله یلتمس الثواب

* * *

تعبانک وجه مسرود اوزره اندفاعی کورن قریش،
ارتق :

— « انا لارجو ان یكون الله قد رضى عملکم .
وقبل نفقتکم فاهدموها ! »
دیدیکی حالده ینه قور قد قلیر یچون جسارت ایده میهرک
میانه لرنده :

— « هدمه کیم اول باشلار ؟ »
مشاوره سنه مجبوریت الویر مشدی . ولید بن المغیره ،
قومک شوتر دینه قارشى :

— « بن اول باشلارم . بن اختیارم . بر بلا کله
ده ذاتاً اجلم یقین ! »

دیدکدن صوکره بالطه یی انه الهرق ظهر بیه چیقمش
او کون هیچ باشقه سی قارشقمسزین یالکز کنیدیسی
هدم ایده طور مشدر .

قریش ایسه اوزمان ولیدک باشنه بر بلا کله جکی
اعتقادنده بولندیلر . حتی او کونک کیجه سنک تماماً

مروری انتظارنده دخی بولندیلر . حالبوکه ولیده نه کیجه ،
نه کوندوز هیچ برشی اولدیغی کوریلنجه هدم و تعمیرده
برمحذور اولدیغندن هرکس امنیت تامه حاصل ایدهرک
ایرته سی صباح هرکس برابر هدم ایتشدیر .

اساس بیت اللهه واردقلری زمان ، النده کی بالطه -
سنی اساسدن اولان ایکی طاشک اره سنه صوقوب
شدت کوسترن ولید ، طاشدن او شدتله قوپاریدیغی
پارچه یی همان « ابووهب بن عمرو بن عمران بن مخزوم »
الیدیغی حالدہ الندن دوشوب ینه اسکی موضعنه اوطور -
دقن فضله دیدندن چیقان شراره ، هرکسک یوزینی ،
کوزینی یاقه جق درجه ده پارلامش و بو حالت غریبه دن
طولایی مکه خلقی رجفان برحاله کلمشدی .
بناءً علیه اساسه طوقاندامق . خصوصنده عومجه
درحال اتفاق آرا حصوله کلمشدر .

وقتاکه عملیات انشائیہ ججرا لاسودک موضعی اولان
[رکن] ه واردی . ججرا لاسودک یرینه وضعی شرفنی
احرازه هر قبیلده ارزو حاصل اوله رق :
— « ججرا لاسودی ، یرینه بزقویه جغز »

ديه اورتهده برمنازعه چيقدى .

حتى وضع حجر خدمته كسب استحقاق ايجون
كيسه اثبات و ابراز امتياز ايدمديكنه مبنيدرکه قبائل ،
مسجد حرامده بالا اجتماع آرالينه حجر مذكوري وضع
و حقنده مذاكرات و مناقشاته باشلادی .

مذاكره اوزون مدت دوام ايتدی . هر كون
مذاكره وقوعبولديغی حالده نتیجه حاصل اولمزدی .
حل و فصلنه امكان بوله مدقلى او منازعهي
بالضروره قلينج ايله فصل ايتك اوزره حربه قرار
ويردكلى بيله واقع اولديسهده وليد ، قبائلى حربدن
منع ايتدی :

الك صوكره قبائل قریش ، حرم كعبهده اوطوروب
مناقشه و منافسه ايدرلر كن وليد بن المغيرة قومه خطاباً :
— « ای قوم ! سز و بز بو ايشده انجق خيری
مراد ايتك . منافسه و محاسده ايتمكز ! آرا و افكارده
اختلافكز حاصل اولدقجه ايشلريكزده اونستده تشتته
اوغرادی . ايشده مقصود ايسه انجق اصلا حدر . بناءً
عليه بورايه شمدي كيم اوّل كلير و سزه قاريشير ايسه
انی ايشه حكم تعيين ايديكز ! »

دیمش قوم دخی اوسوزه قارشى :

— « رضینا وسلمنا »

دیه روی قبول وموافقست کوسترکن کلوب قاریشمش
اولان ذات عالی احمدی ، بر موجب قرار حل وفصل
اموره حکم ده نصب وتعیین ایدلمشدر .
ایشته او زمان حضرت فخر کائنات افندیز دخی
ردای شریفه لریک اوزرینه حجرى وضع وردانک
درت طرفدن اوجلرینی فرق اربعه مذکورده دن
کندی انتخاب بیوردقلری « عبد مناف بن عتبہ بن
ربیعہ » ، « ابو حذیفہ بن مغیرة المخزومی » ؛ « ابو زمعة
الاسود » ، « عاص بن وائل السهمی » نام درت کیسه یه
طوتیردقدن صوکره رکنه نکین قالدیرتوب بعده
ردانک ایچندن حجرى کندی مبارک الماریله آلهرق
یرینه قویمشدر !

حجر مبارکی او صورتله وضع بیورورلرکن -
نجددن کلش بر رجل اولق اوزره کندینی او زمان
ناسه کوسترمش اولان - شیطان علیه اللعنه ، کویاوضع
حجرده ذات عالی نبوی یه یاردم ایتک ایچون بیته چیقیدیغی
حاله طرف ذیشرف احمدیدن کوردیکی تحقیر اوزرینه

نجدی لعین، ارتق کنیدی ضبط ایده میهرک قریشه
خطاباً :

— « واعجبا لقوم اهل شرف وعقل و سن
واموال ! عدوا الى اصغرهم سنّاً و اقلهم مالاً .
فرأسوه عليهم في مكرتهم و حرزهم . کانهم خدم له .
اما والله ليفوتهم سيفاً وليقيمهم عليهم حظوظاً و حدوداً »
ديه باغیر مشدی !


* °

قبائل بیننده حرب و قتال احداثه يك مستعد
کورینان شو منازعه و اختلاک سرعت منع و ازاله سی
خصوصنده ابراز بیوردقلری حکم و تدبیر جدیر قریشجه
يك زیاده سیله تحسین و تقدیر ایدلشدر .

بنا تمام اولوب ایش یالیکز سقفک آمانه قالمشیدی .
او صروده ایسه یمن حکمدارینک بلاد شامیه دن انطاکیه
شهرنده انشا ایتدیر مک ایستدیکی کلیسایه قویق اوزره
بحراً کوندردیکی کراسته لری حامل اولان کمی « شعیه »
نام ساحلده قضایه اوغرایه رق کناره یاناشدیغندن
ایچنده کی کراسته یی ملک مر قوم، بیت الله باغشلامشدی !
ایشته او کراسته لرله سقف بیت الله ده انشا ایدلدی .

* *

سید البشر افندیز ، اوتوز بش یاشلرینه بالغ
اولدقلرنده هاتقدن کندیلرینه طوغری « یا محمد ! » دیه
ندا ایدلمکه ، بعض طرفلردن ده کوزینه نور کورونمکه
یاشلامشدی .



فصل ثالث

{ ظهور نور اسلام }

ابتدای نزول وحی الهی . وقوع رسالت احمدیه . سابقین
اسلام . اسلام ابی بکر . اسلام علی . اعلان نبوت و اذیات
کفار . مسلمینک حبشه هجرتلری . اسلام حمزه . اسلام
عمر . انشقاق قر ، قطیعه رحم . اعجاز قرآن . فسخ حکم
عهد . سنة الحزن و وفات خدیجه و ابی طالب . طائفه عزیمت
احمدیه . ازدواج نبوی باعائشه و سوده . معراج قدسیست
منهاج پیغمبری . عقبات بیعتلری . اسلام اسید بن حضیر .
اسلام سعد بن معاذ

*
*
*

۱

— ابتدای نزول وحی الهی —

سلطان هر دوسرا خاتم الانبیا محمد المصطفی علیه
افضل الصلوة و التحایا افندیمن حضرتلری ، قرق یاشلرنده
خلعت مقدسه نبوت و قرق اوچ یاشلرنده حلیه جلیله
رسالت ایله متحلی و مشرف اولدیلر .

نبوتلری رؤیای صالحه و صادق ایله باشلایوب کجه
هر نه که رؤیاده کورورلر سه تماما عینک ظهور ایله دیکنی
مشاهده بورورلردی .

ایشته او غنجه کستان نبوت افندیملک یکر می اوج
سنه اولان زمان سعادت نشان نبوتلرنده قرق الی
دفعه دور وتکرر ایتش بولسان الی آیک ایلک الی
آینده وحی الهی، انجق رؤیای صالحه ایله واقع اولدیغیچوندرکه
رؤیای صالحه، نبوتک قرق الی جزئدن بر جزء
اعتبار ایدلمشدر . [۱]

بو اوقات مسعودده یعنی بو ایلک آلتی ماه ظرفنده
حضرت سید رسل افندیملر . هر شیدن زیاده خلوت
وعزاتی سوه رک جوار قدسیت مدارلرینه اغیار و ماسوادن
هیچ برشیک اقتراخی ارزوایلله مدکریچون جبل حراده
واقع غار مخصوص صلیرینه کیدر ، اوراده تک وتنهارینه
عبادت ایلهردی .

مذکور غار حراده قبیله قریشدن اک اول عبادت
ایدن، جد عالی نبوی « عبدالمطلب » در . بعده « امیه
بن المغیره » ایله « ورقه بن نوفل »، ملازمت غارده اکا
پیرو اولمشلردی .

[۱] رؤیای صالحه ایله ابتدای وحی زمانی و امتدادی
مدتی ، ربیع الاول اون اوچنچیسندن رمضان شریف اون
یئنجیسنه دکن کچمش اولان الی ماه اولدینی روایات
تاریخیه دندر .

فقط كرك غار سعادتقرارلرينه ، كرك بر باشقه يوله
كيدر كن يولده طاغ، طاش، اغاج هر نه يه تصادف بيورورلر
ايسه هيسنك ده كنديسنه طوغرى :

— « السلام عليك يا رسول الله ! »

ديه آواز ايله دكاري ني ، كيجه رؤياسنده بيلديكي برچوق
كيمسه لري و كذلك باشي كوكله اريشير ، اياغي يرلره
يتشير بيوك بر مخلوق عجبى كورمكه باشلا ديغنى متعاقب
قورقوسندن كيفيتى حضرت خديجه يه آچمشدر .

زيرا بو علامادن هيچ برينك كندى نبوت احديه -
لرينه دليل و مقدمه اولديغى خاطر و خياله بيله كلزدى .
انجق علامات مذكوره يي باشقه درلو برسؤ حال اثرى
اولقى اوزره تلقى ايله مكده ايدى .

كوندوزلري ده بعضاً ، بيلديكي كيمسه لر ، يانته كلوب
كيرلردى . بونلر كه و كيم اولديغى حقنده جناب اجد
بر معنا ويره ميكندن طولايى اوركر و دائماً خوف و حذر
اوزره بولنور ايدى .

حضرت خديجه ، اونلر كه فنا كيمسه لر اولديغنى
سويله مكله برابر شايد بردها كورينه جك اولورلر سه
كورونديكاري زمان كنديسنه خبر و ير مسنى ده سوزينه
علاوه ايدى .

بر کون حضرت پیغمبر افندیز، سعادتخانه لرنده
[خدیجه نك خانه سی] اوطور یوراردی . اولجه کوردیکی
کیمسه لر، ینه کوزینه کوروندی . افندیزدخی ، کیفینی
در حال حضرت خدیجه یه بیلدیردی .

خدیجه ایسه همان اوستنی باشنی محکم اورتدکدن
صوکره افندیز ل ارقه طرفلرینه کچوب صول دیزی اوستنه
رسول اکرمی اوطورده رق اکا :

— « کور یور مینسک ! »

دیه صوروب :

— « کور یورم ! »

جوابی آلیر ایکن ذات جلیل رسالتپناهی بی صاغ دیزی
اوستنه بعده تا قوجاغنه اوطور تمش وهر ایکی موضعه
ایکن کوروب کور مدیکنی صورده رق ینه کور مکده
اولدیغی جوابی النجه نهایت باشندن بر قسمی آچهرق
صاچنی میدانه قویدقن صوکره بردها صورمش
وایشته او زمان ارتق کور مدیکی جوابی آلوب
کورینان شیرک نه اولدیغی اوصورتله اکلامشدر .

حضرت خدیجه بو وجهله ایشی اکلایه رق بعده
ذات عالی اجدی یه خطاباً :

— « او کورینان شیلر ، شیطان دکل بلمکه ملائکه کرامدر . زیر ملائکه اولزسه صاچی کوروبده غائب اولزلر . »

دیه تبشیرات مخصوصه اجرا ایتشد .

لکن حضرت خدیجه نك اشبو استطلاعات و تبشیراتی غار حرا ده و یا خود وسط جبلده حضرت جبریل ایله اولان ملاقات و مخاطبه دن صو کره اولدیغنی یازان بعض آثار تاریخیه دخی موجوددر .

*

* *

حضرت رسول اکرم صلی الله تعالی علیه وسلم افندیمر ، سن شریفلرینک قرقه بالغ اولدیغنی شهر رمضان شریف اون یدنجی - و علی روایة ربيع الاول اون یدنجی و یا خود اون ایکنجی - بازار ایرته سی کونی جبل حرا ده کی غار مخصوص سعادت لرنده ایدیلر .

حضرت جبریل امین ، حامل منشور وحی مبین اولدیغنی حالده حضور پر نور رسالت پناهی به کلوب :

— « یا محمد ! انت رسول الله ! »

دیهرک فتح باب مصاحبت ایله مک ایسته یجیه اوته دنبری کوزینه کورینان شیلردن ذاتاً پک زیاده سیله خوف ایتمش اولان حبیب خدا ، اوسوز قارشی مصادف اولدیغنی

دهشتندن ناشی دیزلری اوستنه دوشوب بویون چنبرینک
 کوشه لری شدتلی برحالدہ دیترمکہ باشلادیغندن همان
 دوتوب خدیجہ نیک خانہ سنہ کلہ رک اوزرینی ده اورتیر.
 دکن صوکره ، کندیسینی استیلا ایدن روع ودهشت
 زائل اولنجیه دکن استراحت بیوردیلر . بعده قالقوب
 ینہ جبل حراده کی غاره طوغری کیتدیلر .

فقط وسط جبل حرایه موصلتلی ائساننده طرف
 سمان :

— « یا محمد ! انا جبریل وانت رسول الله ! »

مداسی کلکله حضرت نبی ذیشان یوقارییه باقوب
 جبریلی بشر صورتندہ افق سماده قائم کوردکن فضله
 هرهانکی برباشقه جانبہ احاله نظرایتسه اوراده ده کور.
 دیکندن افندیمز ، ینہ حاصل ایله دیکی دهشت سببیلہ اورادن
 نه ایلرییه تقدم ، نه ده کیرییه عودت و تأخر ایله میهرک
 قالمش ونهایت کندیلرینی طاغدن آشغییه اته حق
 مرتبه ده کنارہ تقریب ایتشدی .

روایتہ کوره اوزمان دهشتده « آدم کوندرسون
 ده نبی کیرییه الیرسون » دیه خدیجیه خبر دخی
 کوندرمشدی !

حضرت جبریل ، باشقه زمانده بردها :

— « یا محمد ! انا جبریل و انت رسول الله ، اقرا »
 ديه خطاب ايتديکندن رسول اکرم صلى الله عليه وسلم
 افنديز دخی او خطابک کنديلرينه اولان تأثيراته قارشى
 زياده سيله متأثر اولدقلرى حالده مقابله :

— « ما انا بقارىء . فما اقراء »

بيورملييله جبريل امين ، رسول اکرمى سینه سنه
 ياخود رأس همایون محمدی قوتوغی التنه الوب
 اولقدر شدتله صیقه دی که مبارک ذات عالی رساله
 لتپناهینک وجود مسعودلر نده تاب وتوان نامنه هیچ بر
 شی بر اقامشدى .

اشبو معامله یی حضرت جبریل ، اویچ دفعه تکرار
 له دقدن صوکره : [اقراء باسم ربك الذى خلق . خلق
 الانسان من علق . اقراء وربك الاکرم .] آیت
 کریمه سنی تلقین بیورمشدر [سنه میلادیه ۶۱۰]

ظهور وحی الهینک مهابتی فخر عالم افنديز مه پک
 زياده سيله خوف و دهشت ایراث ایله دیکندن جسم
 همایونلرندن کل صوی کبی تر لر طمله دی . وهمان
 دیتريه ، دیتريه خدیجه نك يانه کلوب [زملونی
 زملونی] بیوردى .

خدیجہ دخی در حال او حضرتک اوستنی اور تدی .
 اوده بر مقدار تنفس واستراحتدن صوکره ، واقع اولان
 حالی خدیجہ سويله دی .

بعده حضرت خدیجہ نبی ذیشان یاننه الوب
 ورقه بن نوفلک نزدینه کتیردی . و کیفیت وحی الهی بی دم
 اکا حکایه ابتد . [۱]

ورقه ایسه :

— « مژده یا محمد ! سن عیسی بن مریمک خبر
 ویردیکی نبی آخر الزمانسک ! سکا کورینان ملکده
 موسی بن عمرانہ کلان ناموس اکبردر . کاشکی کنج

[۱] ورقه « نوفل بن اسد بن عبد العزی بن قصی .
 نک اوغلی و حضرت خدیجہ نک عمیلریدر . کتب سماویہ
 آشنا و آخر عمرنده نور بصردن محروم اولمش بر پیر فانی
 ایدی . حضرت پیغمبر افندیمنک زمان رسالت احمدیه لری
 کلوبده هنوز دعوتہ مأمور اولمرندن مقدم وفات ایدهرک
 مکده [حجون] قبرستاننه دفن ایدلشدر . ورقه ، رسالت
 احمدیه بی تصدیق واکا ایمان ایتشدی انک ایچوندرکه ذات عالی
 رسالتپناهی :

— « لقد رأيتہ فی الجنة وعلیه ثیاب الحریر »

بیورمشلردر !

اولوبده سنك اعلان نبوت ايدە جكك وقته ايريشيدم .
 قومك سنى مكە دن چيقارە جغى زمان سكا ياردم
 ايدردم . »

ديدكدن باشقه كيفيتك نبوت ورسالتە دلالتى حقنەدە
 خديجه يە خطاباً :

فان يك حقاً يا خديجه فاعلمى !

حديثك ايانا فاجد مرسل

وجبريل ياتيه وميكال معهما

من الله وحى يشرح الصدر منزل

يفوز به من فاز غراً لدينه

ويشقى به الغاوى الشقى المضلل

فريقان منهم فرقة فى جنانه

واخرى باغلال الجحيم تغلل

بيلترينى دە سويلە مشدر .

حضرت پيغمبر دخی :

— « يا قوم بنى مكە دن چيقارە جقمى ؟ »

ديه سؤال ايدنجه ورقه :

— « اوت چيقارە جقندر ! منصب نبوت عالمده

هر كيمه احسان بيوراديسه قومى ايچنده اكا دشمنلر

پیدا اوله کلمشدر . سنی دخی قومک مکهدن چیقارسه
 کرکدر »
 جوانی ویردی .

*

بر روایتده ، مهابت وحی الهیه قارشی متأثر
 قالان حضرت پیغمبری ثیاب ایله اورتوب اویوتدقدن
 صوکره خدیجه یالکز اولدیغی حالدہ عزاده سی ورقه یه
 کیتمش وواقع اولال حالی حکایه ایتمش ، اودخی ایات
 مذکورہ ایله جواب ویرمشدر . خدیجه او جوانی
 الوب کلدیکنک عقینده ایدی حضرت جبریل ، « یا
 ایها المدثر ! قم ! » آیات کریمه سنی تلقین ایتدیکندن
 رسول ذیشان افندیمن اندن صوکره خدیجه ایله برابر
 اولدقلری حالدہ ورقه یه کیدمرك اندن خبر هجرتی
 ومستقبلده کوروب پکیره جکی احوال حقنده دها بر
 چوق معلومات غیبیه یی آلمشدی . که ایشته بوروایت ،
 روایات سائرمدن دها زیاده صحتیه اقرب اولدیغنه مآل
 ایات برسند مؤید کورینور .

اندن صوکره تحمل واستعداد جناب احمدینک
 توسعی ایچون وحی الهینک ارقه سی کسلدی . جبریل
 امین کورونمز اولدی . فقط اسرافیل علیه السلام اره

صره کبیر ، بعض شیلر تعلیم ایدردی . بو حال اوچ سنه
دوام ایتدی .

*

**

۶

— ❖ وقوع رسالت احمدیه ❖ —

سال حیات سعادتلرینک قرق اوچنجی دورء منوره
دل آرالرنده برکون حضرت پیغمبره کوکدن « یا محمد »
دیه بر ندا کلدی . افندیمز ، یوقارییه باقوب جبریل امینی
هواء و بر کرسی اوزرنده قائم کوردی .

فقط کندیسنه تأثیر ایدن مهابت وحی الهی سببیله
یرنده طوره میوب خدیجه نك یانته کلدی . و [زملونی
زملونی] یاخود [دثرونی ، دثرونی و صـ : بوا علی ماء
بارداً] دیهرک لباسنه بوروندی .

جبریل امین دخی تایانته کلوب :

— « یا ایها المدثر ! قم ! »

دیدی . افندیمزده جواباً همان یرندن قالقه رق :

— « قد قت ما صنع ؟ »

دیمکله جبریل :

— [فاندِر ! وِر بک فکبر ! وِثابک فطهر ! والرجز
 فاهجر ! ولا تمنن تستکثر ! وِر بک فاصبر !] آیات
 کریمه سنی تلقین ایتدی . که ایشته بو آیات کریمه نك
 مضامین شریفه سی رسالت اولمغله اوندن اولیه
 ارتحال وانتقالرینه دکین و حیک ارقه سی بر دها
 کسلما مشدر .

*

* *

۴

— سابقین اسلام —

امین وحی خدا ، « قم » امریله رسالتپناه افندیمز
 حضرتلرینی اقامه و آیات کریمه رسالتی تلقین ایله دیککی
 زمان حضرت رسول محترم صلی الله علیه وسلم افندیمزک
 ایاقده طوردقلرینی کورن خدیجه ، اکا خطاباً :
 — « یا ابا القاسم ! او یومدن نیچون قالقدیکز ؟ »
 دینجه افندیمزده :

— « یا خدیجه ! ارتق او یومق بنم ایچون دکلدِر . »

حضرت جبریل کلدی . حق تعالیٰ نیک امریٰ خلقه
تبلیغ ایت دیه امر ایتدی . فقط شمدی بکا کیم
اینانیر ؟ »

جوانی ویردیکندن حضرت خدیجه اوسوزه مقابل :
— « یا رسول الله ! بن سکا اینانیرم . بکا هرکسدن
اول تلقین دین ایت ! »

دیش ورسول اکرم صلی الله علیه وسلم افندیز
حضرتلری دخی اونک او طرزده کی صداقت
خدا پرستانه سندن غایت زیاده سیله ممنون ومحفوظ
اوله رق اکا ک اول دین مبین اسلامی عرض وتلقین
بیورمشدر .

جبریل امین ، هنوز اوراده حاضر وموجودایدی .
رسول محترم افندیزه دیدی که :

— « یا محمد ! برصو کتیر ! سکا آبدست ، نمازاداب
واصولنی اوکردهیم »

صو کلوب هراوچی ده آبدست آلدقدن صو کره جبریل
امام اولدی . نبی ذیشان افندیز انک اردینه خدیجه
دخی حضرت پیغمبرک اردینه کچوب ایکی رکعت نماز
قیلدیلر .

بر روایتہ کورہ اشبو تعلیم آداب وضوء و صلوات
کیفیتی غار حرادہ واقع اولمشدر . حتی حضرت
جبریل ایامیلہ یرہ دینچہ دیدیکی یردن همان بر لطیف
پیکار ظهور ایدہرک رسول اکرم افندیمرزہ او پیکاردن
آبدست آلدیرمشدر .

*

* *

حضرت خدیجہ رضی اللہ تعالیٰ عنہا حضرت تلویدن
صوکرہ الک اول کیمک قبول دین اسلام ایتدیککی بین الروات
مختلف فیہ ایسہدہ اکثریت حضرت ابی بکرک
اسلامندہدر .

جناب ابی بکر رضی اللہ تعالیٰ عنہ حضرت تلویدن
صوکرہدہ « علی ابن ابی طالب » و رسول اکرمک
آزادلیسی « زید بن حارثہ » قبول دین مبین اسلام شرفیلہ
مشرف اولدیلر .

جناب ابی بکر رضی اللہ تعالیٰ عنہ حضرت نلری ،
ارتق امنیت ایله دیککی و قبول دین اسلامہ مائل
و مستعد کوردیککی آدملری ال التندن تشویق و دعوت
ایدر و قبول واجابت کوسترنلریدہ الوب حضرت
سیدالبشر افندیمرزک حضور پر نور ہمایونلرینہ کتیررتقدیم
ایدردی .

ایشته ابی بکرك او صورتله اولان تشویق و دعوت
خفیه سی اوزرینه « حضرت عثمان بن عفان ، عبدالرحمن
بن عوف ، سعد بن ابی وقاص ، زبیر بن العوام ، طلحه
بن عبدالله » قبول دین اسلام بیورمشلردر . رضی الله
تعالی عنهم !

مشار الیهم حضراتی دخی « ابو عبیده عامر بن
عبد الله الجراح ، عبیده بن الحارث ، خباب بن ارت ،
سعید بن زید ، وزوجه سی فاطمه بنت الخطاب ، عمرو
بن نفیل ، ابوسلمه بن عبد الاسد ، ارقم بن ارقم المخروص ،
عثمان بن مظعون ، قرنداشلری قدامه و عبدالله ، بلال
بن رباح الحبشی ، عبد الله بن مسعود ، صهیب بن
رومی ، عمار بن یاسر ، ووالده سی سمیه » نام ذوات
تعقیب ایله دیلر . رضوان الله تعالی علیهم اجمعین !

بعده ناس بلوک بلوک دائرة فخره اسلامه دخول
ایتمکه و دین مبین محمدی شرفی احراز ایله متشرف
اولمغه باشلا دیلر .

ع

— اسلام ابی بکر —

رضی الله عنه

حضرت خدیجه رضی الله تعالی عنها حضرت تدرندن
صوکره جناب ابی بکرله علی المرتضی رضی الله تعالی
عنهمادن برینک هرکسدن اول قبول دین مبین اسلام
ایتدیکی مشهور ومتفق فيه ایسهده هانکی برینک
اسلامده سبق وتقدم ایتدیکی اختلافدن وارسته
اوله مامشدر .

حضرت علی المرتضی کرم الله وجهه نك سبق
اسلامنه « محمد بن جریر الطبری » کی قائل اولان
بولندیگی کی بونک سبق وتقدم لرینی جداً قبول ایدن
دخی بولنمشدر .

حتی شعرای جناب رسالتیناهییدن « حسان بن
ثابت » رضی الله عنه حضرت تدریده اسلامده جناب ابی
بکرک سبق لرینه :

اذا تذكرت نحواً من اخي ثقة
فاذكر اخاك ابا بكر بما فعلا
خير البرية اتقادها واعدلها
بعد النبي واوفاهها بما جلا
الثاني التالي المحمود مشهده
« واول الناس منهم صدق الرسالا »

بیتلریله اشارت ایتشدرد .

مشار الیهک سبقلرینه اولوجهله عموماً اعتقاد
واعتماد حاصل اولدیغی حالدہ علامۂ قسطلانی [ارشاد
الساری نشرح صحیح البخاری] نام کتاب مستطابلرندہ
جناب ابی بکر رضی اللہ تعالیٰ عنہ حضرتلرینک
اسلاملرندن بحث ایدرکن بر یردہ سویلہ دیکی :

— « وهو اول من اسلم من الاحرار البالغين . . . »

سوزینک اوزرندہ « احرار ، بالغین » کبی ایکی درلو
یوروتدیکی قیدلر ، روایات واختلافات تاریخیه قارش
مثلاً آزادلیلردن « زید بن حارثہ » ، صبیاندن « علی ابن
طالب » رضی اللہ عنہمانک سبق اسلاملری مروی بو-
لندیغنه کوره محتمل اولان سهو وخطایه محل قلاماق
ایچون - اول اوله ، ثانی ثانییه ناظر اولمق اوزره
وضعی اختیار ایدلمش برر قیده احترازیدر .

بونکله برابر اوقیدلر، روایات واختلافات مذکوره
بیننده علامه مشارالیهجه حصولی شبه‌لی قالمش دیمک
بولنان ترددی ده واضح بر صورتده ایما ایدر.

مع مافیه بونلر هب محتمل اولان خطادن احترازه
محمول اولوب اکثریت ینه سبق اسلام ابی بکرده قالیور.
ذاتاً مشار الیهک قبل النبوه معلوم و مروی اولان
شئونات حیاتیه سی دقتله ملاحظه ایدیلیر ایسه قبول
اسلام خصوصنده هیچ برکیمسه کندیلیرینی سبق ایده -
میه جکی پک قولای اکلاشیله یور.

جناب ابی بکرک صورت قبول اسلامی وقعہ سنی
اک مفصل اوله رق یازان اثر تاریخیده دینیله یورکه :

« اوکونک کیچه سی ، نبی محترم صلی الله علیه وسلم
افندیمز، بیوک براندیشه ایچنده قالمشدی . کندی کندینه :
« بن بواشی کیچه آچیم ؟ هر نه یاپسه م اینامزلر ! »
بیوررلردی . انجق برچوق ملاحظات دورا دوردن
صوکره : « ابو بکره آچیم » دیه بیلمشدی .

زیرا ابو بکر ، حضرت رسول اکرم افندیمزک
هرکسدن زیاده دوستی ایدی . افندیمز نصل که کو -
چوکلکندنبری بتلره بغض ایده کلدیسه اودخی عین
وجهله بغض طوتار ایدی .

حتی ابو بکر، کنج‌کننده یعنی زمان بعثت و رسالت
احمدیه دن چوق مقدم بعضاً نبی ذیشان افندیمزه
خطاباً :

— « یا محمد : عوم قبائل عربك و علی الخصوص
آبا و اجدادیمزك طایدیغی بتلره سن نیجون سجده ایتمزسك ؟ »
دیدجکه افندیمز دخی اکا :

— « یا ابا بکر ! کوکلم وارمیور که مخلوق اثری
اولان بر شیئه عبادت ایدیم ! باشقه درلو بر دین حق
واردر ! »

جوابی ویریر جناب ابی بکرده :
— « یا محمد ! بنم ده فیکرم ایشته او ، دیدیکک
شیئک عینیدر ! »

دیه او فکرده کی مشارکت و موافقتی اظهار ایدردی .
لکن حضرت فخر کائنات افندیمز ، مبارک خاطر عاظر
سعادتلرینه هیچ کتیرمدیلرکه ایلاک تکلیفده ابو بکر،
تکلیف دعوتی قبول ایدوب اجابت کوستره !
حالبوکه جناب ابی بکر دخی او کیجه بیوک بر
اندیشه ده ایدی . ذهننده دیرایدی که :

— « بو بتلره طایمق هیچ ایو بر دین دکدر .
کندیسندن نه فائده ، نه ده ضرر کلیمان بر شیئه عبادت

جائز می ؟ حق تعالی بزی و کافه مخلوقات یار آید یی حالد
هیچ قبول ایتز که کند یسنک غیری اولان مخلوقنه عبادت
ایدلسون ! آه کاشکی بر آدم اولسیدی ده بنی بر دین حق
طوغری سوق و ارشاد ایتسیدی ! عجبا کیمی بوله بیلیرم ؟
نهایت شوکا قرار و یردی :

— « محمد الامین ، کامل ، عاقل بر ذاتدر . بنله
دوستلغی ، بتره بنم کبی بغض و عداوتی وارددر . یارین
اونک یانه واروب افکاریمی ، اسراریمی آچهم . تاکه
او ، بکا طریق حق کوستره ! »

* *

صباحلین حضرت رسول اکرم افندیمر جناب ابی
بکر رضی الله عنک خانه سنی تشریف نیتله دولخانه .
لرندن طیشارییه چیقمش لردی . ابو بکر حضرتلری
دخی خانه لرندن چیقدی . سعادخانه رسالتیناهییه
کله جگدی . یولده بری برینه تصادف ایتدیلر .

بونک اوزرینه حضرت سید کائنات افندیمر جناب
ابی بکره خطاباً بیوردیلرکه :

— « بن او یکره بر مشورت ایچون کیدیور ایدم »
صحابیء مشارالیهده ، اکا جواباً :

— « بن دخی او یله ایدم • فقط سویله مک
ایستدیکم شی اوزوند • سز کندی حکایه کزی
ایدیکز ! »

دینجه رسول محترم صلی الله تعالی علیه وسلم افندیز :
— یا ابا بکر ! حضرت جبریل امین کلوب بکا
کندی کوستردی • خلقی دین حقه دعوت امرینی
ویردی • تا که خلق حق تصدیق ایله عبادت اصنام
واوئاندن واز کچهر ! »

بیوردیغندن حضرت ابی بکر، اوسوزه بیوک برمنونیتله
مقابله ایله مشدر :

— « یا محمد ! جله خلقدن اول بکا دین حق
عرض ایت ! بن دون کچه بو اندیشه مدن طولای
اویویه مدم • بو کونده ایشته انجق بونکچون سکا
کلیور ایدم »

حضرت نبی اکرم، رسول مکرم افندیز همان
اوراده دین اسلامی جناب ابی بکره عرض وتلقین بیور-
مش صحابی مشارالیه دخی، بلا تردد قبول ایتمشدر .

•••

امام مسلم نووی حضرت تدرینه مسند اولان روایت
کوره مشارالیه، قبول اسلام ایله دیکی زمان، یکرهی

یاشنده ایدی . لکن بو روایت صحیح دکلدر . زیرا
 بدایت ظهور اسلام اولمش بولنان مشارالیهک
 التمش اوچ یاشنده ایکن ارتحال ایتمش اولدیغنه باقیلیر
 ایسه واشبو التمش اوچدن کندی - ایکی بچق سنه
 اولان - مدت خلافتی ورسول ذیشانکده یکریمی اوچ
 سنه بولنان مدت دعوتی که جمعاً یکریمی بش بچق سنه
 طرح وافر از ایدیلیر ایسه یکریمی بش بچق سنه اول
 اوتوز یدی بچق یاشنده اولدیغی حالده قبول اسلام
 ایتدیکی تحقیق ایدر .

ابو بکر رضی الله تعالی عنه حضرتلرینک دین
 بین اسلامی ایشته اولوجهله قبول ایتمش اولسندن
 ملولای ذات جلیل رسالتینهای فوق العاده درجه سنده
 نون اولدیلر .

حتی بتون رجال عالمدن اول کندیسی دین مبین
 حقه دعوت اولندیغی جهتهله عدم اجابتی حالنده حصوله
 تاثیر هجکی مأیوسیت ، تحدید اولتمق مقدرندن فضله
 لنان جناب ابی بکر رضی الله تعالی عنه حضرتلرینک
 یله همان بلا تردد اجابت کوسترمسی طبیعی محظو-
 بیت علیه احدییه بی مستلزم اولدیغندن حقهله طرف
 یشرف رسالتینهایدن :

— « ما عرضت الاسلام على احد الا كانت له عند
ذلك كنود غير ابى بكر وانه لم يتلعم » (١)
بيورلمشدر .

*

* *

« رياض النضره » ده محرر اولديقى عبدالرحمن صفوى*
شافعى حضرتلرى طرفندن « نزهة المجالس » • يازيلان
روايته كوره جناب ابى بكر ، شام ديارنده تجارت
ايدركن بر رؤيا كورهش واو رؤيايى راهب مشهور
« بحيرا » :

— « ان صدق الله رؤياك فانه يبعث الله نبيا
من قومك تكون وزيراً له في حياته وخليفته في وفاته »
ديهرك ابو بكر خاتم الانبيا والمرسلين افنديزه وزير
وبعد وفاته خليفه اوله جفنى تبشير ايله تعبير ايتمشدى •

(١) عبدالرحمن صفوى شافعى حضرتلرى ، « نزهة -
المجالس » نام كتابلرينه - امام رازيدن نقلاً - بو حديث
شريفى :

« ما عرضت الا لام على احد الا وتلعم فيه غير ابى بكر رضى الله
عنه فانه قبله ولم يتوقف فيه »
عباره سيله يازمشدر !

وقتاً که جناب سید المرسلین افندیمز اعلان نبوت
ایدوب دعوتہ باشلادی. ابوبکر، کیدوب رسالتیناہ افندیمز :
— « دلیل نبوتک ندر ؟ »

سؤالنی منکرانه بر صورتده ایراد ایتش افندیمزده :
— « شامده کوردیکک رؤیا ! ۰۰۰۰ »

دیه جواب ویرمش اولدیغندن ابوبکر همان :
— « اشهد ان لا اله الا الله واشهد انک رسول الله »
جوابیلہ برابر قبول دین اسلام ایله مشدر .

— اسلام علی —

کرم الله وجهه

یدی . سکز ، طقوز ، نهایت اون یاشنده بر صبی
اولدیغی حالده قبول اسلام ایله دیکی مروی اولان
جناب علی المرتضیٰ نک، حضرت ابی بکره سبق و تقدملری
ده مرویدر .

اشبو روایتی صحیح اولمق اوزره قبول وتلقی ایدیلر:
— « لقد صلت الملائكة علیّ و علی علیّ . لانا
کننا نصلی و لیس معنا احد »

حدیث شریفنه ، وابن عباسک :

— « اول من اسلم بعد خدیجة علی »

کبی روایتنه ، كذلك جناب علی المرتضانک :

— « عبت الله خمس سنين قبل ان يعبدہ احد من

هذه الامة »

قولنه استناد واعتماد ایدرلرکه او حالدہ سبق هانکی
طرفده اولدیغی حقیقه شهبه لی قالیر .

بو سببه مبنی اولمیدر که علامه قسطلانی دخی
« ارشاد الساری » لرنده سبق جناب ابی بکر حقندہ
برایکی یرده :

-- وهو اول من اسلم من الاحرار البالغين »

دیمش ومسبوقلری « احرار ، بالغين » ایلہ قید ایدرک
سابقیت جناب ابی بکری اولوجهله محافظه ایدہ بیلشدیر .
ایشته بونلرکبی برچوق سندلره قارشى اکثریتینه
سابقیت صدیقیده قالوب جناب مرتضا اندن صوکره
قبول اسلام ایتدی دینلمشدیر .

مع مافیہ جناب علینک سابقیتلرینه قائل اولان
« محمد بن جریر الطبری » ، مشارالیهک صورت قبول
اسلاملری حقندہ دیرلرکه :

جبریل امینک امام اولدیغی واکا حضرت رسا-
 لئیناه افندیملزه حضرت خدیجهنک اقتدا ایدوب جماعه
 ایکی رکعت نماز قیلدقلری زمان یانلرینه جناب علی
 المرتضا کیروب انلری اوله برحالد کورمشدی .
 حالبوکه اوکلرنده طابه حق برشی کورمه دیکنندن
 نیچون اوله وکیمه سجده ایله دکلرینی صوردی . افندیملز
 دخی ، واقع اولان حالی اکا جواباً سوله دکدن صوکره
 کندیسیده قبول ایدرسه تعلیم ایدجکنی علاوه ایدی .
 علی ، برکره :

— « بابام ابوطالبدن صورهم »

دیه رک طیشارییه قدر حقیقه دیسهده همان دونوب :
 — « یا محمد ! حق تعالی بنی یارادیرایکن ابوطالبه
 صوروبده بعده یاراتمدی . بن حقه طایمق ایسترن
 طابه یممی دیه ابوطالبه نیچون صورهم ؟ اول دین که
 فشرینی سکا امر ایتدیلر حقدر ! بکاده عرض ایت ! »
 دیه مقابله ایتمکه افندیملز اکاده دین اسلامی عرض
 ایله دی . اودخی شرف قبول دین اسلام ایله مشرف
 اولدی . رضی الله تعالی عنه !

حالبوکه جناب علی المرتضی کرم الله وجهه
 حضرتلری اوزمان اذیات مشرکینه تحمل ایدمه جاک

قدر صبی بولمق سببیلہ اسلامنی کیزلی طوتار ایدی .
 حتی بواخفای اسلام خصوصی خیلی زمان دوام
 وامتداد ایتشد .

*
 * *

۶

— اعلان دعوت —

و

« اذیات کفار »

بدایت امرده دعوت ، بر مقتضای حال و مصلحت
 کیزلی اولور ایدی . حتی نمازده بیله قرآن جهراً او-
 قونماز ایدی .

مؤخراً یعنی تاریخ ولادت نبویه نك قرق دردنجی
 سنه سنده [فاصدع بما تؤمر و اعرض عن المشرکین]
 آیت کریمه سی نازل اولدیغندن اندن صوکره ذات
 رسالتیناه افندیمز ، ناسی علماً دعوت و قرآن کریمی ده
 جهراً تلاوته باشلادیلر .

*
 * *

بدايت بعثت احديه ده قريش قومي اور رسول
 ذيشانه بردنبره ايمان ايتك ايستمديسه ده اوندن پك ده
 اوزاق طور مامش و بتلرينك عليهنده سوز سويلنلديكي
 ايشيديلنجيه دكين اوزات عاليشان حقنده فنا معاملهي
 روا كور مامش لدر .

فقط مشركين قريش - شر كده دوام و ثباتلري
 اولدقجه - كرك كنديلرينك ، كرك معبود مقدس عد
 واعتقاد ايله دكلري هبل ، اساف ، ناله ، لات ، عزى
 فلانلرينك عموماً جهنم اوطونى اولديغى حقنده [انكم
 وما تعبدون من دون الله حصب جهنم] آيت كريمه سنك
 و برده اصنامه عبادت ، شرك و ضلالت اولوب معبود
 اتخاذايديله جك انجق خالق المخلوقات اولان جناب
 حق اولديغى و اكا عبادت ايدلسنك وجوب و لزومى
 مر آيات كريمه نك تعاقب نزولى صنديد قريشه كوج
 لكهرك اولوقته دكين هيچ بردفعه بيله يالان سويله مديكنه
 بناندقلى حضرت محمد صلى الله عليه وسلم افنديمى
 كذيبه قالمش لدر .

كور دكلري هر درلو معجزات بينات نبويه ده
 مديلر . ايجلرندن دين اسلامى قبول ايدن ايتدى .

ایمان، فرقه او، حضرت رسول کبریائک علیهنده اجرای
عداوتہ یکدست و یکزبان اتفاق اولدی!

بناءً علیه ربیعہ بن عبد منافک اوغلاری «عتبه»

عتبه «و» ابو سفیان صخر بن حرب بن امیه، ابو

الختری، ابو جهل بن هشام بن مغیره «و ابو جهلک

عوجہ سی «ولید بن مغیره المخزومی»، عمرو بن

عاصک پدری «عاص بن وائل السهمی» کبی بر چوق

کبار قریش طویلانوب ابو طالبک یانسه کیده رک اکا :

— «یا ابا طالب! برادر زادهک بزم دینمه

دخل و تعرض ایدیور. یا نهی ایت! یا خود جایه دن

واز کیچ!

دیدیلر.

ابو طالب، او آدملری بر لسان مناسب استعمال

ایده رک باشندن صاودیسده نبی محترم صلی الله علیه

وسلم افندیمز دعوتنده دوام ایله دیکندن تکرار

کدیدلر و :

— «بو حاله بز تحمل ایده میه جکز. نه اوله جق

ایسه اولسون! اکر سن محمدن الکی چکه میه جک

ایسهک بز سندن الیزی چکه جکز!»

دیدیلر.

ابو طالب ، ارتق ایشك كو جلدشديكنى اكلايه رق
 رسول مكرم افنديمه حال و كيفيتك وخامت عواقبندن
 بحث ايتدى . هر نقدر حايه كدن واز چكدم ديه مديسه .
 ده طرز افاده سندن او معناني اكلامق ايسته يور ايدى .
 رسالتپناه افنديم ، اكا قارشى پك زياده سيله متكدر و
 متأثر اوله رق مبارك كوزلرندن ياش كلدى . و مأوسا
 قالقوب كيده چكلى ائشاده :

— « يا عم ! بن جناب الله طرفندن تبليغ امر ايله
 مأمور و ايفساي امره مجبورم . اونلر نه ياپارلر سه
 ياپسونلر . سنده بنى حايه ايدرسك ايدرسك . والا
 ينه سن بيليرسك ! »
 بيورديلر .

رسول اكرم افنديمك اوليله آغلايه آغلايه قالقوب
 كيتمسندن فوق العاده متأثر قالان ابوطالب ، او حضرتى
 ارقه سندنبرى چاغيره رق اعاده ايتدى . هم ده انى
 تسليمه اولمق اوزره :

— « اى برادرزاده ! سن ايشكه باق ! بن صاغ
 اولدقجه انلر سكا برشى ياپه مزلر . »
 ديدى .

فی الحقیقه ابوطالب، جایه ده پک بیوک بر ثبات و متانت
 ابراز ایله مش، انک ثبات و متانتیله افندیمز دخی امر
 دعوتی ایفاده ذره قدر قصور و خلل کتیر مامشدر .
 فقط اصحاب کرامک و علی الخصوص اصحاب
 عشرتدن اولیان ضعیفای اسلامیه نک - قبول اسلامری
 سببیه - کفار قریش النذن اوغرادقلری مصائب و
 و تعذیبات، تحمل ایدیله میه جک بر درجه ده ایدی .
 حتی رسول اکرم صلی الله تعالی علیه وسلم افندیزه،
 عمی ابولهب، مثلاً اقربادن اولدیغی حالده پک چوق
 اذیتلر ایدردی :

رسول ذیشان افندیمز . پیدرپی نازل اولان آیات
 کریمه قرآنییه بی تلاوت وناسی دین مبین حقه دعوت
 ایله دجه اودشمن دین ابولهب، بونک علیه ده طولاشیر
 و : « محمد، سزى اجدادیکزک دینندن دوندیرمک
 ایستیور . صاقین الدانمیکز ! » دیر ایدی .

ابولهبک زوجه سی « ام جیل » - که ابو سفیان
 صخر بن حربک قیز قرنداشیدر او - ده قوجه می کبی
 کاه ایله، کاه دیلیله بر چوق اذیتلر ایتسنی ارزو ایدر -
 دی . حتی دیکنلری طویلایوب کجه حضرت پیغمبرک

کچه جکاري يول اوزرينه دو کړدی .

*

**

رسول اکرم افنديمک کریمه مکرمله لری [رقیه]
رضی الله تعالی عنها حضرتلرینک زوجی عتبه بن ابی
لهب دخی مشرک اولدیغیچون ابوینی ایله برابر حضرت
یغمیره عداوت ایدردی .

.*

اول وقت که [واندر عشیرتک الاقرین] آیت
کریمه سی نازل اوله رق اقرباسنی ترهیباً دین حقه دعوت
ایتمکه مأمور اولدی . او حضرت ، همان حرم شریفه
کیتدی . بعده صفا اوزرینه چیقوب اقرباسی بولسان
یتون بنی هاشمی آواز ایله دعوت بیوردی .
قومی یعنی آل هاشم ده صفایه طوغری کلوب
خطاب اجدیه منتظر طورونجه رسول محترم افنديم
جوتلره خطاباً :

— « ای عبد المطلب اوغللری ! وئی فهر اوغللری !!

اکرین شو طاغک ارقه سنده بردشمن وار سزی یغمایه

کلش دیرایسه م سوزیمه اینانیرمیشکز ؟ »

بیورمش و آل هاشم ده :

— « اوت اینانیرز »

جوابيله مقابلده بولمشدر .

بعده رسول ذیشان عليه صلوٰۃ الرحمن افنديم
بورديلرکه :

— « اويله ايسه سزى ، اوککزدهكى يوم قيامتک
عذابيله قورقوتمه مأورم . بکا ايمان ايدیکز ! »
آل هاشمک ايجنده جناب احده شدت عداوتيله
معروف اولان ابولهپ ، همان حدت ايدهرک حضرت
پيغمبره قارشى اغزینی فنا بوزدقدن فضله :
— « بزى بونکچونمی چاغیردک ؟ »

ديه خاطر خاطر رسالتپناهى بوزدهجق سوزلری
سويله مکه ويردن الديغى طاشى او حضرت طوغرى
آتمه يي ايستمکه قدر جرأت ايتشدی !
ايشته بونک اوزرينه [تبت يدا ابى لهپ . . .]

سوره شريفه سى نازل اولمشدر .

ابولهپک ايسه بويله خاصه کندی علينده بر
سوره نازل اولمسندن وزوجه سى « ام جميل » ک
او سورده اويله « حلاله الخطب » ديه ياد وؤبدأ
تشهير ايدلمش اولمسندن طولاي عداوتى مشد اولدى .
بناءً عليه اوغلاری « عتبه » ، ايله « عتيه » به
حضرت [رقيه] ايله [ام کلثوم] رضى الله تعالى

عنہما بی تطلیق ایچون قطعاً المفاد بر
امر و یردی . اونلر دخی در حال اوامری یرینه
کتیر دیلر .

لیکن [ام کلثوم] رضی اللہ تعالیٰ عنہا حضرت تلرینک
زوجی عتیہ ، یالکز تطلیق ایلہده قناعت ایتدیکندن
حضور پر نور رسالتپناهی یہ کیتدی و :
— « کفرت رب النجم اذا هوى . وبالذی ذنی

فتدلی »

دیدکدن صوکره حضرت پیغمبر ذیشانک
اوزرینه هجوم ایله یاقه سندن طوتوب مبارک کوما . کنی
یرتدی .

حالبوکه استعینذ بالله [فاصبر کما صبر اولوالعزم
من الرسل] ، [فاصبر صبراً جیلاً] آیات کریمه سنده کی
هضامین شریفه آمرانه نک اسیر تأثیری بولنان حضرت
پیغمبر ، انجق :

-- « یارب! اونک اوزرینه جانور لر کدن برینی مسلط

ایت ! »

دیہ دعا بپور مقصدن باشقه هیچ برشی دیمدیلر .

* *

تیر دعای جناب پیغمبرینک هیچ تخالف ایتیبوب

همه حال هدف قبول واجابتہ اصابت ایدہ جکندن
 طولایی هر حالده او قضای ناکهانیہ اوغرایہ جغنی
 یلان عتیبه ، پک زیاده سیمله حذر اوزره بولمقده
 ایدیسده برقاج رفیقله برابر اخیراً شامہ کیدرکن یولده
 « زرقاء » نام مرحله یه وارد یغنده من طرف الله مسلط
 اولان بر ارسلانک پنچہ قاهرانه وجانشکارانه سنده پارچه -
 لانوب کیتشد .

حضرت پیغمبر ، کَریمہ محترمه لری [رقیہ]
 رضی الله تعالی عنها حضرت لری ، عتیبه دن صوکره
 جناب عثمان بن عفان رضی الله تعالی عنه حضرت لری نه
 تزویج بیوردیلر .

*

* *

سفهای قریشدن « عقبه بن ابی معیط » نام مشرک
 برکون « امیه بن خلف » لکشویقله مسجد حرامده ذات
 رسالتپناهینک وجه شریف لری نه توکور دیکندن او معامله یه
 قارشی حضرت پیغمبر افندیمز ، یالکمز :

— « یا کافر ! نذر ایدرم که سنی البته برکون قتل

ایتدیره جکم »

بیورمش عقبه ایسه جوابده :

— « یا محمد ! سن اونی امید ایدر میسک که پادشاه
اولوبده آدم قتل واعدام ایتدیرمک الیکدن کله »
دیدیکی حالده یوم بدرده ، اسیر دوشمش و حضرت
پیغمبر افندی مزدخی ، کافر مرقوم علیه نده کی نذرینی حضرت
علی افندی مزک سیف جلاد تیله ایفا ایتشدیر :

*
* *

« استطراد »

و

« نذر نبوی »

سفر دن کلد کجه ترتیب ایتدیر دیکی ضیافته قومشو .
لرینی دعوت ایتمک عادتیله معتاد بولنان « عقبه بن ابی
معیط بن امیه بن عبد شمس » نام سفیه ، بر وقت
اولیله بر ضیافته ذات عالی رسالتیناهی بی ده دعوت
ایتشدی .

فقط حضرت پیغمبر ، ضیافت سفره سته اوطور .
دقدن صوکره النی کیری چکهرک :

— « کلمتین شهادتینی زیور زبان مصادقت ایله دیککی
کور مد کجه یمک کدن یمم »

بیوردی ابن معیط لعین ، امر پیغمبری به امتثال ایتدی !
اندن صوکره ضیافت طعامی تناولنده طرف عالی
پیغمبریدن مباشرت بیورولمش ایدی . لکن وقعه دن یعنی
اسلام ابن ابی معیطدن بالاخره خبردار اولان « امیه بن
خلف » ، تو بیخ و عتاب معرضه عقبه به :

— « صباأت یا عقبه ! »

دیدیکندن عقبه دخی :

— « خیر اویله دکل . لکن دعوت ایتدیکم حالد
یمکممی تناولدن ابا ایدنجه بتون بتون قالقوب کیتسون دیه
استحیاء کلمه شهادتی سویله دم »

دیله تطمین قلبه غیرت ایتشدر . انک اوزرینه امیه :

— « اویله ایسه بو سوزیکک صحتنی اثبات ایچون
کیدوب محمد [علیه السلام] ک یوزینه توکور ! بوینده ده
بر یومروق ایندیرده اینانه یم »

دیله بیاغی شدت عداوتنی اظهار ایتمکله تکلیف واقع ،
طرف ابن ابی معیطدن قبول ایدلدی حتی عقبه ، او
حضرت نبی ذیشانی دارالندوده ساجد اولدقلری
حالد بولوب ابن خلفک عین توصیه سی وجهله
اهانتی اجرا ایتش و او معامله به مکافاة ذات عالی
رسالتپناهیدن :

— « لا القاك خارجاً من مكة . الا علوت رأسك

بالسيف »

جوابی المشدی !!
انتهی

*
* *

کبار رؤسای قریشدن « عبدالله بن جدعان » ک
کوله سی بولنان [بلال بن رباح الحبشی] رضی الله تعالی
عنه حضرت تلرینک ، قبول اسلامی سببیه مشرکین و اصنام
منه قارشى حاصل ایله دیکى عداوت دینیہ و خصوصت
قلبیہ سندن طولایى برکون اصنام مشرکینى نجاست
غلیظه سیله پیسله دیکى طویلهرق و او زمان انک افندیسی
بولنان مرقوم عبداللهه ، کیفیت اهانتدن شکایت
ایلدیکندن حدت ایدن مرقوم ، بلال حضرت تلرینى اولاً
صنادید قریشک پنجه قهر و اعتسافنه ویردکن صوکره
کویا اصنامک بلال طرفندن هتک و اخلال اولنان ناموسلرینى
اکال ایچون - یانلرنده - ذبح ایدمک اوزره یوز رأس
دوه دخى اعطا ایتشدی .

« امیه بن خلف » ک ریاست مشرکانه سی التنده بر
جاعت ، تموزک ائ صبحاق کونلرندن برنده حضرت
لالی کونشه قارشى قیزغین بریره آتدیلر :

« الوهیت اصنامی تصدیق برله محمدی تکفیر و تکذیب
 ایدنجیه و یاخود اولنجیه دکین او صورتله تعذیب
 ایدمک تراريله » ارتق تعذیب ایدورلرذی . مشارالیه
 ایسه ، کندیسنک متانت دینه و صداقت اسلامیه سنه
 بناءً بر نفس بيله توحید خدادن آیرلمدیغنی [احد، احد]
 ديه اعلان ايله مکده ایدی .

بلالک مشرکین الندن او صورتله چکدیکی عذابی
 ذات اشرف رسالتیناهی ده مشاهده بیورمش اولدقلرندن
 اول امرده اکا خطاباً :
 — « ینحیک احد »

ديه تسلیت ویردکن صوکره کلوب حضرت ابی بکر
 رضی الله تعالی عنه افندیمره دخی :
 — « بلال الله اوغورنده تعذیب اولنیور »

بیوردیلر . او سوزدهکی حکمتی اکلایان جناب ابی
 بکر دخی ، همان درتیوز سکسان درهم التون ايله بلالی
 اشترایدوب تخلیص و بده آزاد بیورمشدر .

اشبو بلال حبشی ، « عبدالله بن جدعان » ک دکل
 بلکه « امیه بن خلف » ک کوله می بولندیغی و حبشی
 مشارالیهک ، صاحبی الندن دوچار اولدیغی عقوبات
 سبباً جناب ابی بکر رضی الله عنه حضرتلری انی صاحبندن

برباشقه بیاض کوله وایکی قیه التون بدل مقابلنده آلوب
بعده لوجه الله تعالی آزاد ایتدیکی ده مرویدر !

* *

« عمار بن یاسر » ک باباسی یاسر دخی ، شدت
حرارت شمس قارشی اقامه و تعذیب اولندیغی صروده
متأثرا وفات ایله دیکنندن طولایی یوره کی یانمش اولان
زوجه سی « سمیه » ، ابو جهلی بعض کلمات غلیظه ایله
لسانه المقله ابو جهل لعین ، النده کی حربه ایله همان اوروب
مرقومه بی اعدام ایتشددر !

*

* *

« خباب بن ارت » رضی الله تعالی عنه حضرتلری
دخی مشرکین طرفلرندن کونشک حرارتیله تعذیب
اولندقدن باشقه آتشده قیزدیرلمش طاش پارچه لری
وجودینه یاشدیرلمق صورتیله انواع عقوباته گرفتار
ایدلمشدر .

*

* *

« امیه بن خلف » صفوان بن امیه نك کوله سنی -
دین اسلامی قبول ایله دیکنندن طولایی - آیاقلرینه ایپ
طاقدیروب اولوم درجه سنه کلنجیه دکن صیحاقلدیرم
طاشلری اوستنده سور و کلتدیردی .

نهایت اونی ده حضرت ابی بکر رضی الله عنه افندیز
کندی پاره سیله صاتون آله رق آزاد ایتشدیر .

*

**

« نضر بن حارث » ده ، حضرت پیغمبر افندیز
حضرت لری قرآن کرمی تلاوت بیورور لکن ناسه
خطاباً :

— « محمد [علیه السلام] ، سزه اسکی ماصالری
سویله یور »

دیه هزیانلرده بولنور ایدی .

**

*

ابو لهب ، جوارنده بولنان باب سعادت مآب جناب
پیغمبری یه هر وقت ملوثات طرح والقا سیله کویا تحقیرات
اجرا ایدردی . حتی برکون عم نبوی جناب حمزه ، ابو
لهبک بویله بر معامله سنه راست کلدیکندن ملوثاتی همان
باب جلیل نبوی اوکنندن قالدیره رق کافر مرقومک باشنه
صقالنه آتمشدی !

*

**

حضرت پیغمبرک دایی زاده سی « اسود بن عبدیغوث » ،
فقرا ی مسلمینی کورد بجه انلره اشارتله :

— « بونلر، ير يوزينك پادشاهلريدرو. اكا سرءنك
ملكنه وارث اوله جققلر ! »

ديه استهزا ايله مكده اولدقدن فضله رسول ذیشان افنديمز
حضرتلرينده راست كلديكي حالده :

— « يا محمد ! بوكون كوكدن برخبر يوقى ؟ »
هزيان ملعننت نشاني اغزينه الير ايدى .

*
* *

« خلف » ك اوغلارى « اميه ، ابى » ده ، اللرينه برر
كيك پارچه سنى الهرق رسول مكرمه خطاباً :

— « يا محمد ! ربك بونلريمى ديرلده جـك ؟ »
ديرلردى !

*
* *

« عاص بن وائل السهمى » كه عمرو بن عاصك والد-
لريدراوده حضرت پيغمبرى هرزده كورور ايسه اوراده
نبى ذیشانك اردندبرى اغزىنى ، بورتى اكرك مسخره-
لققلر ايدردى .

*
* *

« وليد بن المغيرة المخزومى ، حارث بن قيس العطيله ،
اسود بن مطلب » نام مشركلرده اذا واستهزاده يك مبالغه
جرات ايدرلردى .

حتی بر کون رسول کبریا، مسجد شریف حرامده
 اوطورور ایکن تصادفاً کلان [عاص بن وائل السهمی،
 ولید بن المغیره، حارث بن العطیله، اسود بن مطلب
 بن الحارث، اسود بن عبد یغوث] نام بش مشرک
 اسکی عادتلی اوزر. نبی ذیشانہ قارشى بر چوق مسخره.
 لقاری و انواع هزیانلری کوستر دکاری صرده حاضر
 اولان جبریل امین، رسول اکرمه خطاباً :

— « یا رسول الله ! شو حریفلرک سکا اولان اذیتى
 دفع و رفعه مأمور بیورلدم »
 دیمش و بعده حضرت پیغمبر دخی ولیدک باجاغنه، عاصک
 الله . حارثک بورننه، ابن مطلبک کوزینه، اسودک
 یوزینه اشارت بیورمشدی .

غرائب معجزات احدیه لرندندرکه ولید، بر کون
 اوفجی بر اوسته نك دستکاهی اوکندن پکرکن رداسنه
 بر اوق طاقلدی . فقط سیرتنده پک متعظم و متکبر
 بولنان ولید، اکیلوبده رداسنی اوقدن قورتارمغه
 قدر تنزل ایتکسزین انحق اوجندن طوتوب اوموزینه
 اتمق ایچون یاپشه رق اوموزینه طوغری شدتله اتدیغندن
 اولجه طاقلمش اولان اوق، ساقنه طوقاندیغندن

دلديكى طمردن وجودينك بتون قانى آقهرق هلاك
اولشدر .

«عاص بن وائل السهمي» دخى ، بر كون ايكي
اوغلى ايله برابر اولديغى حالده طيشارى يه كيدوب راحله -
سندن اشاغى ايندكده يردن اياغنه برشى باتمش واوشينك
تأثيريله باجاغى شيشوب دوه بويى قدر اولمش نهايت او
تأثيردن متأثراً هلاك اولمشدر .

«حارث بن قيس العطيله» ده ، يديكى طوزلى بالغك
ويرديكى حرارت سببيله صو ايچه ايچه قارنى باطلامش
وديك بر روايته كوره بورنندن قان وجراحت چيچه
چيچه عازم راه بئس القرار اولوب كيتمشدر .

«اسود بن المطلب بن الحارث» دخى كوله سييله
برابر طيشارى يه چيقوب باديه ده بر اغاج دينه او طور .
مشدى . جبريل امين ، اسودك قفاسنى دينده او طور ديغى
اغاجك قوووغنه چاله چاله اولديردى .

لعين ، قفاسى او صورتله اغاجه چالنديغى زمان
كوله سندن استغاثه ايتدكده كوله سى :

— «والله سكا سندن باشقه هيچ بر كيمسه نك
طوقانديغى كورميورم . سن كندى قفاكى كندك
چاليورسك»

دیه جواب ویرمشدی .

« اسود بن عبد یغوث » بر کون بادیده کزرکن
 باد سموه تصادف ایتمکله هر یری کمور کبی قارارمش
 اولدیغندن دونوبده خانه سنه کلدیکی زمان اهل و عیالمی
 کندبسنی طانیه مدیغیچون رد و طرد ایتمش اوده
 صحراالرده سرکردان کزرکن آج و صوسز فوت و هلاک
 اولمشر .

لیکن اشخاص مرقومه نك وجه مذکور اوزره
 تواریخ فوت و هلاکینی تماماً تعیین ایدر هیچ بر اثره
 تصادف ایده مدم .

اذیاتی یالکز بومعدوداته منحصر اولمیان مشرکینک
 اذیاتی جله سندندرکه :

« ابو جهل ، ابولهب ، ابو سفیان ، ولید بن
 المغیره ، نضر بن حارث ، امیه بن خلف ، عاص بن
 وائل السهمی کبی اشداء مشرکین قریش بر کون
 طولانهرق :

— « عربک زیارت کعبه یه کله جک حجاجی بزدن
 محمد [علیه السلام] حقنده معلومات المق ایستر .
 فقط انلره آیری آیری جواب ویریه جک و جواب دخی
 یکدیگرینه منافی و مناقض اولوبده کیمی شاعر ، کیمی

ساحر ، کیمی مجنون ، کیمی ده کاهن ديه جك اولور
 ايسه عربان ، انك حقننده کي جوايمزك بطلاني
 اكلار . شمدیدن لایق بروجهله تسمیه سی چاره سی
 دوشونه لم ! »

ديه بر مجلس مشورت تشکيل ايتشلردی .
 اومجلسده اچلرندن بری :
 — « شاعر در »

یدی . فقط « ولید بن المغیره » اکا خطاباً :
 — « دکدر ! بن [عبید بن الایرص ، امیه بن ابی
 الصلت] کبی دهات شعرانک سوزلرینی ایشتم . بونک
 سوزی هیچ برینک سوزینه بکزمیور ! »
 اعتراضده بولندیغندن افراد مجلسدن بر دیکری :
 — « کاهندر »

دیمک ایسته مشدر ، ولید اکا دخی :
 — « کاهن کیمدر ؟ »
 ديه کهانت ايله موصوف اولانلرک نه صورتله تعریف
 ایديله جکلرینی صوروب :
 — « بعضاً راست کتیررده طوغری سویله مش
 اولور بعضاً ده سوزی یالان چیقار ! »
 جوانی الدقندن صوکره :

— « بك ابى اما محمد [عليه السلام] هيچ يالان

سويله مامشدر . او حالده اكا كاهن ده دينيله من ! »

دير ايكن بر باشقهسى طاورانهرق :

— « مجنوندر »

ديش بولتغله وليد :

— « مجنون كيدر وناصل اولور ؟ »

ديرك مجلسدن :

— « ناسى اخافه ايدر »

جوانى الديغك عقينده :

— « محمد [عليه الصلوة والسلام] دن هيچ بر

كيسه هيچ بر زمان قورقماشدر . يعنى او ، كيسه يي

قورقوتماشدر ! »

ديدكدن صوكره قالقوب خانه سنه طوغرى كيتمشدر .

حالبوكه وليدك بوانصرافندن مجلسجه شبهه حاصل

اولهرق حقنده [صباء وليد] دينلمشدى . ابو جهل ،

وليدك نزينه كيدوب اكا :

— « سكا نه اولدى ؟ يا ابا عبد شمس ! قریش

حقكه [صباء وليد] ديور »

ديش وليد دخى اوسوزه قارشى :

— « بن نه دیندن دوندم ، نهده باشقه شیخ
برشی یایدم ! انجق انک حقننده برشی دوشنیورمه
یالکز » ساحردر « دیه بیلورم . زیراساحر ، بابا ایله
اوغلی ، قرنداش ایله قرنداشی یکدیگرندن آیرر . ایشته
بوده او یله یاپور . »

جوانی ویردیگندن کویا برچوق ملاحظات مدققانه .
دن صوکره حقیقت احدیهیه مقرونه صوک بر نتیجه
صحیحه اولق اوزره ولیدک کشف ایله دیککی ساحر لکن
او حضرت رسول کبریاه اسناد ایدلسی روا کور یله رک
مکده ده :

— « محمد [علیه السلام] ساحردر ! »

دیه اعلان ایدلکدن فضله وفودعربه دخی او یولده
جواب ویرلنکه اتفاق ایدلمشدی .

قریشک رسول محترم علیه نه کی شو اتفاقنه قارشی
ذات عالی رسالتینهای ، تأثر وتأذی فوق العاده حاصل
ایله دیکندن سعادتخانه احدیلرینه معموماً عودت برله
اثواب شریفه لرینه بورینوب یاتمش وروایت کوره ، او
حالده ایکن حق سبحانه وتعالی حضرتلری استعیند بالله
[یا ایها المشر ! قم فاندرا !] آیات کریمه سنی انزال

یوردرق حبیبی امر انداره ایشته او زمان مأمور
ایتشدی .

۷

مسلمینك حبشه هجر تلی

مشرکین قویشتك ، مسلمین حقنده روا کوردیکی
مظالم و تعدیاتہ قارشی فوق الغایہ بزار و نزار قالان
مسلمینہ ، تاریخ نبوتك بشجی سنہ سی شهر رجبندہ ارض
حبشه هجرت و ملک حبشستان [اصحمة النجاشی] یه
دخالت ایتلرینہ طرف یتغمبریدن مساعده یورلدی .
شو مساعده علیہ اوزرینہ حبشه هجرت ایدن
مهاجرین اسلامیه ، اون ایکسی : « عثمان بن عفان ،
عبد الرحمن بن عوف ، زبیر بن العوام ، ابو حذیفہ بن
عتبه ، مصعب بن عمیر ، ابوسلمہ بن عبد الاسد ،
عثمان بن مظعون ، عبد الله بن مسعود ، عامر بن ربیعہ ،
سہیل بن بیضاء ، ابوسبرہ ، ابو رهم العامری » نامند
ارکان . دردی دخی :

« رقيه بنت النبي »، ابو حذیفه نك زوجته سی «سهله
بنت سهیل »، ابوسله نك زوجته سی « ام اسلمه بنت ابی
امیه »، عامر بن ربیعہ نك زوجته سی «لیلہ بنت ابی خيثمه»
نام قادی نلردن مرکب بر قافله ایدی !

مکه دن ساحل دریایه ایندی لر . بحرأ افریقا یقه سنه ،
اورادن ده ارض حبش حکمداری نجاشینك یانه وار .
دی لر . ذوات مشار الیهم دن صوکره « جعفر بن ابی
طالب » رضی الله عنه حضرتلری ده انلره التحاق
ایتمشدر .

صحابی مشار الیهك النده طرف اشرف رسالتپناهیدن
حبش ملکنه خطاباً یازلمش برده مکتوب شریف وار
ایدی که صورت منیفه سی بروجیه زیر درج صحیفه
مباهات اولنور :

« بسم الله الرحمن الرحيم . من محمد رسول الله الى »
« النجاشی الاضحى ملك الحبشة سلام عليك . فانى اجد »
« اليك . الله الملك القدوس المؤمن المهيمن . واشهد »
« ان عيسى بن مريم روح الله وكلمته القاها الى مريم »
« البتول الطيبة الحصينة فحملت بعيسى فخلقه من روحه »
« ونفخه كما خلق آدم بيده ونفخه وانى ادعوك الى الله »
« وحده لا شريك له والموا الاله على طاعته وان تبغى »

« وتومن بی وبالذی جائی . فانی رسول الله . وقد »
 « بعثت الیکم ابن عمی جعفر ومعه نفر من المسلمین . »
 « فاذا جاؤک فاقهرهم ودع الجبر . فانی ادعوک وجنودک »
 « الی الله . وقد بلغت ونصحت فاقبلوا نصیحتی والسلام »
 « علی من اتبع الهدی »

اشبو مکتوب شریف ، تاریخ هجرتک یدنجی سنه .
 سندہ ملوک و حکمدارانک طرف اشرف رسالتیناھیدن
 دین مبین اسلامہ دعوت بیورلدقلری زمان حبشہ
 سفیری « عمرو بن امیة الضمری » رضی اللہ عنہ
 حضرتلرینہ ویریلان نامہ ہمایون اولمق اوزرہ قید
 ایدنلردہ بولنیور . لکن مضمون شریف مکتوب ،
 جناب جعفر رضی اللہ عنہ واتباعی بولنان جماعت
 مسلمین حقندہ اکرام و اضافہ بی توصیہ ایتیکدہ اولدیغندن
 یاخود ہر حالده خصوصی دعوت ایلہ توصیہ والتماس
 حقندہ کی مندرجاتی مساوی دینیلہ جک بر صورتہ
 بولندیغندن زمین وزمان مقتضاسنجہ دہا مناسب عد
 ایدیلان توصیہ بی حاوی اولہرق جناب جعفر یدیلہ
 نجاشی حبشہ یہ کوندرلمش اولمق جہتی اقوی
 کورولشدہ .

نجاشی ، نصارا دیننده اولدیغی حالد مهاجرین
اسلامیه یه یرکوس-تره رک مأمول اولندیغی قدر حرمت
ورعایت ایتدی .

بعده اهل اسلامدن دها برچوق ذوات ده هجرت
ایتمش اولدیغندن نجاشینک یاننده اهل اسلام چو-
غالمشدی .

حالبوکه برآراق « والنجم » سورة شریفه سی نازل
اولوب حضرت نبی محترم صلی الله علیه وسلم افندیمز
دخی اوسوره یی مسجد شریف حرامده تلاوت بیوردیغی
زمان ، حاضر بولنان بالجمله مسلمین و مشرکینک برابر
مجدده ایتدکری ، حبشه کی مسلمینه واصل اولنجه او
مجدده نک عمومی بر اتفاق واتحاد قارشی معبود مطلقه
یدلمش بر سجدده اولدیغنه مسلمین حبشه ظن و ذهاب
حاصل اوله رق اکثر مسلمین ، مکه یه عودت ایچون یوله
عیقمشدی . لکن یولده ، کفار قریشک ینه کفر و
داوتده کی ثباتلرندن خبردار اولدقلرینی متعاقب سکسان
چی ارکک ، اون سکزی قادین اولمق اوزره یوز بر
رلی بر بیوک قافله اولدیغی حالد تکرار حبشه عودت
نشلردر .

فقط اهل اسلامك ديار حبشه چو غالمسندن
 ودين مبین اسلامك دخي انتشاره ايسته او وجه مسرود
 اوزره بر استعداد فوق العاده كسب ايتكمده اولديغي
 كورلمسندن طولاني مكده صنايد قريش ، اندیشه يه
 دوشه رك همان مهاجرين اسلاميه نك وطنلرینه اعاده سی
 ز جاسیچون كبار رؤسای قريشدين « عبدالله بن ابی ربيعہ »
 وعلی روايته « عماره بن ابی معيط » ايله « عمرو بن العاص » ی
 نجاشينك نزدینه سفیر كوندرديلر .

*

**

ایکي سفیر ، حضور نجاشی یه كيرديكي زمان
 حبشه نك حکمدارانہ قارشى عادت مرعيه تعظيمه سی
 اوزره اولاً سجده ، بعده مکه مکرمه دن ککش اولان اسلام
 مهاجرينك اعاده لرینی استدعا ايله مشلردر .

بارکاه نجاشی یه کیرمزدن مقدمه وکلای حبشه یی
 بر طاقم اغیرجه هديه لرله اله المش و مهاجرينك کیری
 كوندرلملری خصوص صنده وکلادن وعده مظهر
 اولمش اولدقلری جهته او زمان وکلا دخی ، سفیر -
 لرك ترویج استدعایری خصوصنی همان تنسیب والتزام
 ایتملردی .

لكن نجاشی ، بر دفعه ده مهاجرینك رأی صو -
 رولق طرفنی التزام ایتدیکندن در حال مهاجرین جلب
 ایدلشد .

اشبو وقعه دن خبردار اولان مهاجرین ایسه مجلس
 حکمداری به نه صورتله کیره جکاری حقنده اوله
 مذاکره و مشاوره ایتشله . بعده امر مکالمه به جعفر
 رضی الله عنه حضرتلرینی مأمور تعیین ایله مشلدر .
 بونلر ، بارگاه حکمداری به دخوله حبشه عادی
 اوزره نجاشی به سجده ایتیموب بلکه بالکتر بر سلام شرعی
 ایله اکتفا ایتدیلر .

حالبوکه وکلا ، بونلرک سجده و اریده سلامه
 صارلملری بر نوع رعایتسزلاک عدایمه رک او بهانه ایله
 شدید مؤاخذه به تشبث ایتک ایتدکلی حاله
 جعفر حضرتلری ، مسئله نک او نقطه سنه جواب
 ولق اوزره : « بز ، سجده بی بز یوقدن وارایدن انجق
 جناب الله ایدرز . اوندن باشقه هیچ بر شیئه سجده
 ایتک جائز اولمز . پیغمبریمز ، بز به یولده امر و اراده
 ایتشدر . »

ضمونی مفید بر تعبیر ایله مذاقعه ایتشدی . بوسوزدن

طولانی قلبنده هیئت نبویه دن بر تاثیر عجیب حاصل
اولان جناب نجاشی :

— ای مهاجرین ! شمدی بورایه گلش اولان
ایکی آدمک وقوعبولان شکایتلرینه کوره سز ، انلرک
دیندن چیمشسکز ! یهود ، نصارا دینلرینی ده قبول
ایتمشسکز . سز ؛ دینکز جقنده بکا راز معلومات
ویریکز ! »

دیدی . بوکا قارشی جعفر رضی الله عنه حضرتلری ده :
— ای ملک ! واقعا بزده اولجه قریش دینی
ایله متدین ایدک . انجق اخیراً جناب حق ، بزده برنجی
ذیشان کوندردی . او نبی ذیشان ، بزى یوقدن وار
ایدن الله ذوالجلال حضرتلرینک برالکئی واکا عبادتک
لزو منی بیلدیردی . دین اسلامک باشقه بالجمله ادیانک
بوندن بویله حکم سز قالدیغنی خبر ویردی . و بزه امر
بالمعروف ، نهی عن المنکر ایله امر ایتدی . نماز ،
اوروج ، حج ، زکاة ، صله رحم کبی جمیع اخلاق
حسنه و افعال مستحسنه ایله عمل و تخلقه فرمان بیوردی .
و بزه بر قرآن کریم کتیردی که اکا ذبیاده هیچ برشی
بکزمز . و معجزات باهره و دلائل واضحه ایله تبلیغ
ایله دیکى احکام دینیدمی حتمدر . انک ایچون کندیسنه

ایمان و اتباع ایتدک • واکا ایمان و اطاعت ایتدیکمزدن
 طولایی قوم و قبیلہ من ، بزہ ہر درلو اذا وجفایی روا
 کوردیکندن و مقاومت ، مقابلہ ایسہ کندیمزدہ قوت
 و قدرت بولہ مدیغمزدن پیغمبریمز ، درباریکزہ ہجرت
 ایچون بزہ اذن و رخصت و یردی . و ملوک سائرہ اوزرینہ
 سنی ترجیح ایدہرک بزہ بورایہ کوندردی »
 دیہ جواب و یردیکندن نجاشی ، ممنونانہ و متخیرانہ بر
 وضعده :

— « اونبی ذیشانہ نازل اولان قرآندن یانکزده ہیج
 برشی وارمی ؟ »
 دیمکلہ جعفر حضرتلری [کہیحص] سورۃ شریفہ .
 سنک اولندن بش آیت کریمہ بی اکا از براوقویو یردی •
 قرائت قرآنیہ بی استماع ایدرکن نجاشی ، تأثرندن
 اغلاہرق کوزی یاشی طاملامشدی !
 نجاشینک اورادہ کی علماسی ، اشبو آیات کریمہ حقنہ
 انجیلہ تطبیقات ایلہ اوغراشہرق مفاهیم و مضامین
 قرآنیہ نک کندی کتابلرنده کی مالہ تماماً مطابق اولدیغنی
 کوردکلرندن نجاشی :

— « بو کلام لطیف ایلہ تورات شریف ، برچراغک
 نوریدر »

دیمش واندن صو کره قریشک سفیری « عمرو بن العاص »
دونوب اکا خطاباً :

— « والله بومهاجر لری سکا تسلیم ایله مم »

دیمشدر .

عمرو بن العاص ایسه ، ارتق ایشک کسب ایتدیکی
اهمیته کوره صو ک بر چاره اولور امیديله اهل اسلام
علینده نجاشیشک حدتنی جلب ایتک ایچون دسیسه یه
مراجعت ایتدی دیدی که :

— « پادشاهم ! بومهاجر لری حضرت عیسی حقنده کی

اعتقاد لری ده عقیده کزه مخالفدر »

بونک اوزرینه نجاشی ، مهاجریندن :

— « حضرت عیسی حقنده نه دیر سکر ؟ »

دیه سوروب :

— « بز انک حقنده ربمزلک دیدیکنی دیرز . ربمزا یسه

[هو عبدالله و کلمه] دیمشدر ،

جواب مفیدینی الدقه یردن همان بر اوافق چوپ پارچه سنی
آله رق :

— « ای حبشه اهالیسی ! وی پاپاسلر ! بیلک که

انجیل شریفده مذکور اولان شیلرله بونلرک اره سندده

شو چوب قدر فرق و تفاوت یوقدر . ای مهاجرین !

مرحبا سزه و مرحبا طرف ذی شرفندن کلدیککز رسول
محترمه ! بن شهادت ایدرم که او ذات عالیقدر ، جناب
حقک حق پیغمبری و رسول مکرمیدر . و بزم انجیل
شریفده اوصاف پاک و نعت مبارکنی **کوردیکمز**
و حضرت عیسی علیه السلام کده قدومنه اشارت
ایتدیکنی رسول ذیشان آخر الزماندر . ای مهاجرین
کرام ! بمالکمندن هرزده ایسترسه کز اوراده اقامت
ایدیکز ! خدا حقیچون اکر غائله سلطنت اولماش
اولسیدی بن بالذات کیدوب او رسول ذیشانک عتبه
علیاسنه یوز، کوز سورر و انک پاپوشلرینی الله طاشیر
ایدم . و الله ابدست صوینی دوکمک شرفیله کسب عز و
اقتحار ایلهردم »

دیه اظهار اخلاص و ایمان ایتدکدن صوکره همان هرایکی
سفیری مأیوساً رد و اعاده ایتشدی .

نجاشینک مشرکین مکه جه پک فوق المأمول صایلان
بو معامله مستغنیانه قارشی قریش ، ارتق بستیون
متحیر قالدیفندن حتی اندن صوکره تدبیر اولور امیديله
ذات رسالتیناهی به دیمکه مجبور اولدیلرکه :

— یا محمد ! ایسترسه ک بز سنک ربکه سجده ایدلم

فقط سن ده بزم بتلریمزه سجده ایت ! »

ایشته بونک اوزرینه ایدی جناب حق ، جواباً استعید
بالله :-

[قل ! افغیر الله اعبد ایها الجاهلون ؟] آیت کریمه سبله
[قل ! یا ایها الکافرون ! . . .] سورة شریفه سنی انزال
بیوره رق انلری رد ایتشدرد !

* *

۸

— ❧ — اسلام حمزه ❧ —

رضی الله عنه

رسول اکرم ، حبیب محترم صلی الله تعالی علیه
وسلم افندیمز حضرتلری تاریخ نبوتلرینک التنجی، سالنده
برکون صفاده اوطورورلرکن امت محمدک فرعونى ابو
جهل لعین ، قارشیدن کچور ایدی . حضرت رسول کبریاه
برصورت غلیظه ده سب ایتدی !

جالبوکه جناب پیغمبرینک اکا سکوت ایله جواب
ومقابله بیوردقلرینی « عبدالله بن جدعان » ک جاریه سی

کورمش و ابو جهلاک شو حقش معاملہ سنہ قارشى . فوق
العاده تأسف و تأثر ايده رك اغلامشدى .

عم اجدى حزه بن عبدالمطلب ايسه ، او کون صيد
وشکاره کيتش اولوب عودتده بر معتاد طواف کعبه
ايچون سلاحرى اوزرنده اولديغى حالدہ حرم شريفه
کيتک اوزره ايکن جاريه مرقومه - واقع اولان حالى -
اکا سويله دى .

حزه او صروده هر نقدر ايمانه کلامش ايديسه ده
برادر زاده سى عليهنده سويلنيله جک فنا لقرديلرى اصلا
قبول ايده ميه جک اولديغندن او سوزى ايشتيديکى آنده
همان مجمع قريشه حدتله کيدوب لعينى بولدى . واکا
خطاباً :

— « برادر زاده مى سب ايدوب خاطرينى يقان
سنميسک ؟ »

ديه رك اوزرنده کى او قنک ياي ايله اوروب ابو جهلاک
قفاسنى ياردى .

حزه نك بو حرکتنه قارشى لعينک عشيرتى بولنان
نخزوميلر حزه ميه هجوم ايتک ايسنديسه ده ابو جهل :
— « طوقانمى کز ! حقى واردر . زيرا حقيقه بنانک

برادر زاده سنه فنا لقردى سويله مشدم »

دیه مانع اولدی .

جزه ، اورادن ايرلدقدن صوکره ملعون مرقوم ،
کندی عشیرتندن مجلسنده حاضر بولنان بعض بنی
مخزومه :

— « امان ایلشمیکز ! حدت ایدرده مسلمان اولور
ایسه محمدیلر ، انکله قوت بولش اوله جقلر ! »
دیمشدی .

* *

ابو جهلک عقل وفکری انجق اهل اسلامک قوت
بوله مامسی خصوصنه مصروف ومعطوف اولدیغندن
جزه نك قبول اسلامی سببيله قریش ایچنه بر بیولک تفرقه
دوشه جکنی و اوتقیدردهده قوه اسلامیه ازیاد کله جکنی
یقیناً بیلدیکی جهتله ایشک بویه اولسندن غایتله صاقینیر
ایدی .

یوقسه ابو جهل ، قریشک اعاضمندن وریاستجه جزه ده
معادل مرعی الخاطر ، نافذ الکلام ، کثیر العشیره بر حریف
ایدی .

حتی سید کائنات علیه افضل الصلوة واکل التحیات
افندیمز ، بودقیقه ده مبنی [یارب ! بودین اسلامی ابو جهل

ایله یاخود عمر بن الخطاب ایله عزیز و آشکار ایت ! [دیه
نیاز بیورمشدی .

چونکه او زمان قریش ایچنده نفوذ و خاطر
صاحبی اولانلر بو ایکسی اولدیغی **کبی** رسول
اکرم افندیمر حضرتلرینه اک زیاده عداوت ایدن ده
بونلر ایدی .

* *

حزه شرف اسلامی احرازه یك مستعد بر حالد
حضور عالی پیغمبرییه واروب ، ابوجهله ایله دیککی
معامله شدتی حکایه تسلیمت ویرمک ایستدی . افندیمر
صلی الله علیه وسلم حضرتلری ده :

— « یا حزه ! بن سنک قبول دین مبین اسلام
ایله دیککی کورور ایسه انجق انکله متسلی و محظوظ
اولورم باشقه درلو متسلی اوله نم ! »

طرزنده اداره کلام ایتکله حزه ، درحال کله طیبه
شهادتی کتیرمش واندن باشقه اندن کلدیکی مرتبه رسول
اکرمی مشرکین قریشک دست تطاول و تجاوز اتندن
حایه ایتکله حصر وجود ایده جکنی قریشه اعلان
ضمننده کوزل بر قصیده دخی سویله مشدر . رضی الله
تعالی عنه !

روایات تاریخیه کوره حضرت حمزه رضی الله
 تعالی عنه افندیملک قبول اسلامی کوننک ایرته سی کونی
 یاخود اندن اوچ کون صوکره عمر ابن الخطابک دخی
 قبول اسلامی شرف وقوعبولمشدر .

* *

۹

— اسلام عمر —

رضی الله عنه

جناب حمزه رضی الله عنه حضرتلرینک قبول
 اسلامی اوزرینه قوای اسلامیه پک زیاده لشمش اولدیغی
 ایچون صنادید قریش، هروجهله متخیر و مأیوس قاله رق
 بینلرنده بر مجلس مشورت تشکیل ایتدیلر . کویا اهل
 و دین اسلامک احساسنه بر چاره تصور وتذکر ایده .
 جملکردی .

خذه افراد مجلسدن هر بری اهل اسلام علیه
 واحمای دین اسلام حقننده بر فکر مخصوص بیان

ایدرکن او بیانات فکریه بی دیکله یه طورمش اولان ابو
جهل، ایاغه قالدهرق :

— « یا معشر قریش ! محمد [علیه السلام] بزم
آله لریمزه سوکدی . و [انکم وما تعبدون من دون الله
حصب جهنم] دیدی . بونی اولدیرملی . باشقه برچاره
یوقدر . ایچکرده اوفعلی اجرا ایچون قیلنجنه کونه جک
کیسه وارمی ؟ کیم که بوفعلی اجرایه موفق اولورایسه
اکا یوز دوه و بیک قیه کوش ویره جکم »

دیه باغیردیغندن عمر ابن الخطاب :

— « بو دیدیکک ایشی ده خطاب اوغلندن باشقه
یاپه جق کیسه یوقدر ! »

دیه رک یرندن صچرا یوب قالمش و مجلسده حاضر بولنان
خذه کفار قریش، او جنکوری :

— « دی باقهلم خطاب اوغلی ! کورهم سنی ! »

دیه پارلاق بر صورتده آلقشلامشدر !

بعده عمر، ابوجهله خطاباً :

— « دیدیککی اولوجهله تعهد ایدیورمیسک ؟ »

دیه رک اندن :

— « اوت تعهد ایدیورم »

جواب تأییدی المقله عمر، انك النذن طوتوب برابر
 بیت الله الحرام ایچریسنه کیردیلمر . وعادتلمری اوزره
 خصوص مذکور حقنده « هبل » نام قوجه بتك
 حضورنده اجرای آیین قسم برله صمنی ایشه شاهد
 صادق تعیین ایلده دکن صوکره قیلنجنی همان قوشانوبه
 رسول مکرم افندیمر حضرتلرینك اولدیغی سمت طوغری
 آقوب کیتشدیر .

لکن یولده کندیسنه راست کلان « نعیم بن عبد
 الله » طرفندن :

— « نزهه کیدیورسك ؟ بویه حیزلی حیزلی
 یا عمر ؟ »

دیه وارد اولان سؤاله :

— « عربك ایچنه تفرقه واختلال دوشورمش
 اولان محمدك وجودینی قالدیرمغه کیدیورم
 جوابنی ویریرکن نعیم :

— « یا عمر ! مشكل بر ایشه باشلامشك ! محمد
 [علیه السلام] اصحابی طرفندن اوילה بر محافظه ایدیه -
 یورکه ایستدیك کبی ظفر بولمق ممکن دکدر . بالقوض
 ظفر بولدك . صوکره بنی عبد المطلب النذن هیچ قور-
 توله منسك »

دیمش بولندیغندن عمر حدتلنه رك :

— « اویله ایسه سن ده محمدیلردنسك ! اولاسنك

ایشکی بترملیم ! »

دیه قلنجنه ال اورمش ، نعیم بردها طاورانهرق :

— « یا عمر ! سن بنی براق ! همشیرهك فاطمه ایله

زوجی سعید بن زیده باق که انلر محمدیلردندر »

جوابی ویرمشدر .

عمر، انلرك دین اسلامی قبول ایله دكلرینه بردنبره

اینامیه جق اولدیهده نعیم :

— « اینانمزسهك تحقیق ایتده اكلارسك ! »

طرزنده تأیید مدعاده بولندیغنه قارشى اول امرده انلرك

تحقیق احوالنه لزوم کورمش واولوجهله سمت مقصود.

دندن انحراف وانصراف ایدرك سعیدك خانه سنی نقطه

منتهای حرکت اتخاذ ایله مشدر .

فی الحقیقه عمرك اوجراتی کنديسیچون پك تهلكه لی

برحرکت ایدی . زیرا ایشك حقندن طوته لم که کلمشده

اولسون ! بالاخره دكل یالكز عمر، بتون خاندان خطاب

ایشته اوجراتك سببيله محو اولمزمی ایدی ؟ هیچ شبهه

یوق که اولور ایدی .

لكن عمر، كندی رأى وعزم جنكاورانه سنده
مستقل ومصر اولديغندن كندیسنی میدان جرأته آتدی.

* *

فقط كرك همشیره سی و كرك انك زوجی سعیدك
قبول اسلاماری حقنده کی مسموعاتی، كندیسنه يك
زیاده سیله تأثیر ایله دیکندن اولانلرك اوینه کیتمكه
لزوم کوردی.

مكر او ائشاده « طه » سورة شریفه سی نازل اولمغه
سعید وزوجه سی فاطمه، اوسورة شریفه یی بر صحیفه یه
یازدیروب اصحاب کرامدن خانه لرینه جلب ودعوت
ایله دكیری [خباب بن ارت] رضی الله عنه حضر تلی
نام ذاتدن او کربور لر دی !

عمر، خانه نك كوشه باشی طولاشیر ایکن اوده بر
شیئك اوقوندیغنی ایشتدیکندن قپویی همان حیزلی حیزلی
چالدى .

قلنجی بلنده ، حدتلی بر حالدده عمر ك كلوب قپویی
چالدیغنی کورن سعید وزوجه سی ، كرك جناب خباب
رضی الله عنهی، كرك صحیفه شریفه یی بر یرده صاقللا.
دقدن صوكره قپویی آچدیله .

عمر ایسه ایچری یه کیرر کیرمن :

— « او قود یغکز شی نه ایدی ؟ »

دیدى . سعید اكا :

— « خیر برشی یوق ! »

دیه تلاشی ایما ایدر برسسه جواب ویردیسسه ذاتاً
او زمان غضبه کلش بولنان عمر همان :

— « ایشتدیکمز خبر طوغری ایمش ! سزده

محمدیلردن ایمشسکز . سزده محمدک سحرینه الدانمشسکز ! »

دیهرک سعیدی یاقه سندن طوتوب یره شدتله آتدی .

مشار الیهک زوجه سی « فاطمه » ایسه « سعیدی

عمرک الندن قورتارهیم » دیه اوغراشیر ایکن الدیغی

طوقات یوزینی قاناتدی .

حالبوکه عمر ، قیز قرنداشنک یوزندن قان آقتدیغی

کورونجه معامله نارواسندن نادم اوله رق حدقی سکونت

بولمغه همان میل ایده قالمشدی .

فاطمه ، هر نقدر الدیغی ضربه ناکهانیدن طولای

یوزی آل قانلره بویامش و بردرجهیه قدرده جانی یامش

ایدیسسه اندن صوکره حیت و غیرت دینه سی او یانه رق

— عمرک کوسترمش اولدیغی وضع وضع نادمانه سندن

بالاستفاده — جناب حقه متوکلاً دیدی که :

— « یا عمر ! اللهدن نیچون اوتانمزسک ؟ آیات و

معجزات ايله كوندرديكي حق پيغمبره نچون اينانزسك؟
 ايسته بن! ايسته زوجم! هرايكيز، شرف اسلام ايله
 مشرف اولدق. باشمزي كسسك دخی ديكلميز.
 دونمیز. اشهد ان لا اله الا الله و اشهد ان محمداً
 رسول الله!

عمر بركرم حيرته قالير كي اولديغني متواقب يره
 اوطوره رق كال رفق وملايمتله:
 — « هله شو اوقودينكز شي چيقاريكزده بنده
 باقميم »

ديه او خصوصده برباشقه جدیت اظهار ايتديكنه مقابل
 همشيره سي طرفندن:
 — « لايمسه الا المطهرون »

جوابي ويرلش اولمغه عمر بر روايته توضوء وروايت
 اخراجه اغتسال ايتدكن صوكره فاطمه دخی اوصحيفه يني
 كتيروب اكا ویردی.

ذاتاً اوقومقي بيلان عمر، سورة شريفه يني اوقومغه
 باشلادی. فقط انده كوردیكي فصاحت و بلاغتي،
 معاني و مزایاسنك فوق العاده اولان لطافتي كنديسنده
 لك بيوا برتأثير حاصل ايله دی.

اولوقت که تلاوتی استعین بالله [. . .] له ما فی السموات
وما فی الارض وما بینهما وما تحت الثرى [. . .] آیت
کریمه سنه کلدی بو آیتک معنای منیفنی ذهنده تجسم
ایتدیرمش درجه سنده بیوده رک درین بر فکر و مطالعه
حق بولدی .

بعده قیز قرنداشنه دیدی که :

— « یا فاطمه ! بوقدر مخلوقات هپ سزک سجده

ایله دیککز ربک میدر ؟ »

فاطمه ، اکا جواب ویردی :

— « اوت ! اویله درآ ! شبهه می وار ؟ »

عمر ، ارتق حیرت ایله تردددن متمزج برحس ایله
تحسوس اولدیغنی ایما ایدر وضع و سیما ایله سوزنده
دوام ایتدی :

— « یا فاطمه ! بزم بیک بشیوز بوقدر مزین و مکلف

یتلریمز وار . هیچ برینک یر یوزنده بر ذره قدر ملکی
حق ! »

لکن عمرک دین مبین اسلامی قبوله میلی سایل کبی
اقش ایکن سورمک آلت طرفندن [لاله الاهوله الاسماء
الحسنی] آیت کریمه سنی ده کوروب اوقوینجه اراده می

الندن كیده رك كو كسی كورله مش وایشته اوزمان همان
كلمة طيبة شهادتی كتیریویر مشدر .

بونئی ایشیدن جناب خباب رضی الله عنه حضر تلی ده
کیزلندیکی یردنبری تکبیر کتیره کتیره همان میدانه
چیققدن صوکره :

— « یاعمر ! جناب رسالتیناهی » اللهم اعز الاسلام —
وعلى رواية - ايدالاسلام باحدالرجلين اما بابی جهل
بن هشام واما بعمر بن الخطاب « ديه دعا بیور مشلردی
ایشته او شرف وسعادت سکا میسر اولدی »
دیدى .

اشبو دعای نبونك چهارشنبه کونده بیورلدیغی
و پنجشنبه کونده ده اثر استجابت ظاهر اوله رق عمر بن
الخطابك قبول دین اسلام ایله دیکی مرویدر . او وقت
مشارالیه یکر می التی یاشنده ایدیلر .

عمر ، همان او ساعتده رسول اکرم افندیمر
حضر تلینك توده اولدیغی صور دی . او حضرت
حبیب کبریا ایسه او کون صفا جوارنده کبار صحابه
کرامدن « ارقم » رضی الله عنه حضر تلینك خانه سنده
اصحاب کرامیله مصاحبت ایتکده ایدیلر .

جناب رضی الله عنه حضر تلی ، عمری اورایه

کتیردی . عمر ، کیدوب قاپوی چالجه قاپوده اوکون
محافظلق ایدن ذات ، ابن خطابک مسلحاً کلوب قاپوی
چالديغنی ایجری یه خبر ویردی .

عمر ، ذاتاً قورقونج ومهیب السیما برآدم اولدیغیچون
اونک او یولده کی کلیشندن بر کره اصحاب کرام اور کدیسده
جزه رضی الله عنه حضر تلی :

— « عمر دن قورقه جق نه وار ؟ ایولک ایچون
کدیسه پک اعلا . والله او ، قیلنجی چیقار مدن بن انک
کله سنی یره دوشور یرم ! »

دیه اصحابه بر صورت شجیعانه ده تسلیت ویرمشدر .
جناب جزه نك بو سوزی بیتک اوزره ایکن عمر
دخی ایجری یه کیرمشدی . اصحاب کراجه عردن
امنیت اولدیغندن طولای یالکز براغیله میهرق بری
صاغندن ، بر دیکری صولندن طوتدیغی حالدہ حضور
عالی نبوی یه کتیرلدی .

حالبوکه جبریل امین ، رسول اکرم افندیمز حضر تلی نه
ابن خطابک وقوعبولان معامله سنی وقبول دین اسلامنی
اولجه اخبار ایتمش اولدیغیچون اصحاب کرام تلاش
ایدرکن افندیمز تبسم بیورورلردی .

عمر ، اويله ايكي ذاتك قوتلى پنجه لرى التنده اوله رق
 ايجرى به كيرنجه رسول اكرم صلى الله عليه وسلم افنديز
 حضرتلرى براقديردي . او دخی كلوب حضور پر نور
 رسالت پناهيده وجه پاك احدى به متوجهاً ديزچو كدى .
 او طوردى .

حضرت پيغمبر ، عمر ك قولندن كال رفق وملايمتله
 طوته رق اكا بيورديلر كه :

— « اسلم يا ابن الخطاب ! اللهم اهده ! »

عمر ، غايت الغايه بر وضع خالصانه ايله جواب
 ويردى :

— « اشهد ان لا اله الا الله واشهد انك رسول الله ! »

يارب ارض عنه !

*

* *

جناب عمر بن الخطاب رضى الله تعالى عنه حضرتلرينك
 شرف دين اسلام ايله مشرف اولملرندن طولايي بتون
 اصحاب كرام اولقدر ممنون اولديلر كه او كونه دكين هيچ
 بر كيمسه نك ايمانه كلديكى اعلان ايدملك عادت دكل
 ايكن حضار كرام ، صوت بلند ايله تكبير كتيرديلر .
 او درجه ده كه مكه زوقاقلرند نبرى تكبير سى
 ايشيدلدى .

اصحاب کرامک عددی اوکون حضرت عمر
رضی الله عنه افندیز حضرتلریله قرق نفره بالغ
اولمشیدی .

حضرت عمر :

— « ارقداشلریمز قاچ کشیدر ؟ »

دیه صوردی . اصحاب کرام :

— « سنکله تام قرق کشییه بالغ اولمشز »

دیه جواب ویردیله .

بونک اوزرینه مشارالیه دیدی که :

— « اويله ايسه نېچون طورهلم ؟ هايدی چيقهلم .

حرم شریفه کیدوب اعلاى کلمة الله ایدلم ! »

جمله اصحاب کرام قیام و حرم شریفه طوغری

حرکت ایتدی . او ترتیبده که : اوکده جناب عمر ،

انک اردنده حضرت علی ، بعده رسول محترم صلی الله

تعالی علیه وسلم افندیز حضرتلری ، صاغنده ابو بکر ،

صولنده حزه ! رضی الله تعالی عنهم !

* *

بو ترتیبده گلزدن اول حضرت عمرک، یالکیز اولدیغی

حاله جناب ارقک خانه سندن چیقوب حرم شریفده

کندیسنی بکله یان مشرکینه کلدیکی و دین مبین اسلامی

قبول ایتدیکنی قریشه اعلان ایتدیکی واندن طولایی
 اوزرینه هجوم ایدن مشرکیندن برینی همان شدتله یره
 آتوب کوکسی اوزرینه اوطوردقندن صوکره ایکی
 پارمغنی - التنده کی حریفک - ایکی کوزینه صوقغله
 متأثر قالان حریفک صیحه ایتدیکی ایشیدلسی اوزرینه
 مشرکینک هیئت ابن الخطابدن قورقه رق قاچدیغنی
 روایتی ده واردر .

لکن عربلرک اوزمانکی اصول معاشراته کوره
 بوروایت ، براز مستبعد کورینیور .

صنادید قریش ایسه ، اوصرده حرم شریفده
 طوپلانوب ابن خطابک کتیره جکی خبری درت کوزایله
 کوزه ده طور یورلردی . کوردیلرکه ابن خطاب ،
 جماعت اسلامیه نك اوکنه دوشمش کلیور !
 بری برینه خطاباً :

— « باقسه کز آعر ، بتون محمدیلری ارقه سنه
 طاقش ده کتیریور . »

دیدیلر .

لکن ابوجهل ، ایشک ایچنه مأمولک غیری دیگر
 کونا برانقلاب معکوس اولدیغنی حس و تفرس ایتمش
 اولدیغندن هیئت اسلامیه نك اوصورتله اولان کلیشنی

بکنه مدی . و همان براز ایلری به طوغری سکر دوب
ابن خطابه یناشه رق صور دی :

— « خیر اوله یاعمر ! بونه ؟ »

حضرت عمر رضی الله عنه وقار و طورینی هیچده

بوزمیه رق :

— « اشهد ان لا اله الا الله و اشهد ان محمداً

رسول الله »

جوابیله مقابله ابتدی .

اوکون اهل اسلام ، حرم شریف کعبه ده صف
اولوب و جهراً تکبیر دخی کتیره رک آشکاره نماز
قیلمشدر .

قریش ایسه ، هیئت محترمه اسلامیه نك او حرکت
خدا پرستانه سنه قارشى متحیر و مبهوت اوله رق بر طرفه
طاغیلوب کیتمشدر .

۱۰

— ❦ انشقاق قر ، قطیعه رحم ❦ —

وقتاکه حزه و عمر رضی الله تعالی عنهما حضرتلری

کبی عربک کزیده ایکی جنکاوری ، شرف دین اسلام
ایله مشرف اولوب مبنای اسلامیتہ ایکی بیوک عباد
اولدی و حبشستانہ کیدن مهاجرین اسلامیه دخی حرمت
ورعایت مخصوصه یه مظهر اولدی . خذله مشرکینک
ذات جلیل رسالتیناھی علیهنده ترتیب ایله دیکی سوء
قصد فکر فاسدانه و حاسدانه سی باشه کتیر یله مینجه
صنادید قریش : « اهل اسلام ، کوندن کونه چوغالیور .
دین اسلام کیتدیکجه قوتلشیور . ابوطالب ، هرنقدر
ایمان ایتدیه ده اوده محمدی اولادی کبی حایه ایدیور .
عموماً بنی هاشمده انلرله قرابت و عشیرت غیرتی کو-
دیور . ایشته بزم هر درلو تدبیرلریمز ، بوصورتله تأثیر-
سز قالبور . بوکا برچاره ! » دهرک اوزون اوزادی یه
مذاکره و مشاوره ایله دکدن صوکره نهایت شوکا قرار
ویردیلر :

— « مسلم و غیر مسلم بتون بنی هاشمیه الفت
و اختلاط ، اورته دن کلیاً منع و رفع ایدلسون ! »
بو خصوصده مشرکینک رأیلری متفق اولدی .
حتی فیما بعد بنی هاشمیه الش و یریش ایدلماک وانلردن
قیز النماقی ، انلره قیز ویرلماک اوزره بینلرنجه حاصل
اولان اتفاق حاوی بر قطعه عهدنامه ، « منصور بن

عکرمه « یاخود » بغیض بن عامر بن هاشم « الیله
 یازیلوب کعبه نك ایچنه تعلیق و او عهدك خلاف و خا .
 رجنده ذره قدر حرکت ایدلمامك اوزره برده یمین
 وقسم ایدلدی . که ایشته بو عهد ، بو منع اختلاط معا .
 هده سی ، تاریخ نبوت محمدیه نك یدنجی سنه سنده واقع
 اولمشدر .

معاهده نك وقوعی اوزرینه كرك مسلم ، كرك مشرك
 چله بنی هاشم « شعب ابی طالب » ده محصور قالدی .
 لکن ابولهب ، بنی هاشمدن و شعب مذکورده
 ساکن اهالیدن بولندیغی حالده رسول مکرم صلی الله
 تعالی علیه وسلم افندیغی حضرتلرینه اولان شدت
 عداوتندن ناشی مباعدت و کفارہ مقارنت فکریله
 اورادن ایریلوب طائفه مشرکینه قاریشدی !

خانه لری دیگر محله لرده بولنان اهل اسلام دخی
 خانه و محله لرینی ترك ايله کلوب دین اسلام اوغورنده
 شعب مذکورده محصوریتی قبول و اختیار ایتدی !

*

* *

انشقاق قر — تاریخ نبوتك سکزنجی و علی روایه
 طقوزنجی سنه سنده انشقاق قر معجزه سی واقع اولمشدر :

وليد بن المغيرة ، ابو جهل ، عاص بن وائل السهمي ،
عاص بن هشام ، اسود بن عبد يغوث ، اسود بن المطلب ،
زمعه بن اسود بن مطلب ، نضر بن حارث « کبی بر
طاقم رؤسا واعيان مشرکین قریش ، بر مهتاب کچھ سندھ
رسول الله افنديمى حضرت تارندن معجزه ايستدیلر . رسول
الله افنديمى دخی ، قریشک ايستدیکى وحتى تعيين وتعريف
ايتدیکى وجه اوزره غب الدماء قره اشارت ايتش واو
اشارتلىنى متعاقب قر دخی ايکى پارچه اولوب بر
پارچه سى جبل حرانک بر طرفندن ديگر پارچه سى ده
طرف ديکردن کورولشدر .

اوراده حاضر بولسان اشخاصک کافه سى ده آيت
اويله انشقاقنى کوردکلى کبی شامدن کلان قافله طرفندن
دخی او کچھ انشقاق قر حادثه سنک عينيله مشاهده
ايدلديکى مؤخرأ حکايه ايدلشدر .

والسفاکه ابوجهل کبی اشداء قریش ، ينه ايمان
ايدمى يوب معجزه نبويه سحره جل واو صورته
حضرت نبى امى ذيشانه ساحرک اسناد ايتلشدر .

*

* *

شعب ابى طالبدہ مسلمينک مدت محصورتى ايکى

سنه دن زیاده دوام ایتدی • بو محصوریت ، مسلینه پک
زیاده سیله اضطراب ویردی •

زیرا اهل اسلامدن بری طیشاریده بولنسه مشرکین
قریش ، ا کا فوق الطاقه دینیه جک قدر اشکنجه لر ، اذیتلر
ایدرلردی • حج موسمنده بیه تجارتدن بری ، بنی هاشمه
الش ویریش ایده جک اولسه کفار قریش ، همان او
تجاری اندن منع ایدرلردی •

بو سببه مبنیدرکه حضرت علی کرم الله وجهه
افندیمز بیه اوزمان سعادتخانه رسالتپناهیده بولندیغی
حالده صباوته بناءً اسلامنی اظهار ایده من ایدی •

جزه رضی الله تعالی عنه عنده حضرتلری ، سیف
وشجاعتی سایه سنده ایستدیکی یرلرده سر بستجه کزر
طولاشیر ، عمر بن الخطاب رضی الله تعالی عنه
حضرتلری دخی کذلک مشرکین ایله بعضاً پنجه پنجه ،
بوغاز بوغازه کله رک اوغراشیر ایدی •

لیکن دین مبین اسلامک توسع وانتشارینی منع ایتمک
ایچون اوغراشان مشرکینک هر درلو غیرتلیر بیهوده
قاله رق معجزات نبویه ایله شجره طیبه دین اسلام هر
طرفه ریشه ران ظهور و شیوع اولمقده ایدی •

عقلی وزره قدر انصافی اولانلر ، معجزات باهرات

احمدیه قارشى بر ديه جك شى بوله ميبوب همان دين
 مبین اسلامك اديان سائرہ اوزرنده كى فضل ورحمجانى
 تسليم وتصدیق ايدہ رك شرف اسلامى احراز ايدرلردى .
 زیرا اول خاتم الانبیا محمد المصطفى عليه اكل
 الصلوة والتحايا افنديز ، هر درلو شئونات ماضيه دن
 بخبر بر قوم بدوى ايچنده طوغوب ، يتشوب بويومش ،
 باشقه يرلرده تعلم وتدرسى اولديغى ده هر كسك مسلمى
 اولان بر « نبى ، امى » بولنش اولديغى حالده احكام
 شرايعه ، تاريخه ، جغرافيايه ، قوزموغرافيايه ،
 هيئته ، علم حقوقه ، علم اخلاقه ، فن طبابته ، سياسته ،
 مواليد طبيعیه ، اوقونومیه متعلق خبر ويردىكى
 علوم اولين و آخريں ، انجق وحى الهى ايله ، الهام
 ربانى ايله اوله جغى طبيعى و بدیهى واو حالده كيفيت
 او حضرتك دليل كافى نبوتى ايكن باشقه برچوق معجزات
 نبويه ارايه ايتشدرد .

ازجمله ايشته قرآن كريم ! . . كه احكام منيفه سى
 الى قيام الساعة باقى وجاريدر معجزات نبويه دن برى
 بلكه برنجيسيدر .

*

* *

— اعجاز قرآن —

قرآن عظیم الشانک اعجاز بی انبازی وجوه کثیره -
سندن شو وجوه ثلثه بعضدر :

وجه اول — عصر وزمانک موقع ومکانک ال
یوکسک بر موقع اعتبار واشتهارده بولندیردیغی شیئه -
یعنی فصاحت وبلاغتله شعر وانشایه - قارشی معجزه
اوله رق انزال بیورلمش اولسیدر .
زیرا هر عصرده نه که مشتهر ومعتبر ایسه او عصر
ده کی اقوامه مبعوث اولان پیغمبرک معجزاتی ده اکا کوره
یا بمق عادت الهیه در .

مثلا موسی علیه السلامک زمان مبعوثیتلرنده سحر -
بازلحق صنعتی پک ایلری بر صنعت اولغله جناب حق اکا
بر عصا ویردی که انکله سحره مصریه وقبطیه بی سراپا
مغلوب ومرعوب ایتشدی !

عیسی علیه السلامک عصرنده ده حکمت مشتهر
ومعتبر اولدیغندن واجب تعالی حضرتلری اونبی

ذیشانى اعمالك كوزىنى آچمق ، موتالرى بأذن الله
احيا ايتك كى اطبا و حکمانك يامغه قطعاً مقتدر و موفق
اوله ميه جقلرى معجزات ايله بعث بيورمشدى !

خاتم النبیین ، سيد المرسلین افنديمى حضرت تليريك عصر
سعادتلرنده ايسه بين العرب هر شيدن زياده اشتهار ايتمش
بولنان شى ، فصاحت بلاغت شعر و انشا ايدى . هم
اويله بر اشتهاركه كرك مدنى ، كرك بدوى بالجمله عربلر
يئىنده فصاحت و بلاغت ، انسان ايچون بر محك مزيت
و معيار فضيلت طائلشدى .

حتى عربلرك فصاحت و بلاغته اولان اودرجه .
دهكى فخر و مباهاته و شعر و انشادهكى دقت و اهماتنه
مبىدركه كيمى معلقات كى نظيره من قصائد و نشائد
سويله يهرك شعراى سائر هيبى ميدان امتحانه دعوت ايدر ،
كيمى - هر سنه ذى القعدة آينده و مكه نك جهت تهاميه .
سنده جوارنده تشكىلى معتاد بولنان - سوق عكاظ پناير
مشهورى كى محافل مليه ده عمومه و عظم و نصيحت
يوللو غايت كوزل و بحر قدر تأثيرلى خطبه لر اوقور ،
ونثر و شعرنده اثبات تفوق ايدنلرك آثار و اشعارى
كعبه ديوارينه آصيلير ايدى . كه زمان جاهليتده عربلرك
فصاحت و بلاغته بو درجه لرده ايلرى يه واره بيللرى

شایان دقت و عبرت بر کیفیت اولوب بلکه بو لسان
عربك او مرتبه ده ككله ایرمسی من طرف الله او لسان
اوزره معجز بر كتاب نازل اوله جفته اشارت مخصوصه
دیمك ایدی ! .



وجه ثانی — وجه اولده مذکور اولان سبيله
برابر برده استعین بالله « ولو اجتمعت الانس والجن علی
ان یأتوا بمثل هذا القرآن لایأتون بمثله ولو كان بعضهم
لبعض ظهیراً » آیت کریمه سبيله اعجاز بدایع نمای بی انبازی
اظهار و اثبات بیورلمش اولمسیدر .
ایشته بو آیت **ک**ریمه ایله ثابتدرکه اتیان مثل ،
محالدر . زیرا قرآن کریم ، سوره بسوره یاخود آیت
بآیت نازل اولدقجه حضرت پیغمبر افندیمز اونی امتنه
او قور و :

— « نظیرینی سویله یه مزسکز ! »

دیه اعجاز قرآنی اظهار بیورمرق بالجمله شعرا و بلغایی
میدان امتحانه دعوت بیورورلردی .
حالبوکه بونجه سخنساز ، بدایعپرداز بلغانك ایچندن
هیچ بری ایشته بن دیهرک — الك قیصه بر سورهمی

اولسون تنظير ايتك اوزره - جسارت ايدوب ده كنديني
ميدانه آته مامشدر .

مسيله كي بر كذايك مخصوصاً ترتيب ايله ديكي ترهات
ايسه سوزيمزك بالطبع خارجنده قالير !

*
* *

وجه ثالث - بلغاي مشركينه بيله قرآن كريمك
بشر سوزي اولمديغني اكلا ده جق قدر تائير حاصل ايدهرك
ايتان مثلدن اعتراف عجز ايتدير مسيدر .

مثلاً : [يا ارض ابلعي مائك ويا سماء اقلعي وغيض
الماء وقضى الامر واستوت على الجودي] آيت كريمه سي نازل
اولوب امرى القيسك همشيره سي طرفندن ايشيدلديكي
زمان ، مرقومه : « ارتق كيمسه نك برديه جكي ، امرى
القيسك شعري ده ميدان فخر ومباهاتده طور مغه ذره
قدر حق وصلاحيت قالمدي » دهر ك قرنداشنك طبقات
سبعه دن الك يو كسكده يعنى طبقه اوليده معلق و :

قفانك عن ذكرى حبيب ومنزل

بسقط اللوى بين الدخول فحومل

مطلعيله باشلايان قصيده فريده بليغه سني كعبه ديوارندن
ايتدير مشدر .

او، ایندیرلدیکی تقدیرده مادونی اولان طبقاتک هیچ
 حقاری قالمیه جفندن انلر دخی برر برر ایندیرلدی .
 زیرا قرآن کریم ، اولیه بر بلاغتی اولیه بر فصاحتی
 حائزدرکه انسان ، اونی او قودقجه تکرار تکرار اوقو-
 یه جغنی کلیور .

حالبوکه بر شعر ، یا بر نثر هر نقدر فصیح و بلیغ
 اولور ایسه اولسون بر ایکی دفعه او قودقدن صوکره
 انسان ، اندن حظنی المش اولیور . طبیعت ، اوصاتیور .
 حتی بدوی عربلردن بری [فاصدع بما تؤمر !
 و اعرض عن المشرکین !] آیت کریمه سنی ایشیدنجه
 همان سجده و ارمش و : « بوسوزک فصاحتنه سجده
 ایتدم » دیمشدر !

بر دیکریده سورة شریفه یوسف علیه السلام
 او قونور ایکن [فلما استئسوا منه خلصوا نجياً] آیت
 کریمه سنی ایشیدنکده : « بن شهادت ایدرم که هیچ بر
 مخلوق ، بویه بوکا بکزر سوز سویله یه من ! » دیمشدر .

•••

مشرکین قریشک اعظمندن « ولید بن المغیره » نام
 کیمسه ، برکون سید المرسلین افندیمز حضرت تلیشک
 حضور پر نور همایونلرینه کیده رک :

— « یا محمد ! بر مقدار قرآن اوقو ! دیکله یه یم »

دیمکله حضرت فخر کائنات افندی مزده ولیده : [ان الله
یأمر بالعدل والاحسان وایتاء ذی القربی وینهی عن
الفحشاء والمنکر والبغی یعظکم لعلکم تذكرون] آیت
کریمه سنی تلاوت بیور مشلر .

حالبو که آیت کریمه بی جان قولاغیله دیکله مش
اولان ولید :

— « یا محمد ! والله بونده بر حلاوت ، بر حسن
ولطافت واردره . یک درین ومفید بر کلامدر که اونی بشر
سویله یه من »

دیه اعتراف ماهوالحق ایتد کدن صوکره قومنه کیده رک
انلر . خطاباً :

— « سزک ایچکزده شعرك احوالی بندن ده ااعلا
بیلیر کیسه یوقدر . شعرك هر نوعی ، حتی جن
شعرلرینی بیله هیگزدن ابی بیلیرم . فقط محمد [علیه
السلام] ک بکا اوقودیغی کلام ، بونلرک هیج برینه
بکزه من . هر کلامه غالب اولور . اکا هیج بر کلام غالب
اوله من ! »
دیمشدر .

کذلک بر اراق « ابوجهل » لعین ملا قریشده :

— « محمد [عليه السلام] لك ايشى بزه فنا اوليورم
 سحر وشعر وکهايته آشنا آدم اولسهده انک ياننه
 کيدوب قونوشه رق حقيقت اجديه دن بزي خبردار
 ايتسه . . . »

ديدکده ايجلرندن « ابوالوليد » کنيه سيله مکنى اولان
 « عتبه بن ربيع » نام شخص ، لعينه جواباً :

— « والله بن شعر وسحري ، هم کهاتي ايشتم
 هم ده بيليرم »

ديدکدن صوکره همان قالقوب نزد جليل پيغمبريه
 کلمشى .

جناب رسول کبريايه :

— « يا محمد ! سنى خير ليسك ؟ يوقسه هاشمى ؟
 سنى خير ليسك يوقسه عبدالمطلبى ؟ سنى خير ليسك ؟
 يوقسه عبداللهى ؟ نيچون بزم آلهه ليمزه شتم ايدرسك ؟
 وبزى طريق حقدن اضلال ايتك ايسترسك اكر رياست
 ايسترسهك سكا بز بر لواء رياست عقد ايدرزده رئيس
 اولورسك ! اكر شهوات نفسانيه كه خدمت ايتك
 ايسترسهك سكا ايستيديك كى بنات قريشك كوزلارندن
 اولرله قيز البويررز . اكر ايستيديك مال ايسه سنى
 زنكين اينجه ده دكين مال ويررز »

دیدى .

عنه سوزده ايكن حضرت نبى محترم افنديز، سنى
هيچ چيقارميه رق ديكه يور ايدى . فقط سوز يتوبده
عنه طرفندن جوابه انتظار كوستر يلنجه رسول كبريا ،
جوابه ابتدار بيوره رق :

-- « بسم الله الرحمن الرحيم . حم تنزيل من
الرحمن الرحيم . . . الى قوله . . . صاعقة مثل صاعقة
عاد و ثمود »

آيات كريمه سنى تلاوت بيورديغى بر صرهده ايدى كه
عنه ، همان يرنذن اوينا يه رق « يتر ! . . . » ديمك
ايسنديكى افاده ايتك اوزره حضرت رسالتينا هينك
مبارك دهان شريفلرينى اليه طوتوب انى تكلمدن منع
ايتدى .

عنه اورادن ايرلدقن صوكره خانه سنده كلدى .
لكن طيشارى به چيقمامغهده باشلادى .
عنه نك طيشارى به چيقمامغه باشلامسندهكى حكمت ،
فطر دقتنى جلب ايتش اولان دهات قریش ، انك
حقنده :

-- « عنه بى كوره ميورز . يوقسه اوده محمد
[عليه السلام] او يه رق ديندنمى دونمش ؟ »

کبی سوزلری سویله دکدن صوکره یانه کیدنلر ، اکا :
 — « یا عتبه ! سنی بزم مجلس مصاحبتزدن منع
 ایدن ندر ؟ یوقسه سنده می دینکدن دوندک ؟ »
 دیدیکندن محمد بردهاقونوشماق اوزره حدت ایله برابر
 قسم ایتک خبائثنی اظهار ایله حریفلری تأمین ایدرک
 بعده :

— « واللہ بن انکله قونوشدم . لکن او بکا او یله
 برشیله جواب ویردی که او نه شعر ، نه سحر ، نه ده
 کهانت ! .. هیچ بری دکدر . [صاعقة مثل صاعقة
 عاد و ثمود] سوزینه کلنجه قالدوب اغزینی کندی
 المله طوتدم . حتی سکوت ایتسی ایچونده یالواردم
 بیلدم که محمد ، یالان سویله میور . سزه عذاب ایتکدن
 قورقدم »
 دیمشدر .

*.

۱۶

— فسخ حکم عهد —

مشرکین قریش ، هم دین اسلامک توسع وانتشا .

رینی منع ، همده نشر و تعمیمنه خدمت ایتمکده بولنان
 مسلینی شدیداً تضییق ایتمکده ایدیلر . حتی ایشته انجق
 او فکره مبنی عموماً بنی هاشمدن منع الفت و اختلاط
 صورتیله هر درلو علائق مادیه بی انلردن قطع ایله دکلرینه
 دائر واقع اولان معاهده لرینی حاوی یازدقلری عهدنامه بی
 اولوقت کعبه دروننده حفظ و تعلیق ایتمکلی حالده
 دین مبین اسلامک شیوع و انتشارینه مأمول ایتمکلی
 قدرینه مانع اوله مامش لردر .

حالبوکه بین العرب اشرف قبائل صاییلان قریشیلرک
 اولیه ایکی فرقه اولملرینک سیئاتندن اولمق اوزره اوج
 سنهیه قریب بر مدت هر درلو معاملاتک منقطع و معطل
 قالمسندن طولایی منفعت ذاتیه لرینه خلل کلش اولان
 اکثر مشرکین قریش بیله او معاهده نابجاندن نادم
 اوله قالمش لردی .

حکمتدرکه او عهدنامه بی الیه یازان « بغیض بن
 عامر » یا خود « منصور بن عکرمه » نک الی قوریوب
 چولاق قالمش اولدقدن باشقه یازیلان عهدنامهیه من
 طرف الله بر بوجک مسلط اوله رق لفظه جلاله نک
 غیری او کاغده نقدریازی وار ایسه هپسینی ییوب محو
 ایتمشدی .

برکون کبار قریشدن « هشام بن عمرو بن الحارث » ،
معتبران قریشدن « زهیر بن ابی امیه » نک یانه کیدوب
اکا :

— « یازهیر ! لایقمیدرکه بز اولاد و عیالمزله برابر
انواع ذوق و صفا ایچنده بولنهلمده اقریامزدن اولان بنی
هاشم ناحق یرده محصور و محبوس و نعمت ذوق و صفادان
محروم قالسون ! »

کبی مضمونی ثابت و مبرهن قضیه لر بیانیه انی کندیسنه
ظہیر پیدا ایتدکن صوکره « زمعه بن الاسود ، ابو
البحتری ، مطعم بن عدی » نام رؤسای ده صره سیله
او باده کی تشبثنده دائرء اتفاقنه دعوت و عهدنامه بی
یرندن فک و شق ایتدکجه دعوا لرندن کف ید ایتاملری
شرطیله اتفاقه ادخال ده ایله مشدر .

ایرته سی کون رجال خسه مرقومه ، مجمع قریشه
کیتمشدی . ابتدا ایچلرندن ایاغه « زهیر بن ابی امیه »
قالقوب :

— « ای اهل مکه ! بونه ظلم صریحدرکه بز اهل
وعیالمزله برابر کندی ذوق و صفامزه باقه طور ملده
بنی هاشم محبوس و هر درلو حقوق مدنیه دن محروم
قالسون ! »

کبی همچان آمیزدها بر چوق مضامینی حاوی او قود یغی
خطبه بی :

— « یمین ایدرم که او عهدنامه بی یرتیمینجه یریمه
او طور میه جغم »

خاتمه سیله بتردیکندن ابو جهل لعین، همان قالقه رق انی
شدله رد ایتک ایستدی :

— « والله یالان سویلرسک ! شق عهدنامه یه حق
وصلاحیتک یوقدر »

ابو جهل ، سوزینی بتردکدن صوکره ایاغه قالقان
« زمعه بن الاسود » دخی خبیثک علیهنده بولندی.
دیدکی که :

— « والله سن یالان سویلرسک ابو جهل ! بز او
عهددن ذاتاً راضی دکلدک . »

بونک عقیبنده ده او سوزی « ابوالختری » :

— « زمعه یالان سویله میور . ایش اویله در »

دیه تصدیق و « مطعم بن عدی » دخی بوافکارده انلرله تماماً
متفق اولدیغنی اعلان ایله مشدر !

*

**

بونلر بومناقشه ده بولنورکن کیفیت محو عهدنامه دن
جبریل امین واسطه سیله خبر الان حضرت رسول کبریا

افندیمز ، ماهو الواقعی ابوطالبه سویله مش اودخی همان
جمع قریشه کیده رک رسول الله افندیمزدن ایشندیکی وجه
اوزره وقعینی حکایه ایله دکن صوکره دیمش که :

— « یا قوم ! محمدک شو دیدیکی شی صحیح ایسه
ارتق سزده انصاف ایدیکز ! ارامزده کی شو اختلاف
واختلالی قالدیرهلم . اکر صحیح چیقمزسه بنده اونی
جایه دن واز پکرم »

اعیان قریش ، بوسوزی معقول کوره رک عهدنامه یی
ئمان کتیرتدیلر . لکن کوردیلر که ایچنده « باسمک اللهم »
بباره سندن باشقه هر نه که وار ایسه هپسی دلیک دشیک
ولوب محو اولمش !

مأمولک خلافتده قریشیلرک او یله بردنبره ملزم
له قالدقلمی صره ده پک زیاده محجوب اولدیغیله
ابرینه عنادنده اصرار کوسترن ابو جهل لعین ، هر
در حکم عهدک بقاسی طرفنی التزامده طایانه طور -
سده رجال خسته متفق و سائر فسخ والغای عهد
فدارانلک اکثریت آرای نامانه سی ایله اوصحیفه
ضیفه یرتیلوب آتلشدر .

بناءً علیه هاشمیلر علیهنده کی عهد و اتفاق دخی
لوجهله نقض ولغو ایدلمش اوله رق کرک مسلم ، کرک

غیر مسلم کافہ بنی ہاشم اندن صوکرہ محصوریت بلا -
سندن قور تیلدی .

*

**

۱۳

— ❧ سة الحزن ❧ —

و

« وفات ابی طالب و خدیجه »

تاریخ نبوت احدیه نك اوننجی سنه سنده عم و حامی
نبوی « ابوطالب » ، واندن اوچ کون صوکرہ سیدة
النساء حضرت « خدیجة الکبراء » رضی اللہ تعالیٰ عنہا
ارتحال داربقا ایتدیلرکه هر ایکیسنکده او یله بری برینی
متعاقب وقوع ارتحالری ، ذات عالی رسالتیناهی به یك
زیاده سیله تأثیر ایله دیکندن طولای اوسنه ، « سنة الحزن »
دیه تسمیه یورلشدر .

ابوطالبك قبول اسلامی ذات عالی پیغمبریجه بغایت
مطلوب و ملتزم بولندیغی حالده هنکام صحت و حیاتند

قبول دين اسلام ايله ديكنى كورمك رسول مكرم افنديمه
ميسر اولدى .

لكن ابوطالبك برادرزادهسى بولسان او حضرت
رسول محترم افنديمك شرف عوالمهاى نبوت ورسالتى
ايله اقتنار ورسالتنى ده قلباً تصديق ايله ديكي بعض
اشعارندن اكلا شلمقه در .

مثلا شو :

ودعوتى و علمت انك صادق
ولقد صدقت و كنت ثم امينا
ولقد علمت بان دين محمد
من خير اديان البرية دينا
لولا الملامة او حذار مسبة
لوجدتني سمحا بذاك مبينا
والله ان يصلو اليك يجمعهم
حتى اوسد في التراب دفينا
فاصدع بامرک ما عليك غضاضة
وابشر بذاك وقر منه عيوننا

اياتنده امانت و صداقت جناب محمدیه بی تصدیق و
کتیروب نشر ايله ديكي دين اسلامك دخي خيرالاديان
اولديغنى صراحة تسليم ايتشدرد .

بوندن باشقه اوغلی جناب علی المرتضیٰ کرم الله
وجهه افندی می دخی :

— یا بنی ! اتبع ابن عمک ! فانه لایأمر الا بالخير .
واما انا فلا افارق دین آبائی »
دیهرک ذات عالی رسالتیناهییه اتباعه سوق وارشاد
ایردی .

واحیفاکه ابو طالب ، قومنک رئیس بولندیغنه
رسول اکرمکده کندی زیر دست جایقنده بیومش
اولدیغنه باقهرق اقرار باللسان صورتیله اظهار اسلام
ایدوب تابع اولمقدن عار ایتدی .

مع مافیه دها شو قدر اولسون برشی دیرایدی :
— « بن بیلیمکه محمد [علیه السلام] یالان سویله مزه
باطل سوز ، اندن صدور ایتمز . حتی قریش قومنک
قادینلری بنی تعیب ایتیه جکری بنی بیلسم بنده اکا تابع
اولور ایدم »

مرض موتی مشدد اولدیغی زمان جناب رسالتیناهی
اکا خطاباً :

— « یاعم ! بر کره اولسون کله شهادتی کتیر ؟
تا که روز جزا ده شفاعت ایدم بیلیم »
بیوردیلر . ابوطالب او اخطار رسالتیناهییه :

— «قورقارم که ابوطالب قورقدی ده عجز و خوفندن ایمان
آیتدی . دیه نسوان قریش، بنی لوم و تعیب ایدر .»
جواب ناصوابیله مقابله ایتشدرد !

*
* *

اما بر روایت وار که ابوطالب فوت اولور ایکن
دوداقلری براز دپر نمکله یاننده بولنان برادری عباس
بن عبدالمطلب قولاق و یروب انک نه دیدیکنی دیکله -
دکدن صوکره رسول ذیشان افندیزه دونه رک :
— « یا ابن اخی ! واللہ سنک امر ایتدیکک شیئی

سویلور .»

دیمش وحضرت پیغمبر افندیزده اکا قارشی : « الحمد لله
الذی هدک یاعم ! » بیور مشلردر .
لکن کرک حال حیاتنده ، کرک زمان مماتنده وجه
شرعی اوزره قبول و اظهار اسلام ایتدیکندن طولایی
کافراً فوت اولدیغی مشهوردر .
حتی حالت احتضارنده یاننه کلش اولان ابو جهل
ایله عبدالله بن ابی امیه ، رسول الله اکا :
— « یاعم ! قل لا اله الا الله ! کلمة حاج لك بها
عند الله »
دیدیکنی ایشندکارنده همان :

— « يا ابا طالب ! ترغب عن ملة عبد المطلب ؟ »
 ديه از دیر دقلری جهته مرقومك آخر كلامی :
 — « علی ملة عبد المطلب »
 اولمش ایسده حضرت رسول اکرم افندیمز :
 — « لاستغفرن لك ما لم انه عنه »

دیه سوکیلی عمی ایچون شفقت شفیعانه سنی اظهار ایتیش
 اولدیغندن انی اوفکر استغفار دن نهی ضمننده استعید بالله
 [ما كان للنبي والذين آمنوا ان يستغفروا للمشركين ولو
 كانوا اولی قربی من بعد ماتین لهم انهم اصحاب الجحیم] آیت
 کریمه سی نازل اولدوقدن صوکره ابو طالبك احوال
 برزخیه سی حقنده طرف ذیشرف اجدیدن :
 — « وهو فی ضحضاح من نار . ولولا انا لكان

فی الدرك الاسفل من النار »

بیوره رق طوپوقلرینه دکین کلیر نار جحیمده طور دیغنی
 سویله مش اولدیغندن کافراً فوت اولدیغنده ارتق شبهه
 قالماش دیمک اولور .

مع مافیه زمان وفاتنده اعیان قریشی یانسه طوپولاتمش
 ورسول اکرمک صدق وامانتی انلره قارشى تصدیق
 برله حیایتی سپارش ایدهرک اسلامه اولان میلنی اظهار
 ایله مشدر .

فخر عالم صلى الله عليه وسلم افنديز حضرتلری ،
 خدمات حامیانہ سیکہ کنديسنی اڌ زياده ممنون ايتمش
 اولان عنك شو يولده ابدیاً ضايع اولوب کيتمسنة پک
 چوق متأسف قالديغندن حقنده استعیند بالله [انک لا
 تهدي من احببت ولكن الله يهدي من يشاء ۰۰۰۰]
 آیت کریمه سی نازل اولدی .

جناب ابی بکر رضی الله عنه حضرتلرینک درجه
 فضل و رفعت مرتبه ولايتلری شونندن ده اکلاشیلیرکه
 اشبو آیت کریمه ، ذات عالی رسالتیناهییه هنوز نزول
 ایدرکن او وحی الهی بی حضرت ابی بکر رضی الله
 عنیه افنديز دخی ایشتمش ومهابت وحی الهی سببیله
 غشی اوله قالمشدی !

مشرکین قریش ، ابوطالبک وصیتنی ایفا ایتماشدیر
 بلکه محو واعدامنه قدر یورو دکبری و یورویه جکبری
 بر ذاتک علیهنده هر درلو حرکات تجاوزیه اجراسنه
 فرصت کوزدهن قریش ، کرک ابوطالبک ، کرک حضرت
 خدیجه رضی الله عنهانک وفاتی فرصتندن استفاده ایدهرک
 تحمل ایدیله میه جلک درجه ده آغیر اذیات واستحقاراته
 جرأت ایتمکه باشلامشلردر .

طائفه عزیمت احمدیه ❦

وفات ابی طالبدن بالاستفاده هر درلو تجاوزاتی
ارتق مباح کورمکه باشلامش اولان مشرکینک چو-
چالان اذیاته قارشى رسول مکرم صلى الله تعالى علیه
وسلم افندیز حضرتلری پک زیاده سیله مأیوس و مغموم
قاله رق بنی ثقیفدن طلب نصرت وانلری دین مبین
اسلامه دعوت ایتمک اوزره آزادلیسی «زید بن حارثه»
رضی الله تعالى عنه ایله برابر شهر شوالده مکه دن
طائفه عزیمت بیوردیلر .

اوزمان طائفده بنی ثقیف اعاضمی «حبیب، مسعود،
مالک» ناملرنده اوچ قرن داش کیمسه لر ایدی .

لکن بونلرک - نه نصرت ، نه ده دعوته اجابت
ایتملری شویله طورسون ! - بری :

— «مادامکه دیدیکلک کبی سن پیغمبر آخر الزمانسلک
بزدن نه یاردم ایسترسلک ؟»

دیگری :

— اول ربك كه سنى رسالتله كوندردى نيچون
اعدادن صاقلاماز ؟ »

اوديكردى ده :

— « ربك پيغمبر كوندركم ايستينجه بر بيوك
آدمى كوندردى ده نيچون سنك كى بر يتيمى
كوندردى ؟ »

ديه مستهزيانه جواب رد ويرمشدر .

ذات عالى رسالتپناهى بونلردن مايوس اولدوقده
صوك برتكليف اولمق اوزره انلره ديدى كه :

— مادامكه بكا نصرت ودعوتمهده اجابت ايدلميه .
چكدر . باري سبب عزيمتم اولان دعوتى ومنزلده
بكا عدم اجابتكزى كيسه يه طوبورميكر . تاكه عليهمده
عداوت قريش شتد اوليه ! »

حالبوكه ثقيف رؤساسى كيفيتى قصداً وعمداً اشاعه
الله دكدن باشقه اوسيد الانام عليه افضل الصلوة واكل
السلام افنديز ايچون :

— « شو كيدن دلدر ! »

ديه طائف چوجقلارينه امر و اشارت ايتديلر .
چوجقلا ايسه بيوكلرندن كوردىكى بوز اوزرينه

سید کائنات افندی می آرند نبری طاشلامغه
باشلادیلر .

حتی آتیلان طاشلردن رسول اکرم افندی می محافظه
ایچون سپر طوران زید حضرتلری بر قایچ یرندن
یاره لشمش و حضرت نبی محترم افندی می زک دخی مبارک
ایاقلری قانامشدی .

وقتیکه طائف حدودندن طیشاری چیقدیلر کونش
پک قیزغین ، هواده پک صیحاقل اولمغله برابر یاره
اغریسی ده مشد اولسندن طولای یاری یولده او طو -
ره رق تأثرندن بر مقدارده اغلادی . حتی بر کمره
اهل طائف علیهنده دعا ایتمک جهتی خیالخانه رسالتینا -
هییه کلمش اولدیغی حالده ینه مرجه او فکرندن واز
پجیدیلر .

براز دها ایلرییه کلدکلرنده « عتبه » ایله « شیه »
ناملرنده ایکی قرنداشک باغلرینه تصادف ایدوب باغکده
قاپوسی اچیق بولندیغندن ایچریسنه کیردیلر . باغده کی
حوضک باشنه واره رق ایاغندن اقان قانی اوراده
میلدی .

صاحب البستان اولان کیمسه لرك « عداس » نامنده
بر کوله سی او باغده او کون موجود ایدی . مرقوم

عداس، بر طبق اوزوم رسول اکرم افندیز حضرت تلیته
کتیروب تقدیم ابتدی . طرف ذیشرف اجدیدن ایسه .
— بعد البسمله — بر صالقم یاخود بر دانه اوزوم النوب .
باقیسی اعاده بیورلدی .

عداس ، اوراده رسول محترم افندیزك حال و
خاطرنی صورهرق جواب آلیز ایکن نبوت ورسالتنه .
یقین کتیردیکنندن همان شرف اسلام ایله تشرف ایتشدرد .
رضی الله عنه !

•
* *

حضرت سید البشر افندیز مکیه بر مرحله مسا .
فه سنده تقرب ایله دکلرنده « بطن نخله » نام محله اختیار
اقامت بیورمشلردی .

کیجه او محله قیلدیغی صلات قیام جوف الیل
یاخود صلاة الفجرده « الرحمن » یاخود « طه » سورة
شریفه سنی تلاوت بیورورلرکن او تلاوت اجدیه بی
دیگله مش اولان [سلیط ، شاصر ، ماصر ، حاصر .
حسا ، مسا ، علیم ، ارقم ، ادرس] نام طقوز جن .
قبول دین اسلام ایدوب رسول اللهدن الدقلری تنبیها
مخصوصه اوزرینه دیگر امشالی جن طوائفی ده دعوت

ایتمک اوزره عودت ایتمشلردر .

*

* *

اشبو جنلر « نصیبین » یاخود « نینوا » اشرافندن
برجاعت ایدیلر . کندیلرینک یعنی بتون طوائف و ملل
جنیهنک ، ابواب سمان طرد و حتی شهابلرله رجم دخی
ایدلکه باشلادیغنه سبب اولمق اوزره روی زمینده بر
حادثه عظیمه نک وقوعی اکلامشردی . ایشته او حادثه نک
نه کونا اولدیغنی اکلامق ایچون ابلیس طرفندن اطراف
حالمه چیقاریلان فرق عسکریه دن بونلرده - اولاً تهامه
حوالیسنه کوندرلش - بر قول ایدی .

*

* *

ایرته سی کون اراده سنیه پیغمبری شرفتمعلق بیو-
رلدی که مکّه یه دخول ایده ! لکن مکیلردن بری کلوب
افندیمره :

— « صاقین مکّه یه کیرمک تشببشده بوانمیکز !

زیرا مشرکین قریش ، سنزی مکّه یه قویماق اوزره
اتفاق ایتدیلر »

دیه خبر ویردی .

بونک اوزرینه کندیلرینی حایه ایتمک رجاسیله

مکده « جبر بن بشر » نام کیمسه یه خبر کوندردیلر .
او شخص :

— « بن نصل حایه ایده بیلیرم ؟ بنده بعینه اونک
کبی بریستک حایت وشفاعتی ایله مکیه کیرمشم .
معذورم ! »

دیه معتذرانه بر صورتده جواب ویرمکله اندن صوکره
« سهیل بن عمرو » نام خطیب شهرتشارده اولوجهله
خبر کوندردی . او ایسه جواب قبول ویرمک رسول
مکرمی یاننه المش وبعده « مطعم بن عدی » نک عهده
حایتنه تودیع ایله مشدر .

ابو جهل ، کافئه اعوان واتباعی ایله اوکون حرم
کعبده طویلانجه او اجتماعدن تدارکات حربیه مذا-
کره سی معناسنی اکلایه رق « مطعم بن عدی » دخی ،
کندی عشایرینی - افندیملک محافظه سی اوغورنده -
سلاح بدست صولت برحاله قویمشدی !

*

**

ابوجهل ، حایه مسئله سی مطعمدن صوردی .
مطعم ، واقع اولان تعهدینی جواباً بیان ایتمکدن ذره قدر
احتراز ایتدی .

رسول اکرم ، ایشته او حایه سایه سنده سالماً وآمناً

حرم شریفہ کیدہ رک حجر الاسودی استیلام وایکی
رکعت نماز ادا سندن صوکرہ کندی سعادتخانہ جناب
رسالتپناہیلرینہ شرقعاودت بیوردیلر •

مکہ یہ عودت لرندن یعنی بطن نخلہ وقعہ سندن اوج
آی صوکرہ شعب حجوندہ [مکہ دہ بر قبرستان] اون
ایکی بیک نفر جنک حضور جلیل نبویدہ شرف اسلام
ایلہ مشرف اولدقلری مرویدر •
شویله کہ :

بطن نخلہ وقعہ سندن قبول اسلام ایدن جنارک
دعوت لرینہ اجابت کوسترمش اولان جماعتدن بری
حضور رسول اللہ کلوب :

— « ان قومنا قد حضروا بالحقونک »
دیمش حضرت پیغمبرده کیچہ بروقت اورایہ کیدہ -
جکلرینی وعد ایدہ رک انی اعاده ایتشدی •
بناءً علیہ جناب فخر کائنات علیہ افضل الصلوٰۃ
واکمل التحیات افندیز حضرتلری اصحاب کرامنه
خطاباً :

— « بن جن طائفہ سنہ بوکیچہ تلاوت قرآن ایلہ
مأمور اولدم بکا او بابده کیم تبعیت ورفاقت ایدر ؟ »
بیوردیلر • لکن بو سؤالہ قارشى - باشلرینی اوکلرینہ

طوغری براز اشاغی به بوکوب باقه قالمش اولان اصحاب
کرام هیئت محترمه سندن - کیسه جواب ویره منجه
سوزینی ایکی دفعه ده تکرار ایتدی . ینه سکوتدن
باشقه جواب آله مدیغی بر ساعتده کبار اصحابدن «عبد
الله بن مسعود» رضی الله عنه حضرتلری :

— « بن یا رسول الله ! »

دیه رک همان تبعیت ایتشد .

*

**

اشبو صحابی مشار الیه ، او وقعہ جنبه ده کی
مشهودات غریبه سنی بالاخره نقل و حکایت ایدرکن
دیر ایدی که :

— « برابر کیتدک . تاکه « حججون » ک « شعب ابن
ابی دب » نام موضعنه واردق . انده ارض اوزرنده
اطرافه بر خط یعنی بردآره مبارک ایاغیله چیزه رک بنی
او دائره نک ایچریسنه ادخال برله « بن سکا عودت
ایدنجه یه دکین سن بودآره دن طیشاری یه چیمه ! »
بیوردق دن صوکره کندیلری براز ایلریله دیلر .

« جمل » دنیلان ککلک قوشی صورتده بر طاقم
شیلر ، حول رسول الله دوشدی . انلرک سیاه انسان
صورتنه کیردکلرینی ده کوردم ! الرنده دفلرینی چالپور-

لردی . اولقدرده چوق ایدیلرکه بلوط کبی حیلولتلی
سبیلله نظرمدن حضرت رسول الهی غیب ایتشلردی .
ایشته اواثاده ایدی که انلرده بیوک وشدتلی غلبه لک
ایشتم . حضرت نبی ذیشان ایچون قورقدم . حتی
ایاغه دخی قالقدم .

بعده بلوط اچیلیر کبی بردنبره اچیلان سیاهییلرک
اره سندن بری ذات عالی رسالتیناهی ، بکا طوغری
مبارک اللریله اشارت بیوره رق یرمه اوطورمقلغمی
امر ایتدی بنده همان اوطوردم .

صوکره نبی ذیشان افندیمز ، سورة شریفه [علق] ی
تلاوته بدء و مبادرت بیوردیلر . اوتلاوت اوزینه بتون
سیاهییلر ، عموماً یره سرلدیلر . حتی کندیلرینی اوقت
کوره مزددمده سسلرینی ایشیدیردم .
رسول الثقلین افندیمز بعد التلاوه عودت بیور .
دقلرنده بکا :

— « هیچ برشی کوردکی ؟ »

دیه صوودیلر . بنده :

— « اوت ! کورددم . برطاقم سیاه شخصلی ، بیاض

البسه لی کیمسه لردی »

جوانی ویردیکمک مقابلنده طرف عالی نبویدن :

— « ايشته انلر ، نصييين جنلرندن اون ايكي بيك
 كييسه ايدى . قرآنى ديكله مك ايجون كلمشله . ديكله دكدن
 صوكره قوملرينى دعوت وانذاره عودت ايتديلر . بنده
 انلرى كييك ودوانى بعره ايله تزويد ايتدم . بناء عليه
 كييسه كييكله وبعره ايله استنجا ايتسون ! »
 بيورلقله برابر :

— « يانمه كلمكى مراد ايتدىكى ؟ »

سوزى علاوه ايدلدى . بن :

— « نعم يا رسول الله ! »

ديه جواب ويرركن او حضرت عاليشانده :

— « لكن ايشته او ، سنكچون ممكن اولزدى . »

بيوردى .

*

**

بر روايته كوره جنلر نزد رسالتپناهيده مجتمع
 اولدقلرنده ديديلر كه :

— « صدق نبوت ورسالتكه كيم شهادت ايدر ؟ »

حضرت رسالتپناه افنديمзде قارشيدن براغاجه

اشارتله :

— « ايشته شو اغاج ! . . تعالى يا شجره ! »

بيورديلر .

اغاچ ايسه یرده کی کوکرینی طوپراغه سورویه
 سورویه کلوب حضور پر نور رسالتپناهیده دیکلدکن
 طرف عالیؑ نبویدن وقوعبولان :
 — « علی ماذا تشهدین لی ؟ »

سؤالنه اغاچ :

— « اشهد انک رسول الله »

جوابيله مقابله ایتدیکی کورولدکن صوکره رسول ذیشان
 افندیز اکا :

-- « اذهبی ! »

فرمان عالیشانيله عودت اجازتی ویرمش اوده
 کیدوب اسکی یرنده اسکیمی کبی قیام وانتصاب
 ایتشدرد .

*

**

جناب رسول الثقلین افندیز حضرتلرینک جنلرله
 ملاقاتی یالکز بو دکل بلکه دهها زیاده در . حتی جناب
 انس رضی الله تعالی عنه حضرتلرندن مرویدرکه :
 سیدالانام علیه افضل الصلوة والسلام افندیمله
 برابر برکون مکه طاغلرنده بولنیور ایدم . اوکرده -
 اوجی دمیرلی عیصاسنه متکی - بر پیر فانی حیقوب

کوروندی . اکا رسول کبریا افندیمز ، جن لسانیلہ
قونوشہ رق :

— « هانکی جندنسک ؟ »

دیہ صور دیلر . اوده :

— « بن هامه بن هم بن لاقیس بن ابلیسم »

جوانی ویرمک احفاد ابلیسیہ دن اولدیغنی ییلدی ررکن
تی ذیشان افندیمز :

— « لکن سنکله جدک ابلیسک اره سنده یالکز ایکی

بابا کوره یورم . قاچ یاشنده سک ؟ »

بیوردیلر اختیار هامه ، او سوزه :

— « بن عمر دنیاک چوغنی کوردم . حتی

قابل هابیلی قتل ایتدیکی زمان بن یوکسک دیه لرده
کزر دم »

دیہ جواب ویروب :

— « عیسی بن مریم علیه السلام ، بکا اکر محمد

[علیه السلام] ملاقات ایدرسه ک بدن اکا سلام سویله

دیمشدی . شمدی انک سلامنی سکا تبلیغ و صدق نبوت

ورسالت اجدیه کده ایمان ایتدم »

علاوه سنی ده در میان ایتدی . افندیمز :

— « علی عیسی السلام وعلیک یا هامه ! »

بیورمقله برابر :

— « نه ایسترسک ؟ »

استفسار خاطر نوازانه سنده دخی بولندیلر .

هامه اشبو سؤاله ده :

— « بکا حضرت موسی توراتی ، حضرت عیسی ده

انجیلی اوکرتدی . سنده قرآنی اوکرت ! »

دیه بیان حاجت ایتیش و انک اوزرینه قرآندن اون سوریه بی

رسول محترم صلی الله علیه وسلم افندیمز اکا اوراده

اوکرده رک حاجتنی اسعاف بیورمشدر !

*

**

عادت عرب اوزره مطعم بن عدی ، اول فخرکائنات

افندیمز حضرت تلرینک اطرافنده پروانه کبی اولاد و اتباه

عیلّه برابر دونوب طولاشه رق حفظ و جایه سنده پک

بیوک غیرت و حیت ابراز ایله مشدر .

*

**

ازدواج نبوی

با

(عائشه وسوده)

ایشته او صره لرده ایدی [سوده بنت زمعه] ایله [عائشه بنت ابی بکر] رضی الله عنه حضرتلری رسول اکرم افندیزه تزویج بیورلمشدر .

حضرت عائشه ، یدی یاشنده کوچوک اولمق منا . سبتیله نکاح عقد ایدلدیکی حالده امر زفاف ایکی سنه مدت دها تأخیر وبعد الهجرة سکز آی صوکره مدینه منوره ده اجرا ایدلدی .

{ استطراد }

حضرت خدیجه رضی الله عنهانک زمان وفاتلرنده فخر عالم صلی الله تعالی علیه وسلم حضرتلرینک شدت اغتماملری واقع اولمشدی . حضرت جبریل ، عائشه بنت ابی

بكر رضى الله عنهما نك صورتى حاوى جنتدن بر ورقه
مخصوصه كتيره رك ديدى كه :

— « يا محمد ! ربك سكا سلام ايدر دير كه شو
ورقه دهكى صورته مشابه اولان قىزى بن اكا سماءه تزويج
ايتدم اوده يرده تزوج ايتسون ! »
بونك اوزرينه حضرت پيغمبر « دلالة » يي چاغيره .
رق اكا :

— « بو ورقه دهكى صورته كيمك قىزى بكر ؟ »
ديه صور مش دلالة ده ورقه يه باقدقدن صوكره :
— « ابو بكر ك قىزى ! . . »
جوابى ويرمى .

بعده حضرت رسول اكرم جناب ابى بكرى حضور
تاليلرينه چاغيره رق :

— يا ابا بكر ! سنك شو ورقه دهكى صورته بكر
بر قيزك وار . ايشته اونى بكا رجم سماءه تزويج
ايلاه دكدن باشقه سكا ده اونى بكا يرده تزويجه امر
ايتدى . »

بيورديلر . حضرت ابى بكر ، جواب ويردى :
— « او ، دهها كوچوكدر »

حضرت پيغمبر او سوزك مقابلنده :

— «اگر تزویجہ تزوجہ صالح اولسیدی ربم بکا
اونی تزویج بیورمندی»
بیوردیلر . ایشته او انده نکاح همان عقد
ایدلشد .

بعد العقد حضرت ابی بکر رضی اللہ عنہ حضرت تری،
سعادت خانہ لرینہ کیتدی . حضرت عائشہ نیک الہ
بر طبق خرما ویرہ رک شویله تنبیہ ایتدی :

— «کیت ! بو طبق حضرت محمد علیہ السلامہ
تقدیم ایت ! ہمده دی که ارزو بیوردیفکر ، بودر .
صالحیدر دکلیدر بيلم»

عائشہ او طبق تقدیم و باباسنک تنبیہ وجہ
اوزرہ اداره کلام ایدرکن حضرت فخر کائنات
افندیزده :

— «یا عائشہ ! قبلنا ثم قبلنا»

انتهی

بیوردیلر .

۱۶

— معراج قدسیت منہاج پیغمبری —

حوادث خارقة العادات معراجیہ پی ، اسکی روما .

لیلرله مصر اهاالی قديمه نبطیه و قبظیه سنک و علی الخصوص
اسکی یونانلیلرک بوکونکی افکار جدیده اصحابی طرفندن
یک مردود کوریلان خرافات اساطیریه سنه بکرتیمک
اوزره اکا [خرافات اسلامیه] دیه جک قدر ایلرییه
یورویه رک اولاً نبوت و رسالت احدییه بی انکار و او
صورتله بعده کندی دینسرلکنی اظهار ایده جک اولان
فلاسفه حکما ، هر درلو صلاحیتلرینک خارجنه چیقمش
اوله جققلرندن انلره یالکز سکوت ایله مقابله جواب کافی
کورولمک لازم کلیر :

انکس که بقرآن و خبر زونرهی

آنست جوابش که جوابش ندهی

* *

تاریخ نبوت احدییه نک [۱۰ یاخود ۱۲] نجی
سنه سی شهر رجب - علی روایة اخرى انه وقع في
ربيع الآخر وفي شرح مسلم انه في شهر ربيع الاول - يكرمي
يدنجی بازار ایرته سی یاخود جعه ایرته سی کجه سنه
معراج قدسیت منهاج پیغمبری شرف وقوعبولدی . که
استعین بالله [سبحان الذی اسری بعبدہ لیلاً] آیت کریمه .
سیله ثابتدر . بناءً علیه مسجد اقصایه دکین اولان اسرآنک
منکری تکفیر اولنور .

لكن آيت كريمه ده مذکور بولنان [ليلاً] كلمه
طيه سنك نكره اولسندن ده مستفاد اولديغي اوزره مدت
انسراء بك آز بر زماندر .

*

علائی حضرتلری ، فخر کائنات افندیملک ليله*
معراجده - مراکب خسه صاحبی اولدقلرینی یعنی -
بش دفعه وقوع رکوبلرینی بیان ایدیورلر .
شویله که :

رکوب اول - مسجد حرامدن مسجد اقصایه قدر .
رکوب ثانی - مسجد اقصادن سماء دنیایه قدر .
رکوب ثالث - سماء دنیادن سماء سابعده قدر .
رکوب رابع - سماء سابعده دن سدره المنتهی به قدر .
رکوب خامس - سدره المنتهی دن قاب قوسینه قدر

**

فاضل نسفی حضرتلری [زهر الریاض] نام
کتابلرنده دیرلرکه :

جناب حق رسول ذیشاننه عجایب سماواتی و
غرائب ملک و ملکوتی کوسترمک ایچون انی سماواته
قالدیرمق اوزره براق حاضرله مسنی جبریل علیه السلامه
امر بیوردی . اوده رکوب همایون اجددی به مخصوص

بر براق المغه جنته کتیدی . لکن جنتده قرقیک براقک
ایچندن برینک رفقا سندن ایریله رق محزون محزون طور-
دیغنی کوردیکندن نیچون او یله محزون و مغموم طور یغنی
صوردی . براق ایسه جواباً :

— « بوندن قرقیک سنه مقدم (محمد) دیه ایشدیکم
براسم لطیفه عاشق اولدم . او اسم لطیفک بکا و یردیکمی
عشق و محبت بنی اکل و شربدن تا او زماندن بری منع
ایتدی . »

دیمش اولمغه حضرت جبریل او براق عاشقی آلوب
دوئمش اوکا یاقوت احردن برا کر ، زبر جددن برکم
اور مشدر .

بعده اسرافیل ، میکائیل ، عزرائیل علیهم السلام
و رضوان الجنان حضراتی یوز بیکرله ملائکه کرام
دخی برابر بولندیغنی حالده زمینه اینه رک باب سعادت مآب
یغمبری یه کلدیلر .

ذات عالی رسالتینهای ایسه او کیجه ، ابوطالب قیزی
وجیر نام کیمسه نك زوجه سی بولنان « ام هانی » ک
خانه سنده بیتوتت بیور مشلردی .

جناب جبریل علیه السلام ، بعد العشاء اورایه کلوب
دق باب وبعده :

— « قم يا محمد ! »

ديه خطاب ايتمله اكا طرف پيغمبريدن :

— « يا جبريل ! بكارحت آيتيله مى كلك ؟ يوقسه .

عذاب آيتيله مى ؟ »

ديه مقابله بيورلمش وارتق اندن صوكره طرفين بيننده .
شومحاوره جريان ايتشدرد :

جبريل — « ان الله يقرؤك السلام ويدعوك لحضرته .

لسر بينك وبينه . يا محمد ! الليلة ليلتك . والدولة دولتك .

انت شمس المعارف . انت بدر اللطائف . انت في القيامة .

ملجأ كل خائف . مامهدت الدار الا لاجلك . ولاروق .

كأس الحب الا لوصلك . قم ! فان الموائد لك ممدودة .

والايام للقائك معدودة »

نبي مكرم — « يا جبريل ! رب كريم بنى دعوت .

ايدر اما نيچون عجبيا ؟ »

جبريل — « ليغفرلك ماتقدم من ذنبك وماتاخر . »

نبي محترم — « بو بكادر لكن عيال وامتته نه

ياپه جق ؟ »

جبريل — « ولسوف يعطيك ربك فترضى »

رسول اكرم — « برآبدست آلهيم »

جبریل — « قد جئتک بماء من السلسبیل فی کوز
من الجوهر • وطست من یاقوت احمر • وحلة من
سندس خضر • وعمامة من نور »

حضرت پیغمبر جبریلک کتیردیکی سلسبیل ایله
توضؤ ایتدکدن صوکره بافرمان جلیل ربانی اول آب
دست همایون اجدی بی جبریل امین، حضرت میکائیل،
اوده عزرائیل، اوده اسرافیل او دخی رضوان جناحه
ویره رک بعده فردوس اعلایه کتیرلمش، اوراده حور
عین یوزلرینی او صو ایله مسح ایدرک انوار وملاحات
وجهیه لرینی مزداد اولمشدر •

حدیث شریفه مستند اولان دیگر بر روایتده
حضرت پیغمبر او کیجه زمزم قویوسندن آبدست آلهرق
بعد الطواف « حطیم » ده اوویه قالمش — یاخود او یو-
مامشده یالکز مضطجع اوله قالمش — ایدیلر •

ایشته اوراده ویاخود روایت اولییه کوره ام
هانی خانه سنده ایکن خطاب جبریل تأثیریه قالقوب
ایکی رکعت نماز قیلدی • بعد الصلاة جبریل او حضرت
نبی محترمک صدر شریفنی یاردی • ایچنده هر نه کی وار

ایسه هپسنی زمزم صویله اوچ کره یقایوب بعده ایمان
وحکمتله تمثلی برباشقه طاسدن قلب همایونی املا ایدرک
یرینه قویدی .

خارق العاده دندرکه جبریلک دست شریفیله حصوله
کلان اشبو شقیقه اثری ، مبارک صدر شریف اجدیده
هرزمان موجود و مشهود ایدی !

بو معامله لردن صوکره حضرت جبریل ، براق
رسول اکرک پیشگاه عالیرینه سوق و تقدیم ایدرک او
حضرت دخی یلنمک اوزره مبارک ایاقلرینی اوزنکی یه
باصمشرودی . براق سرکشک ایدیوردی .

حضرت جبریل :

— « اما تستحی ممافعلت؟ فوالله مارکبک احدا کرم

علی الله من محمد ! »

دیه براقک اوسرکشکنندن مقصدینی صورتدی . براق
ایسه :

— « یا جبریل ! دیه جک سوزم واردر : یارینکی

یوم حشردهده حضرت رسول اکرم صلی الله علیه
وسلم افندیمز قبرلرندن قالقوب محشره کیده جکاری زمان
ده بکا بنه لرینی ایسترم »

دیه جواب ویردیکندن حبیب خدا افندیمز ، براقک

اومسئولنی قبول بیورہرق بعدہ بیندی • جبرائیل یولا-
رندن ، میکائیل رکاہندن طوتدی • اسرافیل دہ اثواب
علیہ جناب احدیہ بی اطرافندن محافظہ وتسویہ
ایدردی •

ارتق سمت مقصودہ طوغری کیدیور ایدی •
جبرائیل علیہ السلام امر و اشارتلیلہ براقدن ایندرک
شجرہ موسیٰ نک موقعی بولنان « مین » دہ ، ولادتکاه
مسیحا اولان « بیت لحم » دہ کذلک « طور سیناء » دہ
ایکیشز رکعت نماز قیلدی •

ایشته بومنازل ثلثہ مذکورہ دہ کی نمازلردن صوکرہ
براق اوزرنده کیدرکن طرف یمیندن « یا محمد ! » نداسی
کلدی • لکن التفات بیورلمدی • براز دها کیتد کلرنده
جانب یسارندن دہ اولسکنک عینی برندا کلدی • اکادہ
التفات ایدلمدی • بعدہ یولده غایت کوزل و مزین بر
قادین - و علی روایۃ یک چرکین برعجوزه - کوروندی •
او دخی ندایی عیناً تکرار ایتدی • لیکن مظهر نکاه
التفات پیغمبری اولیوب براغیلدیغی صرہ دہ حبیب خدا
افندیمز ، بونلرک نہ اولدقلرینی جبریلدن صورتی •
اوده :

— « طرف یمینکدن کلان ندای اول ، یهوددن
ایدی . اکر اجابت والتفات ایتش اولسیدک امتک بتون
تهود ایده جک — یاخود یهودیلره مغلوب اوله جق —
ایدی . جانب یسارکدن کلان ندای ثانی نصرانیدن
ایدی . اکر اجابت والتفات بیورسیدک امتک بتون
تنصر ایده جک — یاخود نصرانیلره مغلوب اوله جق
— ایدی . اول قادین که صوکره ندا ایتدی . اوده دنیا
ایدی . یاخود شیطان ایدی . التفات واجابت بیورمش
اولسیدیکز امتکه ترجیح الدنیا علی الاخری سیئه سی
عارض وشیطانه تبعیتلری غالب اوله جق ایدی »
جوابی ویردی !

* *

براز دها ایلری یه کیتدکلرنده غایت کوزل قوقولی
وکوزل برکنج آدم ، حضرت پیغمبرک ایکی قاشنک
اره سندن الننی اوپوب غائب اولدی . بونی ده جبریلدن
صورو بنجه او :

— « دین اسلام ! »

دیه جواب ویردکدن فضله :

— « مژده یا محمد ! سکا وامتکه که مؤمن اوله رق

یاشارلر • مؤمن اوله رق اولورلر • آمن اولدقلری
حالده ده جنته کیررلر «
تبشیراتی علاوه ایتدی •

*
* *

وقتا که مسجد اقصایه واردیلر • قابوسنده جبریل
برطاشه الی صوقه رق حلقه پیدا ایلهدی • براقی او
حلقه یه ربط ایتدکن صوکره مسجد شریفه کیردیلر •
اوراده استقباله کلش اولدقلری جبریل امین طرفندن
بیلدیریلان ارواح انبیا ومرسلینک کافه سی حضرت
حبیب خدایی تهننه ایتشدیر •

مراسم استقبالیه نك او صورتله ختامنده جبریل :
— « بیوریکز یا محمد ! انبیا ومرسلینه نماز قیلدیر! »
دیه رک عوما نمازه طور دیلر •

نمازده امام اولان رسول اکرم صلی الله علیه وسلم
افندیمرک خلف ظهر لرنده جد امجدی جناب ابراهیم
وانک طرف یمینده اسماعیل ، و بسمارنده اسحاق علیهم
السلام قائم ایدیلر •

ایشته بو نمازک رکعت اولیسنده « قل یا ایها الکافرون »
رکعت ثانیه سنده « اخلاص » سورۀ شریفه لرینک تلاوت
بیورلدیغی « عقائق الحقائق » ده مذکوردر •

نمازدن صوکره ایدی • بری صو ، بری شراب ،
دیگری سود یاخود بال اولق اوزره اوچ قدحی حاوی
براء صونولدی جنابخواجه حکمتخانه کائنات افندیز
اقداح ثلثه دن سودلی قدحی اختیار ایدی • جبریل ،
اصابت علیه احديه فی تبشیر ضمننده :

— « اصبت الفطرة • ولو شربت الماء غرقت امتك
والخمر سفهت امتك »

یدی • حضرت پیغمبر اوسوزه قارشى سودی ایچدی •
لیکن قدحک دیننده براز مقدار سود قالمشدی • جبریل
دوام ایدی :

— « ولو شربت اللبن كله لم يدخل احد من امتك
النار »

ذات عالی رسالتیناهی • همان کلیسنی ایچمک
ایستدی • فقط جبریل ، او زمان شرب کک ممتنع
اولدیغنی برطرفدن بیلدیره یور ایدی :
— « هیات جرى القلم بما حکم »

*
*
*

بونلردن ده صوکره حضرت جبریل ، رسول اکرمی
مبارک النذن طوته ورق ناحیه صخره یه کتیردی و « یا اسماعیل !

دل علی المعراج ! « ديه ندا ايتدی • عقيبنده فردوس
اعلادن نردبان يتشديرلدى •

نردبانك ايكي شقندن يعنى قنادنن برى يا قوته
جرادن ، ديكر قناده زبرجد خضرادن و پردهكى
اوجى صخره كوكدهكى ده سمايه ملاصق ايدى •

حالبوكه نردبانن يوقارى يه چيقيمق ايچون صخره
باصديغى زمان طاش باذن الله عروجه باشلا ديغندن رسول
مكرم حضرتلى :

— « قف يا حجر ! »

ديه زك طاشى عروجدن منع ايله مشدر •
طاش عروجاً واردىغى پرده ايشته او كيجه دنبرى
معلق اوله قاله رق طوردى • اوزرنده ده چاموره باصمش
كبي مبارك اياقلىله براقى قلى ايز ، حالا موجود و
مشهوددر •

* *

نردبانك يوز درجه سى يعنى يوز قدمه سى وار
ايدى • لكن هر بر قدمه اوزرينه چيقدىغى زمان مشهو •
داتى التندكى قدمه نك رفعتنه كوره باشقه باشقه در •
از جله قدمه اولى يه باصديغى زمان الوانى ده ثيابى ده
قيرمى ، قدمه ثابيه ده الوانى ده ثيابى ده صارى ، قدمه

ثالثه الوافی ده ثیابی ده یشیل برطاقم ملکاری مشاهده
بیور مشلردی .

هله قدمهٔ سابعدهٔ اوپله بر نورلی ملکار ذات عالی
رسالتیناهی بی تعظیماً استقبال ایتملردی که انوارندن نور
بصر احدی از قالدی غائب اولیور ایدی .

زردبانک یوزنجی قدمه سنی بولدیغی صروده سما
ملکرینک تهلیل و تسبیح سسلرینی ایشتمکه باشلامش و ذاتاً
او قدمه ده سما دنیا به واصل اولمشدی .

سما اولی یعنی سما دنیا حضرت آدم علیه السلامی ،
سما ثانیه ده یحیی ، عیسی علیهما السلامی ، سما ثالثه ده
یوسف ، داود ، سلیمان علیهم السلامی ، سما رابعه ده
ادریس علیه السلام ایله مریمی ، یوحانندی ، آسیه بی ،
کونشی ، سما خامسه ده هارون ، اسماعیل ، اسحاق ،
یعقوب ، لوط علیهم السلامی سما سادسه ده موسی و میکا
ئیل علیهما السلامی ، سما سابعده ابراهیم علیه السلامی
وبیت المعموری کوردیلر .

روایته کوره هر بر سماده بتون اها لیسلیله برابر
ایکیشر رکعت نماز دخی قیلدی .

سما سابعده بیت المعمورک ایچنده ینه کندی امامت
علیه رسالتینا هیلرله بتون سماوات اهلی مقتدی اولدیغی

حالده ایکی رکعت نماز قیلدیرمش وقلب همایونلرنده
واقع اولان تمنی اوزرینه فضائلجه ایشته او بیتدهکی
نمازک مثل ومعادلی اولهرق امتنه صلوة جمعه وجاعتی
احسان بیورلمشدر .

سماواتدن « سدرۃ المنتهی » یه طوغری عروج
بیوردیلر . حضرت جبریلی اوراده ، براز دهاایلرییه
کندیکننده اسرافیلی ، دها ایلریده نوردن یتش یک
حجابی یکدکدن صوکره کی مقامدهده - تصادف ایله -
دیکی - روحی [۱] کرییه براقدی .

حجابدن حجابیه ملائکه الرنده اولهرق نیجه بیکرله
پرده بی یکدی . تاکه حجاب وحدانیتیه واردی . کندی
ذات همایونلرینی هواده معلق قنبدیل کبی کوردیکی
متعاقب رفرف اخضر ظاهر وحاضر اولهرق انک
اوستنه بیندی .

رفرف ایله عرش اعظمه واردی ، عرشک دهشتره
سان اولان عظمت طاقتشکسانه سنه قارش ی یک بیتاب قالدی .
بناءً علیه ثبات وتحمل احسان بیورمسنی ربندن نیاز
ایتدی . حق تعالی حضرتلریده اکا قوت وتحمل ویردی .

[۱] حق تعالی حضرتلرینک « یوم یقوم الروح والملائکه
صفاً » آیت کریمه سنده ذکر ایله دیکی روحدر !

عرش اعظم دن او صروده بری رسول اکرم افندی مژک
لسان شریف لری نه ، بری کتف همایون لری نه ، دیکری ده
قلب عالی رسالت پناهیلری نه اولق اوزره اوج قطره شی
طاملا دیغندن لسانده فصاحت ، شخصنده هیبت ، قلبنده
ده محبت الهیه حاصل اولدی .

لکن عرش اعظمی کوردیکی زمان اطرافدن هیچ
بر سس ایشیده مدیکندن کن دیسنه وحشت وانقطاع
حس عارض اولمشدی . جبریل علیه السلام ، بولندیغی
سدره المنتهاد نبری :

— « یا محمد ! ان الله تعالى یثنی علیک فاسمع ! واطع
ولا یهولنک ! »

دیه ندا ایدهرک وحشتنی دفع ایتشد .
بوندن صوکره نوردن یتش بیک حجاب دها یکدیکی
اشاده جناب ابی بکر رضی الله عنه حضر تلرینک سسنه
بکر بر سسده :

— « قف یا محمد ! فان ربک یصلی علیک »

نداسیله توقیف ایدلدی که اوراسی عوارض ماسوی الله
اولان کیف وکم مسافه دن بالکلیه منزله اولدیغی حالده
قرب جلیل کبریا مقامی بولندیغندن « ثم دنی فتدلی .
فکان قاب قوسین اودنی . فاوحی الی عبده ما اوحی »

کبی وقایع غریبهٔ ملکوتیه ایشته او مقام عالیده واقع
اولدی . وهیسی ده امتی حقنده اولق وهر برینه جواب
المق اوزره ربیله اره لرنده بلا حرف ولا صوت اون
ایکی بیک کلمه دخی جریان ایتدی .

حتی :

« رأیت ربی باحسن صورة » [۱]

ایشته او مقام عالیده کی مشهوداتی حکایه جله سندندر .

*

مقام عالی « قاب قوسین » ده وقایع عجیبه
ملکونیه دن حکایه حضرت صاحب المعراج افندیمر
بیوردیلرکه :

« ربم بکادیدی که : یا محمد ! ملاً اعلاهانکی مسئله ده

مناظره واختصام ایدر ؟

بن دیدم :

— « سن بیلیرسک »

بو سوزم اوزرینه تجلی خاص الهی ظهور ایدرک او
تجلی فیض بخشادن بکا علوم اولین و آخرین منکشف
اولدی .

بعده رب العزة بکا خطاباً بیوردی که :

— « یا محمد ! سن بیلیرمیسک که ملاً اعلی هانکی

مسئله ده مباحثه و مناظره ايدر ؟

جواب ويردم :

— « كفارات ، منجيات ، درجات ، مهلكات

مسئله لريله ! . »

رجم بکا :

— « طوغری سويله دك »

ديد كدن صوكره :

— « اى ملكار ! سز شمدي حلال مشكلاتي بولديكز

هر درلو اشكالكزي صوريكز ! »

ديجه اسرافيل عليه السلام بکا :

— « كفارات ندر ؟ »

سؤالي ايراد ايتدى .

بنده :

— « اسباغ الوضوء في المكاره . والمشي بالاقدام

الى الجماعة . وانتظار الصلاة بعد الصلاة »

ديه جواب ويردم .

ميكائيل عليه السلام ده « درجات » ي صوره رق :

— « اطعام الطعام ، وافشاء السلام والصلاة بالليل

والناس نيام »

جوابي الدي .

جبرائیل علیه السلام ده « منجیات » حقننده کی
سؤالنه :

— « خشية الله في السر والعلانية والقصد في الفقر
والغنى والعدل في الغضب والرضى »
جوابی الدقن صوکره « مهلكات » لک نه اولدیغی
صورن عزرائیل علیه السلامه بدخی :
— « شح مطاع وهوى متبع واعجاب المرء بنفسه »
جوابی ویرلدى .

او مقام عالی قاب قوسینده امت ایچون یکرمی
درت ساعتده الی وقت اوله رق نماز فرض قیلنمشدی .

« ثم دنى فتدلى » قول شریفنک معنای منیفی
تاویل ایدن علمای عارفینک تاویلات صحیحه سنه کوره
اول روح جسم کائنات علیه افضل الصلوة واکمل
التحیات افندیمز حضرتلری ، مقام قاب قوسینده وقتاکه
ربنی مکاندن منزله اولدیغی حالده یمیننده ، یسارنده ،
امامنده ، خلفنده ، تحتنده ، فوقنده یعنی هر جوانب
وجهاست سته سنده بلا کیف ولا کیفیه مشاهده ایتدی .
بویله تجلیکاه رب العالمین اولان بر مقام شریفدن انصرف

ایتماسی حقنده واقع اولان ارزوی جناب رسالتینا هیدن
 بالطبع خبیر اولان رب الملك والملکوت حضرتلری ،
 حبیب اکرمنه بیوردی که :

— « یا محمد ! سن بنم رسولسک . اکر بو مقامده
 علی الدوام قالسهک رسالتکی ایفا ایتمش اوله میه جقسک .
 ارتق ارضه طوغری نزول و عبادیمده رسالتی تبلیغ
 ایت ! بن سکا بو مقامی ذاتاً ویرمشم »

بو امری متعاقب ذات احدی ایله ربی ارسنده
 تاردن بر حجاب کشیف حائل اولمش و بعده رسول
 مکرم صلی الله علیه وسلم افندیمز دخی حاضر کلان رفرف
 اخضره بینوب عودت بیورمشدر .

*

**

جناب رسول کبریا ، حین عودتلرنده موسی علیه
 السلامه سماء سابعده ملاقی اولمشدی . انک اشارتی
 اوزرینه افندیمز ، تا قاب قوسین او اونی مقام عالیسنه
 دکین بالدفعات رجعت ایتدی . الی وقت صلات مفروضه .
 یی رب رحیمه اوزر ، اوزر و بر دفعهده بش عدد
 تنزیل بیوریلوب یالکز بش قالنجیه دکین عفو و تخفیف
 ایتدیردی .

*

**

ملاقات و مناجاتدن صوکره بر اراق جبریل علیه -
السلامک دلالتی ایله جنته کیده رک درجات جنانی
و درکات نیرانی مشاهده بیوردیلر .

بونلردن ده صوکره عالم شهوده طوغری قدم جنبان
نزول اولدی .

ذات عالیء احدى حدیث معراجی الك اول « ام
هانی » ه سویله مشدی .

حتی اکا :

— « چیقوب قریشهده سویله یه حکم »

دیدیکی زمان ام هانی :

— « ای عم زادهم ! رجا ایدرم که سویله مه ؟

زیرا اینانمزلرده سکا اولجه اینامش اولانلرده تکذیبه
قالقشیرلر »

دیه مقابله ایتمش اویله ایکن ده ذات پیغمبری صباحلین
همان چیقوب راست کتیردیکی « مطعم بن عدی » ابو
جهل بن هشام ، ولید بن المغیره « نام قریشیلره اخبار
ایتشد .

لکن کرک انلرک و کرک سائر مشرکینک بر صورت

منکرانده الارینی باشلرینه ، جبهه لرینه قویه رق :

— « بزسیر سربع ایله قوشوب کتیدیکمز حالده

همان انجق ايكي ايدە وارە بىلدىكمز قدسە سن بر كچه دە
كىدوب ككشمك ها ! لات وعزى حقيچون يمين ايدر زكه
يالان سويليورسك »

ديمه لر ينك تاثيريله بعض اهل اسلام ارتداد ايدەرك جناب
ابى بكرە كيتديلر .

مرتدين ، اكا وقعە يى منكرانه بر ادا ايله اكلاندقلىرى

حالده او :

— « اكر ديدىككز سوزى سويلەمش ايسە
البته طوغرىدر . زيرا او بزه بر خبر ويريوركه او خبر
يدى قات كوكدن اكا آن واحددە كلير . بو ، اندن
غريب دكلدر »

جواب تصديقى ويرمشدر .

بر روايتده حضرت پيغمبر بوبله بر ادماده بولنديغى
زمان مشركين قريش ، مسجد اقصائك قابولرينى وسائر
بعض اوصافنى صور مشلردى كه بو سؤال ، حديث
معراجك جناب ابى بكرە منعكس وبالع اولسندن مقدم
ايدى .

مشركينك اشبو سؤالنه قارشى رسول ذیشان
افنديمك زياده سيله مضطرب ومتحير اوله قالدقلىرى
حالده مبارك ديدە پر نور بصيرتلىرىدن حجاب قالديريله .

رق مسجد اقصای تمامیلہ مشاہدہ بیورمش وانلر مدہ
مشهوداتی اولدیغی کبی جواب ویر مشدر .

* *

دیگر روایتہ کوره حضرت ابی بکر رضی الله عنه
افندیز ، مرتدین ایله اولان محاوره یی بیتیردکن
صوکره همان رسول اکرم افندیزک حضور عالیلرینه
کله رک :

— « یا رسول الله ! بونلر دیدیلرکه حضرت محمد
بوکیجه مکهدن بیت المقدسه دکین کیتمش ده ینه کلمش ! »
دیرایکن اوصاحب المعراج افندیز دخی :
— « نعم یا ابا بکر ! »
دیه جواب ویردی .

بعده ابو بکر رضی الله عنه حضرتلری :
— « اویله ایسه بیت المقدسک اوصافنی سویله !
زیرا بن اولجه کورددم . بیلیرم »
دیدکده حضرت پیغمبر دخی اندن صوکره کوزلرندن
حجاب قالدیریلهرق بیت المقدسی کورمش اولدیغندن
اولدیغی وکوردیکی کبی وصف بیورمش ابو بکرده
[صدقت انک رسول الله] دیه هرکسندن اول حدیث
معراجی تصدیق ایله مشدر .

صحابیء مشار الیهک «صديق» لقبيله ملقب اولميرينک
سببی ده ايشته بوتصديق اولمشدر .

* *

۱۷

— عقبات بيعتلى —

عقبه اولی — حضرت سيد کائنات عليه افضل
الصلوة افنديز ، نبوت اجديه لرینک اونبرنجی یاخود
اون ايکنجی سنه سی موسم حجنده مکه خارجنه چيقوب
« عقبه » نام محله مدينه اهالیسندن بر جاعته تصادف
ایتمشدر .

مکراو جاعت ده مدينه ده « خزر ج » قبيله سندن ايدي .
خزر جيلرله هاشمیلر اره سنده ايسه ذاتاً قرابت صهریه
موجود ايدي . مثلاً کرک عبد المطلب والدہ سی « سلمه
بنت لبید الخزر جی » نک و کرک والدہ ماجده جناب
رسالتپناهی « آمنه بنت وهب » ک عشیرتی اولان بنی
نجار قبيله سی ، خزر جيلر اره سنده مهم ويوک بر شعبه ،
برعشیر تدیر .

ذات عالی رسالتپناهی اوجاعته :

— « سز کیملر سکز ؟ »

دیه سوروب انلردن :

— « مدینه ده خزر ج قبیله سندنز »

جوانی النجه :

— « اویله ایسه اوطور سه کزده براز قونوشه ق

اولزمی ؟ »

دیه واقع اولان تکلیف جناب احمدییه قارشى :

— « پک اعلا اوطورملم »

اجابتی کوسترمش اولان جاعت همان امر رسول الله

امثالاً اوطور مشلردر .

بعده جناب ذات رسالتپناهی اولاً براز قرآن کریم

تلاوت بیوروب دیکلکدکن صوکره بونلری دین مبین

اسلامه دعوت بیوردی .

* *

آل غالبندن بر پیغمبرك كله جكنی بعض اختیار کیمسه .

لرندن و شرفظهورینك ده پک قریب اولدیغنی و حتی

ظهورنده ده دینی قبول برله اوس و خزر ج قبائلندن

کور دکلی اذیتلرك انتقامنی انك سایه سطوتنده اله جقلرینی

کهنه یهوددن اولجه دفعاتله ایستمش اولان جاعت مر قومه .

اود دعوت نبویه اوزرینه یکدیگری ارسنده از بر مذاکره
دن صوکره :

— « یهودیلرک خبر ویردکاری پیغمبر ذیشان ایشته
بو ذات شریفدر »

دیه رسالنده یقین حاصل ایله دکارینی متعاقب حضور
پر نور نبویه کلمه طیبه شهادتی کتیردیلر .

ایشته مدینه اهالیسندن بوضورتله دین مبین اسلامی
قبول شرفی ایله تشرف ایدن سابقین انصار کرام :
[ابو امام اسعد بن زراره ، رافع بن مالک العجلانی ،
عوف بن حارث بن رفاعه ، قطبه بن عامر بن حدیده ،
عقبه بن عامر بن نابی ، جابر بن عبد الله بن رباب]
نامنده التی ذاتدر . رضی الله تعالی عنهم !

بونلر موسم حجدن صوکره مدینهیه عودت ایدهرک
انتشار دین مبین اسلامه غیرت عظیمه کوسرتدیلر .
غیرتلری سایه سنده ده دین اسلام خزر جیلر ارسنده
منتشر اولدقدن یاشقه « اوس » قبیله سنه دخی سرایت
ایتمکه باشلامشدر .

* *

عقبه ثانیه — بو وقعتک ایرته سی سنه سی یعنی

تاریخ نبوت احدیه نك اون ایکنجی سالی موسم حجنده جناب « اسعد بن زراره » رضی الله عنه حضرتلری ، رفقاسی بولنان « رافع ، عوف ، قطبه ، عقبه ، حارث » حضراتی و خزر جیلردن « معاذ بن حارث بن رفاعه ، ذکوان بن عبد قیس بن خلمده الزرقی ، عباده بن الصامت بن عبد قیس بن اصرم ، ابو عبد الله یزید بن ثعلبة البلوی ، عباس بن فضله » نام ذواتی و اوسیلر- دنده « ابو الهیثم بن تیهان الاشہلی ، عویم بن ساعده » اسمنده ایکی ذاتی مستحکماً مکہ یه کله رک منی عقبه سندره رسول ذیشان افندیملزه کوریشوب عقد بیعت ایله مشلر در . رضی الله عنهم !

بو بیعتده شرک و زناء ، سرقت و افتراء ، قتل نفس بغیر حق کبی منہیاتدن اجتناب ایتملری و خشیت املاقدن طولایده قتل اولاده جرأت ایتملری خصوصی کبی بعض مهمات دینیہ ، طرف اشرف رسالنپناهییدن امر و تبلیغ بیورلمش و او وسائر شرطلره انلرک بیعتنی المشر .

زیرا زمان جاهلیتده ارکک اولان اولاد ایله افتخار قیز اولادی ایله ناسه قارشی عار ایدن عربلر ، یکی طوغان قیز چوجقلرینی قتل و یاخود دیری ایکن طوپراغه

دفن وافنا ايدرلردى . وبوعادت ، اجراسى بين العرب
 طبيعت حكمنه كيرمش قديم برعادت ايدى .
 اشبو عقبه ثابته ، جناعت اوسيه وخزر جيده سى ده
 قبول واجراى بيعت ايله دكدن صوكره مدينه دونوب
 كيدرك نشر دين اسلامه جهد ايتكه باشلاديلر . حتى
 جهد وغيرتلى تأثيريله دين اسلامك مدينه ده واقع
 اولان وسعت وانتشارينه بناء ذات على رسالتپنا .
 هينك ده مدينه ده بولملى مدينه اهالى اسلاميه سى طرفندن
 استرحام ايدلمشدر .

رسول اكرم افنديمى حضرتلى ، بو خصوصى
 استشاره ضمننده عمى وقيله هاشميه نك رئيس نامدارى
 عباس بن عبدالمطلبه سويلدى . عباس بعدالملاحظه :

— « بك ابي اما مدينه ده اون ايكي بك بلكه دها
 زياده نفوس وار . اونجه نفوسه قارشى اميد ايتمكه
 اون ايكي كشى ايله ايش كوريله بيلسون ! او حالده
 سنك اورايه عزيمتلك تأخيرى لازم كليز . لكن افكار
 عموميه نك دين واهل اسلامه قارشى نه مركزه بولنه .
 جغى اكلاشلق ايچون طرفكزدن بر خليفه كوندرلسون !
 حقنده اهالى مدينه نك واقع اوله جق معامله سنه باقم .
 عزيمتكز محذوردن سالم اوله جقميدر ؟ »

دیه جواب ویرمش اولدیغندن رسول ذیشان افندیغز
 اصحاب کرامندن «مصعب بن عمیر بن عبدالدار»
 رضی الله عنہ، یثرب اہالی اسلامیه سنہ قرآن کریمی
 وبعض آداب وارکان اسلامیه بی تعلیم ایتک اوزرہ
 مدینہ مأموراً اعزام بیوردی .
 جناب مصعب رضی الله عنہک مدینہ و وصولی زمانلرنده
 اورانہ اهل اسلامک عددی قرق ذاتہ بالغ اولمشدی .

*
..

اهالی اسلامیه نک رئیس جناب «اسعد»
 و معلمری «مصعب» رضی الله عنہما ایله برابر بتون
 افراد مسلمین جمعہ کونلری خارج مدینہده بر محلدہ
 چاعت ایله نماز قیلغہ باشلادقلری حالده نشر و تعمیم
 دین اسلام یولنده ینہ بعض موانعه تصادف ایتکده
 ایدیلر .

مثلا رئیس المسلمین اولان جناب اسعد رضی الله
 عنہ افندیغزک تیزه زاده سی و اوس قبیلہ سندن بی
 عبدالاشهل عشیرتک رئیس «سعد بن معاذ» ایله
 ینہ رؤسادن عزاده سی «اسید بن حضیر» نام ایکی کیمسه
 هنوز ایمانه کلامش اولدقلرندن طولایی بونلرک دائرہ

ریاستنده بولنان افراد ، قبول دین اسلامی کندیلر یچون
 یك بیوک تهلیکه لی کوریورلردی .

* *

۱۸

— اسلام اسید بن حضیر —

برکون جناب « مصعب » رضی الله عنه ایله « اسعد
 ابوزراره » حضرتلری بنی سهل محله سنده و بنی ظفر -
 خانه لرندن برنده مصاحبت ایدرلرکن رؤسای عربدن
 « اسید بن حضیر » ، النده حربیه سی بولندیغی حالده
 او ایکی صحابی عالینک یانته کمال حدتله کیدوب باغیره
 باغیره :

— « غرضکز ندر ؟ برطاقم ضعفای الدادوب
 بولدن صایدیور ، از دیره یورسکز ! »
 دیمشدی . مصعب رضی الله عنه ، اوزمان اکا صورت ملایمانه
 و ناز کانه ده :

— « هله براز او طور ! سوزیمزی دیکله ! مقصدیمزی

اکله . »

جوابيله مقابلہ ایدنجہ کندی معاملہء حدیدانہ نارواسیلہ
جناب مصعب طرفندن کوستریلان مقابلہء لینہ ارہ سندہ -
کفر ایلہ ایماندہ کی فرق و تفاوتک عیننی اکدیرن -
تضاد غریبہ قارشی ، تجاوزندن طولایی محجوب قالمش
اولان اسید ، اوطور مغہ مجبور اولدی .

حضرت مصعب رضی اللہ عنہ افندی زاکا بر مقدار قرآن
کریم تلاوت بیوروب ایشتیردی کندن بلاغت قرآنیہ نک
تأثیرات روحانیہ سیلہ متحسس و متأثر اولان اسید ، تکریر
تلاوتی ارزو برلہ قبول دین اسلامہ اولان میل ناکہائیسنی
اظہار اینمکله ، جناب مصعب دہ تلاوتی بردہاتکرار و اعادہ
ایدہ رک اسیدی اشواق اسلامیه واذواق قرآنیہ یه
مغروق بیورمشدر .

اسید مزایای قرآنیہ قارشی حاصل ایلہ دیکی تأثر
وتحیرینی ارتق میدانہ قویہ رق :

— « نه کوزل شی ! لکن بودینه کیرمک ایچون

نه یاییلم »

دیدی . حضرت مصعب اکا اوآندہ تلقین دین ایتمش
او دخی شرف اسلام ایلہ همان مشرف اولمشدر .
رضی اللہ عنہ !

— اسلام سعد بن معاذ —

حضرت اسید بن حضیر رضی الله عنه افندیز ،
اولوجهله شرف اسلامی احرارز ایدنبجه جناب مصعب
رضی الله عنه حضرتلرینه خطاباً :

— « کیدهیم . بورایه سعد بن معاذی کوندیرهیم
اگر اوده ایمان ایدرسه ارتق مملکتده ایمان ایتدک
کیمسه قالماز »
دیهرك قالقوب کیتشدرد .

سعد بن معاذ کلدیکی زمان جناب اسیدک او اسکی
کلیشنی تنظیر ایدرجه سنه غایت حدتلی بر حالده ایدی .
دیدیکه :

— « یا اسعد ! اگر ارامزده قرابت موجود
اولسیدی قبيله منک ایچنه کتیر دیککز بویله چیرکین ایشلره
هیچ تحمل ایدمه زدم »

جناب مصعب رضی الله عنه اکاده :
— « هله براز اوطوروب بزى دیکله ، اکلاده

بعده بکنیرسهك قبول ایت ! والا بزده سكا چرکین کلان
ایشی طبیعی تکلیف ایتیز !
دیه جواب ویردی .

بر وقت حضرت اسیدی بیله تأثیر روحنوازانه -
نی البته الهرق مخالفته درمانسز براقش اولان حسیات
نورانیه بونی دخی همان متأثر ایدهرک زمین امتثاله
طوغری اوطورتدی .

مصعب رضی الله عنه افندیز سعدده [الم
نشرح لك] سورة شریفه سنی تلاوت بیوروب دیکله
دینجه ارتق او تلاوته قارش یوزنده حب ومیل
اسلام وعلاماتی کورونمکه باشلامش اولان سعد ، میلی
کیزلیه میدهرک :

— « سز بو دینه کیررکن نه یاپارسکز ؟ »

دیدیکندن مصعب حضرتلاری جوابده یالکز تلقین دین
ایتمش سعد دخی همان شرف اسلام ایله تشرف ایتمشدر .
رضی الله عنه !

❖❖

جناب سعد رضی الله عنه ، شرف اسلامی بعدالاحراز
عودت ایله دکدن صوکره کندی قومی اولان بنی عبدالاشهل
عشیرتی طویلایه رق انلره خطاباً :

— « ای جماعت ! بنی ناصل بیلیرسکز ؟ »

دیوب قبیلہ سی طرفندن ده :

— « سن بزم فاضل وافضل رئیسمرسک »

جوانبی الدقن صوکره :

— « اویله ایسه بن الله ورسولنه ایمان ایتدم .

سزده ایتلیسکز . والا فیما بعد هیچ بریکزله کوروشه مم »

دیمسیله بنی عبدالاشهل عشیرتی ایچندن دین مبین اسلامی

قبول ایتدک « عمرو بن ثابت بن وقش » دن باشقه کیسه

قالماشدر .

« اصرم » نامیله معروف اولان مرقوم عموک

قبول اسلامی یوم احده دکین تأخر ایتشدی ! احده

قبول اسلامیله برابر همان حربہ کیریشوب شهید

اولمشدر . دیرلرکه : آلنی بر دفعه بیله سجده محلی

کورمدیکی حالدہ احراز رتبہ شهادت ایدن ، بوذاندر !

رضی الله تعالی عنه .

جناب سعد رضی الله عنه حضرتلری دین مبین

اسلامی اولوجهله قبول ایتدکن صوکره مصعب

حضرتلرینه ، دعوت ناسده ظهیر اوله رق جناب اسعد

ابو زرارہ رضی الله عنه حضرتلرینک خانه لرنده افراد

قبائلی دین مبین اسلامه دعوت ایتدیلر .

حتی اولقدرده نشر وتعمیمه موفق اولدیله
اوس وخزرج قبیله لری ایچنده پرتو مهر منیر اسلام ایله
منور و مستنیر اولدق یالکیز بر « امیه بن زید » ک خانه سی
قالمشدی .

*
* *

عقبه ثالثه — تاریخ نبوت محمدیه نک « ۱۳ » نجی
موسم حجنده لاجل الحج مکه یه عودتی لازم کلان حضرت
مصعب رضی الله عنک یانده — شرف صاحب علیه جناب
رسالت پناهی یه مظهریت و ممکن اولدیغی تقدیرده جناب
رسول اکرمی البوب مدینه یه کتیر مک خصوصنی
مذاکره ارزوی عالیسی ایله -- بری بنی نجاردن « نسییه
بنت کعب » دیکری بنی سلمه دن « اسماء بنت عدی »
نامنده ایکسی قادین اولق اوزره یتیش بش نفر اهل
اسلام دخی برابر ایدی که بونلرک ایچنده خزرج قبیله -
سنک مهم بر شعبه سی بولنان بنی نجاردن مهماندار جناب
احدی « ابو ایوب الانصاری » کنیه سیله مکفی حضرت
خالد رضی الله عنده موجود ایدی .

مکه یه وصول لرنده بونلرک جله سی یشنه عقبه ده
ینه او فخر کائنات علیه افضل الصلوة افندیمن حضرت تلریله

بولشديلو. و الك اول مدينه هجرت سنيهك امكانى
 خصوصنى موقع مذاكره قويديلر .
 ايشته بو مذاكره نتيجه سنده بعض شرائط
 تحتنده اوله رق موافقت عليه پيغمبريه يي استحصال ده
 ايده بيلديلو .

رسول محترم افنديز او جاعته براز قرآن كريم
 تلاوت بيوردقن صوكره « كندى نفسلرينى ، اولاد
 و عيالارنى ناصل كه اغيارك تجاوز و تسلطندن صاقينير .
 لرسه ذات احدي يي ده ايشته او قدر صاقتمقده هر زمان
 ثبات و دوام ايده جكارينى قوياً تعهد ايتلري شرطيله »
 اولردن اولايهت ايسته مشدى .

*

* *

بو هيئت اسلاميهك واقع اوله جق تكليف هجرت
 قارشى ايتلري لازم كلان بيعت و هر درلو تعهداتى
 معاملاتده بولنق اوزره دعوت مخصوصه نبويه ايله
 عقبه يه كلش اولان عم نبوى عباس بن عبدالمطلب ،
 جاعته خطاباً :

— « يا قوم ! بن هنوز بونك ديننده دكاسه مده
 بو ، بنم برادر زاده مدر . حفظ و حايه سنده دقت
 و اهتمام طبيعى . مكده بدن باشته خصم و اقرباسى

چوق • مدینه ده ایسه هیچ کیسه سی یوقدر • بوراده
 هر درلو معیشتی مکمل • واقرباسی عندنده حاز اولدیغی
 عزتی ده معلوم و مسلم • بوکون مثلاً مدینه یه وارده جق
 ایقای مأموریت و انفاذ امر حق ایچون یارین برکون
 طبعی محاربه اجراسنه مجبور اوله جقدر • ایشته او
 زمانلرده سز بوندن شاید که ال چکه جک • اعراض
 ایده جک ایسه کز باری شمیدین ایدیکز ! که مدینه ده او
 وقت کندی باشنه قالمش اوله جغنه مکده بوکون
 قوم و قبیله سی ایچنده قالوب راحتنی و عزتی غیب
 ایتسون ! »

دیدی • جماعت بوسوز اوزرینه براز دوشوندی و ملا-
 حظله لرندن صوکره « براء بن معرور » دست شریفه
 رسالت پناهی یه طوته رق :

— « والذی بعثک بالحق نبیاً لمننک مما تمنع ازرتنا
 فبايعنا یا رسول الله ففحن اهل الحرب واهل الحلقة
 ورشاهما کابراً عن کابر »

دیرکن « ابو الهیثم بن التیهان » طرفندن جناب پیغمبره
 خطاباً :

— « یا رسول الله ! ان بیننا و بین الناس حبلاً وانه

قاطعوها فهل عسيت ان فعلنا ذلك ثم اظهرك الله ان
ترجع الى قومك وتدعنا »

سؤالی ایراد ایدملکه اکا حضرت رسول ذیشان
افندیز :

— « بل الدم الدم والهدم الهدم انتم مني وانا منكم .
احارب من حاربتم واسالم من سالمتم »
ديه جواب وروب :

— « اخرجوا الى منكم اثني عشر نقيبا كفلاء على
قومهم بما فهم ككفالة الخواريين بعيسى بن مريم »
علاوه سنی ده درمیان بیوردیغندن قوم دخی طقوزی
خزر جدن اوچی اوسدن اولق اوزره اون ایکی کفیل
ارائه وتعیین ایتشلردر . بومعامله ختام بولدقن صوکره
« عباس بن عبادہ بن نضله » عباس بن عبد المطلبک
اشبو جماعته اولان بعض خطاب واستمزاجنی تکرار
ایدوب جواب قبول و موافقت الدیغنک عقیننده ایدی .
جماعت دیدی که :


— « یا رسول الله ! بزسنک اوغورنده فدای جان
ومال ایله دیکمز حالده بزه نه مکافات، نه اجر واردرا ؟ »
حضرت پیغمبر افندیز :

— « جنت ! »

ديه جواب ويردى . بعده جماعت اسلاميه ارتق اكا
مقابل :

— « اليكى وير اويله ايسه ا »

ديمش حضرت رسول كبريا دخی مبارك اللربنى اوزا .
دهرق همان عمو منك بيعت وتبعيت اسلاميه سنى المشدر .
بعد البيعه اهل مدينه دونوب مدينه كيتدى .



فصل رابع

(برنجی سنہ ہجریہ وقایعی)

مقدمات ہجرت . وقعۃ غار و تحریات کفار . تعقیبات
کفار و بعض خوارق احمدیہ . سراقہ نک تعرضی . قبایہ
مواصلت ہمایون و بناء مسجد شریف قبا . منزل ومہماندار
نبوی . عبد اللہ بن سلامک اسلامی . بناء مسجد شریف
نبوی . امر جہاد . مواخات اصحاب . اراجیف یہودیہ .
مشروعیت اذان محمدی

مقدمات ہجرت

عقبہ ثالثہ مدینہ اہالی اسلامیہ سی طرفندن
ایدیلان بیعت وتعهد اوزرینہ اورایہ ہجرت سنہ ذاتا
خیانخانہ جناب احمدیہ تصور وتصمم بیورلمش اولدیغندن
ایدی کہ ہجرت ایچون اصحاب کرامہ طرف ذیشرف
پیغمبریدن مأذونیت ویرلدیکندن اصحاب کرام دخی
وطن ومسکنلرینی ترک ایدہرک مدینہ یہ صاوشوب برر
برر ہجرت وعزیمتہ شهر محرم الحرامدہ باشلامشدر .

روایتہ کورہ اصحابدن الك اول هجرت ایدن ،
 « ابوسلمہ بن عبد الاسد » رضی اللہ عنہ حضرت تلمی
 ایدی . مشارالیه اولجہ یعنی بدایت بعثت ونبوت جناب
 پیغمبری اثنالرنده مشرکین قریشک حقوق وحریت
 اسلامیه بی بسبتون ایاق التنه الوبده هردرلو اذیات و
 مظالمی اهل اسلام حقنדה روا کوردکری زمانلرده اواذیات
 کفارہ قارشی برطریق فوزونجات اولور امیدیلہ ارض حبشه
 هجرت ایتشکن بالاخرہ شرف مصاحبت احديه
 مظهریت املیلہ عودت ایدہ رک مشرکینک تعديات غدا
 رانه سنه بالضروره تحمل ایدہ قالمش اولدیغندن مهاجرت
 حقنדה کی رخصت و مأذونیتی پک بیوک برسونج ایلہ قبول
 ایلہ مش بناءً علیه باب هجرتی ده هرکسدن اول اچمغه
 مسایرعت ایتشد .

بو ذاتک هجرتی متعاقب زوجہ سی « لیلی » ایلہ
 برابر « عامر بن ربیعہ ، عبدالله بن جحش ، عمرو بن ام
 مکتوم ، عمار بن یاسر ، عبدالله بن مسعود ، بلال بن
 رباح الحبشی » رضی اللہ عنہم حضراتی مدینہ یه طوغری
 روبراء هجرت اولدیله .

ذوات مشارالیهمی « عمر بن الخطاب » ایله برادرى
« زید وعباس بن ربیعہ » رضی اللہ تعالیٰ عنہم حضراتى
یکرمی نفرى حاوی بر بیوک قافلہ اسلامیه اولدیغى
حالدہ تعقیب ایتدیلر .

بعده داماد جناب رسالتیناهی « عثمان بن عفان »
رضی اللہ تعالیٰ عنہ حضرت تلرینک شرف مهاجرت علیه -
لری وقوعبولدی .

بو صورتله هجرت ایدن مهاجرین اسلامیه ایسه ،
مدینه افراد اسلامیه سی طرفندن مظهر حسن قبول
اوله رق مدینه نك « عوالی » نام قریه لرندہ اسكان وتوطن
ایدیلیر ایدی .

*

**

اصحاب کرامک کافه سی ده هجرت ایتش مکده
یا لکز ذات سامی احدى ویاننده « ابو بکر الصديق »
ایله « علی بن ابی طالب » رضی اللہ تعالیٰ عنہما حضرت تلری
قالمشدى .

حضرت پیغمبر افندیمز دخی هجرت ایتک نیتندہ
ولندقلری خالدہ انجق هجرت اجدیه لری حقندہ
شرفصادر اوله جق اذن وفرمان الهییه منتظر
ولنیورلردی .

حتی ارزوی هجرتلرینه تبعیت ایدیورمک فکر
عالیسی ایله اره صره رسول اکرمدن رخصت هجرت
ومفارقتی ایستیان جناب ابی بکر الصدیق رضی الله تعالی
عنه حضرتلری ، اوصاحب الیثرب والبطحادن :
— صبر ایت ! مأمولدرکه جناب حق سکا اوبابده

بر رفیق احسان بیوره ! «
جواب حکمتآب عالیسنی آلیرلردی .

*
* *

۲

— وقعه غار —

و

(تحریات کفار)

مشاوره — صنادید قریش کوردی که مدینه ده
خزرج ، اوس قبیله سی افراد عشایری عموماً ایمانه کلمش
واهل اسلامک اکثری ، هاشمیلرکده اعظمی مدینه یه
طوغری هجرت برله همان برایکی آی ظرفنده مدینه ده
بیوک بر قوه اسلامیه تشکیل ایدلمکده بولنش ! ..

حالبوکه قریشک حوالی شامیه قوافل تجاریه سنک
 یک مهم بر کذر کاهی مدینه اولدیغندن مدینه
 منوره یی مرکز اداره اتخاذ ایدن هیئت محترمه
 اسلامیه نیک او صورته اوراده تشکل و تجمعی ،
 مشرکینک اشیای تجاریه سی ایچون بیوک بر تهلکه ، بر
 تهدید دیمک اولدیغندن ایشته بو نقطه یی ، بو مهم
 نکته یی ملاحظه ایتمش اولدقلرینه مبنی هجرت اسلام
 میده دن طولایی مشرکین قریش ارمه سنده اهمیتلی بر تلاش
 بر خلجان حصوله کلمشدر .

بناءً علیه ایشه بر چاره عاجل تصور اولتق
 اوزره [عتبه، شیبه، ابوالختری، عاص بن وائل السهمی]
 نام رؤسا، ابوجهلک ریاستی التنده «دارالندوه» ده
 [۱] طویلاندیلر .

(۱) دارالندوه، «قضی بن حکم» ک خانه سیدر .
 مرقوم عمود نسب نبویه واقع اولمش وزماننده سدان
 کعبه معظمه یی بنی خزاعه دن بر تقریب خدعه کارانه ایله اخذ
 واسترداد ایله دکن فضله «بنی فهر» قبیله سی عشائری ده
 قطعات حجازیه نیک اودیه و جالندن الوب حول حرم شریف
 کعبه یه نقل و جمع ایتمش بر داهی حصافتشعار ایدی .
 انک زمان حیات و ریاستنده هر درلو امور سیاسیه مذا
 کراتیچون دارالندوه قبائلجه بر دارشوری اتخاذ ایدلمش

وايشی تشکیل ایله دکری او انجمن مشورتده زمین
مذاکره و مشاوره وضع ایتدیلر .

ایشته او انجمن مشورتده ، ابلیس علیه‌العهنه دخی
پیر ساخورده بر حریف صورتده موجود ایدی !

رؤسای مرقومه ، دارالندوده اجتماع ایدرکن
ابلیس لعین دخی عصادر دست تلویث و تلبیس اولدیغی
حالد کلوب انلره قاریشمق ایسته‌دی . ابو جهل اکا
خطاباً :

— « بز ، کیزلی برایش مذاکره سیچون طویلاندق .

سن چیق ! »

دیدیکی خالد لعین :

— « بن ارض نجددن کلمش بر اختیار کیمسیم .

چوق ایشلر کوردم . تجربه‌م آز دکدر . ایشلردن
اکلارم . بنی بو مذاکره شریک اتخاذا ایدیکز .
بلکه ایشه یارارم »

تمنیات ابلیسانه‌سنده بولمغله ارتق رده محل

قالیه‌رق امر مشورتده شریک اتخاذا ایدلمشدر .

بولندیغندن اندن صوکره‌سنده بین‌العرب و علی‌الخصوص
بطحا عربلرنده سرنمای ظهور وحدوت اوله‌جق مهام امور
مذاکراتی ارتق اوخانه‌ده اجرا ایدلمکه باشلامشدر .

جمعیتدن هر بر فرد . کندی مطالعه سنی بیانده بالطبع
 سربست براغلاش ایدی . هر کس - مثلاً کیمی مکهدن
 طیشاریه طرد و تغریب ، دیگر بر قسمی ده حبس
 و تعذیب ایدلمسی طرفنی تنسیب و التزام کبی - مطالعه
 مخصوصه سنی بیان ایتدی . ابلیس لعین ایسه ،
 بونلرک هر درلو بیاناتی کندی مطالعه سیله جرح و ابطال
 الیه مشدر !

لکن افراد هیئتک هدف مقصده فکرأ صورت
 اصابت و یا مرتبه تقریرلرینی کوزه درک کندی بیان
 مطالعه ده اک صوکرهیه براقش اولان ابو جهل لعین ،
 کال حدتله :

— « اولدیر مکدن باشقه معقول بر چاره یوقدر .
 اما هر قبیله دن برر آدم انتخاب ایدلمی . و فعل قتلده جله سی
 یکدست اتحاد و اجتناسار اوله رق برابر بولنلی . تاکه
 قاتلی معین اولق صورتیله ایچمزده یالکز بر قبیله متهم
 قالمیه . ایشته اول حالد هاشمیلرده دیته راضی اولغنه
 مجبور قالیرلر . قان دعواسی ده قبائل ایچنده محو اولور
 کیدر »

دیمش و بو رأی همان هر کسک رأیی اوزرینه ترجیح ده
 ایدلمش ایدی . بناء علیه مشرکین قریشک ایچندن و هر

قبيله دن ايكيشر آدم اوله رق برهيئت جتاييه انتخاب
وترتيب ايتديلر .

تشيث — وقتا كه اقشام اولدى [ابو جهل ، حكم
بن عاص ، ابو لهب ، اميه بن خلف ، ابى بن خلف]
كبي اشداء رؤساى حاوى اولان او هيئت جنايه ،
جوار سعادتقرار احدى بي اطرافندن قوشادوب ذات
رسالتپناهينك اويوملرينه منتظر طورديلر !

حالبو كه مشركينك افكاريني ومذاكرات واقعه سنى
حضرت جبريل امين ، « واذ يمكر بك الذين كفروا
..... » آيت كريمه سنى كتيره رك افنديمه
بيلديرمش وكيجه سعادتخانه نبويلرنده قالبوده جامه .
خواب همايونلرنده ياتماملريني وهمان جناب ابى بكر
الصديق رضى الله عنه حضرتلريله برابر مدينه يه
هجرت ايتلري امر الهيسنى ده تبليغ ايتمشدى .

رسول اكرم صلى الله عليه وسلم افنديمى درحال
على كرم الله وجهه حضرتلريني چاغيره رق نزد
همايونلرنده بولنان بعض اماناتى اكا ويردكدن صوكره :
— « يا على ! بن مدينه يه كيديورم . بو امانتلري

اوج كونه دكين فلان وفلان اصحابه تسليم ايت ! بعده
سنده طورمه دن كل ! لكن سن شمدي بنم ياتاغه يات !
تا كه قابوده بکله يان مشرکين، بنی ياتيورطن ايتسونلر !
بيورديلر .

حضرت على افنديم زده امر رسالتپناهيه امثالاً
مبارك جامه خواب احدى يه ياتوب رسول اكرمك
يشيل خرقة شريفه لريني ده اوزرينه اورتي .

بعده حضرت حبيب خدا يردن برآوج طوپراق
الدى و «يس» سورة شريفه سنى اولندن «... فهم
لا يبصرون» عبارة شريفه سنه دكين تالوت بيوردقن
صوكره سعادتخانه رسالتپناهيلرينك هر طرفنه عطف
نكاه دقت ايده طوران مشرکين ملعونين طرفنه طوپراغى
اتدى كه ايشته اودرلو معجزه احدى نك تاثير غريبيله
كوركي اوله قالان مشرکين ايچندن چيقوب كيتيديكى
حالده اوزات شريفى هيچ فرق و تشخيص ايده مامشلردر !

*

**

تيقظ — بر زمان صوكره برى كلوب، الان

بکله يان كفاره صورت مستهزيانه ده :

— «نيه طوربورسكز؟ محمد باشكزه طوپراق صا .

چہرق کیتش ! ہلہ دقتلہ باقیکز ! اولہ دکلیدر ؟
دیدی .

ایشته اووقت کوردیلر کہ اوستلری باشلری توز
طوپراق ایچندہ قالمش ! . .

بونک اوزرینہ جسارتہ کلان خذلہ کفار ، خانہ سعادتک
ایچریسنہ کیردیکندن فراش ہمایون نبویدہ حضرت
علی المرتضی افندیمنک یاتدیغنی کوردیلر . و « ایشته
محمد یاتور » دیہ اوزرینہ هجوم ایدلک اوزرہ ایکن
جناب علی ایاغہ قالدی : انک قیامنی کورن کفار ،
یا کشلقلرندن وبرشیئہدہ موفقیتسزل کلرندن طولانی پک
زیادہ سیلہ مہوت و متحیر قالہرق اکا :

— « محمد زردہ ؟ »

دیدکلری خالدہ یالکز :

— « بیلم »

جوابی الہ بیلدیلر .

لکن کرک جواب علیہ ، کرک کندی مغبونیتلرینہ
قارشنی پک زیادہ سیلہ غضب وحدت ایتشدیلر . انکچون
حضرت علی افندیمنی اورادن چیقارہرق بر ساعت
مدت محبوس طور دیردقدن صوکرہ ینہ صالیور دیلر .

مکده اعلان — حضرت فخر عالم صلی الله

علیه وسلم افندیملک کفارک ایچندن هیچ بلای اولدن
نهان اولیورهرک اسلام علیهنده کویا اک بیوک، اک
معقول! برتدیر وتشبثلری بولنان قتل و اعدام ایشی
— دست تشبثلرندن قورتاروب — تماماً تأثیرسز بر اقمش
اوله بيلمسی رؤسای قریشک ناموسلرینه طوقانديغندن
بهمه حال بولمق اوزره مکهي آلت اوست آرادیلر. حتی
اوله بر اعلان دخی ایتدیلرکه: [محمدی کیم بولور ایسه
اکا یوز — بر روایتده اکیویوز قیویرجق — دوه ویره.
جکز!] مکده بو اعلانی ایشتمش نقدر اوباش طاغی
وار ایسه هپسی قارغیلی قیلنجلی اولدیغی حالدده سکرده رک
طیشاریه یایلدیلر.

حضرت پیغمبر صلی علیه رب البر افندیملر ایسه او کچه
سعادتخانه رسالتپناهیلرندن چیقوب [هر زده ایسه بر
یرده] کیزلندی.

فرداسی وقت الظهرده جناب صدیق رضی الله
عنه افندیملک خانه سنی تشریف بیوردی. قابویه واردیغی
زمان اوکنده طورهرق علی وجه الشرعی:

— « ایچری کیرمکه خانه صاحبک اذنی وارمی؟ »

دیدى . حضرت صدیق ایچریدنبری ببولک برمنونیتله :

— « یوریکز یا رسول الله ! »

دیہ مقابلهء جوابیه ده بولنور ایکن سرعتله استقباله ده
کمشدى .

سید کائنات علیه افضل الصلوة افندیمن حضرتلری

ایچرییه کیردی . وهجرتیه من طرف الله مأمور ومأذون

اولدیغنی بیلدیردی . انک اوزرینه ابو بکر الصدیق رضی

الله عنه حضرتلری :

— « بن ده برلکده مییم ؟ یا رسول الله ! »

کلام استفهامیله ایتدیکی خطابه طرف ذیشرف

احدیدن :

— « اوت یا ابا بکر »

جواب مستطابی ویرلمش واولوجهله مظهر تبشیر رسا -

لتینهای اولمشدر .

جناب صدیق افندیمن ، معیت سنیه رسالتینهایده

بولندیغنی حالدیه هجرت شرفنه نائل اوله جفنه اولقدرمنون

اولدی که کوزلرندن بلا اختیار سرین سرین اشک

شادی دوکولدی . واولجه سکزیوز درهم کموش بدل

ایله الوب خانه سنده بسله دیکی دوه لرندن « قصواء »

یاخود «جدعاء» نام برینی ، بینوب هجرت ایتک اوزره
او ممنونیته قارشی همان حضرت رسول الله عرض
و تقدیم ایله دی .

لکن نبی ذیشان :

— «بك اعلا در . اما شمدی هدیه قبول ایتم .

صاتون آلیرم »

«یه رك دوه نك بدلی اولق اوزره تنسیب بیوردیغی
درتیوز درهم كموش و حضرت عائشه دن منقول اولان
روایتہ كوره قرقبك درهم و علی روایتہ قرقبك دینار
پاره یی بدل تعیین و تخصیص بیوردی .

رسول خدانك او دوه لرینه طرف صدیق دن پردوه
دها ترفیق ایدیله رك ایکیسی حاضر لتدی رلمش و رهبر -
لكده کی مهارتی ایله معروف و مشهور اولان « عبدالله
بن اریقط » نام کیمسه دخی مدینه یه دکن یول کو سترمك
ایچون اجرت معینه ایله رهبر اتخا ذ ایدیله رك کندی لر نجه
معین اولان بر وقتده [اوچ کون صو کره] جبل ثوره
کتیرمك اوزره دوه لر اكا تسلیم ایدلمشدر .

..

غار — جناب رسالتیناهی اقشاهه دکن حضرت

صدیقه قاله رق پنچشنبه کیجه سی ایکسی مکه نك آلت
طرفنده تخمیناً بر ساعت مسافه سنده بولنان جبل ثوره
طوغری یوریدیلر .

* *

بر روایتده کفارک هر درلو مذاکرات ومقرراتی
حضرت جبریل مذاکره کونی خبر ویرمش ، فخر
طلم افندیزده او حالدہ نزد همایونلرنده کی اماناتی اصحابنه
تسلیم ایتک اوزره حضرت علی افندیزده ویره رک
صدیق حضرتلریله ده هجرت تدارکی حقنده مذاکره
ایله مشدی .

کیجه اولوبده کفارک الندن اووجه غریب اوزره
قورتیله رق ابا بکره ملاقی اولدقلرنده حضرت صدیق ،
لوازم سفریه نك احضارینی اوکون کوله سینه ذاتاً
تنبیه ایتش اولدیغندن هیچ بر شیئه بکله مدن همان
طوغریدن طوغرییه جبل ثوره کیدوب مغاریه
کیرمشلردر .

* *

هرنه حالدہ اولور ایسه اولسون مغاریه برکره
کیردکلرینک عقیننده همان بأذن الله بر اورومجک کلوب
مغاره نك اغزینه آغنی کردی . و بر چفت ییانی کوکرچیندم

مغارہ نک قابوسی بولنان اغزینہ یمورطہ لادی کہ کیفیتی
بوصیری حضر تلی مشہور قصیدہ جیدہ برہ لرنده :

وما حوی الغار من خیر ومن کرم
وکل طرف من الکفار عنه عی
فالصدق فی الغار والصدق لم یرما
وہم یقولون ما بالغار من ارم
ظنوا الحمام وظنوا العنکبوت علی
حیر البریة لم تنسج ولم تحم

یتلریلہ برصورت بدیعہ دہ بسط و بیان بیورورلر .

قریشک او آرایچی طاقی ، جبل ثورک ہر طرفنی
طولاشوب آرارلر کن قوم اوزرنده بولدیغی اثرہمایون
محمدیدن استدلال طریقہ آریان « امیہ بن خلف » کہ
فرقہ تعقیبہ سی مغارہ نک تا اغزینہ ایریشدکارندہ ایزی
غائب ایتدیلم . « علقمہ بن کرز » کی بعض کفار ،
ایستہ او زمان :

— « شومغارہ نک ایچریسنی ارایہ لمدہ باقہ لم »

دیدیلم . امیہ انلر جوابدہ :

— « اورادہ نہ ایشکز وار ؟ محمد طوغندن اورادم »

اورو محکمر آغ کرمش ، کوکر جینلردہ یووا یاپوب یمور .
طہ لامشلم ! »

دیمیله فکر تحریدن انصراف حاصل اولمشدی .
 لیکن بصر بصیرتدن محروم اولان اوخله کفار،
 غارک قاپوسنده ایکن ایچریدن رسول اکرم ایله جناب
 صدیق، انلری کورورلردی . حالبوکه دیده بصیرتلی
 کور اولان ملعونلر ، بو ایکی حضرتی کوره مزلردی .
 حتی مغارنک اغزینه اودرجه یاقلاشدقلری و کیر-
 مک، آرامق کبی سوزلری سویله دکلی زمان ابو بکر
 الصدیق افندیملر پک زیاده سیله خوف وهراس ایچنده
 قالمش اولدقلرندن طولایی ایدی که :

— « یا رسول الله ! بونلر از دها دقت ایدرلرسه
 بزنی کوره جکیر . بنی اولدیرلرسه ده بن همان بر شخص
 اولدیغم ایچون برشی دکل . لیکن الله ایتیه که سکا برزبان
 ایده جک اولورسه امتک هلاکنه و دین اسلامک ده
 محوینه سبب اولور »

دیدی . حضرت پیغمبر صلی علیه رب البر افندیملر :
 — « اسکت یا ابا بکر ! ما ظنک بائین الله ثالثهما »

دیه تسلیمیت بیوردقندن صوکره باب غاره اشارتله :
 — « اگر انلر شورادن کیرلرلرسه بزده شورادن

چیقارزن »

دیر ایکن ارقه دیواره اشارت بیوردیلردی که او زمان
حضرت صدیق، اشارت بیوریلان ارقه دیواره باقدی.
دیوار یارلمش و بر بیوک دکز دخی دیواره متصل اولوب
غایت کوزل برکی دیواره یاناشدیرلمش حاضر طور دیغنی
کوردی !

* *

لدغ حیه - مغاره کیر دکلرنده سطح زمین
اخلده کوردیکی وسد ایتک ایستیوبده طیقامغه طاش
له مدیغنی بر دلیکدن، مؤذی حشرات چیقوب رسول
دایه ضرر دوقوندیر مسون فکریله جناب صدیق،
دلیکی ایاغیله طیقاش وفخر عالم افندیز دخی
رک باشلرینی صدیقک دیزی اوستنه قویه رق اویقویه
ملردی .

حالبوکه صدیقک عین تصوراتی اوزره دلیکدن بر
ن باش کوستره رک ایاغنی صوقدی . لکن دیزی
اشرف پیغمبریدن وساده اتخاذا بیورلمش اولدیغندن
ضررتی اویقودن اویاندیروب ده راحتسز براتش
امق نیتیه ایاغنی دلیکدن چکمدی . فقط زهرک
له جانی پک زیاده اجیددیغندن کوزلری یاشاروب

طاملامغه باشلادی • یاناغندبری تکرلنهرک وجه پاک
تابناک احدى به طاملايان قطرات دموع تماسندن ذات
جليل محمدی اویقودن اویانمشدی • او زمان یار غارینه
خطاباً :

« نه وار یا ابا بکر ! »

بوردیلر و :

« یارسول الله ! ایاغی برشی صوقدی • اما

ضرری یوق • انام بابام سکا فدا اولسون ! »

جواب صدیقانه سنی الدیلر • حضرت رسول خدا همان
قالقوب ییلانک ایصیردیغی یر • مبارک لعاب شریفلرینی
سورمش وزهرک آجیسی ده درحال زائل اوله رق جناب
صدیق عافیت واستراحت بولمشدر •

ابو بکر الصدیقک اوغلی [عبد الله] رضی الله
تعالی عنهما حضرتلری ، کیجه لر ی غاره خفیاً کله رل
قریشک افکار و حرکاتنه دائر معلومات ویرر و جبل
ثورده برسوری قویون کوتمکده بولنان « عامر »
فهیره « دخی قویونلرینی صاغه رق کیجه مغاره یه کیزلیم
سود کتیرر ایدی •

حضرت پیغمبر صلی علیہ رب البر ، یار غاری ابو بکر
 الصدیق افندیملزله برابر اوچ کیجه بو حال اوزره
 مغارده قالدیلر . اندن صوکره وقت معینه لری حلول
 ایتمش اولدیغندن رهبر لری « عبد الله بن اریقط » ،
 دوه لری مغاریه یتشدیردی . ساحل طریقیله مدینه یه
 طوغری ارتق راه مهاجرته دوزلدیلر . که ایشته بدایت
 هجرت سنیه جناب رسالتیناهی ، روایت کوره « ۶۲۲ » نجی
 سنه میلادیه سی شهر صفر یکر می سکزنجی و ماه تموز
 اون یدنجی بازار ایرته سی کوننه شرفصادف اولمشدر .

* *

۴

تقییات کفار

و

« بعض خوارق احديه »

غاره خفيا سود کتير مکده بولنمش اولان « عامر » ی
 معیتلرینه المشلردی . بولده « قدید » نام محله اورا

اهالیسندن « ابو معبد » ك خیمه سی او کندن پکیورلردی .
صاتون المق اوزره [خورما یا خود باشقه ینه جک بر
شی وارمی ؟] دیه چادر دن صور دیلر . صاحب الخیمه
اولان ابو معبد ، او صرده چادرده حاضر بولنمدیغندن
زوجه سی « ام معبد » [عاتکه بنت خالد الخزاعی] :
-- « هیچ بر شیز یوقدر »

جوابی ویرمشی .

اوزمان منظور عالی اولان بر قویونه اشارتله :
— « یا شوندر ؟ »

دیه صور دیلر . عاتکه بوسوزه جوابده :

— « او ، بر زبون قویونجغزدرکه یوریمکه بیله
طاقتی بولنمدیغندن سوری ایله برابر کیده میهرک کیری
قلمش ! »

دیدی . بعده طرف رسالتیناهیدن عاتکه یه :

— « اذن ویریور ایسهك صاغیم »

یورلمش وعاتکهك :

— « پك اعلا ، سودی بولنور ایسه صاغیور یكز ! »

جوابی اوزرینه صاغغه مباشرت دخی یورلمشدر .

اولوقت که حضرت رسول خدا ، او زبون قویونی

طوتوب مهلرینی [بسم الله الرحمن الرحيم اللهم بارك لها

فی شاتما [دیهرک بعده صیغادی . قویونک سودی همان
کلکه ومه لرندن اقمه باشلامش ایدی . چادر دن بر بیوجک
قاب الدیره رق سودی انک ایچنه صاغدی . سوتده
قابک ایچنده لبالب طولدی .

ایشته او سوددن اولا صاحبه الخیمه عاتکه یه ،
بعده یار غاری ابو بکر الصدیقه وسائر حاضر اولان
کیمسه لره طویونجه یه دکن ایچیردی .

بونلردن صوکره کندیلری ایچدیله . بردها صاغه-
رقینه ایچدیله . دفعه ثلثه اوله رق صاغدقلى سودی
ارتق عاتکه یه بر اقدقن صوکره بینوب یوللرینه دوام
ایتدیله .

او کون ابو معبد ، خیمه سنه کلوبده قابده کی سودی
فردیکی زمان عاتکه یه دیدی :

— « بونه ؟ »

عاتکه ده :

— « والله بون بون بون مبارک بر ذات کلدی .
ریدن کری قالان زبون قویونی صاغدی . هم کندیسى
دی ، هم بزى وسائر حاضر بولنانلری طویونجه یه

قدر ایچردکن صوکره او چنجی دفعه اوله رق صاغدیغی
ایشته شو سودی ده بزه براغوب کیتدی
جوابنی ویردی .

ابومعبد ، کندی کندینه : « بونده بر حکمت وارا »
دیدکن صوکره تکرار صوردی :

— « شکل و سیاهی نصل ایدی ؟ »

هاتکه ، حلیه جیله نبویه دن خیالخانه سنده ضبط
ایده بیلدیکی مقداری :

— « والله غایت نورانی یوزلی لطیف بر ذات ایدی .

اورته بویلی ، قاره کوزلی و قاشلریله کیرپکاری کوزل

ایدی . کوزینک قاره سی غایتله سیاه ، بیاضی ده غایتله

بیاض ایدی . قاشلری اینجه و چاتیق ایدی . بونی

اوزونجه ایدی . صاچنک ، صقالنک قیللری اعتدال

اوزره لطیف ایدی . آوازی نه چوق اینجه و نه

چوق قالین و یوکسک دکلدی . کمال فصاحت و بلاغته

لطفله سویله ر ایدی . بوی دخی اورته ایدی »

دیه برر برر صایدی .

ابومعبد . هاتکه نک بوجوابنی دیکه دکن صوکره

اکا :

— « والله سنک بودیدیکک ذات ، قریش ایچن

ظهور ایتدیکی ایشیدیلان پیغمبردر. آه اکر بوراده حاضر
بولنسه یدم اکا همان تابع اولیویرردم »
دیدى .

* *

معجزات باهرات احدیه دندرکه او قویونک تا خلافت
فاروقیه زمانلرنده واقع اولان قوراقلغه دکین یا شادیغی
وحوالی حجازیه ده عموماً حیواناتک یه جک برشی بوله .
مدیغی ائالرده بيله صاغیلوب بول بول سود ویردیکی
جاتکه دن مرویدر !!

*

* *

ع

— سراقه نك تعرضی —

حضرت حبیب خدا محمد المصطفی افندی عزی اله
پکیره بیلن کیم ایسه قریشک اکا یوز دوه ویره جکی
حقننده ایتدیکی اعلان ، کنانه قبیله سندن او حوالیده
ساکن خیمه نشین بنی مدلج عشیرتی ایچنده طوبولمش وحتی

ساحل طریقہ ایکسی سواری ایکسی پیادہ اولہ ورق درت
کشینک کچوب کیتدیکی خبری دخی ایشیدلشدی .
قریش طرفندن موعود یوز دوهی المق طمعنه
قاپاش اولان [سراقہ بن مالک بن جعشم المدجلی
الکسانی] همان اتہ بینوب یک شدتلی ودقتلی برحالدہ
تعقیبہ باشلادی .

فخر عالم صلی اللہ علیہ وسلم افندیمز ايسہ یار غاری
جناب صدیق ایلہ برابر ، عاتکہنک چادری اوکندن
ہنوز یکی ایرلش ایدی . سراقہنک ارقہدن یتشمکدہ
اولدیغی کورولدی . حضرت ابی بکر الصدیق رضی اللہ
عنہ افندیمز « امان یا رسول اللہ ! طوتولدق » دیہ یک
زیادہ سیلہ تلاش واضطراب کوستردی .
بوکا قارشی حضرت پیغمبر صلی علیہ رب البر
افندیمز :

— « قورقہ ! اللہ بزمہ برابردر »

دیہ تسلیمت ویررکن سراقہ یتشوب :

— « یا محمد ! بوکون بنی سندن کیم منع ایدر ؟ »

دیہ اظہار صلابت وشجاعت ایتدی . اکا جواباً طرف
ذیشرف پیغمبریدن :

— « جبار الواحد القہار منع ایدر »

بیورلدی . ایشته بونک عقیبنده ایدی بتون بتون تعرض
وتجاوزه باشلایان سراقه ایچون رسول ذیشان :

— « اللهم اصصره ! »

دیه دعا بیورمش سراقده همان بردن بره دوريله
قالمشدر .

آتی کیشنیهرک قالدی . وینه چاتمق اوزره
تکرار حاضرالمقده ایدی ! او انده جبریل امین نازل
اوله رق :

— « یا محمد ! الله ارضی سکا مطیع بیوردی . اکا

ایستدیککی امر ایت ! »

مژده سنی ویردی . حضرت حبیب خدا دخی امر ایتدی :

— « یا ارض ! سراقه بی طوت ! »

سراقه ایه ارتق طوتولیور ایدی . اتنک ایاقلری دیزلرینه
دکین یره باتمش ، کومولمش ایدی ! یدی دفعه طوتیلوب
ینه مرحت وشفاعت جلیله اجدیه ایله قورتلدقن
صوکره باشه کتیره میه جکنی اکلایه رق قورقوسندن :

— « یا محمد ! بنی قورتارده ایستدیککی بکا امر

ایت ! »

دیه امان ایستمکه مجبور اوله قالمشدر .

رسول کبریا افندیز ، سراقه یه خسف بلاسندن امان
ویردکدن صوکره دیدی که :

— « بزم بورادن کچدی کمزی اوچ کونه دکین کتم
وتعقیب ایدنلری ده منع ایت ! »

سراقه دخی شو مأموریتی بالطبع قبول وجداً ایفا
ایتمشدی .

*

**

سراقه ، آتیه شوکت وسطوت اسلامیه نك میدان
الوب یوکسله جکنه بالملاحظه یقین حاصل ایتش اولدیغندن
بر اماننامه ایستدی .

رسول اکرم صلی الله علیه وسلم افندیز دخی معیت
همایونلرنده کی « عامربن فهیره » حضرتلرینه دری اوزرینه
بر اماننامه یازدیروب سراقه نك الله ویردکدن صوکره
یولنه دوام ایتدی .

سراقه ایسه وعدی اوزره اوراده قاهره قریش
فرق تعقیبیه می کلدیکه « بن بورالری آرادم . کیمسه لر
یوق . اوچ درت کوندنبری خبرم اولدن بورادن قوش بيله
چکیرمدم » جوابيله خذله مشرکینی اعاده ايله ردی .

لكن ابو جهل لعين ، سراقه نك او حالنه اخيراً واقف
اولديغى زمان نيك زياده غضب و حدت ايدوب غير تسزل كنندن
وانسانيتسزل كندن باحث بر هجويه سويله مش سراقه
دخى اكا :

ابا الحكم واللات لو كنت شاهداً
امام جوادى حين ساخت قوائمه
علمت ولم تشكك بان محمداً
رسول يرهان قلمك كاتمه
اليك فرد الناس عنه فاني
ارى امره يوماً ستبدى معالمه
جواب شاعرانه سيله مقابله ايتمشدى كه خلاصه مالى :
« اكر آتمك اياقلىرىنك اوزمان ناصل يره باتديغنى كور -
سيدك سن محمدك نبوت ورسالتنه اينانير ، ايمان ايدردك »
ديمك اولور !

فتح مكه [۸] سنه سى حضرت پيغمبرك حنين غزا
سندن شرفعاودت عليه لرى اثناسنده سراقه ، اماننامه
رسالتپناهى ايله حضور پر نور نبوى يه كلوب شرف
اسلام ايله مشرف والتفات عالي درجات احمدى يه ده نائل
اولدى .

حتی جناب رسالتیناه افندیمز ، او وقت ا کا
خطاباً :

— « یا سراقه ! ناصلسک ؟ کسرای عجمک
بیله ز کترینی طاقنه جغک زمان ! . . »
بیوروب عقیننده :

— « صانکه کوزیمک اوکنده کی کبی کوریورم که
سراقه ، کسرانک بیله ز کترینی طاقینور »
بیورمش اولدقلری حالدہ بوکلام حکمت انجام پیغمبرینک
معناسی اوزمان لایقيله اکلایشيله مامشدی .

حالبوکه حضرت عثمان ذی النورین رضی الله عنه
افندیمزک زمان خلافتلرنده یعنی بعدالہجرہ [۳۱] ده
دولت وسطوتی محو و مضمحل اولان کسرای ساسانیا -
نہنک اغتنام اولنان اموال و اشیاسی مدینہ کتیریلوب -
ده بیله ز کتری سراقه نک طاقندیغی زمان ، یکریمی اوچ
سنہ اول طرف ذیشرف پیغمبریدن کیفیتک تبشیر
بیورلدیغی و بناءً علیہ معجزات احدیہ دن اولدیغی میدانه
چیقمشدر !

*

**

سراقه دن ایریلوبده یولدن خیلی مسافه دها

الدقلمنده تصادف ايله دكاري بر چوبانندن ده سود ايستديلر .
چوبان :

— « صاغيلير قويونم يوقدر . شوراده بر چكي وار . لكن اونك سودي قالمدي »
ديدي . انك اوزرينه حضرت پيغمبر صلي عليه رب البر يورديلركه :

— « اوچكي يي كتير ! »

چوبان چكي يي كتيردي . ذات عالي اجدى مبارك
الني بعد البسملة ممة نك اوستنه قويدغي كي سود كلكه
باشلا ديغندن حضرت ابي بكر الصديق افنديمز قالقاني
قاب يرينه طوتدي . قالقان سوت ايله طولدي .
حضرت حبيب خدا ، او سودي اولا جناب ابي
بكره ، عامره ، عبداللهه ، چوبانه ايچرد كدن صوكره
بردها صاغوب چيقارديغي سودي كنديلري ايچديلر .
بو عجائب و غرائب احوال خارقه العاداتي كورمش
اولان چوبان ، متخير و متعجب قاله رق كيم اولدقلمريني
صورمغه مجبوريت حس ايتدي :

— « سن كيمسك ؟ بن سنك كي بر آدم كورمدم
رجا ايدرم كه بكا كنديكي بيلدير ! »
حضرت رسول خدا :

— « اکر کیمسه یه سویله میه جک اولور ایسه ک

سویلرم »

بیوردیلر . چوبان کیمسه یه سویله میه جک دانه دانه
امنیت کوسه تردیکندن رسول ذیشان افندیز دخی
کندیلرینی چوبانه بیلدیردیلر :

— « محمد رسول الله دیدکری ایسته بنم »

چوبان حیرتی اظهار ایتدی :

— « ها ! قریشک . دینندن دوئمش دیدکری »

سنمیسک ؟ »

رسول اکرم اکا :

— « انلر البته اویله دیرلریا ! »

دیه مقابله بیوردقدن صوکره چوبان تکرار :

— « بن شهادت ایدرم که سن حق پیغمبرسک »

سنک شو یایدیفک شیئی بی اولمیان بایه من . بن ارتق

سنکله برابر کیدرم »

دیدیکی حالده افندیز اونی منع ایله مشدر :

— « شمعی اولماز . صوکره بنم ظهوریمی ایشتدیگک

زمان کل ! »

تاجر لکی زمانہ زندہ حوالی شامیہ یولار زندہ کی سیر
 وسفرینک کثرتہ بناء طانیلان حضرت ابی بکر رضی اللہ
 عنہ افندی مزہ ذات عالی نبوی ایچون :
 — « بو او ککده کی کیدر ؟ »
 دیہ صورانلرہ ، جناب ابی بکر :
 — « رہبر مدر . یول کوستریور ! »

جوانی ویریر ایدی . او صرہ دہ قافلہ شامیہ ایلہ برابر
 ہنوز مدینہ دن چیقمش اولان « زبیر بن العوام »
 رضی اللہ عنہ حضرتلرینہ تصادف ایتمشردی . جناب
 زبیر دخی قافلہ سیلہ مکہ کی کیدہ رک ایشنی اورادہ
 تسویہ ایتدکدن صوکرہ همان دونوب مدینہ یہ ہجرت
 ایتمشدر .

*

**

۵

— ❧ قباہ مواصلت ہمایون ❧ —

و

❧ بناء مسجد شریف قبا ❧

رسول محترم صلی اللہ تعالیٰ علیہ وسلم افندی مزہ

حضرتلرینک مکهدن شرف انفکاک عالیلری خبری
مدینهیه واصل اولمغله مشاهدۀ نور جمال محمدییه
مشتاق اولان انصار کرام ، خارج مدینهیه چیقوب
حرارت هوا مشتمد اولنجیه دکین شرفقدوم محمدییه
انتظار ایتک بر قاج کوندن بری کنسیدیلرنجه اعتیاد
ایدلش ایدی بر بازار ایرتهسی کونی ینه چیققدقلری
حالدۀ وقت ظهر حرارت هواییهسی باصنجه عودت
ایتملردی .

لکن برایش ایچون خانه سنک طامی اوستنه چیقمش
بولنان بریهودی ، اوزاقدنبری رسول اکرم ایله یار
غارینک آق جامه لره بورونمش اولدقلری حالده کلکده
بولندقلرینی کورمرک :

— « ایشته ایستدیککز ذات کلیور »

دیه قدوم احمدی بی انصار کرامه تبشیر ایتدیکندن بتون
اهل اسلام اول طرفه سکر دوب کیتدیلر .

.*

ایشته « قبا » یه او ، موصلت احمدیه لری زمانی ،
تاریخ نبوت محمدیه نک اون دردنجی سالنده واقع شهر
ربع الاولک برنجی یا ایکنجی ویاخود اون ایکنجی بازار
ایرتهسی کونی ایدی !

حرارتك پك شدتلى اولمى وذات همايونلرينك ده
يورغون بولملرى حسييله بر مدت استراحت ايتك
اوزره مدينه بر ساعت قدر بعد مسافه مى بولنان
« قبا » نام قريه اينهرك بنى نجاردن « كلثوم بن هرم » ك
خانه سنه مسافر اولديلر .

قباده اون درت كون قدر اقامت و برده مسجد
شريف انشا بيور مشلدر كه او ، « مسجد شريف قبا » ديه
معروف اولان مسجد دن اول جاعت مسلمين ايچون هنوز
بر مسجد انشا اولنماشدى .

* *

قباه شرف و اصلت نبويه يي متعاقب انصار كرامك ،
شرف قدوم محمدى يي تبريك ايله دكلى صروده مدينه نك
اك مشهور شاعرى و معلقات سبعة نك دردنجى طبقه سى
منسوبينندن بولنان « حسان بن ثابت » رضى الله عنه
حضرتلى ده تشریف على نبويه دائر بر كوزل
قصيده سويله يرك او قصيده يي شكرانه قدوم
پغمبرى اولمق اوزره اوراده حضرت حبيب خدايه
عرض و تقديم ايله مشدى .

* *

حضرت علی کرم الله تعالی وجهه ، رسول اکرمک
حرکتلرندن صوکره بروجه امر و فرمان پیغمبری مکده
اویچ کون اقامت و اماناتی اصحابنه بالتسلیم هجرت
ایدهرک قباده رسول کبریاه ملاقی اولدی .

لکن مکهدن قبايه دکین پیاده کلش اولسنک تأثیری
اوله رق مبارک ایاقلری یارلش و اوسبيله پک زحمتلر
چکمش اولدیغندن ذات عالی نبوی یی کورور کورمن
اغلا یوب بویننه صارلدی . وایاغنده یاریلان یرلره
افندیمز ، آب دهان عالیبرنی مبارک الریله سورمکله درحال
التیام پذیر اولدی .

*

* *

قباده درت و علی روایه اون درت کون آرام
بیوردقلرینک عقیبنده بر جمعه کونی ناقة همایونلرینه
بینوب یوز نفر اصحاب کرام ایله برابر نفس مدینه یه
عزیمت بیورمشلردی . یولده صول طرفلرینه میل ایله
« بنی سالم بن عوف » یوردنده « رانوان » وادیسنک
اوست طرفنده ایندیله .

ایشته او وادیده غایت بلیغ بر خطبه ایراد بیوره .
رق جمعه نمازینی قیلدی . که رسول مکرمک اک اول

قيلدقلرى ججه نمازى بو نماز اولديغى كى ابداكى
خطبه سى دخى او نمازده كى خطبه سى بولنـديغندن على
طريق اخلاصه ترجمه سى جودت پاشا مرحومك قصص
انپاسندن نقلاً ذكر اولنه جقدر .

اولاً جناب حقه جد و ثنادن صوكره باشلايوركه :
« اى ناس ! صاغلفكرده آخرتكز ايچون تدارك »
« كوريكز ! محقق بيليرسكزكه يوم قيامتده هر كس »
« چوبانسز براقديغى قويونندن صوريله جق . صوكره »
« جناب حق اكا ديه جك . اما ناصل ديه جك ؟ »
« ترجانى يوق ! پرده دارى يوق ! بالذات ديه جك كه : »
« سكا بنم رسولم كلوبده تبليغ ايتديمى ؟ بن سكا مال »
« ويردم . سكا لطف واحسان ايتدم . سن كيندك »
« ايچون نه تدارك ايتدك ؟ او كيسه دخى صاغنه »
« صولنه باقه جق . برشى كورميه جك . اويله ايسه »
« هر كيم كه كندوسنى ولو كه بيارم خرما ايله اولسون »
« آتشدن قورتاره بيله جك ايسه همان اول خيرى »
« ايشله سون ! انى ده بوله من ايسه بارى بر كلمه طيبه »
« ايله كندينى قورتارسون ! زيرا انكه بر خيره اون »
« مثلندن يديوز مثلنه قدر ثواب ويريلير . والسلام »
« على رسول الله ورحمة الله وبركاته . »

*

**

بو برنجی خطبه یی بیتروپ او طور د قدن صو کره
 خطبهٔ ثانیه ده قیام ایله بو وجهله دوام بیور مشدر :
 « الهه جد اولسون ! الله جد ایدرم . واندن »
 « یاردم ایسترم . نفسلریم زک شرلرندن و کوتو عملریم زدن »
 « الهه صیغندق . الهه هدایت ایتدیکنی کیمسه اضلال »
 « ایدم من . الهه اضلال ایتدیکنه ده کیمسه هدایت »
 « ایدم من . اشهد ان لا اله الا الله وحده لا شریک له . »
 « کلامک اکوزلی کتاب الله در . هر کیم که جناب »
 « حق انک قلبنده قرآنی مزین قیله وانی کافر ایکن »
 « اسلامه ادخال ایدم . و او دخی قرآنی سائر سوزلره »
 « ترجیح ایدم . ایشته اول کیمسه فلاح بولور . »
 « طوغریسی کتاب الله کلامک اکوزلی ، اک »
 « بلیغی در . الهه سودیکنی سویکز ! الهی جان »
 « و کوکلدن سویکز ! الهه کلامندن و ذکرندن »
 « اوصانیمکز ! الهه کلامندن قلبکزه قسوت کلمسون ! »
 « زیرا کلام الله هر شیئک اعلاسنی آیروب سچر . عملک »
 « خبرلیسنی و قوللرک کزیده سی اولان پیغمبرلری »
 « وقصه لرک ایسنی ذکر ایدر . و حلال حرامی بیان »
 « ایدر . ارتق الله عبادت ایدیکز ! واکا برشی شریک »
 « ایتیمکز ! اندن حقیه صاقینکز ! وینکرده کلام الله »

« ایله سویلشکر ! محقق بیلیملیسکز که الله تعالی عهدینی »
 « بوزانلره غضب ایدر . والسلام علیکم . »

*

**

عقبانده کی بیعت انصار اثنالرنده مدینه لیلر طرفندن
 ایدیلان عهد و میثاقک زمان ایفاسی ارتق کلمش دیمک
 ایدی . بناءً علیه حضرت رسول مکرم افندی مزده
 خطبه بلیغه سنی ، نقض عهد ایدنلره جناب حقلک غضب
 الهیسی ایریشه جگنی بیان ایله نهایتلندیر مشدر .

**

۶

— ❖ منزل و مهماندار نبوی ❖ —

سید کائنات علیه افضل الصلوة افندی مز حضرت تلمری ،
 نمازی او وادیده قیلدقدن صوکره ناقة سعادت لرنه
 بینوب ارتق طوغریدن طوغری به شهر مدینه به متوجهاً
 حرکت پیور مشدر .
 لکن کیمه مسافر اوله جغنی انصار کراجه معلوم .

اولمديغندن انصاردن هر بری مماندارى ذات رسا -
لئيناهى شرف عالمهاى احرازه بر ارزوى شديد حاصل
ايتمکده ايدى .

مدينه مواسلت همایونلرنده اهالى اسلاميهسى
اولقدر ممنونيت کوستردیلرکه درون شهر بيوک برسرور
ايله طولدى .

چو جقار سوينوب : « رسول الله کلدی ! » ديه
سوقاقلرده چاغيريشور ، نسوانده طاملرک اوستنه
چيقوب :

نحن بنات من النجار
يا حبذا محمد من جار

کبي اشعار لطيفه او قورو « خوش کلدیکز يا رسول الله ! » ديه
باغيريشور لردي .

انصار کرامدن هر هانکي برينک خانهسى اوکنندن
يکرسه « بيوريکز يا رسول الله ! » ديه رک دعوت ايچون
ناقۀ سعادتک يولارندن طوتوب دوندير مکه چاليشير
ايدى .

لکن اونلر اوصورتله يولاره ياپشدقجه حبيب خدا
افنديمز انلرى :

— « طوقا نمیکز ! کنیدیسی مأموردی . نزولزه
 مشیت الهیهنک تعلق ایله دیکی محلی بیلور . اورایه
 کیدیور . طوریکز باقهلم نرهیه کیدیور ؟ »
 دیه منع ایدردی .

یولاری ذاتاً الندن براقش اولدیغندن مبارک ناقة
 سعادت صاغنه ، صولنه باقنه باقنه کنیدیگندن کیده رک
 نهایت « مالک بن نجار » ک خانه سی اوکنده سهل ،
 سهیل نامنده ایکی یتیمک مالی اولان ، بر خالی عرصه ده
 چوکوب اوطوردی . لکن طورمدن همان قالقوب
 کیده رک بنی نجاردن « خالد ابویوب الانصاری » رضی الله
 تعالی عنه حضرتلرینک خانه سی اوکنده اوطوردی .
 اوراده دخی طورمدن همان قالقدی . دونوب اولکی
 چوکدیکی عرصه خالیده اوطوردقن وبوینی اوزا -
 دهرق باغیرمغه ، اغزینی اچمیدیغی حالدیه بوغازندن
 سس چیقارمغه باشلادقن صوکره رسول مکرم صلی الله
 علیه وسلم افندیمز [هذا المنزل ان شاء الله] بیورور ایکن
 ایندی . و خالد رضی الله عنه حضرتلرینک خانه سنی تشریف
 بیوردی .

ناقه سعادتک اوزرنده کی اشیای نبویه بی حضرت

خالد ايله زيد بن حارثه رضى الله تعالى عنهما حضرتلى
برابر الوب خالك خانه سنه كتير ديلر .
رؤسای انصار كرامدن « ابو امام اسعد بن زرارہ »
رضى الله عنه حضرتلى ده ناقه سعادتى آلوب تبركا
كندى خانه لرينه كتير مشدى .

* *

جناب ذات رسالت پناهينك شرف قدوم عاليه مدينه
شهرى سراپا مسعود و منور و اهالى اسلاميه سى ده
غريق سرور او فر اولدى . وطنلرندن دور و على الخصوص
ديدار سعادت آثار احدى بي مشاهده دن مجبور اولان
وديار آخر غربته غريب و سرگردان قالان مهاجرين
اسلاميه دخى تازه جان بولدى .

*
* *

۷

— عبد الله بن سلامك اسلامي —

اوكون مدينه اهالي سى ابو ايوب انصارى حضرتلرينك

خانه سنه کلوب جناب فخر الانام عليه افضل الصلوة
والسلام افندي می زیارت و شرف قدوم هما یونلرینی تبریک
ایله دکاری زمان بنی قینقاع قبیله عظیمه یهودیه سی علما
وعظما سندن و سلسله نسبیک تا حضرت یوسف علیه السلامه
دکین مضبوطیتی سببیه قدر و حیثیتی بالکیز بین الیهود و کل
حتی عربلر بیننده دخی مسلم اولان « عبدالله بن سلام
بن الحرث الاسرائیلی » نامنده بر ذات ده کلمشدی .

عقباتده قبول دین مبین اسلام ایتمش اولان مسلمینک
حکایات و توصیفاتنه باقهرق و بعثت احمدیه نک مدینه ده
ولوله انداز شیوع اولدیغی اثنا ده عبدالله بن سلام ،
او بعثت احمدیه یی - ذاتاً کتب توراتیه دن استبشار
ایله مش بولمق حسبیه بعثت خاتم الانبیا زمانتک پک
تقرب و حلول ایله دیکنه حکم ایتمش ایدیه ده مبعوث
اوله جق اولان ذات شریفک اشبو « محمد الهاشمی
القریشی » اولدیغی بیلک ، کویا کندیسنجه شخص
عالیلرنده وجودی لازم اولان علامت نبوتی کورمکه
متوقف اوله قالدیغندن طولانی قبول و یاردی حقنده هنوز
برشی سویله یه میوب سکوتی اختیار ایتکده ایدی .

لکن ایشته او ایلك زیارتی اثناسی جناب ابی
ایوب الانصارینک خانه سنده حضرت نبیّ ذیشان

بر نظر دقت و امعان ايله معاينه و مشاهده ايدوب
بعده كوردیكى لزوم اوزرينه رسول اكرم حضرتلرينه
دیدى :

— « بن سكا اوچ شی صوره جغم . بواوچ سؤالنه
پیغمبر اولیان، طوغری جواب ویره مز قیام ساعتك اولكى
علامتی ندر ؟ اهل جنتك جنتده اولكى ییه جكى ناصل
طعامدر ؟ باباسنه یاخود اناسنه بکزه یان چوجق نیچون
بکزه یور ؟ »
حبیب خدا دخی اکا :

— « قیام ساعتك شرط اولی بر آتشدركه خلقی
شرقدن غربه حشر و سوق ایدر . اهل جنتك جنتده
اولكى طعامی « زیاده کبد الحوت » که بالغك جکرند
بر قطعه منفرددر ! ماء الرجل یعنی منی الرجل مرأدن
اول نزول ایدرسه چوجق باباسنه ، لكن منی المرأة
دها اول نزول ایدرسه اناسنه بکزر ! . . . »

جوانی ویرمکه جناب عبدالله ، ارتق نبوت و رسالت
محمدیه ازل و جان یقین و ایمان کتیرمش اولدیغندن
همان او مجلسده کلمه طیبه شهادتی برآورد زبانه صدق
و محالست ايله مشدر . رضی الله عنه !

بوندن صوکره عبدالله بن سلام رضی الله عنه
حضرتلری ، جناب فخر الانام افندیزه خطاباً
دیدیکه :

— « یا رسول الله ! طائفه یهود ، سنک نبوتکی
بیلیرلر . لکن مخصوصی انکار ایدرلر . بن انلرک
اعلمی یم . بناءً علیه اسلامه تبعاً انلرکده قبول اسلامی
لازم کلیر . او حالده بنی صاقلا ! بن صاقلی طورور
ایکن قبيله یهودی یانکزه جلب ودعوت ایت ! اولاحال
وشامدن صورهرق ویره جکلری جوابه کوره اسلامی
انلره اظهار وتبلیغ ایت ! »

ذات رسالتینه ، اوزاتی دیدیکی کبی صاقلایه رق
احبار ومعتبران یهودی نزد همایونلرینه دعوت ایتدی .
ابن سلام حقنده کی ظن واعتقادلرینک نه یولده اولدیغی ده
سؤال بیوردی . یهودیلر ایسه هپ بر اغزدن جواب
ویردیلر :

— « او ذات ، جله منک افضل واعلمدر . باباسی ده
بابامزدن افضل واعلم ایدی . »
رسول مکرم ، انلرک او جوانی دیکله دکدن
صوکره :

— « اویله ایسه اعلم وافضلکز اولان جناب ابن سلام ، تورات شریفدن ایله دیکی استبشارات واستدلالات صحیحه سی اوزرینه بنم نبوت ورسالتمی تصدیق وبکایمان ایتمش اولور ایسه نه دیرسکز ؟ »

بیوردی . طائفه یهود ، جبلت متعندانهاری سسوقیله سوزلرینی دکشدیره رک :



— « حاشا ! اکر صحیحاً قبول اسلام ایتمش ایسه

اجهل اوغلی اجهلزدرد . شریر اوغلی شریرمزدرد ! »
دیدیلر . ایشته اوساعتمده ایدی عبدالله بن سلام رضی الله عنه ، کیزلندیکی یردن همان چیقویره رک کلمه طیبه شهادتی یوکسک سسله بالاغلا :

— « ای بنی اسرائیل ! سزدخی ایمان ایدیکز !
زیرا انبیامزک تبشیر بیوردقلری نبی خاتم الانبیاء ، ایشته بو ذات شریفدر »

دیدیکندن یهودیلر انک اوامر وتکلیفنه قارشى چرکین بر لسان قوللاندقدن صوکره دفع اولوب کیتمشلردرد .

۸

—  بناء مسجد شریف نبوی  —

مدینه منورهیه ابتدای مواصلت همایونلرنده ناغه

سعادتلرینک الہ اول چوکوب او طور دینگی عرصہ
 خالیہ ، انصار کرامدن « ابو امام اسعد بن زراره »
 رضی اللہ عنہ حضرتلرینک خانہ سندنہ مقیم
 « سهل وسهيل بن رافع بن عمرو النجاري » نامندہ کی
 ایکی یتیمک ایدی . اون مثقال التونه صاتون النقم
 اوزره طرف عالی پیغمبریدن بازارلغی یعنی قیمتی کسیلہ -
 رک بدلنک تأدیہ وتسویہ سی حضرت ابی بکر الصدیق
 رضی اللہ عنہ افندیزک کیسہ حیت صدیقانہ لرینہ
 حوالہ بیورلدیغندن اودخی همان صاحب لرینہ ویر مشدرہ
 بعده رسول اکرم صلی اللہ علیہ وسلم افندیز
 مخصوصاً کرپیچ ، کراستہ کی ہر درلو تدارکات انشا -
 نیئہ بولنوب ایشتہ او عرصہ خالیہ دہ - قابوسی ناقہ نک
 چوکدیککی موقع ، قبلہ سی دخی مسجد اقصا اولمق
 اوزرہ - بر مسجد شریف ویانندہ دہ اہل بیت رسا -
 لپناہیلر یچون لزومی قدر حجرہ لر انشاسنہ شروع
 وتشبت بیورمشلردرکہ مؤخرأ بر چوق ابنیئہ عالیہ
 علاوہ سیلہ تزین ایدلش بناء علیہ شمسی معمور و مزین
 بولنمش اولان مسجد شریف نبوی ، ایشتہ اوزمان انشا
 بیوردقلری مسجد شریفدر .

مسجد شریف مذکورک وضع اساسی زمانده
کعبه معظمه هنوز مشرکین النده بوانغله مهاجرت
همایونلرندبرنی بیت المقدسه یعنی مسجد اقصایه متوجهاً
نماز قیلمده اولدقلرندن ایدی که قبله سی قدس شریف
اولق اوزره بناسنه باشلامشدر .

زمان انشاسنده هر درلو خدمات انشایده حضرت
فخر الانام علیه افضل الصلوة و اتم السلام افندیز بولوب
اصحاب کرامی ايله برابر مبارک الریله بالذات کرپیچ
کراسته طاشیه رق چالیشیرلردی .

حتی « عمار بن یاسر » رضی الله عنه حضرتلری
برسی ذات عالی پیغمبری دیکری ده کندسی ایچون
ایکیشر عدد کرپیچ طاشیمده اولدقلرندن طولای او
سید کائنات افندیز کمال محظوظیتلرینی اظهار ایدهرک
جناب عماره خطاباً :

— « للناس اجر ولك اجران . و اخر زادك من الدنيا

شربة لبن . تقبلت الفتنه الباغية »

بورمشلردی .

معجزات احديه دندرکه عمار رضی الله عنه حضرتلری
اوکوندن اوتوز یدی سنه صوکره یعنی بعد الهجره
[۳۷ ده] وقوعه کلان وقعه صفینده شاملرله حرب

اولنور ايكن جناب على المرتضا طرفدارى اولديغى حالده
عساكر امويهدن « ابن العاديه » نامنده بر شخصك لندن
شربت شهادتى اچمشاردر !

.*.*

بنايه بدء ومباشرت بيورلدقندن صموكره حضرت
پيغمبر صلى الله عليه وسلم افنديمز ، زوجه محترمه لرى
« سوده » ايله كريمه مكرمهلرى « ام كلثوم ، فاطمه »
رضى الله تعالى عنهن حضراتى مكه مكرمهدن الوب
مدينه يه كتيرمك اوزره « زيد بن حارثه » ايله « ابو
رافع » رضى الله تعالى عنهمايى جانب مكه يه اعزام
بيورمشاردر . بونلر اهل بيت رسالتپناهى ايله برابر
زيه ، كندى زوجه سى « ام ايمن » و اوغلى « اسامه »
رضى الله تعالى عنهمايى آلوب كتيرديلر .
جناب ابى بكر الصديق رضى الله عنه حضرتلرينك
اوغلى « عبدالله » حضرتلرى ايله ديكر عيال واتباع
صديقيه دخى قافله اهل بيت رسول الله ايله برابر
كليويرديلر .

ذات رسالتپناهيكنك بيوك كريمه سى « زينب »
رضى الله تعالى عنهما حضرتلرى ، زوجى « ابو العاص
بن الربيع » كه هنوز قبول دين اسلام ايتماش بولمىسى .

سبيله كله ميوب قالديغي حالده مؤخرأ زوجندن ايريله رق
هجرت بيور مشدر .

*

**

لكن مكه نك آب وهو اسنه الشمس اولان مهاجرين
- او اثنالرده وخامت وثقلت هواييه سى قابل انكار
اوليان - مدينه نك هواسنه مزاجلرينى اويديره ميه رق
اره سى چوق كچمندن حضرت ابى بكر الصديق ايله
بلال بن رباح الحبشى رضى الله عنهما يه ستمه كيف سزلكى
عارض اولديغندن مكه نك هواى لطيفتى ياد وتذكرله
اظهار تحسره ، بناء عليه ترك وطنه سبب اولان مشركين
قريشه وخاصة بو باده دخل وتأثيرلى معلوم اولان
« عتبه بن ربيعہ ، شيبه بن ربيعہ ، اميه بن خلف » بد
دعالم اتمكه باشلاديلر .

حتى جناب ابى بكر الصديق رضى الله عنه حضرتلى
حتى خسته لغنه معروض قالدقلى اشاده :

كل امرئ مصبح في اهله
والموت اذنى من شرك نعله

بئيله حسيات مشتاقانه سنى بر طرز صديق شكيبانه ده
اظهاره مجبور اولدقلى كى بلال حبشى حضرتلى

دخی اولیه بر حالده هم تأثرندن اغلار ، هم ده یوکسک
سسله :

الایت شعری هل ابیتن لیلۃ
بواد و حولی ازخر و جلیل [۱]
و هل اردن یوماً میاه مجنة
و هل یدون لی شامة و طفیل

بیتلرینی سویلردی .

بونک اوزرینه سلطان هردو عالم افندیز : « اللهم
حبیب الینا المدینة کحبینا مکة او اشد . و صححها و بارک
نا فیها . فی صاعها و مدها و انقل حایاها فاجعلها بالجنة »
یه دعا بیورمسلیله جناب حق ، دعا ی نبوی بی مستجاب
وردیغندن مهاجرینه مدینه بی سودیر مشدر [۲] حتی
لقدرده سودیر مشدرکه جناب فاروق رضی الله عنه
ضرتلری :

[۱] ازخر : همزه و خانک کسری ، زانک سکونی
در .

[۲] اولکوندنبری جحفه نك صوی بوزولش و هرکم
، ایچرسه ستمه یه طوتلمغه باشلامشدر . اشبو جحفه حجاج
ک میقاتیدر .

« یارب ! بکافی سبیل الله شهادتی میسر و ببلده رسول الله
فوتی مقدر ایت ! » دیه دعا ایدردی !

•
* *

مسجد شریفک یانده دردست انشا بولنان حجرات
نبویه نك ختام انشا آتی بکله بهرك طوران فخر کائنات
افندیز ، ابو ایوب انصاری رضی الله عنه حضرت تلیزینک
خانه سنده یدی ماه اقامت بیوردیلر .

او مدته انصار کرام اکا نوبتله طعام کتیرر ،
شکرانه تشریف سعادتلری اولوق اوزره بوندن باشقه
دها بر چوق صورتلره معاونات مخصوصه ده بولنورلر .
واو معاونات ایله نظر عالیقدر رسالتپناهیده قربیت
و محبت کسب و تحصیل ایدرلردی .

بویه انصار کرامک هربری برر درلو معاونتده
بولندیغنی کورهرك کندیسیده بروجه ایله معاونت
ایتمینی ایستدیکی حالدده ذات عالی نبوی به مناسب
کندیسنده هیچ برشی بوله میان بیچاره بر فقیره قادین ،
او یولده بر چوق تفکرات و ملاحظات دورا دوردن
صوکره نهایت اوغلی « انس بن مالک » ی برکون الندن
طوتوب کتیرهرك :

— یا رسول الله ! بوده سزه خدمت ایستون !
 ديه حضرت پیغمبر افندیزه تسلیم ایتمشدی .
 اندن صوکره جناب انس بن مالک رضی الله تعالی
 عنه حضرتلری دخی خدمت مابه المفخرت نبویهده
 طقوز یاخود اون سنه متمادیاً مداومت وملازمت ایتمش
 ودعای بانخیر رسالتیناهییه مظهرده اولمشدر .

*
*
*

کړک مسجد شریفک ، کړک حجرات نبویهک الی
 ماه ظرفنده انشاآتی ختام بولدی . حضرت رسول
 مکرم صلی الله علیه وسلم افندیز اهل بیت رسالتینا .
 هیلرینی خالد ابو ایوب انصاری حضرتلرینک خانه سندن
 آلوب مسجد شریف اتصالندهکی حجرات جدیدء سعا .
 دتلرینه نقل بیوردیلر .

ایشته بو نقل همایوندن برآی مرورنده یعنی تاریخ
 هجرت نبویه لرندن یدی آی صوکره شهر شوالده
 حضرت عائشهک امر زفافلری اجرا بیورولمشدر .
 عائشه رضی الله تعالی عنها حضرتلری او زمان طقوز
 یاشلرنده ایدی .

*
*
*

مسجد شریف مذکورک بر طرفندہ بر صفہ
 یاپدر لمشدی کہ اورادہ ، خانہ سی اولیان فقرا و مساکین
 اصحاب یاتارایدی . [اصحاب صفہ] انلر ایدی . اصحاب
 صفہ نك نہ کیچہ ، نہ کوندوز یہ جکری یوغیدی .
 انجق بعضنی ذات عالی نبوی اقشام کندی سعا .
 دتخانہ رسالتپناہیلرینہ کتیروب طویورور ، بعضنی دہ
 سائر اصحاب کرام ویا انصار کرام خانہ لرینہ
 کوندیری دی .

رسول ذیشان صدقہ قبول ایتدیکنندن صدقہ
 نامیلہ کلان شیلری کاملاً اصحاب صفہ یہ تخصیص
 بیور مشلردی . ہدیہ اولہرق کلان شیلردن دہ انلرہ حصہ
 آیرردی .

*
* *

۹

— ❧ — امر جہاد ❧ —

سلطان ہر دوسرا علیہ افضل الصلوۃ و ازہی النحایا
 افندیمز حضرتلری ، ہدایت بعثت و رسالتلری زمانندہ

خلقى قول لين و براز صوكره ترهيب وانذار ايله
دعوته مأمور بيورلمش و دعوتنده كي موعود من
طرف الله اولان موفقیتی کورولد کجه کفار طرفندن
شدتلی منع و مقاومتله تصادف ایتکده بولنمشدی .

اوله کرك ذات عالی رسالتینا هیلرینك ، كرك
اصحاب کرامك کرفتار اولدقلری مصائب ، فوق الطاقه
بر درجهیه واردیغی حالده ینه یالکز صبر و تحمل قیلنجی
ایله مدافعه و مقابله ایدن « عبدالرحمن بن عوف الزهری ،
مقداد بن اسود الکندی ، قدامه بن مظعون الجمحی ،
سعد بن ابی وقاص الزهری » رضی الله تعالی عنهم
حضراتی کی بعض اصحاب کرام :

— « یا رسول الله ! کفارك بو قدر اذیات و تعدیاتنی
ندن چکهم ؟ سلاح ايله مقابله ایتسهك اولزمی ؟ اونلرله
مقاتله ایچون بزه اذن ویر ! »

دیدکجه اوسوزه طرف ذیشرف نبویدن :

— « هنوز حرب و قتاله مأذون و مأمور دگم .

فکر مقاتله دن شمدیلک کفید ایدیکز ! »

جواب صوابی و یریلیر ایدی . بویه تحمل همان اون
درت سنه قدر بر زمان دوام ایتشد .

لکن مقتضای حال و زمانه کوره معامله ده بولنسی .

ترقی شوکت اسلامیہ سنہ بر سبب ظاہری بولنش اولان
 ذات عالی رسالتیناہی ، اے اول یعنی ہنوز کیمسہ نک
 دین اسلام ندر بیلدیکی و او کر دوبدہ قبول ایتدیرمک دہ
 مشکل بولندیغی زمانلر دہ انسیقی موجب اولہ حق یالکز
 بر قول لین ، اخیراً افراد اسلامیہ نک عددی بر قاج
 کشیلرہ بالغ اولوب مجادلالت دینہ حقندہ وقوع و حدودی
 طبعی اولان نزاعلرہ شفاہاً و یا خود مناسب بر باشقہ
 صورتلہ مقابلہ یہ کفایت حاصل ایلہ دیکی زمان انذار
 ایلہ دعوتہ مأمور ایکن دہا صوکرہ ہجرت علیہ
 وقوع بولوب کندی شمس فضل ہمایونلرینہ جریان
 وجولان ویرمک ایچون بر مرکز قویم وقوی استقرار
 واستقلال حاصل و ہر درلو قوۂ جبریہ استعمالنہ قدرت پیدا
 ایلہ دیکی زماندہدہ - دعوتک اے صوکرہ درجہ دہکی
 شدتلیسی بولنان - حرب و قتالہ ارتق لزوم کورولمش
 دیمک اولدیغندن ایدی کہ ہجرت علیہ نبویہ دن صوکرہ
 یعنی اندن بش التی و علی روایۃ اون ایکی آی مرورندہ
 حق تعالی استعینذ باللہ [اذن للذین یقاتلون بانہم ظلموا
 وان اللہ علی نصرہم لقدير] و علی روایۃ [وقاتلوا فی
 سبیل اللہ الذین یقاتلونکم ولا تعتدوا ان اللہ لا یحب المعتدین]
 آیت کریمہ سنی انزال و مأذونیت تامہ احسان بیور مشدر .

بناءً عليه مقدمة وقوع حرب و قتال اولمق ایچون
اولا قریشک یولارده کلوب یکن قوافل تجاریه سنه
تعرض ایدلک اوزره طرف عالی پیغمبریدن برر
فرقه مخصوصه عسکریه ترتیب واعزامنه باشلانیدی که
« احیا ، حران » وقعه لری ، هجرت نبویه دن یدی آی
صوکره شهر شوالده اوصورتله واقع اولمشدر .

* *

۱۰

— مواخات اصحاب —

هجرت علیه نبویه نك برنجی سنه سی ایام اخیره سنده
سید الانام علیه الصلوة والسلام افندیمن حضرتلری ،
جناب « انس » رضی الله تعالی عنه حضرتلرینک
خانه سنده بین المسلمین مواخات رسمنی امر واجرا
بیوردیلر :

اولا ذات اشرف نبوی ، عزاده رسالتینپناهیلری
علی بن ابی طالب کرم الله وجهه حضرتلریله عقد اخوت

بيورمشلردر . اول اخوته بناءً ایدی که جناب مرتضی
افندیمر ، زمان خلافتلرنده برکون کوفه منبرنده « انا
عبدالله انا اخو رسول الله » دیدیلر .
کذلك :

« ابوبکر الصديق » ايله « خارج بن زيد بن ابی زهير الانصارى »
« عمر بن الخطاب » ايله « عتب بن مالك الانصارى »
« عثمان بن عفان » ايله « اوس بن ثابت الانصارى »
« ابو عبيده ابن الجراح » ايله « سعد بن معاذ الانصارى »
« عبد الرحمن بن عوف » ايله « سعد بن الربيع الانصارى »
« طلحه بن عبيد الله » ايله « كعب بن مالك الانصارى »
« سعيد بن زيد » ايله « ابی ابن كعب الانصارى »
« حمزة بن عبد المطلب » ايله « زيد بن حارثه »
« جعفر بن ابی طالب » ايله « معاذ بن جبل »
« زبير بن العوام » ايله « سلمه بن سلامة بن وقص »
« مصعب بن عمير بن هشام » ايله « ابوايوب خالد بن زيد الانصارى »
« ابو حذيفة بن عتبة بن ربيعة » ايله « حذيفة بن اليمان العبسى »
« جندب بن جنادة الغفارى » [١] ايله « منذر بن عمرو »
« حاطب بن ابی بلتعنه » ايله « عويمر بن ساعده »
« سلمان فارسى » ايله « ابو الدرداء عويمر بن زيد »
(١) كبار صحابة كرامدن « ابو ذر الغفارى » رضى الله
عنه حضرتك اسملردير !

« بلال حبشی » ایلہ « ابورویحہ عبداللہ بن عبدالرحمن
خشمی » حضراتی عقد رابطہ مواخات ایتدیلر . رضی اللہ
تعالی عنہم اجمعین !

حتی ایشته بومواخانہ بناء اهل ومالندہ « عبدالرحمن
بن عوف » حضرتلرینک شریک مناصف قبول ایدلمسی
خصوصی طرف جلیل پیغمبریدن « سعد بن الربیع »
رضی اللہ عنہ حضرتلرینہ امر بیورولمش ، انصارئ
مشارالیہ دخی ایکی زوجہ سندن « عمرہ بنت حرام » ی
همان بالتطليق اکا ترک وتزویج ایدهرک مالنه دخی شریک
قبول ایلہ مشدی .

بر مدت ایشته بو نسبت اخوت ایلہ یکدیکنندن
میراث الدیلر . لکن وقعہ بدردن صوکره او صورتله
اولان مواخانک حکمی باطل قاله رق توارث منسوخ
اولمشدر .

۱۶

— اراجیف یہودیہ —

بوسنه ایچنده بر اراق سحره کفار یہود . کویا

دین اسلامی قبول ایدوبده محمد [علیه السلام] تابع
اولانلرک هیچ ذریتی اولماق اوزره بر سحر مخصوص
ترتیب ایله دککری خبرینی اشاعه ایتدکرنندن اهل اسلامدن
بو شایعاته اینانمق ایسته مش اولانلرک بعضی، آرزو
تأسفدن خالی قالماشدی .

حضرت پیغمبر ایسه اصحاب کرامنه :
— « هیچ تأسف اولنسون ! زیرا جناب حق
بکا وعد بیوردی که شریعتم الی قیام الساعه باقی و او
شریعتله متشرع اولانلرده بنم اتم اوله جق او حالده
اتم الی قیام الساعه باقی اوله جقدر . سحره نك اوباده
ایده جککری سحرک بزه قارشى زره قدر تأثیری ده
اولیه جق ! »
زمیننده کی کلام معجزات انجام نبویسی ایله اهل اسلام
متسلی اولشلردی .

اخیراً انصار کرامدن « نعمان بن بشر » ایله مها-
جرین کرامدن « عبدالله بن زبیر بن العوام » تولد
ایدنجه او شایعه سحریه نك کلیاً کذب محض اولدیغی
یاخود تأثیرسنز قالدیغی مرتبه بداهته واره رق اهل
اسلام ممنون و خدای متعال حضرتلرینه متشکر
اولشلردر .

﴿ مشروعیت اذان محمدی ﴾

ایشته هجرنک بو برنجی سنه سنده اذان محمدی
 اوقونمق مشروع قیلندیغندن حضرت « بلال بن رباح
 الحبشی » رضی الله عنه افندیز مؤذنلک شرفنه مظهر
 اولشدر . نماز و قتلرنده اهالی اسلامیهنک مسجده نه
 صورتله دعوت ایدیه جکی حقنده بر کره بین الاسلام
 مذا کره واقع اولشدی . روایت کوره یوم مذا کره نک
 کچه سی اصحاب کرامدن [عبدالله بن زید بن ثعلبه]
 ایله [عمر الفاروق] رضی الله عنهما حضرتلرینه اذان
 واقامتک اصولی عالم معناده تعلیم ایدلدیکنندن افندیز ،
 او وجه مکشوفی تصویب بیورمشلردر .



فصل خامس

(ایکنجی سنه هجریه وقایعی)

وقعه ابواء . وقعه بواط . وقعه ذی العشیره . استطراد
 وابو تراب . وقعه بدر اولی . وقعه بطن نخله . کعبه
 معظمه نیک قبله کاه مسلمین اولدینی . فرضیت صیام رمضان .
 غزوه بدر الکبری . غزوه قرقره الکدر . غزوه بنی قینقاع
 غزوه سویق . وجوب صلات عید اضحی ونحر . جناب علی
 ایله فاطمه الزهرا نیک ازدواجی . فوت امیه بن ابی الصلت

۱

— ❧ — وقعه ابواء ❧ —

شهر صفرده ایدی سلطان هر دوسرا افندیمر کبار
 انصار کرامدن « سعد بن معاذ » رضی الله عنه حضرت لرینی
 مدینه ده قائم مقام بر اقدن صوکره لواء شریف سعادتق
 حضرت حزه رضی الله تعالی عنه افندیمره ویره رک
 التمش نفر مهاجرین ایله برابر مدینه دن مکه سمتنده
 کائن « بودان ، ابواء » قریه لرینه طوغری حرکت
 بیوردیلر .

مقصود همایونلری ، او طرفلرده قریشك چكن
قوافل تجاریه سنه يتيشوب تعرض ايتك و بنی كسانه دن
« نجس بن عمرو » ك ریاست اداره سی التند بولنان
« بنی ضمره » عشیرتی ده تحت اطاعت و انقیاده المق
ایدی .

حالبوكه « ابواء » قریه سنه وصول همایونلرنده
قافله قالقوب كندی نی كنار سلامته قدر ایصال ایدیه بیلش
اولدیغندن امان ایستیان عشیرت مرقومه [فیما بعد اعدای
« بن اسلامه » هیچ بر صورتله مظاهر اولماق و عندالایجاب
اهل اسلامه طرفدار بولماق] شرطیله مظهر امان بیوریله رق
عودت ایدلدی .

روایتیه كورده ده والدئ ماجدئ رسالتینا هیلرینك
قبرلرینی حاوی اولان قریه مذكورده اون بش كون
اقامت همایونلری شرف وقوع بولشدر .

*

**

۶

— ❧ — وقعه بواط ❧ —

ابواء وقعه سنی متعاقب شهر ربیع الاولده مكه دن

یوز کشینک محافظه سی التنده اوله رق بر قافله نك یول
الديغی وریاست امور محافظه نك ده « امیه بن خلف
الجهنی » ده بولنديغی مدینه جه مسموع همایون جناب
پیغمبری اولدیغندن رسول مکرم افندیز همان « سائب
بن عثمان بن مظعون » ی وعلی روایة « سعد بن معاذ »
رضی الله عنها حضرتلرینی مدینه ده بالاستخلاف ایکی یوز
نفر اهل اسلام ایله برابر حرکت بیوردیلر .

لواء شریف ، مهاجرین کرامدن « سعد بن ابی وقاص »
رضی الله تعالی عنه حضرتلرنده ایدي .

« بواط » نامنده کی محله وصوللرنده حرکت اسلا -
میه دن خبر آلان قافله نك صاوشوب کیتدیکی ایشیدیلهرک
عودت بیورلمشدر .

*

**

۴

— وقعۃ ذی العشیره —

ابو سفیانک بر قافله ایله مکه دن حرکت وشامه
عزیمتی مدینه ده ایشیدلمش اولغله ایکنجی سنه هجریه سی
جمادی الاولیسنده حضرت حبیب خدا افندیز ، معیت

همایونلرنده یوز الی نفر اهل اسلام بولندیغی حالدہ
اوستمه طوغری حرکت بیوردیلر .

مدینه ده بودفعه « ابوسلمه بن عبدالاسد » رضی الله
عنه حضرتلرینی قائممقام براقش ولوا شریفی حضرت
جزه رضی الله عنه افندیمزه تسلیم بیورمشلردی .

ینبع طرفلرنده ذوالعشیره نام محله وصول همایونلرنده
قافله نک کیتدیکی خبری الندیغندن اوحوالیده ساکن
بولنان بنی مدلج ایله عقد صلح ومسالت وانلره — بنی
ضمهره عشیرتک ایله دیکی شرط اوزره — برقطعه
امانتامه احسانیله مدینه یه عودت بیورلدی !

استطراد

و

« ابوتراب »

ابوتراب ، رسول ذیشان علیه صلوة الرحمن
افندیمز طرفندن جناب علی المرتضی یه ویرلمش برکنیه
لطیفه در :

ذوالعشیره موضعنده حبیب خدا حضرتلری، جناب

علی بی ایستدیک حالدہ میدانده کورہ مینجه قالقوب انی
 آرامش ، نہایت بولشدی . جناب علی ایسه برخرما
 اغاجی سایہ سنده یوزینی طوپراغه قویوب او یومشدی
 ایشته اوزمان نومدن ایقماظی ایچون « قم ! یا
 ابتراب ! » دیه ندا بیورلدیغندن اوندا ی همایون ،
 اندن صوکره جناب علی کرم الله وجهه افندیمرک
 « ابتراب » کنیه سیله مکنی قالمسنه سبب اولدی !
 مع مافیہ بوکنیه حقیقہ بر باشقه روایت دها واردرد .
 انہی

•
 * *

ع

— وقعة بدر اولی —

مکہ جہتلرنده صحرا نشین اولان طوائف عربدن
 و « فہر بن مالک » نسلندن « کرز بن جابر الفہری »
 نامندہ بر شخص ، مشرکیندن بر فرقہ ایله برابر مدینہ
 جوار لرینہ دکن کلہرک اہالیسنک حیواناتی غارت ایله
 دیکی خبری ایشیدلدی . انک اوزرینہ رسول محترم
 افندیمر ، « زید بن حارثہ » رضی الله عنه حضرتلرینی

مدینه ده قائم مقام براغوب او جانبہ طوغری عزیمت و کرزی
تعقیبہ بدء و مباشرت بیوردیلر .

لواء شریف ، بووقعه ده جناب علی المرتضی کرم
الله وجهه افندیز حضرتلرنده ایدی لکن یتشیلہ میهرک
عودت همایون وقوعبولدی !

*

* *

⑤

— وقعة بطن نخله —

ابن جابر فہرینک تعقیباتندن صوکرہ عودت علیہ
جناب احدیہ صرہ لرنده مکہ ده احوال قریشی تجسس
ضمننده ذات سامی رسالتیناہی ، خالہ زادہ لری «عبداللہ
بن جحش الاسدی» رضی اللہ عنہ حضرتلرینی ، معیتہ
«سعد بن ابی وقاص ، عکاشہ بن محصن الاسدی ، عینہ
بن غزوان ، ابو حذیفہ بن عتبہ بن ربیعہ ، سہیل بن بیضاء ،
حامر بن ربیعہ ، واقد بن عبداللہ ، خالد بن بکر» رضوان
اللہ تعالی علیہم اجمعین ! حضراتنی ترفیق والنہدہ ایکی
کونلاک مسافہ کیدلینجہ او قونلماق شرطیلہ [بسم اللہ

الرحمن الرحيم . اما بعد فسر على بركة الله بمن تبعك من اصحابك حتى تنزل بطن نخلة فترصد بها غير قريش . لعناك ان تأتينا منه بخبر [عبارة شريفة سندہ نامہ ہمایون اعطا بیورہ ورق جانب بطحایہ طوغری اعزام بیورمشدی کہ روایتہ کورہ زمان حرکت . سلخ رجبہ ایدی . لکن اشہر حرمدہ وقوعہ کلدیکی مشہور اولان اشبو وقعہ اشخاصنک سلخ رجبہ کی حرکتلری ایلہ اشہر حرمدہ وقوعہ بولدیغی روایتی قابل توفیق اولہ مامقدہ در [۱]

بولدہ ایکی کون مرور ایدی . جناب عبد اللہ رضی اللہ عنہ حضر تلری اونامہ ہمایونی اچدی او قود قدن صوکرہ رفقاسنہ دیدی :

— « ایچکزده هانکی بریکز دونمسنی ایسترسه

[۱] اشہرم حرم ، مشہور اولان قولہ کورہ « غوال ، ذی القعدہ ، ذی الحجہ ، محرم » درت آیلردر . لکن شہر ذی الحجہ نک یکرمنجیسندن ربیع الاخر اونہ دکین اولدینی و كذلك ذی القعدہ نک یوم عاشرندن ربیع الاول یوم عاشرینہ قدر بولندی روایتی قول آخردر .

اشبو شہور اربعہ نک اشہر حرملہ تسمیہ ایدلسندہ سبب ، زمان جاہلیتدہ شہور مذکورہ ایچندہ قتل و قتالک حرام عد و اعتقاد ایدلمکدہ بولنش اولسیدر !

دونسون ماذونيت واردر . ليكن بن اولورم ده ينه
دوئمه جكم !

« رفقاسى ده اكا :

— « بزم ايچون ده دونمك يوقدر . توكلنا على الله »

جوابى ويرديلر .

بعده عزم وحركتلرينه برقاندها قوت وشدت
ويره رك دوام ايتديلر . انجق ايچلرنده « سعدابن ابى وقاص »
ايله « عتبه بن غزوان » دوه لر بنى نجران نام محلمه غائب
ايتدكلرندن تعقيات وتحريات چيقمشلردى .

جناب عبد اللهك اشبوهيئت تجسسيه سى « بطن نخله »

يه واريغى زمان طائف يولندنبرى بريوك قافله نك كلديكى
وقافله نك رئيس سوقياتى « عمرو بن الخضر مى » اولوب
« عثمان بن عبدالله بن المغيرة المخزومى » ايله « حكم بن
كيسان بن عبدالله » ك ده اكا رفيق معاون اولديغى
اكلاشيلشدى . قافله نك حوله سى ده سراپا اوزوم ايله
سختيان ايدى :

جناب عبد الله رضى الله عنه حضرتلرى ، ارتق
دوشونمكه باشلادى . زير اقاله يه تعرض ايتسه امر ييغمبرى يه

قارشى خلاف كتيرمش اوله جق ايتسه كندى تجسماتندن
او قافله واسطه سيله قریش، خبر اله جق ایدی.

نهایت كندى كندینه « كفار قریش نه بیلیركه اشهر
حرم ندر » ديهرك هجوم وتعرضه قرار ویردى كه او
زمان شهر جادى الاخره نك يوم اخیری ایدی .

قافله مرقومه قارشیدن باقوبده جمعیت اسلامیه یی
كوردیكى زمان خوف و خشینه دوشدیکندن جناب
عبدالله، كندى اصحابنه :

— « قافله خلقی سزدن قورقه رق احتیاطه دوشدی
كندیلرینی تأمین ایچون ایچكزدن برینك باشنی تراش
ایدوب انلره كوندريكز تاكه مخلوق الرأس اولدیغنی
كورهرك امین اولسونلر »

دیدى . اصحاب كرام دخی « عكاشه » رضی الله عنه
حضر تلى باشنی تراش ایتدكدن صوكره او طرفه اعزام
ایتدیلر .

قافله ايسه عكاشه یی مخلوق الرأس كورونجه —
« قوم عمار فلا باس علینا » ديه امنیت تامه اظهار ایتدی .

*

**

ایشته اولوجهله بولدیغی امنیت فرصتندن بالاستفاده

جناب عبدالله رضى الله تعالى عنه حضرتلرى . ايتديكى
هجوم و تعرضده قافله نك رئيسى بولسان « عمرو بن
الخضرمى » بى قتل و رفيقلىرى « عثمان بن عبدالله » ايله
« حكيم بن كيسان » ى اسير ايتدكدن صوكره دونوب
سالما و غانما مدينه يه كمشدر .

ملت اسلاميه نك يانمغه برنجى دفعه اوله رق موفق
اولديغى غنيمت، ايشته بو غنيمتدر .

لكن رسول كبريا افنديمى ، جناب عبدالله
حركتندن طولاي متأسف اوله رق صحابى مشاراليه
توبىخ ضمننده اكا خطاباً .

— « يا عبدالله ! سكا ديمدى كه اشهر حرمده قتال
اولسون ! »

بيورديلر . اصحاب كرامك كافه ده بوسرزنش همايون
رسالتپناهيده يكربان اتفاق اولمشلردى .
اصحاب سريه ايسه جوابده :

— « يا رسول الله ! بز عمر بن الخضرمى بى اولدير .
ديكمز اقشام يكي برهالال كوردك اما بيليز كه شهر رجبه مى
يوقسه جادى الاخره يه مى تصادف ايتدك »
ديه بيلديلر .

بعده فخر كائنات افنديمى ، كرك او ايكي اسيرى ،

كرك ديكړ اموال غنیمتی حفظ ایدہ رك حقنہ شر
فوقو عبولہ جق امر الہی یہ انتظار کوستردی .

بر اراق کفار قریش مکہ نك :

— « محمد [علیہ السلام] اشہر حرمة رعایتی ندن

بوزبور اشہر حرمة قتال جائز میدر ؟ »

دیدیکاری ده ایشیدلدی .

ایشته بونی متعافب استعید بالله [ویسألونك عن

الشہر الحرام قتال فیہ قل قتال فیہ کبیر!] آیت کریمہ سی

نازل اولدیغندن ذات عالی احمدی ، اموال غنیمتی بین

المسلمین تقسیم بیوردیلر .

مشرکین مکہ اسیرلرینی المق ایچون مدینہ

منوریہ آدم کوندرمشملر ایسہده سعد ایله عتبہ

رضی اللہ تعالی عنہما نك سلامتله معاودت لرینہ دکین

فدیہ قبول اولنہ میوب انجق مشار الیہما نك سالما

مواصلت لرندن صوکرہ قبول اولنہ جغی وعکسی تقدیرندہ

انلرہ فدائ ایکی اسیرك قتل ایدیلہ جکی جوابی ویرلمشدی

لکن ہر ایکی صحابی محترم دہ سالما کلنجہ اسیرلرک فدیہ لری

قبول اولندی بناء علیہ اسیرلردن « عثمان بن عبداللہ » ایله

« نوفل بن عبداللہ » بدل ویرہ رك قورتلش « حکم بن کيسان »

شرف اسلامی قبول و احراز ایدہ رك مدینہ دہ

قالشدر . جناب حکم در دنجی سنه هجریه ده وقوعه
کلان بر معونه فلاکتنده شهید اولش عثمان ده مکده کافراً
وفات ایش نوئل دخی روایت کوره خندق غزوه سنده
آتی خندقدن اتلایمق اوزره حله ایدرکن آتیه برابر
خندقه دوشوب اوراده جناب علی المرتضایک ضرب
سیف سطوتیه هلاک اولشدر .

٦

﴿ کعبه معظمه نیک قبله کاه مسلمین اولدینی ﴾

مدینه ده مشرکین یهود ، دیمک ایستدیلرکه :

— «سنک نیشرا تیدیکنک دین اسلام ، بزم دینزدن
باشقه بر دین اولسیدی هر ایکیمزک ده قبله کاهمز بر
اولمزدی »

اولوقت اهل اسلامک قبله سی بیت المقدس اولدینی
کبی مشرکین یهودک ده اوایدی .

بناء علیه رسالتیناه افندیز ، قبله نیک کعبه
معظمیه تحوانی قلباً ارزو پیوردینی حالده برکون
مدینه ده صلات ظهری و علی روایه صلات عصری

جاعةً و — اوزمان قبله کاه مسلمان اولان — بیت المقدسه
متوجه ادا بیورمغه باشلا یوب ایکی رکعتی قیلدقدن صوکره
اوچنجی رکعتک رکوعنده ایکن حق تعالی ، کعبهیه
توجیه وجوه اولنمنی استعید بالله [قدنری قلب و جهک
فی السماء فلنولینک قبله ترضیها فول و جهک شطرا المسجد
الحرام و حیث ما کنتم فولوا وجوهکم شطره] آیت
کریمه سیله امر بیوردیغنک عقیبنده همان نمازده و حالت
رکوعنده یوزینی کعبه معظمهیه دوندیر رک قالان رکعتی
اورایه متوجه ادا بیوردیلر .

ایشته بووقعه نك زمان وقوعی مختلف فیه ایسده
بعض تواریخ ، شهر رجب ، بعضی ده شهر شعبانده
اولدیغنی کوستریور . لکن هر حالده بو ایکنجی سنه
هجریه ایچنده وبو ایکی آیلرک برنده وقوعی متفقدر .

* *

۷

— فرضیت صیام رمضان —

شهر شعبان شریفده ایدی . اهل اسلامک اوروج

طو تملری خصوصنی حق جل و علا حضرتلری استعیند
 بالله [یا ایها الذین امنوا کتب علیکم الصیام کما کتب علی
 الذین من قبلکم] آیت کریمه سیه امر بیورد قدن صو کره
 نه وقت طو تلمسی لازم کله جکنی ده [شهر رمضان الذی
 انزل فيه القرآن فلیصمه] آیت کریمه سیه تنبیه
 وتصریح بیور مشدر .

*

* *

۸

— غزوة بدر الكبرى —

بو غزوه ، ایکنجی سنه هجریه رمضانیا اوائلنده
 ظهور ایتمکه باشلا یوب اون یدنجی — علی روایة اون
 سکرنجی — کوننده واقع اولمشدر :

« ذوالعشیره » وقعه سنده تعقیب ایدلیدیکی حالده
 قورتیلهرق شامه کیتیدیکی یوقاریده ذوالعشیره وقعه سی
 قسمنده یازدیغمز قافله نك شامدن کلیتلی مال آلوب قرق
 نفر سوارى محافظه فرقه سنك نظارتی التنده اولهرق

دوندیکی جبریل امین واسطه سیله مسموع و معلوم همایون
رسالتیناهی اولمغله اولاه احوال قافله یی بحسب ایچون
اصحاب کرامدن « طلحه بن عبدالله » ایله « سعید بن زید »
رضی الله تعالی عنهما حضرتلرینی شام جانبنه ارسال
ایله مش ، کندیلریده بر فرقه عسکریه ایله حرکت ایتک
اوزره خارج مدینه ده « رواء » نام محله عسکری
تهیه و معاینه بیورمشدر .

*
**

اهل اسلامک قریش علیه حركته شدتلی خواهشی
واریدی :
عسکر ترتیب بیوریلیر ایکن انصار کرامدن « سعد بن
خنیسه » رضی الله عنه حضرتلری ، باباسیله برابر غزایه
کیتک ایستدیکي رسول اکرمه عرض اولندی : اوندیمز ،
هر ایکسینه خطاباً :

— « بریکز کیتسون ! بریکز قالسون ! »

دیه امر بیوردی . بناء علیه بابا ایله اوغلی ارسنده
قرعه آتلدی . قرعه ده جناب سعد حضرتلری قزانمشدی !
لکن ینه غزایه کیتکه اولان رغبت و امیدی باقی

اولان خيتمه حضرتلری طورهمدی • اوغلی سعهده :

— « یا سعد ! نوبتکی بکا ویر ! »

دیدیکی حالده سعد :

— « آ بابام ! بوجنتدر • باشقه برشی اولیدی •

ویریردم »

جوانی ویروب بدره کیتمش وارادیغی رتبه شهادتی

احرازه موفقده اولمشدر • رضی الله تعالی عنه !

* *

اذن همایون — اثنای معاینهده افراد عسکریه سی

میاننده معلول ، معذور و یاخود سنأ اوافق اولانلر

ایچون عودته اذن همایون شرفصادر اولدی •

بناء علیه داماد رسالتپناهی جناب « عثمان بن عفان »

رضی الله تعالی عنه حضرتلرینک زوجه محترمه لری

« رقیه » رضی الله تعالی عنها حضرتلریله ، ابوامامه

حضرتلرینک والده لری اغیرجه کیفسر بولملرندن طولای

حضرت عثمان و ابوامامه رضی الله تعالی عنهما حضرتلری

مدینهده قالمقده مأذون اولدیلر •

« عمرو بن ام مكتوم » حضرت تلمری [۱] ده مسجد شریف نبوی امامت علیه سنده ، ابولبابه الانصاری حضرت تلمری ده مدینه امور محافظه سی نظارت جلیله سنده مأموراً براغلیش ایدیلر .

کذلک مهاجرینک ، زمان هجرت لرنده وطن و مسکن اتخاذ ایله مش اولدقلری « عوالی » نام قریه لرده نفاق و شقاقه دائر بعض حوادث اختلاویه نك حدوثی ایشیدلمکله « حاصم بن عدی العجلانی » رضی الله عنه حضرت تلمری دخی « قبا ، عوالی » قریه لرده کی اختلافاتک دفع واصل . حنه مأمور بیورلمشدی .

.*

سوقیات و حرکات عسکریه نك تسهیلی ایچون وسائط نقلیه دن اوله رق یا نلرینه یالکز یتش دوه آله بیلیش اولان مجموع عساکر اسلامیه — التمش دردی مهاجریندن ،

(۱) صحابی مشار الیه ک اصل اسمنده اختلاف وارد : بر قوله کوره « بنی عامر بن لؤی » دن (شریح بن مالک بن ربیعة الفهری) نك اوغلی (عبدالله) در . قول آخره کوره ده (بنی عامر بن هلال) دن . (قیس بن زائدة بن الاصم) ک اوغلی (عمرو) در . لیکن هر حالده اعمی ایدی !

متباقیسی هپ انصار کرامدن اولمق اوزره اوچیوز اون
اویچ و علی روایة — اوچیوز بش نفردن عبارت
ایدی .

ایچلرندن ده یالکز « مقداد بن اسود ، زبیر بن العوام ،
مرتد غنوی » رضی الله تعالی عنهم حضراتی آنلی
ایدی . [۱]

افراد عسکریه ، او دوه لره مناوبه بینر ، حضرت
رسول اکرم صلی الله علیه وسلم افندیملرک « غضباء »
اسمده کی دوه لرینه ده کندی ذات همایونلری ایله حضرت
علی المرتضی ، زید بن حارثه رضی الله تعالی عنهما
حضراتی نوبتله رکوب بیورورلردی .

*
* *

ملت اسلامیه ده اک اول رایت حرب و مظفریت
قالدیرمش اولان بو اردوی همایونده اویچ عدد سنجاق
موجود ایدی .

بونلردن مهاجرینک سنجاقی « مصعب بن عمیر »

(۱) جناب مقداد ، « بعزجه » زبیر دخی « یعسوب »
اسملی آنلرینه راکب ایدیلر .

النده ، انصار کرامکده بری خزر ج ، دیکری اوس
قبيله سنه مخصوص ایکی سنجاقلری وار ایدی .

بر روایتده ایکنجی سنجاقل علی بن ابی طالبده
او چنجیسیده « قیس بن صعصعة الانصاری » حضرتلرنده
ایدی .

*
~

تجسس — طرف عالی پیغمبریدن تجسس ایچونه
کوندریلان جناب « طلحه » ایله « سعید » رضی الله
تعالی عنهما حضرتلری شام یولنده بر قویو باشنده
علف صاتار ایکی عرب شخصنه تصادف ایتیش وانلر ،
او عربلرک : « یارین بورادن قافله کچه جکدر . شو
علفمی اوکا صاتار ایسه م پاره کی ویررم » دیه تقاض
ایله دکلیرنی ایشتمش اولمغله قافله حقنده دیکر کونلا
استیضاحاته لزوم کورمکسزین انجق او قویودن بر از
صوآلهرق دونمشلردر .

حالبوکه قافله نک اداره حفظ و حایه سی رئیس
« ابوسفیان » ، جناب طلحه نک قویو باشندن همان

مفارقتنی متعاقب رفیقی « عمرو بن عاص » ایله برابر
یتیشه رله علفجی عربله :

— « هیچ محمد [علیه السلام] دن، مدینه لیلردن خبر یکر
واری ؟ بورادن کلان کچن اولدیمی ؟ »
دیه صوردی .

ایکی عرب ایسه جوابده :

— « مدینه لیلردن خبریمز یوق . لکن شمدی ایکی
آدم بورادن صو آلوب دوندیلر . دوهیه بنیورلردی .
دیدیلر . ابو سفیان ، دوهنک ایزلرینی تعقیب ایدوب
براز ایلری یه کلدی . یولده ویرده برشیئه تصادف ایتدی :
بهره ایدی . ایشته او بعرمی [دوه ترسی دیمکدر]
قاریشیدیره رق باقدی . ایچنده خرما چکردکی بولندیغنی
کورونجه :

— « ایشته بو بهرنک صاحبی اولان دوه ، مدینه
دندر . زیرا مدینه دوه سندن باشقه هیچ بر دوه خرما
ییز . شو حالد محمد [علیه السلام] بزم پیشمزده در
دیدی . وقافله سنی همان کری طرفه ، ساحله طوغری
اعاده ایتدی . انکله برابر « ضمضم بن عمرو الغفاری »
نامنده بر شخصی مکه ره ساسنه سریعا خبر ویرمک اوزره .

يكرمي التونه استيجار ايدەرك يوله چيقاردى .

* *

ابوسفیان ایسه طلحه رضی الله عنه حضرتلرینک
تجسس اتندن خبردار اولسندن طولای قوزقه رق مکّه یه
مخبر کوندر مکّه برابر قافله یی سمت ساحله طوغری بش
منزل کیری یه اعاده ایتش وجده یه وصولنده ممکن
اولدیغی مرتبه سرعت مخصوصه ایله حرکت ایدەرك
اهل اسلام عسکرینک مدینه دن چیقدیغی ائاده بدر
حذا سندنبری صاوشوب مکّه یه قاچمقده بولمشدی !

* *

رؤیا — غریبدرکه « ضمضم بن عمر والغفاری »
تک مکّه یه وصولندن اوچ کیجه اول عمه نبوی « عاتکه
بنت عبد المطلب » ، رؤیا سنده :
— « بر شخصک دوه اوزرنده اولدیغی حالده
مکّه یه کلوب « ای جماعت ! ای آل عذر ! اوچ کونه
دکین معرکه یه یتیشکر ! » ديه ندا ایتدیکنی متعاقب همان
جبل ابی قبیسه عروج برله اوندا یی انده تکرار لدقن
صوکره جبلدن قوپارهرق اشاغی یه طوغری مکّه یه

یوارلادیغی قایا ، پارچه لنوب هر پارچه سنک بتون مکه
 خلقی خانه لرینه اصابت ایله دیکنی ! ۰۰۰
 کورمش و صبا حلین عاتکه ، بورؤ یاسنی - قریشک پک
 یقینده بیوک بر مصیبتیه اوغرایه جغی ایله تعبیر ایتدکن
 صوکره - غایت مکتوم طو تلسی اخطار یله برابر برادری
 عباس بن عبد المطلبه سویله مشدی !

حالبوکه عباس ، رؤیانک ظاهراً کوستردیکی اهمیت
 فوق العاده یه قارشى کتمه بر درلو موفق اوله میهرق
 الک زیاده سودیکی « ولید بن عتبه » یه - وعلی روایه
 دها باشقه سنه - صورت محرمانه ده سویله دیکندن اوده
 پدری « عتبه » یه اودخی دوستلرینه اچمش دیرکن
 ارتق اغزدن اغزه کیره رک نهایت بتون اشراف ورؤسای
 قریشک قولاق لرینه قاچوب کیر مشدی .

ایرته سی کون عباس ، حرم شریف کعبه یه کیتدیکی
 زمان حول بیت الله ده اورؤیا حقنده تصادفاً سویله شمکده
 بولسان « عتبه بن ربیعہ ، شیبہ ، ابوجهل ، امیه بن
 خلف ، ابی بن خلف ، زمعه بن الاسود ، ابوالختری »
 کبی برچوق اشراف ورؤسای مشرکینه راست کلدی .
 ایچلرندن ابوجهل :

— « یا عباس ! طواف ایتدکنن صوکره بورایه

کل ! »

دیه چاغیردی .

عباس ، بعد الطواف کیتدی . اورؤ سایه قاریشدی .

اوجهل اوزمان عباسه دیدی :

— « همشیره کزه نه وقت پیغمبرک کلدی ؟ ای

عبد المطلب اوغلاری ! ارککریکزک دعواوی نبوت

ایتدیکنه قناعت ایتیمورده شمـدی نسوانکزده می اويله

دعوالره قالقشه جق ؟ »

ابو جهل لعین ، یالکز بو قدر طوقاناقلی لاقردیلری

ابنای عبد المطلب وخاصةً عباس حقنده کافی کورمدی ده

دها یك چوق تفوهات و تجاوزات بوجهلانه ده بولندی .

حتی ملعونک او تفوهات ابوالجهلانه سی طویوله رق چوجقلره

وارنجیه دکین ایشتمدک کیمسه قالمدی .

اقشام بنی عبد المطلب قادیلری عباسک باشنه

طویلانوب هب براغزدن :

— « ابوجهله نیچون بو قدر یوز ویریورسکز ؟

فاسق حریف ، یوز بوله بوله شماردقجه شیماردی .

ارککریکزه سویله مدک برشی براقدیغنه قناعت ایتیمورده

شمی قادیلریکزه دخی دیل اوزاتمغه باشلادی . بوکا .
ده می سکوت ایده جکسکز ؟ »

دیه حدت و تأثر اظهار ایتدیلر . که بو سوزلر برتوبیخ
شدید ایدی .

قادیلرک شو توبیخاتنه اوغرا دیغنی کورن عباس ،
کوجی پک زیاده سیله اوزیلرک حیت طمرلرینی قاپارمش
بولدی . وکندی کندینه :

— « هله صباح اولسون ده باقهیم بن او حریفه
نلر یاپارم ؟ اگر کوتو لاقردی ایتک هنرایسه بن اکا حدینی
بیلدیریرم ! »
دیدی .

*

**

صباحلین عباس ، همان حرم شریفه کیتدی .
حریفک یقه سنه صارلق ایچون مناسیجه بر بهانه
ارایور ایدی .

حالبوکه تلاش و خلیجانی ایما ایدر برندای ناکهانی
هرکسک سامعه دقنی جلب ایتدی :

— « ای آل عذر ! ای معشر القریش ! چاپک
یتیشکز ! یوقسه شام قافله سی محمد [علیه السلام] ک
النه دوشیور ! »

فریادی ایشیدن هر افراد قریش ، اوسمه طوغری
 قوشدی . ایشده اووقته دکین اکلاشیلوب - ضمیمک
 دوه اوزرنده اوطوردیغی حالدده اويله کوجی یتدیکی
 قدر باغیرمسيله - رؤیانک حقیقتی ارتق تظاهر ایش
 اولدیغندن عباس ، ابوالجمله باشقه درلو معاملهده بولمغه
 لزوم کورمدی .

*

**

غلیان قریش - قافله یی قورتارمق ایچون ابو
 سفیانہ یاردم ایتک اوزره ابو جهل وسائر رؤسای
 قریش :

— « محمد [علیه السلام] بونی ده عمرو بن الحضرمی نك
 سختیان ایله اوزومدن عبارت اولان مالیمی ظن ایدیور
 مالزه تعرض نه دیمک اولدیغنی بز اکاشمدی اوکره دیرز »
 کبی پریشان سوزلرله هزکسی تشویقه ونفیرعام
 صورتیله اهل مکه یی اهل اسلام علیهنده ایاقلاندرمغه
 باشلادیلر .

لکن بویله شدتلی ، اهمیتلی اولان تدارکات حریه -
 لری صرہ سنده حاتکه نك - ارتق صحتی اکلاشیش
 دیمک اولان - رؤیاسندن یورکلرینه مستولی اولان رعشات
 خوف و اوهامی بر درلو تسکینده ایدمه میورلردی .

حتی او سبیه بناء ایدی که ابو لهب ، حضرت پیغمبر
صلی الله علیه وسلم حقنده کی عداوت و اهاناتی و عموماً
اهل اسلام علیهنده کی شدت حرکاتی ایله معروف اولدیغی
حالد - معنای پک واضح اولان - او رؤیایه قارشی
بالذات کیتکه هیچ جسارت ایدمه دیکندن «عاص بن
هشام» ی ذمتنده اله جغی درت بیک درهمه مقابل بدل
طوتہ رق کندی یرینه کوندردی .

*
*
*

ربیعہ نك اوغلاری «عتبه ، شیبه» دخی کیتک
ایسته مدیلر . لکن ابو جهلک الندین یقه لرینی قورتاره مدیلر .
حالبوکه بو ایکی قرنداشلرک ابو سفیان ایله قرابت نسبیہ
وصهریه لریده وار ایدی .

مثلاً ابو سفیانک زوجته سی مشهوره «هند»
بو عتبه لرک همشیره سی اولدقدن باشقه عتبه لر ربیعہ نك
اوغلی ابو سفیانده «حرب بن امیه» نك اوغلی اولوب
«امیه» ایله «ربیعہ» ایسه «عبد شمس بن عبد مناف» ک
اوغلاری ایدیلر . شو حالده حسب القرابه سودکری
ابو سفیانی او یله بپوک برتهلکه دن قورتارمق ایچون
یاردم ایتک طبیعی که کندیلرنجه پک ملتزم ایدی .
لکن ابو سفیانہ نسبتاً دهها زیاده سودکری جانلری

یاردم یولنه کیتدکری حالده عاتکه نك رؤیاسیله تهلكه ده .
قاله جق یاخود قالمش دیمك اوله جغندن کیتك ده بردنبره
ایسته یه مدیلر .

*

**

کذلک « امیه بن خلف » ، کویا اختیارلغندن بختله
کندی قورتارمق ایستدیسده ابو جهل براقدی . الله
بر سرمه دان وسفهای قریشدن « عقبه بن ابی معیط »
دخی بر بخوردان آلوب امیه نك خانه سنه کیتدیلر . وجبانتنه
تعریضاً :

— « اوقدن ، قیلنجدن قاریلر کبی حذر ایدنلره
بونلر یاقیشیر ! »

دیدیلر . اوده ارتق کیتکه مجبوریت حس ایتمش وحسیاتنه
تبعاده کیتشد .

امیه نك بدره کیتماک ایچون بهانه ارایوبده ایاق
سوریمسند سبب وحکمت وار ایدی :

« استطراد »

شویله که :

مدینه ده کبار انصار — کرامدن « سعد بن معاذ

الاشهلی « رضی اللہ تعالیٰ عنہ حضرتلری ، مکہ دہ
 « امیہ بن خلف » ایلہ یکدیگرہ دوست ایدیلر . حتی
 جناب سعد ، زیارت بیت اللہ ایچون مکہ یہ کلسہ امیہ نك
 خانه سنہ اینر ، امیہ دخی تجارت ایچون شام یولنده
 حرکت ایتسه مدینه دہ یالکیز سعدہ مسافر اولور ایدی .
 هجرت نبویه دن صوکره ایدی برکون جناب سعد ،
 زیارت ایچون مکہ یہ کیتش ودوستی بولنان امیہ ایله
 برابر اولدیفی حالده حرم شریف کعبه دہ طواف ایله
 مشغول دخی بولمشدی .

هر ایکسینه اويله بر حالده راست کلان ابو جهل
 لعین امیه یه :

— « یانکده کی کیمدر ؟ »

دیه صوردی . امیه دہ :

— « سعد بن معاذ »

جوابی ویردی . ابو جهل ، سعدہ خطاباً حدتله :
 — « دینندن دونمش بر طاقم کیمسه لری حایه ایتش
 اولدیغکز حالده قورقدن سن ناصل بزم بیتیزی زیارت
 ایدیورسک ؟ هم ده کویا سنر اکا بر چوق معاونتده ده
 بولنه جقمشسکز ! واللہ اکر یانکده امیه بولمش اولسیدی
 سن اهلکک یوزینی بردها کوره مزدک ! »

دیمش و بوکا قارشى سعد دخی :

— « والله اكر سن بنى زيارت و طواف كعبه دن
منع ايتمش اولسيدك سكا اندن دها زياده اغير كله جك
مدينه يولندن بن ده سنى منع ايدردم »
ديه شدتله باغير مشدر .

بونك اوزرينه اميه ، سعده :

— « يا سعد ! ابوالحکمه اويله يوكسك سسله
قونوشمه ! او سيد اهل بواديدر »
دينجه سعد دخی :

— « براق سن ده ! والله بن رسول الله دن ايشتم كه
سنى ده انلر قتل ايده جكلر ! »
سوزيله جواب ويرديكنه متخير اولان اميه :
— « مكده مى ؟ »

ديه وقوعبولان سؤال متخيرانه سنه سعد حضرتلرى :
— « بيلم ! »

جوانخى ويرمش اولديغندن اميه ، ارتق چوق زياده سيله
قورقوب ديتره مشدى . حتى اميه خانه سنه كيتديكى
زمان بو وقعهى ، بو وعيد پيغمبرى بى زوجه سنه ده سويله -
دكدن فضله ينه اكا :

— « بن بوندنبویه مکهدن طیشاری چیقوب بریره
 کیتیه حکم »
 دیمشدی

وقناکه بدرغالبه حریه سی یوز کوستروب ابوجهل،
 هیت اسلامیه علیهنده: « ادرکوا العیر! ادرکوا العیر! »
 دیه سوقیات عسکریه یه باشلادی . امیه ، سعدک تبشیراتی
 اوزمانده ده خاطرلامش اولدیغندن مکهدن بدره حرکت
 ایتکی نفسنجه نامناشب وحنی پک تهلکه لی کوردی .
 بناء علیه ابوجهل ، امیه نک یانته کلوب اکا :

— « یا ابا صفوان ! سن حرکتدن تخلف کوستریور-
 مشسک . حالبوکه سن سید اهل بوادی برآدمسک ! سنک
 بوتخلفکه قارشی انی کورن دیکر رؤسا وافراد دخی
 تخلف ایدرلر »

دیه بعض کونه تعریضات توبیخیه دن صوکره سوزینه:
 — « اکر بزم ایله برابر بدره طوغری خروج
 ایده جک اولور ایسه ک سکا کوزل بردوه البویررم ! »
 وعدینی ده علاوه ایتشدیر .

علامه قسطلانی حضرتلرینک « محمد بن اسحق » دن
 اولق اوزره یازدیغی برباشقه روایتیه کوره امیه یی

بدره حرکتہ تحریرض ایچون ابو جہل ، انک اوزرینہ
سفہای قریشدن « عقبہ بن ابی معیط » نام لعینی تسلیط
ایتمشدی .

سفیه مرقومده آنہ بر بخوردان آلوب امیہنک
یانہ کیتدی . واکا خطاباً :

— « سن بدره کیتماک کبی بر جباتی ابرازایتماکده
اولدیغک ایچون قاریسک . بو سکا یاقیشیر »
دیمش وبو قدر اغیر اولان بر سوزہ قارشى امیہ ارتق
کیتماکده چار ناچار مجبور اوله قالدیغندن موعود دوهی
الیدردقدن صوکره کیتماک ایچون حاضرلنق اوزره
اولدیغنی زوجهسی « ام صفوان » ه سویله مکله او .
کندیسنه :

— « یااباصفوان ! سکا قرنداشک « سعدالیرثی » نک
دیدیکی سوزی اونوتدکی ؟ »
دیدیکی حالده امیہ :

— خیر اونوتدم . لکن بونلرله برابر ازبر مقدار
کیتماکده لازم »

جوانی ویره رک بینوب چیقمشدر . انتہی

رؤیا مسئله سندن طولای عباس ایله ابو جهلک
اره سی پک فنا بر حالده اچیلش ای دیسه ده زمزم سقای ،
کعبه نکه ده تعمیر امانتی کبی مکّه جه مهم بعض بیوک
ایشلرک کندی عهدده سنده بولمسی حسیله عباسک ده
کیری قالمسی قابل دکدی .

قریش عموماً ایشته بو صورتله حرکت ایتدی .
لیکن ایچلرنده حضرت عمر بن الخطاب رضی الله تعالی
عنه حضرت لرینک منسوب اولدیغی « بنی عدی » قبيله
سی یوغیدی .

مکه دن بدر محلته واصل اولنجیه دکن « ابو جهل ،
صفوان بن امیه ، سهیل بن عمرو ، شیبّه بن ربیعّه ،
عتبه بن ربیعّه ، قیس بن صبابه ، عباس بن عبدالمطلب ،
ابو البختری » کبی رؤسا واغنیای قریش هر بر منزله
مناوبه اوزر طقوزر دوه کسوب عسکری اطعام
ایتدیلر .

حالبوکه مکه دن حرکتله بدره طوغری عزیمت
ایدرلرکن ساحل یولیه بدر حذا سندنبری صاویثوب
قافله بی منزل سلامته ایریشدیردیکندن طولای ارتق
بیهدّه یرده یورغونلق ، بوزغونلق ویرمش اولقسزین

عسكرك همان اعاده ايدلمسى خصوصى رئيس قافله ابو
سفيان طرفندن رؤساي قريشه خبر ويرلشدى .

بو خبرك ورودى اوزرينه « ابى بن شريق النقي »
نام كيمسه :

— « مادام كه قافله قورتلمش ، مقصديمز حاصل اولمش
ديمكدر . ارتقى نه لزومى واركه ايلرى يه كيدوب بهوده
يورولهلم »

ديه بنى زهره دن اردوده بولديغى افراد ايله متفقاً
آيريلوب كيجه عودت ايتمش اولديغندن هيچ كليان « بنى
عدى » ايله عودت ايدن « بنى زهره » نك غزوة بدرده
تلفاتى وقوع بولما مشدر .

*

**

قريشك حركتمندن خبر الان ابو سفيان - روايته
كوره - ايكي اوغلى عسكرا ايچنده بولنديغندن وملاحظه -
سنگ نتيجه سنده ده بو حركتك صوكنى پك خيرلى
بوله مديغندن طولاي مضطرب قالمسى اوزرينه بر شخص
عسكرك اردندبرى كوندردى . تاكه ايكي اوغلك لزوم
عودتلى حقه ده كي امر وتنبيهى تبليغ ايدى !

ابو سفيان طرفندن كوندريلان شخص يتيشوب
مرسلتك لسانندن :

— « بن منزل سلامته ايندم . سز دخی دونکز !
 زیرا محمد [عليه السلام] ايله حرب ايتک صوکی خیرلی
 دکدر »
 دیدی .

بو تبلیغات ، قریش عسکرانده کی خوف واوهای
 بردها تازده لیه رک اردولرینک ایچنه ، عودت ايله
 عزیزیت حقنده بیوک بر شعله ظفر سوز اختلاف
 دوشوردی :

موجود عسکر ، رأیاً ایکی فرقه اولدی ! بر فرقه سی
 حرب و قتال فکرنده ، فرقه اخی ایسه اورأیک بسبتون
 علیهنده قالدی !

حالبوکه ابو جهل ، بو اختلاف واختلاله قارشى :
 « والله لا ارجع حتى ابلغ بدرأ ونقسم عشراً ونشرب
 خراً » ديه بر طاقم اوضاع و اطوار بو جهلانده کوستر مکه
 برابر قسملر ایدهرک عسکرینی اهل اسلام علیهنده
 تحریک و تشجیع و حرب و ضرب طوغری تحریص و تحریض
 ایدور ایدی .

لکن کرک رؤیانک ویردیکی وهم و خشیت ، کرک
 ابو سفیانک اینجه بر ملاحظه اوزرینه ایتدیکی تبلیغات
 مخصوصه سنده کوریلان حقیقت ، کرک بنی زهره نك

«ابی بن شریق» ایله متفقاً واقع اولان عودتلرنده کی
اصابت اردودن همان پلک چوغنک دیزنده رابطه متانی
چوزمش اولدیغندن ابوجهلک بیک درلو قسملرله تأمین
ایتمک ایستدیکی شان مظفریت یالکز کندی شخص
جهولانه وعنودانه سنه ترك ایدهرک ایکیوز الی نفر
مقداری عسکر عودت ایتدی .

.*.*

اردوی همایونده مذاکره — حضرت رسوڭ
مکرم افندیز مدینه دن زمان مفارقت همایونلرنده
عسکرینی ، قرق الی کشیلک بر قافله یه کوره ترتیب
بیورمش اولدقلری حالد «صفراء» مرحله سنده و
«ذات القرن» نام قویونک باشنده قریشک کیفیت
حرکتندن وحائز اولدقلری قوه عسکریه سندن خبردار
بیورلدقلرندن ومع مافیه یا قافله ویا قریش اردوسنه
مظفریت طرف حقندن استعید بالله [واذ یعدکم الله احدی
الطائفین انها لکم و تودون ان غیر ذات الشوکه تكون
لکم] آیت کریمه سیله وعد بیورمش اولدیغندن کندی
اردوی همایونلری رؤسا و افرادینک بوباده کی افکارینه

او کرمک لزوم مهمی حاصل اولمغله کیفیتی همان موقع
مذاکره و مشاوره قویدی .

زیرا قرق، الی کشیک بر فرقه ایله محافظه اولنان
قافله نلک اخذ و اغتنامه سوق اولنش اولان بر مفرزه
ایله او زمانه کوره ایله بیک کشیک بیوک بر اردو
قارشینه چیقیویرمک هر حالده مشکلی .

بناءً علیه ذات عالی رسالتپناهی ، عموماً اصحاب
کرامنه خطاباً :

— « ناصل ؟ قافله بی می تعقیب ایده لم ؟ یوقسه
قریش اردوسنک قارشینه می چیقلم ؟ هر حالده بویکی
طائفه نلک برینی بزه جناب حق وعد بیورمشدر »
بیوردیلر . عسا کر اسلامیه نلک چوغی ایسه موجود
قوة اسلامیه نلک کفایتسز لکندن بحث ایده رک :

— « بز قافله نیتیله چیقمشدق . اگر بویله بر بیوک
اردو ایله محاربه واقع اوله جغنی بلسیدک طبیعی که دهاتدار کلجه
چیقمازله لزوم کورینیر ایدی ! »
جوانی ویردیلر .

لکن بو جواب ، رأی همایون پیغمبرییه موافق
کلمدی کیچون رسول اکرم افندیملک مبارک خاطر عاطر
رسالتپناهی لرنه بر درجهیه قدر اغرار عارض اولد .

و اتباعه عهد و میثاق دخی و یردک . ارتق نه ایسترسه کز
 امر بیوریکز ! دکزه کیریگز دیرسه کز بیهله کیرمدن
 دونمک احتمالی یوقدر . هله دشمن دینه قارشى کیری
 قالمق بزم ایچ-ون دکدر . اللهدن رجا ایدرم که بزدن
 ممنون قالمق لغمکه سبب اوله حق شیلری بزد او ، کوستره !
 همان مراد بیور دیغکز سمته عزیمته امر بیوریکز ! حاضرز . «
 دیدی .

ذات عالی رسالتیناهی ، سعدک بو خلوصندن پک
 زیاده سیه ممنون قالدق لریچون همان : [سیروا علی
 برکته الله !] فرمانیه عسکرینی جانب بدره طوغری
 دو براه عزیمت بیور مشدر .

بدره متوجهاً اولان ابشته بوصوکی حرکتده
 خواجه حکمتخانه کائنات علیه افضل الصلوة و اکمل
 التحیات افندیمر حضرتلری عسکرینه دیمشدی :

— « سزه مزده که جناب حق ایکی طائفه دن
 برینه مظفرتی وعد بیوردی . والله بن صانکه قریش
 عسکرینک دوشوب هلاک اوله جغی یرلره شمدی باقیورم »

*

* *

روایت اخرا ده دینیله یورکه :

معرکه اتخا ذ ای دیله جک اولان بدر قریه سنه بر
فرسخ مقداری قریب یرده اینه رک دوهیه را کباً
براز ایلری به طوغری کیتد کیری؛ زمان بر قویونک
کنارنده او طور دیغی منظور همایون پیغمبریلری اولان
بر اختیار شخص ایله ذات عالی رسالتیناهی اره سنده
شومحاوره جریان ایتشد :

افندی مز یوردیلرکه :

— « یا شیخ ! قریش قافله سندن خبرک وارمی ؟
زده در ؟ »

اختیار جواب ویردی :

— « قافله سلامتله مکه به واردی . لیکن مکه لیلر
محمد [علیه السلام] واصحابی علیهنده قیام و حرکت
ایتدیلر ! »

افندی مز بردفعه دهها صوردی :

— « بیلیر میسک محمد زده ده ؟ »

— « ارتق سنک کیم اولدیغیزی ا کلامد قجه سویله هم »

— « نه ضرری وار ؟ اولا سز سویله یکر ! »

— « ایشتم که مدینه دن حرکت ایتش ! مسمو -
عالم طوغری ایسه بوکون « ذات القرن » قویوی
کنارنده اونه جق ، یارین ده بورایه موصلت ایده جکدر ! »

* *

بو محاوره دن صوکره ذات پیغمبری ، جناب علی
المرتضی ، سعد بن ابی وقاص ، زبیر بن العوام رضی الله
تعالی عنهم حضراتی تجسس ضمننده ایلری به طوغری
اعزام بیوردی .

بونلر ایلری به کیتدکارنده قریش عسکرندن سقاییت
عسکریه خدمتیه مأمور اولانلرک صوالمق اوزره بدر
قویوسنه کلدکارینی کوزدیلر .

ایشته او ساقیلردن « حریص » وعلی روایه
« اسلم » اسمنده حضرت علی افندیز طرفندن طوتیلان
بر سیاهی ایله برابر بنی عاص بن سعدک کوله سی « ابو
یسار » لدی الاستجواب عساکر قریشیه بدر قویوسنه ایکی
فرسخ اوتده بریده بولندیغی جوابنی ویردکن صوکره
حضور عالی نبوی به کتیرلدی .

ذات سامی اجدی دخی سیاهی مرقومدن :

— « قریش عسکری قاچ نفردر ؟ »

ذیه صورت او ده :

— « عددینی بیله مم . لکن رؤسای قریش بر کون
 طقوز ، بر کون اون رأس دوه کسوب عسکر میدیر لر »
 جوانی ویردکده طرف ذیشرف نبویدن :
 — « اولیه ایسه بیک نفر یا اوله یا اولمیه » .
 بیورلمشدر .

* *

بدرده مقتله ، معرکه یه وصول لرند ، یولده بیوردقلری
 اوزره شوراسی فلانک مقتلی ، بوراسی فلانک مقتلی
 دیه کورمش کبی - کفار قریشدن بدر کونده تلف
 اوله جقلرک مقتلارینی - مبارک اللریله کوستردی !
 معجزات باهره محمدیه لرندندرکه محاربه نك وقوعه عندهده
 هپ کوستردکلرینک عینی اوزره واقع اولمش و هیچ بر
 رده تخلف ، تخالف وقوعه کلامشدر .

اردوی همایون احدینک بدره وصولنده قریش
 عسکری دهها اول « عدوء قصوا » یه اینهرک بدر صو-
 نی ضبط ایله مش اولغله عساکر اسلامیه اوله
 قومسال بر پرده قرار ایتش اولدی که اوراده

عسکر یورور ایکن انسان و حیوانک ایاقلری قایاریدی .
 صوسزلقله هلاک اولمق و اهمه سندن باشقه احتلام
 اولمق کبی بعض عوارض طبیعیه نك مستبعد اولیان
 تعرضاتنه قارشى صویك بدیهی اولان لزوم شدیدینی
 درخاطر ایدهرک هرکس پك زیاده سیله بزار اولمش
 ومع مافیه او کیجه طرف حقدن عسا کر مسلمینه غایت
 طائلی و راحتلی بر اویقو احسان بیوریلهرق قتلترینی
 حسابك ایچنه قاتیمان اردوی همایون افرادینك هر درلو
 یورغونلغی دفع بیورلمشدر .

حالبوکه قریش ، کثرتلری حسابیله مظفریت
 کندیلرنده اولدیغنه و کثرت افراد عسکریه ایله انتظام
 الات حربیه نك مظفریته مدار محض و سبب مستقل
 بولندیغنه اعتماد و اعتقادلری مکمل اولدیغی و کوزلرینه
 پك آز کورینان افراد اسلامیه نك احوال عسکریه سنه
 نسبتاً کندی قوای عسکریه و حرکات حربیه لرینی هر
 صورته منتظم کورمک بناءً علیه شان غالبیت و مظفر .
 يتك انجق کندی طرفلرنده قاله جفنده هیچ شبهه ایتمامک
 ایستدکاری حالده بیله جناب حق اونلرک کوکلرینه

قورقو دوشورمرك اندیشه لرندن طولايي كيچه هيچ
 راحت اويويه مديلردي .
 فرداسي كه هجرت نبويه نك ايكنجي سنده سي شهر
 شريف رمضانك اون يدنجي جعه كونيدر علي الصباح
 رحمت ياغدي . دره ارده سيلار آقدي . عساكر اسلا .
 ميه نك صويه اولان احتياجلري مندفع اولدي . اياقلرك
 طوپراق اوزرنده ثباتي محو ايدن قوملقلر ، رحمت
 صويندن ايصلانه رق پكشدي . سير وحركت عسكريه
 ايچون سهولت حاصل اولدي .

°
 * *

اردوي همايونجه تبديلات موقعيه — برروايته

كوره حس اولنان لزوم شديد اوزرينه « حباب بن
 منذر » رضی الله تعالى عنه حضرتلرينك رأي و تدبير
 سيددانه سي اوزره اردوي همايونجه بعض تعديلات
 و تبديلات موقعيه اجرا ايدلمش و بو تبديل موقع تدبير
 جديري عساكر قريشيه نك صوسنر بر محمله قالمسني
 موجب اولق كي پك يوك اهميتي حازر بر نتيجه مستحسنه .
 بي ده وير مشدر .

°
 * *

حضرت رسول مكرم صلى الله عليه وسلم افنديمز ،
 كندی ذات همایونلریچون سعد بن معاذ حضرتلرینك
 خرما دالارندن معمول اوله رق یاپدیردیغی خیمه ده نزد
 رسالتیناهیلرینه یار غاری حضرت صدیق افنديمزی
 الوب او طور دیلر .

دربار نبویه حاجبك ، محافظلق خدمت شریفه .
 سنی ده جناب سعد درعهده ایدرك ، یانسه الیدیغی دها
 برقاج ذوات ايله برابر بر محافظه فرقه سی شكلی
 الوب خیمه نبویه قاپوسنه دال قیلنج اولدیغی حالده دیکلدی .

*
* *

تلاق صفین — ایشته اردوی همایونجه بویله
 شيرك ترتیباتی هنوز در دست آمام بولنور ایكن قریشك
 اردوسی قارشیدن کورونمش ومیدان حربده صف
 باغلا یوب طور مشدی .

ایچلرنده یوز آتلی ، یتش دودلی نفر بولنان قریش
 عسکری افراد اسلامیه نك همان اوچ مثلندن فضله
 واسباب والات حربیه سنجه اولان قوای ظاهره

ومادیه سی ده مهمات اسلامیه نسبتہ چوق مکمل
ومتظم ایدی .

بری « ابو عزیز زرارہ بن عمرو » ، دیکری
« نضر بن حارث » ، اوچنجیسی ده « طلحه بن ابی
طلحه » نك الله اوله رق اوچ عدد سنجاقلری ده وار
ایدی .

ایکی اردو ، میدان حربده صفبستهٔ حرب و قتال
اوله طور دی ! لکن غریب دکلیدرکه ! اردوی همایونده
مهاجرین اسلامیه نك كافه سی ده قریش عسکرندہ کی افراد ایلہ
قرابت صاحبی اولدیغی خالدہ مثلاً بابا ، اوغلنه ،
قرنداش قرنداشنه دایی زاده دایی زاده سنہ میدان او قویور !
مثلاً رؤسای مشرکیندن « عتبہ بن ربیعہ » نك ایکی
اوغلندن جناب « حذیفہ » رضی اللہ عنہ حضرتلری
افراد اسلامیه میانده ، دیگر اوغلی « ولید » ، باباسی
عتبہ نك یانده !

کذلك « عبدالله بن ابی بکر الصديق » رضی اللہ
تعالی عنہما حضرتلری باباسی جناب صدیق حضرتلرینک

یائنده برادری « عبدالرحمن » ایسه کروه مشرکین عسکری
میائنده !

اردری همایونده رایت غالبیت ومظفریتی قالدیران
علمداران نبویدن جناب « مصعب بن عمرو » حضرت تلرینک
علمداریء مظفریتلرینه مقابل برادرلری « ابو عزیز زرارہ »
دخی قریش اردوسنده بر رایت نحوست آیت ایلہ ہزیمت
عسکریہ لرینی اعلان ایدیور ایدی !

« حارث بن عبدالمطلب » ، کندیمی عسا کر اسلام
میدہ بولندیغی خالدہ « ابو سفیان ، نوفل » نامندہ ایکی
اوغلی قریش اردوسنده اولہرق دین واهل اسلامہ
وعلی الخصوص بابالرینہ قیلنج چکیورلر ایدی !

حضرت حمزہ رضی اللہ عنہ افندیمز ، برادری
عباسی صفوف مشرکین اراسنده کور مکدہ واورادہ
بولنان « عقیل بن ابی طالب » دخی برادری علی المرتضی
افندیمزہ سؤ قصد ایتک سیئہ سنی هیچ صایمہ جق قدر
مہورانہ حرکت ایتکدہ ایدی .

*

* *

براز اولاری ارملرنده اوزاق قریب هر ناصلسمہ
برقراچی بولنان عربلر ، ملتہ ، قومہ ، عشیرتہ منسوب
یولک غیرتلر کوتمش وحتی اولز بر سبیدن طولایی

مجرد او غيرت مليه وقوميه سي سوقيه باب حرب وقتالي
 اچهرق قانلر دوکمش ايکن شمدی ايکی فرقه اولمش
 ويکديکرينک قارشوسنده صف صف طوروب سلاح
 حرب وعداوتی چکه رک اره لرنده کی هر درلو روابط
 مناسبات مليه وعلايق مواخات قوميه لرینی کسمکه
 حاضر لاش اولديلر .

*

* *

مشرکينده تردد — لکن فريقيک شو صورت
 اوزره طوروشی قریش عسکرينک رؤساسندن چوغنی
 متردد براقدي !
 خصوصاً اشراف قریشک جبر و ابراميله عسکره
 قاتيله رق اهل اسلام عليه نه حرکت ايتمش اولان بنی
 عبدالمطلب ، قارشيلرنده برادر ، عمزاده ، دایی زاده
 کبی بتون اتدن ، کيکدن اولان اقبالرينی کوردکری
 آنده کنديلرينه بيوک بر حيرت و تردد الويرمشدی .
 حتی مرقوم « عتبه بن ربيعه » ، ايشک اصل ايشته
 بورالرينی دوشونهرک عريض وعيق بر مطالعه يه
 قوبولدی . و قریشه عتبه نك اغزندن اولهرق تبليغ
 ايتک اوزره « حکم بن خرام » ه خطاباً :

— « ای جماعت ! باقیکنز کیملرله محاربه ایدیور .
 سکنز ؟ عسکر قیلنج صالاد قجه برادرینی ، یا عزامنی ،
 یادی زاده سنی اوروب اولدیره جک ! او حالد صوکره
 بونلر بری برینک یوزینه ناصل اولوب ده باقه جقلر ؟ .
 بوایش اولور شیمی ؟ کلیکنز ! سز بو ایشدن واز کچیکز !
 محمد [علیه السلام] ی دیگر قبائل عربیه براغیکز ! ده
 اونلر انک اوزرینه ظفر بولور لر سه سزک دخی مرادیکز
 حصوله کلش اولور . والا سزده برشی ضائب ایتش
 اولمز سکنز ! »
 دیدی . حکم ده تبلیغ ایتدی .

*

* *

لیکن ابو جهلک رسول ذیشان افندیمن حقنده کی
 افکار عنودانه سی و عداوت شدیدۀ بو جهالانه سی بویله
 بیکارله حقایق واضحه ایله ده سکونت پذیر اولمق درجه -
 سنی چوق اولدن یکمیش اولدیغندن اکابر سکوت
 مستهزیانه ایله جواب ویردکن صوکره کرک رؤسا ،
 کرک افراد عسکریده حس ایله دیکی تردد وندامتی محو
 وازاله برله یرینه رغبت تامه کتیرمک اوزره ملعون
 حریف ، خلقلک غیرت طمرلرینه قدر ایلشوب طوقونه جق
 مؤثر سوزلری سویله مکّه باشلادی .

بناءً عليه آتی دیوب صفدن براز ایلریده میدانه
کیره رک دیدی :

— « بز اولیه بر بطش کوه بر اندازانه مالک
جمعیت یکو جودز کیم محمد [علیه السلام] الیه اصحابندن
ایشته بوکون انتقام آله جغز »

کسب مظفریت ایچون غیرت قومیه سندن باشقه
بر استناد کاهی اولیان مشرکینی ، ذاتاً شهادت شهادت
تشنه اولان افراد اسلامیه اوزرینه کویا غالب
ایده جگدی ! عتبه نک اخطاراتنه جواب اولق اوزره
ابو جهل لعین :

— « محمدیلری اولدیر مکه کیمک نه حاجتی وار ؟
اولدیر مدن اللری ارقه لرینه باغلا یوبده بدهرک تامکه یه
کثیره جکز ! » « عتبه ، اسلام عسکرنده کوردیکی اوغلی
« حذیفه » [رضی الله عنه] بی قریش بهادر لرینلک
او قلرندن ، قیلنجلرندن امرکه یورده افکار عامه بی اندن
طولای اخلال وتشویش ایدیور » کی عتبه ایچون محل
ناموس اوله جق بر چوق سوزلر سویله مشن و اوسوزلرله

انك رأيخده جرح وابطال ايله مشدر !

*
*
*

فتح باب حرب — حتى عسكرلرينك كرك

رؤساسنده ، كرك افرادنده كوردیكى تردد بیویوبده
یاواش ، یاواش حرب فکرندن کلیاً صرفنظر اولنقده
عمومی بر اتفاق حصولندن بیاغی قورقنه باشلیان ابو
جهل لعین ، او محتمل اولان اتفاقك اولوجهله حصولنه
محل بر اقامق فکریله همان سریعاً بر تدبیره تشبث لزومی
حس ایتشن و تشبث دخی ایتشد :

شویله که : بطن نخله وقعه سنده « عبدالله بن جحش »
حضرتلرینك فرقه سی طرفندن قتل و اتلاف ایدیلان
« عمرو بن الحضرمی » نك قرنداشی « عامر بن الحضرمی -
می » ، ابو جهلك تشویقیله : « واعبرواه ! واعبرواه ! »
دیه صفین بیننده ندبه اظهار ایدهرك مقتول عمروك
صورت قتلنده کی مغدوریت و مظلومیتی اخطار ايله
خلقك غیرتی و فعل قتله سبب اولان دین اسلام
علینده کی عزم و حرکاتی تحریك ایتك ایستدیکنی بیلدیر -
دکن صوکره محاربه قاپوسنی دخی آچمن اولق
ایچون اهل اسلام عسکری طرفنه آتدیغی اوق ، عمر

بن الخطاب حضرت تلرینک آزادلیسی «مجمع» رضی الله
تعالی عنه حضرتلرینک شهادتی موجب اولدی . که
ایشته ملت اسلامیده عندالمحاربه ابتدا مرتبه رفیعہ
شهادت احرازی کنیدیسنه میسر اولان ذات ، بوذات
عالیقدردر !

بناءً علیه حضرت نبی ذیشان افندیمر شهید سعید
مشار الیهک قدمی تبشیر ضمننده :
— « سیدالشهداء مجمع . وهو اول من يدعی الی باب
الجنة من هذه الامة »
بیوردیلر .

* *

بنی مخزوم قبیلہ سندن «اسود بن عبدالاسد» نامنده
بری ده «ماء حیم» عطشی زیاده کلدیکنندن ایدی :
« یا محمدیلرک حوضندن صو ایچرم . یا او حوضی
یقارم . یا خودکه حوضک کنارنده اولورم »
دیه قسم ایتدکن صو کره فدائی طرزنده سل سیف
ایدهرک اردوی همایونک حوضنه طوغری سکرندی .
جزه رضی الله تعالی عنه افندیمرده او تشنه زهرابه
نماتک قوشدیغی طرفه قوشوب تا حوضک کنارنده
اکا یتشدی . وبر قیلنج اوروشی ایلہ برابر ایاغنی

دوشوردیکندن لعین، ارقه سی اوستی زمین هلاکه
سرلیوپردی .

لکن خبیث حریف ، ایتدیکی قسمی تمامیه ایفا
ایده بیلش اولسی ایچون ، سرلیدیکی یردنبری کندی
وجودینی سورویه رک حوضه دوشوردی !

جناب جزه ایسه اکاحوضک ایچنده ایکنجی برقیلنج
دها عشق ایتش و حریفک صومامش وجودینی ایکی
بیچوب روان دوزخ مکانی اوچورمشدر .

* *

عامرک مبارزه اصول قدیمه سنه رعایتسزلکله اوق
اتمش اولسی اوزرینه فخر کائنات علیه افضل الصلوة
افندیمز حضرتلری میدانه کیروب اردوی همایونلری
صفلرینک استقامتی دوزلندی :

بعض افراد ، صفنک خارجه از میل ایتش کبی
قائم اولدینی منظور سعادتلری اولغله مبارک الارنده کی
عصای شریفلریله خفیفجه طوقونه رق اویله لرینی
صفنده صره سنه ارجاع ایتدکن صوکره عمومه
خطاباً :

— « بن امر ایتمد کجه دشمن اوزرینه اوق اتمیکز !
 لکن تماماً اوق منزله کلدکرنده آتیکز ! »
 ديه تنبيه دخی بیوردیلر .

*

**

مبارزه واختصاص — ایکی اردو صف حربلرینی
 دوزلدوبده ارتق قیلنج قیلنججه کله جککری صرءده
 دشمن عسکرندن — ابو جهلک بعض تفوهات وتجاوزا —
 تيله ناس نظرنده کوچوک دوشمش اولان — « عتبه بن
 ربیعہ » ، اکال ناموس ایچون بر طرفنه برادری
 « شیبہ » یی بر طرفنده اوغلی « ولید » ی الدقن
 صوکره میدان حربہ آتلا یوب مبارزه ارایسته مشدر .
 بنی نجاردن « عبید بن ثعلبه » نک قیزی « عفراء »
 نامنده بر قادینک اوکون اردوی همایونده حاضر
 بولنان یدی اوغلندن « عوف و معاذ بن حارث بن
 رفاعه » اسمنده کی ایکی یکتیلرله برابر خزر ج قبیله سندن
 شاعر شهیر « عبدالله بن رواحه » رضی الله تعالی
 عنهم حضرائی عتبه و رفقا سیله مبارزه قارشى
 حیقیدیلر .

حالبوکه عتبه انلره :

— « سز کیملسکز ؟ »

دیه صوروبده بونلرده :

— « بز فلان اوغلی فلانز ! »

جوانی ویردکارنده قوجه کافر :

— « اويله ايسه بزم سزکله ايشمز يوقدر . بز

عزادهلريمزی ايسترز »

جوابيله مبارزلی رد و :

— « يا محمد [عليه السلام] ! بزم چوبانلرله

چفتجیلرله ايشمز يوقدر . کوندره جک ايسهك بزه کفو

واقران اولان عزادهلريمزی کوندر ! »

دیه ندا ایتدیکنندن حضرت رسول اکرم صلی الله علیه

وسلم افندیمن دخی :

— « قالق يا عبیده ! قالق يا حزه ! قالق يا علی ! »

بیوردیلر .

بونلرک هر اوچی ده همان قالقوب حریفلره میدان

او قودیلر . لیکن اوزرلرنده کی زرهلردن کیم اولدقلری

بللی اولدیغی جهته عتبه صوروب علی الاصول

اوکرنکدن صوکره [هاه ایشته بویله اولملی . بز بویله

ایسترایدک] دیهرک کندیسى جناب « عبیده بن الحرث »

قارشى کلش و برادری « شیهه » یی ده حزه یه «

اوغلی « ولید » ی دخی علی المرتضی افندیمره قارش
چیقارمشدر .

عتبه ایله عبیده نك هرایکیسی ده اختیار ، جزءه الی
سکز ، علی یکرمی یاشلرنده اولدیغی کبی مبارزه ده مقا
بللری ده کندیلرینه اقران ایدی .

ایلاک جمله ده جزءه ایله علی رضی الله تعالی عنهما
حضر تلری قارشیلرنده کی مبارزلرینک قفالرینی
اوچوردیلر .

لکن عبیده بن الحرث حضر تلری ، راست کتیره
مدکدن باشقه مبارزی بولنان عتبه طرفندن ایاغی آغیرجه
یاره لشمس ایدی . جزءه ایله علی نوبتی عتبه یه یتشدیره
رک انی ده او برکیلرک یاننه کوند رملردر .

ایشته جناب علی کرم الله وجهه افندیمرک ایلاک
مبارزه سی ولید بن عتبه ایله اولان اشبو مبارزه در !

حضر ت جزءه ایله علی رضی الله تعالی عنهما
جناب عبیده یی طو توب کیری کتیر دیلر . عبیده ایاغنده کی
قیلنج یاره سمندن قانلر آقهرق حضور پر نور نبوی
کدیکی زمان :

— « یا رسول الله ! بن شهید میم ؟ »

ديه صورديغندن طرف عالي پيغمبريدن :

— « اوت ! »

بيورولديغني متعاقب يرينك جنة الفردوس اولديغنده
تبشير بيورلمشدي .

حضرت عبيده رضى الله تعالى عنه افنديمىز ، بو
بشارت عظيمه قارشى صورت فوق العاده ده ممنون
اوله رق دين اسلام اوغورنده اياغنىك كىلمش اولسندن
طولاي زره قدر قساوت بيله ايتمه چككه دائر كوزل
بيتلر سويله دي .

ياره سى پك اغير اولديغندن اوچ كون صوكره
اردوى همايونك عودتلرى زمانى مدينه ده كتيريلير
ايكن يولده « صفراء » مرحله سننده عازم دار جنان اولدى .
رضى الله عنه !

• • *

بو ائشاده جناب ابى بكر الصديق رضى الله تعالى
عنه حضرتلرى ، اوغلى عبدالرحمانى مشركين عسكرى
ايچنده كوردىكندن ميدانه چيقوبده انى مبارزه ده
دعوت و قتل ايتك اوزره رخصت ايسته مشدى .
رسول محترم صلى الله عليه وسلم افنديمىز جوابده :

— « یا ابا بکر ! بیلمز میسک که سن بنم کورور
 کوزوم ، ایشیدر قولاغم مرتبه سنده سک ! »
 دیمش واکارخصت و یرو بده تزد هما یونی سعادت مقرون
 اجدیلرندن آیر مامشدر .

ارتق طرفین یکدیگری اوزرینه یوریمکه ، ایکی
 اردو بری برینه یاقلا شمعغه باشلادی . اوقلر هر ایکی
 طرفدن یاغیور ایدی .

کفارک اردو سندنبری « ابن العرفه » نامنده بر تیر
 انداز طرفندن آیلوب کلان اوق ، شجعانک صورت
 مبارزاتی کریدن سیر و تماشا ایدنلرک ایچنده « حارثه
 بن سراقه بن الحرث بن العدی الانصاری الخزرجی »
 نام ذاتی شهید ایتدی . انصار کرامدن ابتدا شهید اولان
 ذاتده بو ذاتدر !

لکن بویله اوکده کی صف حرب اوزرینه آتیش
 اوقلک هر کسی آشوب تا کریده برینی شهید ایتسی —
 سهم قضانک صفوف حربده اوکده کیلری ارقه ده کیلر .
 دن هیچ فرقلی کورم دیکنی کوزلجه اکلاتمش اولدیغندن
 کیفیت — غزات اسلامیه افرادینه مکمل بر درس عبرت
 اولمشدر .

اخيراً شهيد سعيد موحى اليك والدهسى «ربيع بنت
نضر» حضور عالى نبوى به كلوب :

— «يا رسول الله ! او غلم حارثه ، جنتده ايسه
كنديمه تسليت ويروب صبر ايدهم . دكل ايسه نه
ياهم ؟»

ديمش بولمغله حضرت پيغمبر افنديز اكا :
— «يا ربيع ! جنت بر دكل ! متعدددر . سنك
او غلك ايسه جنت الفردوسده در .
ديه جواب ويرديلر .

*
**

ظهور مژده نصرت — طرفينك اويله قيلنج
قيلنجه ، بوغاز بوغازه كلديكى وعند حقدن موعود
نصرتدن بخبر بولسان عوام ايچون غلبه ومظفريت
هانكى طرفده قاله جغلك مجهول بولنديغى زمان رسول
مكرم صلى الله عليه وسلم افنديز ، يار غارى جناب صديق
حضرتلريله برابر ، خيمه سعادته :

— «يارب ! بكا وعد بيوردىغك مدد ونصرتى
احسان ايت !»

ديه نياز ايله مكده ايكن كنديلر نه برنوم خفيف كلشدى .

ایشته او نوم خفیفدن متبسمانه بر صورتده اویانه -
رق یار غارینه :

— « مژده یا ابا بکر ! ایشه جبریل علیه السلام
ملکله امداده کلدی . »
بیوردیلر .

موعود من الحق اولان امداد ونصرتک وقوعنی
مبشر اوله رق استعید بالله [اذ تستغیثون ربکم فاستجاب
لکم انی ممدکم بالف من الملائکة مردفین] آیت کریمه -
سیده نازل اولدی .

* *

رسول ذیشان حضرتلری بیک ملک امداده کلدیکنی
کورونجه همان زرهنی کیوب [سیهزم الجمع ویولون
الدبر] آیت کریمه سنی تلاوت ایده ایده
خیمه دن طیشاریه چیقدی . نصرتی غزات اسلامیه یه
تبشیر وتبلیغ بیوردی .

استطراد

« قریب زمانده او جمعیت منهزم اولوب ارقه
دوندر لر » معناسنی افاده ایدن [سیهزم الجمع ویولون

الدبر [آیت کریمه سنک ترتیجه اوست طرفی :] ام
 يقولون نحن جبيع منتصر [آیت کریمه سیدرکه معنای
 منبئی : « یوقسه مشرکین قریش ، بز جمعیتی ویکووجود
 بر جاعتزمی دیرلر ؟ » دیمک اولور !

حالبوکه آز یوقاریده یازدق که ابو جهل ، معرکه ده
 هر کسی اهل اسلام علیهنده تشجیع وجعیت یکووجودا -
 نه سنی - واهمه اختلال وشائبه اختلافدن قورتاروبده -
 تقویه ایتمش اولق فکریله آیت کریمه مذکورهنک عین
 مفادی اولان معنایی :

— بز یکووجود وجعیتی بر جاعت منتصره یز .
 بوکون محمد واصحابندن انتقام اله جغز ! «
 دیه سویله مشدی !

شو حالده دیمک اولیورکه آیت کریمه مقدما مکده ده
 نازل اوله رق مستقبل احوالندن خبر ویرن آیاتک ،
 بناءً علیه نبوت علیه احدیهنک دلائل وشواهد علیه -
 سندن اولان معجزاتک بریدر ! «
 انتهی

امداد . کلان ملکک بشیوزی جبریل ، بشیوزی ده
 میکائیل علیهما السلامک معیتلرنده ایدی .

ملکک یتشدیکی اشناده ایدی که مثلی کورولماش
 درجه ده شدتلی بر روز کار چیقوب بیوک بر فورطنه

حاصل ایتش بو ایسه مکر ملائکه کرامت امداده
کلیشی ایتش !

ملکر ، او صورت مدهشه ایله میدان حربه
کیرمشلر ، ابلق آتله بیتمش انسان صورتده کورونمشلر .
مشرکینه قارشی صف باغلابوب طور مشلردی !

* * *

جنود اعداده ابلیس — روایات مشهوره دندرکه
قریشیلر ایله بنی کنانه ارسنده وقتیه حرباً قانلردو کلش
اولدیغندن طولای فرسته او قانلرک آجیسنی چیقارمق
اوزره بوکره بنی کنانه نک اهل اسلام ایله ملحوظ اولان
اتفاق واتحادندن قریش ، اندیشه ایدرکن کنانه قبیله نی
ایچنده بنی مدلج عشیرتی شیخلرندن زمان هجرت نبویه ده
یولده مظهر امان پیغمبری اولان « سراقه بن مالک
المدلجی » ، سواری بر فرقه معاونه ایله کلوب قریش
اردوسنه التحاق ایتش وکویا کندیسنک قریش ایله متفق
بولدیغندن باحث اولان :

— « لا غالب لکم الیوم من الناس وانی جار لکم »
سوزلریله افراد عسکریه نک ، اردوی همایون علیه
غیرتنی تحریک ایتش !

حالبوکه سراقه ، قریش عسکرینک ایچنده « حارث
بن هشام » ایله ال اله طوتشوب کز لر رکن او یله شدتلی
بوره لر له ملک لک اهل اسلامه امداده کلدیکنی کورونجه
حارثدن همان مفارقت وعسکرینی ده آلوب قریش
اردوسندن مبادت ایتش ! و او یله شدتلی برهنکامه
سماوی ائناسنده :

— « انی بری منکم . انی اری مالا ترون . انی
اخاف الله . والله شدید العقاب »

دیدکن صوکره صاوشوب کیتسی قریش عسکرینی
وهم وتلاشه دوشورمش !

حتی ابو جهل لعین ، بو وقوعات اوزرینه اردوسنده
حصوله کلدیکنی کوردیکی بعض ترلزلات وهمیه بی دفع
وتسکین ایچون :

— « سز سراقه یه باقی کز ! او ، او یله یاپار .
زیرا انک محمد [علیه السلام] ایله کیز لیجه انفاق واردر .
هله محمد یلری بیتیردکن صوکره دونوب قدید منزله
واردیغمزده بن سراقه یه محمد [علیه السلام] ایله اتفاق
نه دیمک اولدیغنی او کردیرم . همان ایشکزه باقی کز .
ایلری یه یوریکز ! »

دیه عسکرینه جسارت ویرمشدی .

و قتا کہ قریش اردوسی ہزیمتہ دوچار اولوبده
 مکہ یہ خائباً و خاسراً واردی . دیدیلرکہ :
 — « عسا کر قریشیه نك انہزامنه سبب . سراقه نك
 کوستردیکی آثار جبانٹ اولدی . »
 حالبوکہ سراقه بن مالکک ایشدن ذاتاً خبری بیلہ
 اولمدیغندن :

— « واللہ بن سزک بدرہ عزیمتکزدن هیچده خبردار
 دکلمدن لکن ہزیمتکزی ایشتم »
 جوانی ویرمشدر !

مکر سراقه صورتندہ کلوبده التحاق ایدن شخص ،
 « ابلیس » ، و بنی مداح عشیرتدن برطاقم اشخاصک
 صورتندہ و سراقه نك معیتندہ کورینلرده ابلیسک عونہ سی
 بولنان « شیاطین » ایمش !

ملائکئہ کرام ، حربہ کیریشدکلرندہ اللرنده کی
 مزراقلریلہ کفارک باشندن ، بویندن اورورلردی .
 حتی بویلہ اولان ضرب و قتلارینی حق تعالی کلام
 قدیمندہ استعیند بالله [اذیوحی ربک الی الملائکئہ انی
 معکم فتبتوا الذین امنوا سألقی فی قلوب الذین کفروا
 الرعب . فاضربوا فوق الاعناق و اضربوا منهم کل بنان]

آیت کریمه سیه بیان بیورمشدر .

* *

عربن الخطاب رضی الله عنه بیورمشدر که :
 بو ، [سیهزم الجمع ویولون الدبر] آیت کریمه سی مکده
 نازل اولدیغی زمان بن : [عجبا هانکی جمعیت منہزم
 اوله جق ؟] دیمشدم . حالبوکه یوم بدرده جناب
 رسول اللهک خیمه سعادتلرنده زرهلرینی کیوب طیشاری
 چیقارلرکن [سیهزم الجمع] بیوردقلرینی ایشندیکم
 زمان مقصد عالینک نه اولدیغی درحال اکلام .

* *

امداددن انصراف — مرویدرکه ذوالعشیره

وقعه سی اثاسنده مدینه جوارلرینه دکن آچیلهرق اهاالی
 یثربک حیواناتی نهبا کتیرمش اولان « کرز بن جابر
 الفهری » نک قریش اردوسنه امداد ایچون صحرائشین
 بعض طوائف قریشیه بی طویلایوب کله جکی اوکون
 ایشیدلمش ، ذاتاً قوتلیجه بولنان قریشیلر عسکرینک اوله

بر امداده مظهریتی حالنده اهل اسلام ایشنک پلک فنا
 بر شیئه منجر اوله جغی ملاحظه سبیله اردوی همایون
 خلقنجه تلاش واندیشه لر حاصل اولمشدی .
 کرز حقیقه امداده کلمک تصـورنده بولندیغی
 حالده قریشک انهرامنی ایشیدوب او فکر امداددن
 واز یکمشدی .

*
**

ملائکة کرامک میدان حربده کفاره قارشی صف
 طور دقلرینی مشاهده بیورورلرکن حضرت رسول الله
 افندیمرک سبزم خوان اولدیغی حالده خیمه سعادتدن
 طیشاری به حقیقه دقلری زمان یردن بر آوج اوفاجقی
 طاش آلوب [شاهت الوجوه] جلّه دعائیه سنی
 اوقویه رق بعده او طاشلری قریش عسکرینک یوزلرینه
 طوغری آتمشدر .

معجزات نبویه دندرکه طاشلرک هر بر دانه سی
 مشرکینک کوزلرینه ، بورون دلیکارینه اصابت ایتمش
 و او اصابت سببیه کفارده سرسملک کبی غریب بر
 عارضة سماویه حاصل اولمشدی .
 ایسته او معجزه نلک تأثیراتی ایله کفارده سرسملک

حاصل اولدیغی ائنده ملکر دخی حربه لرینی قالدیروب
ایندیرمکه باشلادیلر . ملکرده کی حربه نك هر بر حرکتی
کفاردن برینک هلاکی ایله تمام اولور ایدی .

حالبوکه ملائکه نك حربه لرندن متأثر اولان افراد
مشرکینک وجودلرنده هیچ بر درلو تأثیرات خارجیه
حاصل اولمیوب بلکه تأثیر خارجی بی افراد اسلامیه نك
الرنده کی سلاحلر بعده احداث ایدرلردی .

حتی بعض اصحاب کرامدن روایت اولندیغی کتیده
مذکوردرکه :

اورمق ایچون قیلنجی چکوب قالدیردیغمزده قیلنج
هنوز اشاغییه اینوب دهها بر تأثیر خارجی احداث
ایتمش اولدن ، علیه قصد ایتدیگمز کافرک یره دوشوب
سرلکدن صوکره چالیدیغمز قیلنجک یاره حاصل ایله دیکنی
کورور ایدک . اکلاذق که بز اولدیرمیورز . باشقه سی
اولدیریور !

ایشته وقعه نك اوراسنده حق تعالی کلام قدیمده
استعین بالله [فلم تقتلوهم ولكن الله قتلهم ومارمیت
اذرمیت ولكن الله رمی] آیت کریمه سیله اشارت
بیورمشدر .

*

**

هجوم اسلام — حضرت پیغمبر صلی علیہ
رب البر افتدیمز ، طاش اتدیغنی وطاشلرک تأثیرات
عجیبه سی سبیلله کفراده سر سملک عارضه سنک حصولی
متعاقب همان حله و هجوم ایچون اردوی همایونلرینه
امر ضمننده :

— « هرکیم بوکون دشمن دیندن یوز چویر مدن
پابر جای عزم وثبات اولور و او حالده ایکنده شهیداً
فوت اولور ایسه جناب حق او کیمسه یی البت جنته
قویه جقدر . بوکون شهید اولانلره جنة الفردوس حاضر ،
وانلره رضوان الجنان منتظر در . »

بیوردقدن صوکره اشبو تبشیرات عظیمه نک عقیبنده :

— « هایدی شدیداً حله و هجوم ایدیکز ! »

دیه امر دخی ایتدیلر .

بویله هجوم امر عالیسی ایله افراد اسلامیه نک
مأمور من طرف النبی اولدیغی صروده خورما یمکله
مشغول بولنمش اولان « عمرو بن حام الخزرجی » یاخود
« عمرو بن حام بن الجوح الانصاری السلی » رضی الله
تعالی عنه حضرتلری :

— « جنته كيرمك ايچون شو حريفلك قيلنجيله
اولمكدن باشقه برشي لازم دكلى ؟ پك ابي ! »
ديهرك الندهكى خرماسنى همان اتدى . و شهادتك
فضائلنه دائر :

ركضاً الى الله بغير زاد
الا التقي وعمل المعاد
والصبر في الله على الجهاد
ان التقي من اعظم السداد

قطعه دلنشينى سويله دكدن ودشمن اوزرينه هجوم برله
مشركينك بر قاچلرينى دپه لدكدن صوكره نهايت
كنديسى ده حائز مرتبه شهادت اولمش و جنة الفردوسه ده
كىتمشدر .

اثنائى مهاجده قيلنج ايله شهيد اولانلرك برنجيسى
اشبو جناب « عمير » اولدى . اللهم ارض عنه !

« عفراء بنت عبيد بن ثعلبة التجاريه » نام قادينيك
بيوك اوغلى اولوب عتبه نك زمان قتل و مبارزه سنده
قارشى چيقديغى حالده رد اولنان « عوف بن حارث »
رضى الله عنه حضرتلرى دخى تشنكان شهادت شهادت
بولنان زمره مسلميندن بولنديغندن مرتبه شهادتى احرازه

مانع ظاهری کوریلان زرهلرینی صرتندن چیقارمش
وبعدہ همان قیلنجی چکوب کفار اوزرینه هجوم و بر جوق
خذه مشرکینی قتل و اعدامدن صوکره شربت شهادتی
ایچهرک مرادلرینه نائل اولمشدر . رضی الله عنه !
کذلک دیگر اصحاب کرام برر سیف مسلول
اولدقلری حالدہ هر طرفه شمشیر قهر و تد میری
اور مقده ایدیلر .

علی الخصوص جناب جزء رضی الله تعالی عنه
حضرتلری ، هر هانکی بر جانبہ حله و هجوم ایتسه
فرق مشرکینی ییرتوب پکر . حضرت علی افندیمز دخی
اکا تبعاً راست کتیردیکی مشرکینی ایکی یه یچردی .
ایشته بو ایکی غضنفر صولت اثر ، سیف آتشین
سطوتلریله « زمعه بن الاسود » ، و برادری « عقیل بن
الاسود » ی قتل و اعدام ایله دیلر .

کذلک رؤسای بنی سہمدن « منبه بن حجاج » ،
کیار انصار کرامدن جناب « ابی الیسر کعب بن عمرو »
حضرتلرینک و منبهک برادری « نبيه سہمی » ده « جزء
وسعد بن ابی وقاص » رضی الله عنہمانک « عاص بن
منبه سہمی » ایله « ابو العاص بن قیس السہمی » دخی

جناب علی کرم الله وجهه حضرتلرینک سیف صارم
سطوتلریله عدم آباده کیمش اولدیلر .

حضرت عمر رضی الله تعالی عنه افندیزده «عاص
بن هشام بن المغیره» بی اولدیرمشدر .

بونلردن باشقه جناب علی افندیز ، ابوسفیانک
اوغلی «خنظله» بی ، رؤسای قریشدن حضرت
«طلحه» رضی الله تعالی عنک عمی «عمرو بن عثمان بن
عمرو التیمی» بی وحضرت خدیجه رضی الله تعالی
عنہانک برادری «لوفل بن خویلده» ایله «عبیده بن
سعید بن العاص بن امیه» بی ده قتل ایتمشدر .

لکن بنی سهمک رؤساسندن «ابو العاص» ایله
بنی امیهنک رئیس «ابو سفیان» ، غزوہنک مسبب
محضی اولان قافلهنک امور محافظه سی مشغولیتیله مکه
طرفلرینه طوغری صاوشدیغندن بدرده بولنمامشلردر .

*

**

انهای مقاتله ده کبار صحابه کرامدن قیلنجی
قیرلمش اولان «عکاشه بن محصن الاسدی» رضی الله
تعالی عنه حضرتلری حضور پر نور رسالتپناهی یه کلوب
قیلنجی رسول اکرمه کوستردکده کندیسنه طرف عالی
نبویدن بر او طون پارچه سی اعطا بیورولمشدی .

غرائب معجزات احدیه دندرکه حضرت عکاشه او
چوماغی الوب قیلنج کبی قوللانغه باشلادقن واره دن
بر زمان قلیل ده کچدکدن صوکره او چوماغک بر اعلا
قیلنجه تحول ایله دیکنی کور مشدر !

اخیراً « عرجون » اسمیه تسمیه بیورلمش اولان
سیف مذکورک بر چوق غزوات و محارباتده قوللاندیغی
و حتی ایکنجی عصر هجریده خلفای عباسیه دن ابو
اسحاق المعتصم بالله حضرتلرینک امراسندن « بغا »
نامنده بر ذات طرفندن ایکی یوز التون بدل ایله اشترا
اولندیغی مشهوردر !

*

* *

ترصد — دین و اهل اسلام و علی الخصوص ذات
جلیل رسالتپناهی علیهنده کی فکر و عداوتیله بین الناس
مشهور و معروف اولان « ابو الجهل » ی اولدیر مک
مسلمین ایچون مستلزم مباهات بر کیفیت اوله جغندن
هپ افراد اسلامیه ، او خبیثی راست کتیر مک
ایسترلردی !

حتی ابو الجهل ظنیله جناب جزه رضی الله عنه
حضرتلری مخزومیلردن خالد بن ولیدک برادری « ابو

قیس بن الولید « ی » حضرت علی کرم الله وجهه افندیز
دخی ینه او ظنله مخزومیلردن « عبدالله بن منذر » ی
قتل ایتشلردی .

بوندن باشقه حضرت حمزه افندیز ، رؤسای قریشدن
- « ام سلمه » نك قرنداشی - « مسعود بن امیه المخزومی »
بی ده قیلنجدن پکیردی .

ابو الجهل لعین ایسه : « بنی انام بوکون ایچون
طوغوردی » دیه خلقه جسارت ویره رک عسکرینی
ایلری به طوغری سورردی .

لکن کنديسنك اهل اسلام حقنده کی عداوتی
نسبتنده اهل اسلام ده کنديسنه عداوتی اولدیغنی
بیلدیکندن ومؤید من طرف الله اولدیغنی بیلدیکی حالده
لساناً تصدیق و اقرار ایتدیکی بر پیغمبر ذیشان قوماندا -
سیله غزا ایتکده بولنان مسلمینك غالبیت ومظفریتنی پک
اوزاق کورمدیکندن کنديسنی بسبتون میدانه چیقارمه من
ایدی . وعشیرتی اولان بنی مخزومك دال قیلنج طوران
یکیتلری ارمه سنده بارنمش طور دیغنی جهته یاننه واريله بیلک
امکان خارچنده کی حساب ایدیلیر ایدی .

قتل ابی جهل — برار الق « عبدالرحمن بن عوف »
 رضی الله عنه حضرت تلرینک ایکی طرفنده طوران « معاذ
 و معوذ بن عفراء النجاریه » نامنده ایکی قرن داشدن بیوکی
 « معاذ » حضرت تلری ، صحابی ، مشارالیه حضرت تلرینک
 یکنندن طوته رق چکوب اکا کیزلیجه :
 — « یا عم ! سن ابو جهلی طانیر میسک ؟ بکا
 کوستر سده آ ! »

دیه صوردی . جناب عبدالرحمن :
 — « نه یاپه جقسک او غلم ؟ »
 دیر ایکن معاذ حضرت تلری :
 — « عهد و قسم ایتدم که ابو جهلی کوردیکم آنده
 اوزرینه حمله ایدوب یا بن او خبیثی اولدیره جکم . یا
 او او غورده اوله جکم »
 جوابی ویردی .

* *

معاذ حضرت تلرینک کو چوک برادری « معوذ »
 رضی الله تعالی عنه حضرت تلری بیوک قرن داشی جناب
 معاذک صوردیغی شیدن ذاتاً خبردار اولدیغی حالد
 عین وجهله عبدالرحمن حضرت تلرینه صورمش و :

— « نه يابه جقسك ؟ »

سؤالنه جواباً برادرينك سوزيني سويله مشدى !
بو ائنده ابو الجهل لعين ، مخزوميلر يكيترليني حياتنه
سپر ايدهر ك طوموز طوپي اولوب كلديكني كورن
« عبدالرحمن » رضى الله عنه حضرتلري ، او ايكي
نوجوان انصارى به خطاباً :

— « ايسته اراديعكز ابو الجهل ! »

ديه لعيني كوسترمسيله برابر همان ايكي قرنداشلا ،
صاعقه بلا كبي ملعونك اوستنه بعته دوشمش و بونلر -
دن باشقه ابو الجهلى بتون كون كوزدهده طورديغى حالده
راست كـ تيره مامش ايكن او ايكي چفته شاهينلرك
ييلديرم كبي هجوم ايله دكاري ائنده كورمش ، آولامش
اولان « معاذ بن عمرو بن جوح الانصارى » رضى الله
عنه حضرتلري دخي بونلرله برابر اوتنه دن يتيشمش
اولغله او ، اك اول ابو جهلك اياغنه قيلنج اورمش
لكن ابو جهلك اوغلى « عكرمه » دخي « معاذ بن
عفر » التجاريه « نك - وعلى رواية « معاذ بن عمرو بن
جوح » ك - قولنى قيلنج ايله كسمشدر . جناب معاذك
قولى ارتق دريسيله آصيله قالمشدى !

بوده معجزات باهرات اجدیه دندرکه معاذ حضرت تلی
 اولیه بر حالدہ حضور پر نور رسالت پناهی به کلنجہ ذات
 عالی پیغمبری ، انک کسلس قولنی کنددی ید شریفہ
 نبویہ لریلہ مس و مسح بیوردیلر . قول دخی درحال
 اولکی کبی یرینه یاشوب تماماً کسب التیام ایتشدیر !

* *

[معاذ بن عمرو] ملعونی ایا قسز بناءً علیہ درمانسز
 بر اقدقدن صوکره [عفراء البحاریه] نک « معاذ ، معوذہ »
 نام ایکی اوغلاری ده انی اوراده تماماً مشلردر .

* *

کندیسی شرفا ورؤسای قبائل عربدن اولق اوزره
 عد و اعتقاد ایده کلان ابو جهل لعین ، « چفتجی طا -
 قلری ! » دیه تحقیر ایتکده اولدیغی اهل مدینه نک
 الندن تلف اولدیغی پک کوجنه کیتشدی ! حتی جناب
 معاذ رضی الله عنه حضرت تلی ، قیلنجی اوردقده ملعون
 اظهار تأسف ایدرک : « کاشکی چفتجیلردن باشقه بر آدم
 اولدیرسه ! » دیمشدی .

* *

جناب رسالتماآب افندیمز بیوردیلرکه :

— عجبا ابو جهل شمدی نه یاپیور ؟ کیدوبده اندن
بزه کیم خبر کتیر ؟ »

بوسوز اوزرینه کبار اصحاب کرامدن « عبدالله
بن مسعود » رضی الله عنه حضرتلری سکر دوب
تفحص و تحری به کیتدی . لکن کوردی که : لعین حالت
نزع و احتضاره کلش ! جان چکیشیور ! همان باشی
کسمک اوزره بر الیه صقالنی دسته لیوب بر ایاغنی
بویننه با صدیغی زمان ملعون ، کوزلرینی اچدیغندن
جناب ابن مسعود اکا :

— « سنمیسک ؟ یا ابا جهل ! »

دیدی . ملعون صولک نفسه کلش اولدیغی بر حالدینه
کفر و عداوتی اله آلهرق :

— « ای قویون چوبانجغزی ! پک صرب یرمه
چیقمشسک ! بر بولک رئیس القبیله بی قوم و عشیرتی
طرفندن اولدیرلک خصوصی همان شمدی اولمش
واولغنه باشلامش برایش دکل ! اولدن چوق دفعه واقع
اولمشدر . لکن غلبه هانکی طرفده ؟ »

دیه صوردی . جناب ابن مسعود حضرتلری ده
اکا مقابل :

— « مژده يا ابا الجهل ! غالبيت ومظفريت اهل

اسلامده ! »

جوابي ويرديكي زمان ابو جهلك يأس وتأثرى بسبتون
ارترق :

— « سويله محمد [عليه السلام] . ! كه شمدي يه دكين

انك دشمن دين وجاني ايدم . شمدي ايسه عداوتم دها
زياده ارتدى ! »

ديمش وبوسوزك عقيبنده ابن مسعود حضرتلري
او لعينك رأس منحوسني وجود ملعت نمودندن
آير مشدر .

لكن صحابيء مشاراليه شخصاً پك اوافق وبدناً
غابت ضعيف ونحيف اولديغندن او رأس منحوسي
قالديروبده اردوكاهه دكين كتيره مدي . انجـق ايكي
قولاغندن بريني دلدي . او دليـكـدن ده بر قانجه
پكـيـروب صـيـق يـاـپـشـد قـدن صـوـكره سوروكليه ، سوروكليه
كتيردي !

*

**

رأس منحوس ، عرض وارانـه ايدنـك اوزره حضور
سامي رسالتپناهي يه كيرديكي زمان حضرت جبريل
امين دخی ابن مسعود حضرتلرينك اردنبري ديوان

رسالته بر صورت متبسمانه ده کیره رک - صحابیء مشار الیهک
خاطرینی تطیباً - حضرت نبی ذیشانہ :

— « یا رسول الله ! قولاق قولاغہ بدل ! لکن
قفاندر ؟ فضلہ دکلی ؟ »

دیمشدر !

« استطراد »

حضرت جبریل علیه السلام شو سوزی سویله -
مسنده حکمت وار ایدی :

فخر کائنات علیه افضل الصلوة و ازهی التحیات
افندیمز حضرتلری مکده ده ایکن « الرحمن » سورة شریفه سی
نازل اولدیغی زمان جناب رسالتپناه :

— « بو سورة شریفه بی مجمع قریشه کیدوب سزدن
هانکی بر آدم او قویورر ؟ »

بیوردیلر . عبدالله بن مسعود رضی الله عنه حضرتلری
ایاغہ قالقه رق دیدی :

— « یا رسول الله ! بن او قویوررم ! »

لکن صحابیء مشار الیهک ضعف و نحافت بدینه سنه کوره
دوچار تحقیر اولسی احتمال که خاطر عاطر نبوی به

کلیکله پکده مظهر التفات اولماش ومع مافیہ ذات
رسالتیناه افندیز ، سؤالترینی اوج دفعه ده تکرار
بیوردیغی حالده هر اوچنده ده یالکزا بن مسعود حضرتلری
قیام ایدرک کندینی کوسترمشدر .

بعده شرفتعلق بیورلمش دیمک اولان اذن همایون
اوزرینه ابن مسعود حضرتلری کیده رک حرم شریف
کعبه ده مجتمع بولنان قریش جاعتنک قارشوسنده سورۃ
مذکورہ بی تلاوته باشلادیغی انده ابو جهل لعین، همان
یرندن قالدق رق مشارالیهی بر قایج دفعه توقاتلادق دن فضله
کویا تحقیر ضمننده قولاغنی ده دلوب قاناتدق دن صوکره
کری به اعاده ایتشدی !

*

* *

جناب ابن مسعودک قولاغی قانایه قانایه اولوقت
کلوب حضور عالی نبوی به محزوناً کیردیکی ائنده
حضرت جبریل علیه السلام ده بر صورت متبسمانده
کلمش ومشارالیه ایدیلان حقارتک - حسب آلاتی -
هیچده شایان اسف اولمادیغی تبشیر ایله مشدی .
شو حالده اکلاشلمش دیمک اولیورکه مکده ایشته
او ایله دیکی تبشیراتی تلمیح صره سنده :

— « ابن مسعود ، قولاغنه بدل ابو جهلك قولاغنى
دلى . لكن قفاسنى نچون كسدى ؟ قفانك كسلى
قصاصك خارجنده دكلى ؟ »

كې بر لطيفه نكته پردازانه ! انتهى

ابو جهلك او رأس منحوسى منظور عالى پيغمبرى
اولور ايكن جناب اللهك احسان بيورديغى امدادونصرته
رسالتينه افنديز ، چوق تشكرلر ايله دكدن صوكره
قفايه اشارتله :

— « بوا امك فرعونى ايشته بودر ! »

بيورمشدر .

« عفرأ » نك اوغلى « معوذ » حضرتلرى بوكى
دها مهم بر چوق ايشلرى كوره رك نهايت شهيد اولدى .
رضى الله تعالى عنه !

ابو جهل لعينك برادرى « حارث بن هشام » ده
ايشته بو ارالقده كورولتىيه كيتدى . كذلك رؤساي
قريشدين « طعيمه » نك دخى او كورولتيده حارثى تعقيب
ايتسهنه جناب حزه رضى الله تعالى عنه حضرتلرينك
سيف مسلول صرامتى سبب اولدى .

ليكن حارث ، اهل اسلامدن برقاج ذاتك شهادته
تسبب ايده بيلشدى !

*

* *

ظهور آثار انہزام — ابو جہلک وقوع ہلا۔

کندن صوکرہ مشرکیندہ ارتق مهاجرات اسلامیہ یہ
قارشی قومیق ایچون قریش خلقنی تشجیع ایدہ بیلہ جک
کیمسہ قالمیہ جغندن مشرکین عسکر لرندن طباندہ کی
قوتنہ اعتمادی اولانلر ، ارتق فرار امارہ لرینی کو ستر مکہ
باشلامش بناءً علیہ طرف یشرف رسالتیناہیدن دہ افراد
اسلامیہ :

-- « بنی ہاشمدن الہ کچنلر اسیر ایدملی ! »

دیہ امر و فرمان بیورلمشدی .

« ابو الیسر کعب بن عمرو الانصاری » رضی اللہ
عنه حضرتلری ، عم نبوی عباس بن عبدالمطلبی راست
کتیروب طوتدی .

عباس ، قتل اولنہ جق دیہ بر کرہ پک زیادہ سہیلہ
خوف ایتیش ایدی . لیکن صحابی مشارالیہ ، انک اللریخی
باغلر ایکن « بنی ہاشمدن الہ کچنلر قتل ایدلمیہ جک »
سوزیلہ عباسی تأمین ایدنجه عباس دہ ممنونیتندن ناشی
یانندہ قالمش بولنان یکر می دینار اچہ بی اکا ویردی .

« مجدر » یاخود [بعض نسخہ لره کورہ] « محرز
بن زیاد » رضی اللہ تعالیٰ عنه حضرتلری طرفندن دہ

« ابو البختری » طوتلدى . ابو البختری ، جانندن
 امين اولديغى اكلاينجه يانده بولنان بر باشقه سنك ده
 او امنيتدن مستفيد ايدلمنى ايسته مكده كوستردىكى
 اصراردن طولاي آخذ مومى اليه حدت ايدرك هم
 ابو البختری بي ، هم ده انك امنيتدن مستفيد ايتك ايسته
 ديكى ارقداشنى قتل واعدام ايتشدر .

*
* *

قتل اميه بن خلف — قريشك اك مشهورلرندن
 و برنجى درجده نامدارلرندن « اميه بن خلف » ، هم
 اختيار ، هم ده وجودجه شيشمان اولديغى حالده
 محاربتهك اك صوك دورلرینه دكين طيانه طورمشدى .
 نهايت باشه كتيره ميهرك اوده اوغلى « على » ايله
 برابر كلوب « عبد الرحمن بن عوف » رضى الله عنه
 حضرتلرینه تسليم اولغه مجبور اولدى .
 عبد الرحمن حضرتلرنى ايسه ، بيلرندهكى معارفه
 قديميه بناء او ايكيسنى ربهق اسارته الوب صاغ براقق
 ايستدى . حتى او خصوصى اميه ايله قونوشمغه ده
 باشلامشدى .
 سيف سطوت وجلادتيه قريش خذله سنى دپه ليوب

تارومار ایدہ طورن حمزہ رضی اللہ عنہ حضرتلری
قارشیدہ کورونندی . امیہ ایشته او آندہ دیدی :
— « کیمدر ؟ شوکوک دمیرلره بورینوب صفلری
بیرتان بهادر ! »

جناب عبدالرحمن اکا :

— « عم رسول اللہ حمزہ بن عبد المطلبدر »
جوانخی ویررکن « امیہ » بر وضع متأسفانه ومأیو .
سانه ده :

— « آہ بزه بتون بو ایشلری ایدن ، باشمزہ بو
غوائلی کتیرن ، بزی بو حاله قویان هپ اودر »
دیور ایدی ! بونلر اوپله برلاقردیدہ ایکن جناب بلال
بن رباح الحبشی رضی اللہ عنہ حضرتلری ، « امیہ » یی
کور یویردی !

حالبوکه مکده وبعثت جلیله محمدیه نک اوائلنده
امیہ ، حضرت بلاله پک چوق اشکنجه لر ایتیش وحقنده
— مثلاً تموز صبحاقلرنده کونشہ قارشى قیزغین یرلره
آتدیروب کوکسی اوزرینه بیوک بر طاش قویدیره رق
محمد [علیه السلام] ی تکذیب و تکفیر ایدنجیه و
یاخود اوحال اوزره هلاک اولنجیه دکن تعذیب ایدمک
اوزره معذبلره تسلیم ایتک کبی — پک چوق اذیاتی روا

کورمش اولدیغندن طولای یوره کی یامش اولان بلال،
امیه بی کورر کورمن :

— « یا انصار الله ! ایشته کفره نك رئیس بی امیه
بن خلف ! اوریکز ! اولدیریکز ! »

دیه باغیرمغله اطرافدن عفر ازاده « معاذ » حضرتلری
ایله دها باشقه بعض انصار کرام یتشوب « امیه بن
خلف » ی ، کذلک « عمار بن یاسر » رضی الله عنه
حضرتلری دخی امیه نك اوغلی علی بی همان قتل و
واعدام ایتشد .

*
* *

ختم حرب — ارتق محاربه بیتشدی ! قریش
اردوسی قانلی برهزیمته دوچار، اردوی همایون ایسه
شانلی برمظفریته مظهر اولدی :

معرکه ده دوشوب قالانلرله برابر مجروحاً صوکره
وفات ایدن شهادتک مجموعی - التیسی مهاجریندن ،
سکزی انصار کرامدن اولق اوزره - یالکز اون درت
نفر ایدی . انصارلرله التیسی خزر ج قبیله سندن ،
ایکیسی اوسیلردن ایدی .

مشرکینک تلفاتی ایسه - یکریمی درت نفری

هپ اشراف و رؤسادن اوله رق - يتمش ايكي
نفر ايدي .

اسير ايديلان مشركين دخي يتمش نفر اولوب « عم
نبوي عباس ، عمزاده نبوي عقيل بن ابی طالب ، نوفل
بن حارث بن عبد المطلب ، داماد نبوي أبو العاص بن
الربيع » نام ذوات ده اسراي مشركينك اشرافندن
ايديلر . بونلر اخيراً شرف قبول دين اسلام ايله
مشرف اولمشلردر .

علمدار فضائلشعار نبوي « معصب بن عمرو » رضی
الله تعالى عنه حضرتلرينك - قریش اردوسنده او
كون علمدارلق خدمتيله مأمور بولنمش اولان - برا -
دری « ابو عزيز زرارہ بن عمرو » دخي اسرادن
اولديغي حالده او وقعه اثناسنده دين مبین اسلامي قبول
شرف عالمهاسنی احراز ايله مشدر .

« سهيل بن عمرو العامري » ، خالد بن هشام
المخزومي ، عبد الله بن ابی بن خلف » و حضرت
سوده رضی الله عنہك برادری « عبد الله بن زمعه ،
وليد بن الوليد » اميه بن خلفك ازادليسي « نسطاس »
ده اسرانك اشرافندن ايديلر .

اموات مشرکینه خطاب نبوی — رؤسای

قریشک لاشه لری ، شرف صادر اولان فرمان جلیل
رسالتیناهی اوزرینه بدرده کائن معطل بر قویونک
ایچریسنه آتلدی .

انجق امیه بن خلفک لاشه سی ، زرهی ایچنیده
شیشوب قالدیغندن همان اولدیغی یرده اوستنه طاش ،
طوپراق کبی شیلر آتیه رق اورتولدی . دیگر افراد
عوام قریش لاشه لری ده اولدقلری یرلرده کومولدی .
بعده ذات عالی رسالتیناهی ، معرکه دن ارتق انفکاک
ایده جکی کون اوقویونک اغزینه کلوب لاشه لره خطاباً
دیدى :

— « یا فلان بن فلان ! ویا فلان بن فلان ! ایسرکم
انکم اطعمم الله ورسوله . فانا قدو جدنا ما وعدنا ربنا
حقاً . فهل وجدتم ما وعد ربکم حقاً ؟ »
شوخطابدن تعجب ایتیش اولان اصحاب کرامدن جناب
عمر بن الخطاب رضی الله عنه حضرتلری :
— « یا رسول الله ! ما تکلم من اجساد لا ارواح
لها ؟ »

دیدیکندن اوسوزه طرف ذیشرف نبویدن جواباً :

— «والذى نفس محمد بيده ما انتم با سميع ما

اقول منهم»

بيورلمشدر .

*

**

خبر مسرت اثر مظفريقى تبليغ وتبشير ايجون
حضرت رسالتپناه افنديمى مدينه «زيد بن حارثه»
ايله «عبد الله بن رواحه» رضى الله تعالى عنهما
حضرتلرينى ارسال واعزام بيورمشدى .

*

**

غنيمته متعلق اختلاف آراء — قریش عسکرىنک

فراره يوز طومتسيله امر حرب وقتاله ختام ويرلديكى
زمان معرکهده بولنش اولان بعض غنائم حقنده عساكر
اسلاميه افرادى ارمشده — كيمى مال ، بولان كيمسه نكدر
كيمى ده اويله دكل : بلكه حضور عالى نبوى به
كتير يليرده حقنده شرفوقوعبوله جق وحى الهى به انتظار
ايديليرديه — بعض اختلاف حاصل اولمش ايكن استعيز بالله
[يسئلونك عن الانفال قل الانفال لله والرسول] آيت
كريمه سى نازل اوله رق غنائم ايجون حادث اولان
اختلافات درحال مندفع اولمشدر .

بعده اموال غنائم ، حضور رسول الله كثير يلوب
تقديم ايدلديكندن انك حفظ وجاهه سي نظارتنه بنى نجاردن
« عبد الله بن كعب » رضى عنه حضرتلى مأمور
تعيين بيورلدى .

*

**

مشاوره ومذاكره — اسرا نك فراره محل بوله -

ما ملريچون ضبط وربطنه ده عمر بن الخطاب رضى الله
عنه حضرتلى مأمور تعيين بيورلمغله رئيس اسرا
بولنان عباسى پك زياده سيله صيق باغلاديغندن عباس ،
او صيقنتييه قارشى كچه اضطرابلى ، اضطرابلى
ايكله ردى .

لكن عنك شو صورتله اولان فاجع ايكلتيسنى
ايشندكجه اويقوسى وهردرلو حضور وراحتى منسلب
اوله قالمش بولنان حضرت رسول اكرم صلى الله عليه
وسلم افنديمرك راحتسزلكندن بعض اصحاب كرام ،
خبردار اوله رق مجرد او حضرتك راحتسز اولما -
ملريچون كچه عباسك باغلرينى چوزدكدن فضله عفو
ومجاناً اطلاق بيورلسنى ده صباحلين استرحام
ايتشلردر .

حالبوکه اسرا حقننده نه درلو معامله ایدیه جکنه
 دائر هنوز وحی الهی وارد اولدیغندن بونلر حقننده
 مذاکره و مشاوره اولمق اوزره رسول مکرم افندیمز،
 کبار اصحاب کرامندن بر هیئت شوری تشکیل بیوردیلر.
 اشیو تشکیل هیئت اصولی جناب رسالتک
 معتاد قدیملی ایدی. رأی ایله فصل اولنه جق هر
 بر اموره اصحاب کرامی ایله مشاوره بیورورلردی.
 و مجلس مشورتده ارکان هیئتندن هر بری رأی و مطا.
 لعه سنی سربست سویله مکه اذن همایون وار ایدی.
 بناء علیه هر کس فکر و مطالعه سنی سربست سویلردی.
 خصوصاً حضرت عمر بن الخطاب رضی الله عنه
 افندیمز، وحی الهیه امتثالده نقدر سرعت کوسه تر.
 لرسه رأی ایله اوله جق ایشلرده - هیچ خاطر و
 کوکله باقدن تردد سز - اولقدرده سرعتله رأی قطعی
 المفادینی ویرر یکر و رأی عالیلرنده اصابت ده
 بیورورلردی.

حتی کوسه تردکلی رأی صائب و بیان بیوردقلی
 مطالعه مخصوصه و فکر ثاقبلی، صوکره نازل اولان
 وحی الهیه چوق دفعه لر موافق دوشمش انکچون

کندیلرینه [الفاروق] دینلمشدرکه « حق ایله باطلک
بینی کمالیه فرق و تمیز ایدیجی » دیمکدر .

**

اسرا حقنده ایدیه جک معامله یی مذاکره ضمننده
رسول مکرم افندیز ، اصحاب کرامنی جمع ایدهرک
انلر . خطاباً :

— « جناب حق ، سزی بونلره غالب ومظفر
بیوردی . شمدی حقلرنده نه یامیق ایسترسکز ؟ »
بیوردیلر .

بو کلام پیغمبری اوزرینه جناب فاروق اعظم
حضرتلری ، ابراز رأیده جله اصحاب کرامه تقدم
ایدهرک :

— « یا رسول الله ! جله منی اعدام ومالریخیده
احراق بالنار ایتدیر ! سنی تکذیب و دیار کندنده قهرأ
اخراج ایتمش اولدقلرندن باشقه شمدی ده کلوب مقاتله
ایتدیلر . بناء علیه « ائمة الکفر » بولسان ملعونلرک
قفالری کسیلی »

دیه جواب ویردی .

کبار انصار کرامدن « سعد بن معاذ » رضی الله

عنه حضرتلری ده او رأی فاروقانه ده انکله متفق بولندی .

لکن رجة للعالمین اوله رق مبعوث اولان رسول مکرم افندیمنک رحم و شفقت جلیله احدیه لری بویله سنه اصلا مساعد اولدیغندن سؤالی تکرار بیوردی .
جناب فاروق حضرتلری :

— « یا رسول الله ! بونلر رؤسای مشرکیندندر . اعدام ایدملی ! »

دییه رأی سدید فاروقانه لرنده ینه اصرار کوسرتدی ایسه ده او رأی طرف ذیشرف پیغمبریدن قبول ایدیله مدی .

بعده جناب ابی بکر الصدیق رضی الله عنه حضرتلری ، ایاغه قالقه رق :

— « یا رسول الله ! بونلر سنک قوم و اهلاک دیمکدر . مأمولدرکه ایلریده هدایت رحانییه مظهر اولورلرده قبول اسلام ایدرلر . شو حالده کندیلرندن فذیه النقدن صوکره حیاً اطلاق ایدملرینی مناسب کور یورم .
بیوردیلر .

علی روایه بو ایکی رأی تصدیقاً رد و یا قبول

حقننده حکم همایون هنوز لاحق اولدن ذات عالی
پیغمبری، نطقه شرف آغاز بیورده رق :

— « جناب حق قوللرندن بر طاقنک قلبلرینی
اوله بر مرتبه ده صلابتلی یار آتمشدرکه اوصلابت طاشلرده
بولنمز. ای ابو بکر ! سنک حق یولنده مثالک « فمن تبعنی
فانه منی ومن عصانی فانک » دیان ابراهیم
علیه السلامدر . ویا عمر ! سنک مثالک « رب لا تذر ..
..... » دیان نوح علیه السلامدر .

بیوردقدن صوکره اصحاب کرامنی رأی صدیق ایله
رأی فاروق رضی الله تعالی عنهما حضرتلری بیننده
مخیر بیورمشدی .

اصحاب کرام دخی او باده امر و اراده الهیهنک
شرف صدورینه انتظار فکرنندن هر نصلسه ذاهل و غافل
اوله رق رأی صدیقی قبول ایتمش و ایجاب حال ده
اولوجهله اجرا اولنمش ایسه ده بو خصوصک موافق
اراده الهیه اولمديغنی حضرت الله ، متعاقباً معرض
توبیخده استعید بالله : [ما کان لبنی ان یکون
.....] آیت کریمه سنی انزال بیورمشدر . که اعصار
قدیمه ده عند الانبیا شرایع ، حضرت عمر الفاروق
رضی الله تعالی عنه حضرتلرینک بیان بیوردقلری

رأى سيد فاروقانه اوزره : « اسراي قتل واعداي
 ديني اولوجهله تقليل » ايكن مجرد خاتم الانبيا افنديم
 حضرتلرينك شرف وفضيلتنه اوله رق امتنه اموال
 غنايمك بوندنبويله حلال اولديغني مبشر اولان بوآيت
 كريمهك نزولي اوزرينه رسول اكرم صلى الله عليه
 وسلم افنديم، اصحاب كرامنه :

— « اكر بو معامله مزدن طولاي عذاب ايتسيدي
 ايچكزده عمر الفاروق — ايله سعد بن معاذ رضی الله
 تعالى عنهما — دن باشقه سي قورتلزدی ! »
 بيورمشلردر .

* * *

عودت وايضاي نذر نبوي — ذات عالي رسا .

لتپناهي، — روايت غير مشهورهيه كوره — امر محام
 ربه دن شوال برنجي كوني فراغت ايتمشلر و بدرده
 اوچ كيچه قالدقذن صوكره اردوي هممايونلري وكافه
 اسرا و اموال غنايم ايله برابر قالقوب مدينه منورهيه
 عودت بيورمشلردی .

« صفراء » مرحله سنه مواصلت هممايونلرنده اسرا
 نظرگاه جليل احمديه عرض اولندي . اوزمان حضرت

پیغمبر ، « عقبه بن ابی معیط » ایله « نضر بن حارث » ی
اوراده قتل ایتدیر مشدر . رسالتیناه افندیز ، « عقبه بن
ابی معیط » ی او مرحله ده کوروب :

— « کیت یا علی ! بنم نذریمی ینه کتیر ! »

دیه فرمان بیوردیلر . عقبه ایسه :

— « یا محمد ! [علیه الصلوة والسلام] بنی قتل

ایتدیر دیکک حالد اولاد و عیاله کیم باقار ؟ »

دیدیکندن مقابلنده :

— « جهنم باقار »

جوابی المشدی .

ملعون « عقبه بن ابی معیط » رسول اکرم صلی

الله علیه وسلم افندیز حضرتلرینک مکده بولندقلری

واذیات مشرکینی چکدیکی زمانلرده رؤسای مشرکیندن

« امیه بن خلف » ک تشویقیله مبارک وجه پاک تابناک

احدییه توکورمش و او تحقیره قارشى تحمل ایدن ذات

عالی پیغمبریدن :

— « یا کافر ! نذر ایدرم که سنی البته برکون قتل

ایتدیر . حکم »

وعیدینی المشدی .

غریبدرکه بو وعیده مقابل « عقبه » دخی :

— « یا محمد [علیه الصلوة والسلام] ! سن انی
امید ایدرمیسنگه پادشاه اولوبده آدم قتل واعدام
ایتدیرمک کبی بیوک برایش الیکدن کله؟ »
دیمکه قدر جرأت ایتشدی .

« نضر بن حارث » دخی مکدهده فخر عالم صلی الله
علیه وسلم افتدیمزک حق همایونلرنده هردرلو تجاوزات
تحقیریهده بولندیغی زمان بننه خطاباً :

— « ای چلیم ! بو سوزلرکه محمد [علیه الصلوة
والسلام] سویلیور اکر طوغری ایسه بزم باشمز سعادن
طاش یاغیر یاخود بر عذاب الیم ایتدیر ! »

دیمش ونضرك بویه اولان مساوی اقوال واحوالندن
حق تعالی استعین بالله [واذ قالوا اللهم ان كان هذا هو
الحق من عندك فامطر علينا حجارة من السماء او ائتنا
بعذاب الیم] آیت کریمه سیله حکایه بیوردقدن صوکره
« سأل سائل » سورة شریفه سنی ده انزال بیورمشدی .
ایشته او کافری ده « عاصم بن ثابت » رضی الله
عنه حضرتلرینه قتل ایتدیرمشدر .



اموال غنایمی اوراده اصحاب کرامنه علی السویه
تقسیم بیوردی . بعده اسرایی ضبط وربط مأمورینک

النده کری به براغوب کندیلری همان مدینه به کلدیلر .
که مدینه دن زمان خروج وعزیمت لریله بو کره یوم
مواصلت همایونلری اره سنده روایت کوره تمام اون
طقوز کون یکمشدی .

* *

ملاقات — زمان حرکت اسلامیه ده قافله قریش
حقنده تجسمات و تحریات مأموریتله ایلری به طوغری
کوندرلش اولان جناب « طلحه » ایله « سعید بن زید »
رضی الله عنهما حضرتلری اطرافی تحری ایدرک
جانب مدینه به عودت ایتدکری وقت ، ذات عالی
پیغمبرینک بدره عزیمتلرندن خبردار اولملری اوزرینه
انلر دخی بدر طرفنه همان یوریوب کیتشلر .

بودفعه معاودت همایون وقوع بولدیغی صروده
یولده بولشوب غزاسنی ومظفریت علیه رسالتپناهیلرینی
تبریک ایله مشلر .

* *

مواصلت همایون — « صفراء » مرحله سندن
ایرلدقدن بر کون صو کره حضرت پیغمبر ، مدینه به
واصل و داخل اولش واسرا دخی اندن بر کون ده
صو کره یتشدیرلشدی .

رسول مکرم افندیمز ، اسرای اصحاب کرام
خانه لرینه تودیع ایتدی . وهرکسکده النده کی اسیرینه
کوزلجه باقسی لزومنی ده غزاته قویاً تنبیه بیوردی .

**

تطلیق — اسرآنک الری باغلی اوله رق کلدک لرینی
کورن زوجه محترمه رسالتپناهی جناب « سوده بنت
زعمه بن الاسود » رضی الله عنها حضرتلرینک :
— « پدر وعیملری کبی حرب ایدوب اولمکدن
احتراز برله عار اسارتی قبول ایله یان بو حریفلری ، ایشته
بو حالده بر اقالی »
دیدک لرینی ایشیدن رسول ذیشان افندیمز ، مغبر الخاطر
اوله رق اکا :

— « یا سوده ! سن کفاری حق تعالی ایله حربه می
قاندره یورسک ؟ »
بیوردق دن صوکره مشار الیهایی همان تطلیق ایله مشلردی .
لکن او تفوهات ساهیمانه سندن نادمه اولان « سوده »
حضرتلری نزد جلیل محمدیده پک سوکیلی بولسان
حضرت عائشه رضی الله تعالی عنهانک شفاعت علیه لرینه
مراجعت ایتدی :

— « یا عائشه ! بنم مواقعه ایچون زوجه احتیاجم
یوقدر . زیرا کنج دکلم . شو حالده بنم هر نوبتی سکا
براغیرم . ولی نعمت افندیز حضرت رسالتیناهه عرض
شفاعت ایتده بنی ینه قبول ایتدیر ! تا که روز
حشرده بنده زوجات نبویه دن معدود اوله رق حشر
اوله یم . »

حضرت عائشه رضی الله تعالی عنہا نک ایشته انک
اوزرینه واقع اولان توسط شفیعانه سی ایله افندیز دخی
سوده بی تکرار نکاح ایله مشدر .

* *

استرداد اسرا — مکده قریش قومندن اسیر
ویرمش اولانلر ، برارالق ایستدیلر که کلوب مدینه ده
اسیرلرینی استرداد ایدلر .
لکن ابوسفیان :

— « صاقین اسیرلریکزی بدل ایله استرداد تصورنده
بولنمیکز ! زیرا محمد [علیه الصلوٰة والسلام] اسرای
بهالی ویرر . بنم بر او غلم « خنظله » مسلمان اولدی [*] .

[*] مرقوم خنظله نک جناب علی یدبله قتل ایدلدیکی
روایاته بناءً آن یوقاریده یازلمشدر . الله اعلم بالصواب .

دیگر او غم « عمرو » ده اسیر دوشدی . باقیسه کزآ !
 بونلرک هرا یکیسی ده اوراده ! بن ینه صبر و تحمل ایدوب
 طور یورم . سزده اوله ایدیکز ! «
 دیه هر کسی منع ایتک ایسته دیکی حالدہ کیسه انک
 او سوزینی قبول ایدم مامش اولدیغی ایچون اسرادن
 « ابو زرعہ » نک اوغلی اولاد بدل کتیره رک باباسنی
 قورتاردی .
 دیگر لری ده بونی کوره رک یاواش یاواش بدل اعطاسیله
 اسیرلرینی المغه باشلادیلر .

* * *

اسلام عباس — رسول اکرم ، قریشک کلوب
 اسیرلرینی بدل اعطاسیله قورتارمغه باشلادیغی اوله بر
 صروده عمی عباسه دیدی :
 — یاعم ! سن بوتون اسیرلردن زنکینسک .
 اقربالریکزدن سنک ایله برابر اوچ اسیر فقیر دها وارکه
 انلرده « عقیل بن ابی طالب ، نوفل بن حرث ، هتبه
 بن عمرو » در . هم کندیکی ، هم ده بو فقیرلری سن
 صاتون آل «

عباس ، بو امر پیغمبری به :

— « یا محمد ! [علیه الصلوة والسلام] سز کله
حرب ایتک فکرنده بولندینم حالد بنی مکهدن زور
ایله چیقاردیلر . علی الخصوص قبول دین اسلامده
میل واردر »

جوانی و یردیکی حالد حضرت پیغمبر افندیزدخی :

— « میلک وار . لیکن ظاهرک کفردر »

پیوردیغندن اکا قارشی عباس :

— « بنی طوتان [ابو الیسر کعب بن عمرو
الانصاری] ، بندن برچوق پاره الدی . اوئی بدله
محسوب طوتیکز ! »
دیمشدی .

لیکن عباسک بو باده کی رجاسی ده ردیورلدی :

— « خیر اولمز . زیرا او — اهل اسلام علیهنده
صرف ایتک اوزره طاشیقده ایکن — النان پاره مؤمنلرک
اولدی »

عباس ، ارتق باشقه بر دیه جک سوز بوله میهرق :

— « یا بنم بوندن باشقه پاره میوق . آوچ آچدیروبده
بنی دینلدره جگمیسک ؟ »

دیمکه جرأت ایندیکی حالدہ طرف ذیشرف پیغمبریدن :
 — « هانی -- درت اولادیکه تقسیم ایدمک اوزره
 — « ام الفضل » ه براقدیغک التونلر ؟ »

جوابنی الهرق مبهوت و متحیر اوله قالمشدی !
 مکر عباس ، زمان حرکتنده زوجه سی ام الفضله
 کلینلی التون براغوب :

— « بن محاربیه کیدیورم . شاید بکا برحال واقع
 اوله جق اولور ایسه بو التونلر سنکله اولادمکدر .
 تقسیم ایدیکز ! »
 دیه تنبیه ایتشدی .

لکن نه التونلرک اولیه اکا تسلیم ایدلدیکندن ،
 نه ده ام الفضله سویله دیکی تقسیم لاقردیلرندن کیمسه نیک
 وقوف و خبری یوغیش !

ارتق او سوزه قارشى تحیر و تعجب ایدم قالمش اولان
 عباس بالمجبوریه :

— « بونی سکا کیم خبر ویردی ؟ »

دیرکن اکا طرف عالی نبویدن :

— « ریم خبر ویردی ! »

جوابی ویرلمش وبعده عباس ده :

— « بن شهادت ایدرم که سن حقک صادق بر
رسولیسک ! »

دیه کله طیه شهادتی همان زیور زبان مصادقت
ایله مشدر .

مع مافیه ینه بدل ویرمینجه قورتیله مدی . بدل
اسارت ویردکدن صوکره مکیه عودت ایتدی .

* *

فقرای اسرایه تسهیلات — بدل اسارت ویرمکه
اقتداری اولیانلرک ایچنده یازیبی بولنان اسیرلر دخی
انصاردن اونر چوجغه صنعت کتابتی اوکرتمک وبعده
بلا مانع مکیه کیتلرینه رخصت ویرمک اوزره مدینه ده
الیقونلشدر .

مدینه ده اوللری کتابت هیچ یوق کبی ایکن
بو وسیله ایله اوقور یازار کیمسلر وجوده کتیرلمش
اولدی .

* *

کریمه مکرمه جناب رسالتپناهی « زینب » رضی الله
تعالی عنها حضرتلریدخی ، زوجی « ابو العاص بن

الربيع « لك بدل اسارتی اولمق اوزره بوينده کی کردانلغی
چيقاروب مدينه يه کوندردی !

حالبوکه او کردانلق ، جناب زينب رضی الله تعالى
عنها حضرتلری ابو العاصه تزويج اولنديغی زمان
بوينه والده سی خديجة الكبرى رضی الله تعالى عنها
حضرتلری طاقش ایدی .

مشار اليها حضرتلرينك كريمة مكرمه لرينه بريادكار
قيمتدارى اولان کردانلغك ، بدل اسارت اوله رق
ميدانه چيقمش اولمى اصحاب كرامجه پك بيوك بر
تأثيرى موجب اولدقدن باشقه ذات على رسالتپناهى
افنديمزده صورت فوق العاده ده رقتلرني تحريك ايتمش
اولديغندن :

— « مناسب کورور ايسه كز زينبك اسيريني مجاناً

اطلاق و بدلنى ده اعاده ايديكز ! »
بيورلمش وبونك اوزرينه اصحاب كرام دخی اويله جه
يا پمشلردر .

لكن حضرت پيغمبر افنديمزه ابو العاصه :
— « يا ابا العاص ! سن كافر اولديغك ايچون قيزم
سكا حرامدر . اكر مسلمان اولور ايسه كينه سنده
قالسون ! والا قيزيمي بكا اعاده ايت ! »

بیوردیلر. ابو العاص ده :

— « يك اعلا ! »

دیمش بولندیقندن مکيه عودتده یاننه « زید بن حارثه »
رضی الله عنه حضرتلری ترفیق بیوریلر ق جناب
« زینب » رضی الله عنها حضرتلری مدینهیه جلب
ایتدیرلمشدر . [۱]

* *

اسرادن « ابو غرة الجمحی » نام شاعر هاجی - که
دین و اهل اسلام علیهنده کی هجو یاتی چوق ، شهرندن
باشقه النده سرمایه سی یوق بر حریف بدر زبان ایدی -
فیما بعد اهل اسلام علیهنده سوز سویله مامسی شرطیله
بلا بدل اطلاق ایدلدی .

کذلک « مطلب بن حنطب » ایله « صفی بن رفاعه »
ده مجاناً اطلاق ایدلمشدر !

*

* *

[۱] ابو العاص ، تاریخ هجرتک التنجی سنه سی خلال
شهر جمادی الاولی سنده قریشک « عیص » نام محله « زید
بن حارثه » حضرتلری ومعیق طرفندن. اخذ واغتنام ایدیلا
قافله ده کی اموالیه برابراسیر ایدلمشدی . اوزمان دین مبین اسلامی
ارتق قبول ایتدیکندن جناب رسول مکرم صلی الله علیه وسلم
اندیمز حضرتلری کریمه مکرمه لری « زینب » حضرتلرینی ینه
اکا ویرمشدر .

رئيس قافله ابو سفيانك فريادجيسى «ضمضم بن عمرو الغفارى» نام شخصك مكديه يتشديكى زمان وقوعادن خبر الهرق سوقاقلره دوشوب مكه اهاليستك اهل اسلام عليهنده تشديد حركاتى ايچون باغيره باغيره كزمش اولان خطيب شهير «سهيل بن عمرو» اسرا ايچنده بولنديغندن حضرت عمر الفاروق افنديمز :

— «يار رسول الله ! سهيل بن عمرو بكا براق كه انك اولك ديشلرينى چكوب چيقاريم . تاكه بردها سنك عليهنده بويله خطابت ايتيه»

ديديكى حالده حضرت پيغمبر افنديمز اكا جواب رد اوله رق :

— «يا عمر ! سن انى براق ! سهيل ، بروقت اويله بر مقامه قائم اوله جقدركه حقنده مدح و ثنا ايدء جكسك»
بيور مشلردى !

معجزات احديه دندر كه سهيل ، فتح مكه دن صوكره دين مبن اسلامى قبول ايتدكارى حالده وفات نبوى عقيبنده اهل مكه دن رده ميل ايدن چوق كيمسه لرى بالالزام مؤثر خطب بليغه سيله ارتداددن منع ايله مشدر !

*

**

مکده خبر هزیمت — بدر انزامنده بقیه .
 السیوف ، واقع اولان انزام خبرینی تبلیغ ایتک اوزره
 « حسان بن جابر » نام کیسه یی مکده کوندر مشردی .
 مکده رؤسای قریشدن اوله رق قالان « صفوان
 بن امیه ، طالب بن ابی لهب ، ابو لهب بن عبدالمطلب »
 نام اوچ شخص ، حرم شریف کعبده اوطورورلرکن
 حسان ، واروب انلر پیام هزیمتی تبلیغ ایتدی ؛ قوه
 عسکریه مشرکینه نسبتاً مهمات حربیه سنی پک کوچوک
 کوردیکی اهل اسلامک غلبه سنه بردن بره اینانه میان
 صفوان :

— « بهی آدم ! سن دلمی اولدک ؟ نه سویلیورسک »
 دیه طورور ایکن حسان :

— « بنی مسخره می ایدیورسک ؟ والله باباک » امیه
 ایله قرنداشک « علی » بی دخی اولدیر دیلر !
 جوانی ویرمشدی !

بوجوابه قارشى صفوانک چیقاردیغی نالش سوزناک
 صحت خبر هزیمته یقین واطمئنان حاصل ایله دیکنه ارتق
 دلیل ایدی .

بقية السيوف اولان افراد ، صورت خابانه
 وخاسرانه ده برر برر كلوب مكه يي بولمش وهزيمت
 قریش مكه اهالي سي دي لرنده داستان اولمش كيتمش ايدي .
 هر بر مجلسده بو هزيمت حقنده بيك درلو لاف كذاف
 سويلنير ايدي .

*

* *

فوت ابي لهب — قریش افراد عسكريه سنك

منهزماً مواصلي كونلرندن برنده عباسك زوجه سي
 « ام الفضل » ، واسلامني كيزلي طوتان كوله سي « ابو
 رافع » رضی الله تعالى عنه حضرتلرينك حاضر بولندقلري
 بر مجلسده ، بدر وقعه سي هزيمتنده بولمش اولان « ابو
 سفیان بن الحرث بن عبدالمطلب » دن ابوله ب ، كيفيت
 و صورت وقوع هزيمتي صور مشدي . حريف جوابنده :
 — « والله بيلم ناصل اولدي ؟ محمديلره ملاقي
 اولديغيمزده ارقه مزي انلره تسليم ايتدك . انلر ايسته .
 دكلريني قتل ، ايسته دكلريني ده اسير اينديلر . لكن بزم
 افراد عسكريه مزي ده تعييب ايتيم . زيرا اسلام اردوسنده
 ابلق آتله بولمش بر آلاي سوا ري وار ايدي . ايسته

او سواری آلابی بتون عسکر لریمزی برباد ایدیور ایدی.
مقاومت ایسه ممکن دکلدی .

دیدى .

بو جوابی دقتلی ، دقتلی دیکله مش اولان جناب
ابو رافع ، منسوبیتله متشرف و مفتخر اولدیغی دین
اسلامك سطوت و شوکت دشمن شکنانه سی حقنده کی
حسیات باطنیه سی اسلامیتی حسیله بالطبع بعض
تأثیرات خارجیه ایقاعنه میل ایدهرک مفتخرانه بر
وضع ایله :

— « ایشته او کوردیککز سواریلر ، ملائکه

ایدیله . »

دیورمش بولنجه شوکت اسلامیه نك هر دقیقه حاصل
ایله دیکنی کوردیکی وسعت وقوت حقنده کی حسیات
داخلیه سی کلی تأثیرات خارجیه ایقاعنه معکوساً میل
ایتمش بولنان ابو لهبده جناب ابی رافع حضرتلرینک
« ملائکه ایدی » سوزیله دین اسلامی لسان
ستایشه المش اولدیغنه حدت ایدهرک صحابی مشارالیه
شدتلی بر سله اورمشدر !

رؤسادن بولنان قوجه سی عباسك کوله سنه سله
اورولدیغی عباسك شان ریاستنه از چوق خلل ویره جك

رعايتسزلكلردن معدود حساب ايله يان « ام الفضل » ،
غيرته كلوب :

— « بچاره كوله يي ، افنديسي ميدانده يوق ديه
دوكيورسك آ »

ديدكدن صوكره همان الله الديغي برچادر ديركي ايله
ابولهيك قفاسنى ياردى .

نجوم وكهاته اعتبارى پك اشيرى اولوب احوال
آيه لريني او علوم غريبه لرندن استنباط واستخراج
ايله گلش وسيف قهر وجلادتلرى ، زعم باطلارنجيه
احماى دين اسلامه كافى وكافل بولمش ! اولان مشركين
قريش خواص وعوامندن مركب قوجه بر اردونك
بردنبره دوچار اولديغي هزيمتى وكنديسنك ام الفضل
كبي بر قادين نندن اوغراديغي ذل وحقارتى . « دين
اسلامدن باشقه اولان اديان سائر و اصحابنك صوك
ايام نحس اضمحلاللرى يا قلاشمش وطالع سعد سعادتلرى
افول اولمش ! » معناسنى افهام ايله ديكنندن متعصب
ابولهب ، ايشك اساس اولان بورالرينى ملاحظه ايله
حاصل ايله ديكي تاثيرات وتأسفاته ام الفضلك حقارتى
منضم اولنجه عكسنه يعنى مشركين قريش افكارينك
عليه دونمكه باشلامش — كوردىكي فلكه فنا حالده

کوسه رك خسته لشمش وبر قايح کون ظرفنده شیشوب
فوت وهلاك اولمشدر .

لكن « اميه بن خلف » ناصل كه زرهی ایچنده
شیشدیه بوده بعینه اویله شیشدی ! حتی هم ده غایت
مستکره بر قوقو دخی پیدا ایلهدیکندن لاشه سنی
قالدیر مغه کیمسه یانه کیره مدیکچون اوغلی « عتبه »
روایت کوره خانه یی لاشه نك اوستنه یقوب اوصورتله
دفن ایله مشدی .

* *

اسلام عمیرو بن وهب — بدر هزیمتندن براز
مؤخر ایدی که وقعه مذکورده اسیر ویرمش اولان
مشرکیندن « عمیر یاخود عمیرو بن وهب الجمحی » نام شخص
ایلله رؤسای مشرکیندن « صفوان بن امیه » ، برکون
مکه ده قونوشور لرکن صفوانك :
— « بدر هزیمتندن صوکره حیاتم زده ارتق خیر
قالدی ! »

دیمسی اوزرینه عمیر اکا جواباً :

— « آه اکر بورجم و برده عیالم اولسه مدینه یه
کیدر ومحمد [علیه الصلوة والسلام] ی اولدیرردم »

دیمش و صفوان بیوک بر ممنونیتی ایما ایدر وضع ایله :
 — « اوله ایسه بن سنک هم بورجکی تأدیه ، هم ده
 عیالکی اداره ایتکی تعهد ایدرم »

دیدیکندن عیرو همان حاضرلنوب مدینه یوللا مشدر .
 لکن اوزمان بوتشبدن حضرت جبریل علیه السلام ،
 ذات عالی رسالتیناهی بی خبردار ایله مشدی .

عیرو مدینه واروبده با اراده سنیة پیغمبری
 حضور پر نور احیدیه شرف مشوله نائل اولدقدن صوکره
 سبب حرکت و مجیئتی سؤال بیورولدی . او :
 — « اسیر اولان اوغلی المغه کلدیم »

دیمک ایسته دیکی حالده سویله یه میوب دیلی طوتیله
 قالدی !

ذات عالی نبوی ، دوام ایدرک :
 — « اکر بن سنک نیچون کلدیککی سویلر سه م سن
 دین اسلامی قبول ایدر میسک ؟ »
 بیوردیفتدن عیرو ، اکا جوابده :
 — « اوت قبول ایدرم »
 دیمکله سید الانام افندیمر :

— « صفوان سنک بورجکی ادا ، عیالکی اتفاق

و اداره ایتک ، سنده اکا مقابل بنی اولدیر ملک شرطیه
مدینه کلدکی ؟
دیشلر !

عبرو ، بو سوزه قارشی پک زیاده سیله متحیر اولمش
مع مافیه :

— « یار رسول الله ! او مذاکره بنله صفواندن
باشقه سنک وقوفی یوغیدی ! »
دیه فوق العاده اولان حیرت و تعجبی میدان قویقدن
صوکره :

— « بن شهادت ایدرم که سن حقلک صادق
رسولیسک »

دیه رک دین مبین اسلامی همان قبول ایدیور مشدر .
رضی الله عنه !

مشارالیه دین اسلامی بر کوره اولوجهله قبول
ایدنجه اسیر اولان اوغلی اول کندیسنه تسلیم ایدلمش
وبعد کندیسی مکده خلق خفیا دینه دعوت ایتک
اوزره وطننه اعاده کوندرلمش و اوراده پک چوق
خلقلک قبول اسلامنه سببده اولمشدر .

ظهور تفاق — بدر مظفریت عظیمہ اسلامیہ سی

اوزربنه دین اسلام یک زیاده شهرت وقوت بولش
اولدینگی حکمتنه بناء اعدای دینک ، دین واهل اسلامه
قارشی کوزلری فنا حالده ییلشدی .

حتی مدینه حوالیسندہ کی قبائل یہود : [بعثت
علیہ سی تورائده مذکور ومبشر اولان نبی اخر الزمان ،
ایشته بو ذاندر] دیہ ارتق صدق نبوت وصحت
بعثت رسالت احدیہ یقین وقناعت حاصل ایتمک
جهتنه میل الہ دیلر . واولوقته دکین ایمان ایده مامش
اولان کفرۂ یہود وعربدن بعض افراد ، نبی ذیشانک
صدق نبوتلرینہ ارتق جداً ایمان ایتمش ، بعضی ده
ظاہراً دائرۂ اسلامه کیرمش یعنی مسلمان اولمش
کوروندی !

لکن ایشته بو وجهله اهل اسلام افرادی ارہ سندہ
وجوار مدینہ اہالیسی بینندہ « کعب بن اشرف ، سلام
ابن ابی حقیق ، عبد اللہ بن ابی بن سلول » کبی بر
چوق ارباب شقاق ونفاق ده وجوده کلش اولدی .
حتی بدر مظفریت اسلامیہ سنی تبشیر ایچون طرف

ذیشرف پیغمبریدن مدینه یه مژده جی اوله رق کوند ریلان
 « زید بن حارثه و عبد الله بن رواحه » رضی الله تعالی
 عنهما حضرتلرینک مظفریت اسلامیہ بشارت عظماسنی
 اهل مدینه یه تبشیر ایله دکرینه مقابل کبار رؤسای
 مشرکین یهوددن « کعب بن اشرف » ، هزیمت قریشیه-
 دن طولای مشرک کردن دها زیاده کنیدیسی غمکین کو-
 رینوب قریشک اوغرا دیغی مصیبت انہزامیہ دن طولای
 اهل اسلام علیهنده مشرکینک غیرت وحدتی تیج
 ایتک اوزره :

طخت رچی بدر مهالك اهله

ولمثل بدر تستهل وتد مع

قتلت سراة الناس حول حياضهم

لاتبعدوا ان الملوك تصرع

کبی بیتلری حاوی نشاند مخصوصه سویله دکن وخلق
 دین اسلامدن تنفیر ایده جک معامله لره جسارت برله
 اهل اسلامه قارشى انواع ترهات صرفندن صوکره
 رؤسای یهوددن « حی بن اخطب » کبی یتش نفر
 رفیق ایله برابر همان مکّه یه کیدوب « مطلب بن وداعة
 السهمی » نك خانه سنده رئیس المشرکین ابو سفیان ایله

باشقه دای زاده لری « عتبه بن ربیعہ » ایله « شیبہ بن ربیعہ » نكده اوراده بولند قلری خبری ویرلمش اولدیغندن « اکر محمد ، حق پیغمبر اولسیدی اقرباسنی اولدیرمز . دی » دیدکن صوکره قویونک کنارینه واروب انلرک مرثیه لری اولق اوزره بر اوزون هزیان سویله مش وعقیننده کندیسیده منزل کزین دار عذاب اولمشدر .

*

**

« امیه » نك وفاتندن صوکره همشیره سی « فارعه » ، بر زمان حضور عالی رسالت پناهی به کلدی . ذات عالی پیغمبری ، اکا برادرینک کیفیت وفاتندن سؤال بیوردی . اوده جوابنده دیدی که :

— « برکون امیه او یویور ایدی . ایکی شخص کلهرک خانه نك سققمندبری ایچری به کیردیله . بری امیه نك باشی اوچنده ، دیگرى ایاغی طرفنده اولق اوزره یاننه او طور دیله . باشی اوچنده بولنان شخص ، ایاق طرفنده کی شخصه خطاباً :

— « اوعی ؟ »

دیدى . اوده یعنی ایاق طرفنده کی آدم :

— « وعی »

دیه جواب ویردی . بعده اویری :

— « از کا ؟ »

دیه صورتی . وقارشیسندہ کی رفیقندن :

— « ز کا »

جوانی الدی .

بن امیدہ بونلری صورتی اودہ :

— خیر اریدی »

دیه جواب ویردکن صوکرہ کوزلری یاشاروب

بعده غشی اولہ قاری . بر مدت صوکرہ افاقت

بولدقدہ :

کل عیش وان تطاول دهرأ

صائر امره الى ان تزولا

لیتنی کنت قبل ماقد بدالی

فی قلال الجبال ارعى الوعولا

ان یوم الحساب یوم عظیم

شاب فی الصغیر یوماً ثقیلاً

دیددی .

فارعه ، جوانی اولوجهله پیرنجه رسول اکرم

افندیمز :

— « ما اطيعه من شعر سألتك بالله ان تبشدي

شعراخيك »

بيورديغندن فارعه دخي اميه نك اشعارندن اولاً :

لك الحمد والنعماء والفضل ربنا

فلا شيء اعلى منك جداً واجمداً

ملك على عرش السماء مهيمن

لعزته تعنوا الوجوه وتسجد

قطعه سنی تلاوه واکا بر قاج ایاتی ده علاوه ایندی .

بعده رسول مکرم افندی مزامیه حقنده : [آمن

شعره و کفر قلبه] بیور دیلر .

تمت

— فهرست —

ضعیفه

محرر ك افاده تشكریه سی ۱۵

فصل اول

مقدمات تاریخیه و احوال ارضیه عربستان	۲۶
سکنه عربستان	۲۸
جزیره العربك احوال سیاسیه سی	۳۱
استطراد و امری القیس	۵۱
احوال دینی و مذهبی سی	۵۶
استطراد و « خنظله بن صفوان »	۵۷
ذو القرنین	۶۹
فترت و « خالد بن سنان العبسی »	۷۳
قس بن ساعده	۷۸
تمه مقدمات	۸۶

فصل ثانی

مصحفه	
۹۰	شیدیه و عبد المطلب
۹۵	کشف بئر زمزم
۱۰۹	وقعهٔ فیل و ابرهه الاشرم
۱۲۵	مولد جلیل پیغمبری
۱۳۸	رضاع پیغمبری
۱۴۱	انشقاق صدر
۱۴۶	فوت آمنه
۱۴۷	سیف بن ذی الیزنک تنبیهات و تبشیراتی
۱۵۸	رمد پیغمبری و قعه سی
۱۶۰	فوت عبد المطلب
۱۶۲	شام سفری و بحیرا
۱۶۹	ازدواج نبوی
۱۷۶	تعمیر کعبه معظمه

فصل ثالث

۱۸۶	ابتدای نزول وحی الهی
-----	----------------------

صحیفه

وقوع رسالت احدیه	۱۹۶
سابقین اسلام	۱۹۷
اسلام ابی بکر رضی الله عنه	۲۰۱
اسلام علی کرم الله وجهه	۲۰۹
اعلان دعوت و اذیات کفار	۲۱۲
استطراد و نذر نبوی	۲۲۱
مسئلتک حبشه هجرتی	۲۳۴
اسلام حمزه رضی الله عنه	۲۴۴
اسلام عمر رضی الله عنه	۲۴۸
انشقاق قر ، قطیعه رحم	۲۶۱
اعجاز قرآن	۲۶۷
فسخ حکم عهد	۲۷۵
سنة الحزن و فوت خدیجه و ابی طالب	۲۸۰
طائفه عزیمت احدیه	۲۸۶
ازدواج نبوی با عائشه و سوده	۲۹۹
معراج قدسیت منهاج پیغمبری	۳۰۱
عقبات بیعتناری	۳۲۳
اسلام اسید بن حضیر	۳۲۹
اسلام سعد بن معاذ	۳۳۱

فصل رابع

« برنجی سنه هجریه وقایعی »

صحیفه	
مقدمات هجرت	۳۳۹
وقعه غار و تحریات کفار	۳۴۲
تعقیبات کفار و بعض خوارق احادیث	۳۵۷
سراقه نك تعرضی	۳۶۱
قبایه مواصلت همایون و بناء مسجد شریف قبا	۳۶۹
منزل و مهماندار نبوی	۳۷۵
عبدالله بن سلامك اسلامی	۳۷۸
بناء مسجد شریف نبوی	۳۸۲
امر جهاد	۳۹۰
مواخات اصحاب	۳۹۳
اراجیف یهودیه	۳۹۵
مشروعیت اذان محمدی	۳۹۷


فصل خامس


« ایکنجی سنه هجریه وقایعی »

وقعه ابواء ۳۹۸

صيفه

وقعة بواط	٣٩٩
وقعة ذى العشيرة	٤٠٠
استطراد و ابو تراب	٤٠١
وقعة بدر اولى	٤٠٢
وقعة بطن نخله	٤٠٣
كعبة معظمه نك قبله كاه مسلمين اولديغي	٤٠٩
فرضيت صيام رمضان	٤١٠
غزوة بدر الكبرى	٤١١
غزوة قرقرة الكدر	٥١٦
غزوة بنى قينقاع	٥١٨
غزوة سويق	٥٢١
وجوب صلوات عيد اضحى ونحر	٥٢٤
ازدواج على	٥٢٥
فوت اميه بن ابى الصلت	٥٢٨





3 1761 07290930 2